

सिरि उसहदेवसामिस्स णमो । सिरि गोडी - जिराउला - सव्वोदयपासणाहाणं णमो । नमोऽत्थुणं समणस्स भगवओ महइमहावीर वद्धमाणसामिस्स । सिरि गोयम - सोहम्माइ सव्व गणहराणं णमो । सिरि सुगुरु-देवाणं णमो । **श्रीजीवाजीवाभिगमोपांगं** इह खलु जिणमयं जिणाणुमयं जिणाणुलोमं जिणप्पणीतं जिणपरुवियं जिणक्खायं जिणाणुचिन्नं जिणपण्णत्तं जिणदेसियं जिणपसत्थं अणुवीईए तं सद्दहमाणा तं पत्तियमाणा तं रोएमाणा थेरा भगवंतो जीवाजीवाभिगमणाममज्झयणं पण्णवइंसु । १। से किं तं जीवाजीवाभिगमे ?, २ दुविहे पं० तं०-जीवाभिगमे य अजीवाभिगमे य । २। से किं तं अजीवाभिगमे ?, २ दुविहे पं० तं०-रूविअजीवाभिगमे य अरूविअजीवाभिगमे य । ३। से किं तं अरूविअजीवाभिगमे ?, २ दसविहे पं० तं०-धम्मत्थिकाए एवं जहा पण्णवणाए जाव सेत्तं अरूविअजीवाभिगमे । ४। से किं तं रूविअजीवाभिगमे , २ चउव्विहे पं० तं०-खंधा खंधदेसा खंधप्पएसा परमाणुपोग्गला, ते समासतो पंचविहा पं० तं०-वण्णपरिणया गंधं० रसं० फासं० संठाणपरिणया, एवं ते जहा पण्णवणाए, सेत्तं रूविअजीवाभिगमे, सेत्तं अजीवाभिगमे । ५। से किं तं जीवाभिगमे ?, २ दुविहे पं० तं०-संसारसमावण्णगजीवाभिगमे य संसारसमावण्णगजीवाभिगमे य । ६। से किं तं असंसारसमावण्णगं० ?, २ दुविहे पं० तं०-अणंतरसिद्धासंसारसमावण्णगजीवाभिगमे य परंपरसिद्धासंसारसमावण्णगजीवाभिगमे य, से किं तं अणंतरसिद्धासंसारसमावण्णगजी वाभिगमे ?, २ पण्णरसविहे पं० तं०-तित्थसिद्धां० जाव अणेगसिद्धां०, सेत्तं अणंतरसिद्धां० । से किं तं परंपरसिद्धासंसारसमावण्णगजीवाभिगमे ?, २ अणेगविहे पं० तं०-पढमसमयसिद्धां० दुसमयसिद्धां० जाव अणंतसमयसिद्धां०, से तं परंपरसिद्धासंसारसमावण्णगजीवाभिगमे, सेत्तं असंसारसमावण्णगजीवाभिगमे । ७। से किं तं संसारसमावन्नजीवाभिगमे ?, संसारसमावण्णएसु णं जीवेसु इमाओ णव पडिवत्तीओ एवमाहिज्जंति, तं०-एगे एवमाहंसु-दुविहा संसारसमावण्णगा जीवा पं०, एगे एवमाहंसु-चउव्विहा संसारसमावण्णगा जीवा पं०, एगे एवमाहंसुपंचविहा संसारसमावण्णगा जीवा पं०, एतेणं अभिलावेणं जाव दसविहा संसारसमावण्णगा जीवा पं० । ८। तत्थ णं जे एवमाहंसु दुविहा संसारसमावण्णगा जीवा पं० ते एवमाहंसु, तं०-तसा चेव थावरा चेव । ९। से किं तं थावरा ?, २ तिविहा पं० तं०-पुढवीकाइया आउकाइया वणस्सइकाइया । १०। से किं तं पुढवीकाइया ?, २ दुविहा पं० तं०-सुहुमपुढविकाइया य बायरपुढविकाइया य । ११। से किं तं सुहुमपुढविकाइया ?, २ दुविहा पं० तं०-पज्जत्तगा य अपज्जत्तगा य । १२। तेसिं णं भंते ! जीवाणं कति सरीरया पं०, गो० ! तओ सरीरगा पं० तं०-ओरालिए तेयए कम्मए, तेसिं णं भंते ! जीवाणं केमहालिया सरीरोगाहणा पं० ?, गो० ! जहं० अंगुलासंखेज्जतिभागं उक्को० अंगुलासंखेज्जतिभागं, तेसिं णं भंते ! जीवाणं सरीरा किंसंघयणा पं० ?, गो० ! छेवट्टसंघयणा पं०, तेसिं णं भंते ! सरीरा किंसंठिया पं० ?, गोयमा ! मसूरचंदसंठिता पं०, तेसिं णं भंते ! जीवाणं कति कसाया पं० ?, गो० ! चत्तारि कसाया पं० तं०-कोहकसाए माणकसाए मायाकसाए लोहकसाए, तेसिं णं भंते ! जीवाणं कति सण्णाओ पं० ?, गो० ! चत्तारि सण्णाओ पं० तं०-आहारसण्णा जाव परिग्गहसन्ना, तेसिं णं भंते ! जीवाणं कति लेसाओ पं० ?, गो० ! तओ लेस्साओ पं० तं०-किण्हलेस्सा नीललेसा काउलेसा, तेसिं णं भंते ! जीवाणं कति इंदियाइं पं० ?, गो० ! एगे फासिंदिए पं०, तेसिं णं भंते ! जीवाणं कति समुग्घाया पं० ?, गो० ! तओ समुग्घाया पं० तं०-वेयणासमुग्घाते कसायसमुग्घाए मारणंतियसमुग्घाए, ते णं भंते ! जीवा किं सन्नी असन्नी ?, गो० ! नो सन्नी असन्नी, ते णं भंते ! जीवा किं इत्थिवेया पुरिसवेया णपुंसगवेया ?, गो० ! णो इत्थिवेया णो पुरिसवेया णपुंसगवेया, तेसिं णं भंते ! जीवाणं कति पज्जत्तीओ पं० ?, गो० ! चत्तारि पज्जत्तीओ पं० तं०-आहारपज्जत्ती सरीरं० इंदियं० आणापाणुपज्जत्ती, तेसिं णं भंते ! जीवाणं कति अपज्जत्तीओ पं० ?, गो० ! चत्तारि अपज्जत्तीओ पं० तं०-आहारअपज्जत्ती जाव आणापाणुअपज्जत्ती, ते णं भंते ! जीवा किं सम्मदिट्ठी मिच्छादिट्ठी सम्मामिच्छादिट्ठी ?, गो० ! णो सम्मदिट्ठी मिच्छादिट्ठी नो सम्मामिच्छादिट्ठी, ते णं भंते ! जीवा किं चक्खुदंसणी अचक्खुदंसणी ओहिदंसणी केवलदंसणी ?, गो० ! नो चक्खुदंसणी अचक्खुदंसणी नो ओहियदंसणी नो केवलदंसणी, ते णं भंते ! जीवा किं नाणी अण्णाणी ?, गो० ! नो नाणी अण्णाणी, नियमा

सौजन्य :- प.पू. विदुषी साध्वीश्री चाइलताश्रीजुनी प्रेरणाथी मुलुन्ड (पश्चिम) अचलगच्छ जैन समाज हस्ते धर्णिदराबेन (पाण्ड्रा)

दुअण्णाणी, तं०-मतिअन्नाणी य सुयअण्णाणी य, ते णं भंते ! जीवा किं मणजोगी वयजोगी कायजोगी ?, गो० ! णो मणजोगी नो वयजोगी कावजोगी, ते णं भंते ! जीवा किं सागारोवउत्ता अणागारोवउत्ता ?, गो० ! सागारोवउत्तावि अणागारोवउत्तावि, ते णं भंते ! जीवा किमाहारमाहारंति ?, गो० ! दव्वतो अणंतपदेसियाइं दव्वाइं खेत्तओ असंखेज्जपदेसोगाढे कालओ अन्नयरसमयद्वितीयाइं भावतो वण्णमंताइं गंधमंताइं रसमंताइं फासमंताइं, जाइं भावओ वण्णमंताइं आ० ताइं किं एगवण्णाइं आ० दुवण्णाइं० तिवण्णाइं आ० चउवण्णाइं आ० पंचवण्णाइं आ० ?, गो० ! ठाणमग्गणं पडुच्च एगवण्णाइंपि दुवण्णाइंपि तिवण्णाइंपि चउवण्णाइंपि पंचवण्णाइंपि आ०, विहाणमग्गणं पडुच्च कालाइंपि आ० जाव सुक्किलाइंपि आ०, जाइं वण्णओ कालाइं आ० ताइं० किं एगगुणकालाइं आ० जाव अणंतगुणकालाइं आ० ?, गो० ! एगगुणकालाइंपि आ० जाव अणंतगुणकालाइंपि आ० एवं जाव सुक्किल्लाइं, जाइं भावतो गंधमंताइं आ० ताइं किं एगगंधाइं आ० दुगंधाइं आ० ?, गो० ! ठाणमग्गणं पडुच्च एगगंधाइंपि आ० दुगंधाइंपि आ०, विहाणमग्गणं पडुच्च सुब्भिगंधाइंपि आ० दुब्भिगंधाइंपि आ०, जाइं गंधतो सुब्भिगंधाइं आ० ताइं किं एगगुणसुब्भिगंधाइं आ० जाव अणंतगुणसुरभिगंधाइंपि आ० ?, गो० ! एगगुणसुब्भिगंधाइंपि आ० जाव अणंतगुणसुब्भिगंधाइंपि आ०, एवं दुब्भिगंधाइंपि, रसा जहा वण्णा, जाइं भावतो फासमंताइं आ० ताइं किं एगफासाइं आ० जाव अट्ठफासाइं आ० ?, गो० ! ठाणमग्गणं पडुच्च नो एगफासाइं आ० नो दुफासाइं आ० नो तिफासाइं आ० चउफासाइं आ० पंचफासाइंपि जाव अट्ठफासाइंपि आ०, विहाणमग्गणं पडुच्च कक्खडाइंपि आ० जाव लुक्खाइंपि आ०, जाइं फासतो कक्खडाइं आ० ताइं किं एगगुणकक्खडाइं आ० जाव अणंतगुणकक्खडाइं आ० ?, गो० ! एगगुणकक्खडाइंपि आ० जाव अणंतगुणकक्खडाइंपि आ०, एवं जाव लुक्खा णेयव्वा, ताइं भंते ! किं पुट्ठाइं आ० अपुट्ठाइं आ० ?, गो० ! पुट्ठाइं आ० नो अपुट्ठाइं आ०, ताइं भंते ! किं ओगाढाइं आ० अणोगाढाइं आ० ?, गो० ! ओगाढाइं आ० नो अणोगाढाइं आ०, ताइं भंते ! किमणंतरोगाढाइं आ० परंपरोगाढाइं आ० ?, गो० ! अणंतरोगाढाइं आ० नो परंपरोगाढाइं आ०, ताइं भंते ! किं अणूइं आ० बायराइं आ० ?, गो० ! अणूइंपि आ० बायराइंपि आहारंति, ताइं भंते ! किं उड्ढं आ० अहे आ० तिरियं आ० ?, गो० ! उड्ढंपि आ० अहेवि आ० तिरियंपि आ०, ताइं भंते ! किं आइं आ० मज्झे आ० पज्जवसाणे आ० ?, गो० ! आदिंपि आ० मज्झेवि आ० पज्जवसाणेवि आ०, ताइं भंते ! किं सविसए आ० अविसए आ० ?, गो० ! सविसए आ० नो अविसए आ०, ताइं भंते ! किं आणुपुव्विं आ० अणाणुपुव्विं आ० ? गो० ! आणुपुव्विं आ० नो अणाणुपुव्विं आ०, ताइं भंते ! किं तिदिसिं आ० चउदिसिं आ० पंचदिसिं आ० छदिसिं आ० ?, गो० ! निव्वाघाएणं छदिसिं, वाघातं पडुच्च सिय तिदिसिं सिय चउदिसिं सिय पंचदिसिं, उस्सन्नकारणं पडुच्च वण्णतो कालाइं नीलाइं जाव सुक्किल्लाइं, गंधतो सुब्भिगंधाइं दुब्भिगंधाइं रसतो जाव तित्तमहुराइं, फासतो कक्खडमउयजावनिद्धलुक्खाइं, तेसिं पोराणे वण्णगुणे जाव फासगुणे विप्परिणामइत्ता परिपीलइत्ता परिसाडइत्ता परिविद्धंसइत्ता अण्णे अपुव्वे वण्णगुणे गंधगुणे जाव फासगुणे उप्पाइत्ता आतसरीरओगाढा पोग्गले सव्वप्पणयाए आहारमाहारंति, ते णं भंते ! जीवा कतोहिंतो उववज्जंति ? किं नेरइएहिंतो तिरिक्ख० मणुस्स० देवेहिंतो० ?, गो० ! नो नेरइएहिंतो० तिरिक्खजोणिएहिंतो० मणुस्सेहिंतो उववज्जंति नो देवेहिंतो०, तिरिक्खजोणियपज्जत्तापज्जत्तेहिंतो असंखेज्जवासाउयवज्जेहिंतो मणुस्सेहिंतो अकम्मभूमिगअसंखेज्जवासाउयवज्जेहिंतो उववज्जंति, वक्कंतीउववाओ भाणियव्वो, तेसिं णं भंते ! जीवाणं केवतियं कालं ठिती पं० ?, गो० ! जह० अंतोमुहुत्तं उक्को० अंतोमुहुत्तं, ते णं भंते ! जीवा मारणंतियसमुग्घातेणं किं समोहया मरंति असमोहया मरंति ?, गो० ! समोहयावि मरंति असमोहयावि मरंति, ते णं भंते ! जीवा अणंतरं उव्वट्ठित्ता कहिं गच्छंति कहिं उववज्जंति ?-किं नेरइएसु उववज्जंति तिरिक्खजोणिएसु उ० मणुस्सेसु उ० देवेसु उवव० ?, गो० ! नो नेरइएसु उववज्जंति तिरिक्खजोणिएसु उ० मणुस्सेसु उ० णो देवेसु उवव०, जइ तिरि० किं एगिंदिएसु उववज्जंति जाव पंचिदिएसु उ० ?, गो० ! एगिंदिएसु उववज्जंति जाव पंचेंदियतिरिक्खजोणिएसु उववज्जंति असंखेज्जवासाउयवज्जेसु पज्जत्तापज्जत्तएसु उव० मणुस्सेसु अकम्मभूमिगअंतरदीवगअसंखेज्जवासाउयवज्जेसु पज्जत्तापज्जत्तएसु उव०, ते णं भंते ! जीवा कतिगतिका कतिआगतिका पं० ?, गो० ! दुगतिया दुआगतिया परित्ता असंखेज्जा पं० समणाउसो !, सेत्तं सुहुमपुढविक्काइया । १३। से किं

तं बायरपुढवीकाइया, २ दुविहा पं० तं०-सण्हबायरपुढविकाइया य खरबायरपुढविकाइया य ।१४। से किं तं सण्हबायरपुढविकाइया ?, २ सत्तविहा पं० तं०-कण्हमत्तिया भेओ जहा पणवणाए जाव ते समासतो दुविहा पं० तं०-पज्जत्ता य अपज्जत्ता य, तेसिं पं भंते ! जीवाणं कति सरीरगा पं०, गो० ! तओ सरीरगा पं० तं०-ओरालिए तेयए कम्मए तं चेव सव्व नवरं चत्तारि लेसाओ अवसेसं जहा सुहुमपुढविकाइयाणं, आहारो जाव णियमा छदिसिं, उववातो तिरिक्खजोणियमणुस्सदेवेहिंतो देवेहिं जाव सोधम्मसाणेहिंतो, ठिती जह० अंतोमुहुत्तं उक्को० बावीसं वाससहस्साइं ते पं भंते ! जीवा मारणंतियसमुग्घाएणं किं समोहया मरंति असमोहता मरंति ?, गो० ! समोहतावि मरंति असमोहतावि मरंति, ते पं भंते ! जीवा अणंतरं उव्वट्ठित्ता कहिं गच्छंति कहिं उववज्जंति-किं नेरइएसु उववज्जंति० ? पच्छा, नो नेरइएसु उववज्जंति तिरिक्खजोणिएसु उववज्जंति मणुस्सेसु उव० नो देवेसु उव० तहेव जाव असंखेज्जवासाउवज्जेहिं, ते पं भंते ! जीवा कतिगतिया कतिआगतिया पं० ?, गो० ! दुगतिया तिआगतिया परित्ता असंखेज्जा पं० समणाउसो !, सेत्तं बायरपुढविकाइया, सेत्तं पुढवीकाइया ।१५। से किं तं आउक्काइया ?, २ दुविहा पं० तं०-सुहुमआउक्काइया य बायरआउक्काइया य, सुहुमआऊ० दुविहा पं० तं०-पज्जत्ता य, अपज्जत्ता य तेसिं पं भंते ! जीवाणं कति सरीरगा पं० ?, गो० ! तओ सरीरा पं० तं०-ओरालिए तेयए कम्मए जंचेव सुहुमपुढविकाइयाणं णवरं थिबुगसंठिता पं०, सेसं तं चेव जाव दुगतिया दुआगतिया परित्ता असंखेज्जा पं० सम०, सेत्तं सुहुमआ-उक्काइया ।१६। से किं तं बायरआउक्काइया ?, २ अणेगविहा पं० तं०-ओसा हिमे जाव जे यावन्ने तहप्पगारा०, ते समासतो दुविहा पं० तं०-पज्जत्ता य अपज्जत्ता य, तं चेव सव्वं णवरं थिबुगसंठिता, चत्तारि लेसाओ आहारो नियमा छदिसिं उववातो तिरिक्खजोणियमणुस्सदेवेहिं ठिती जह० अंतोमुहुत्तं उक्कोसं सत्त वाससहस्साइं सेसं तं चेव जहा बायरपुढवीकाइया जाव दुगतिया तिआगतिया परित्ता असंखेज्जा पं० समणाउसो !. सेत्तं बायरआऊ०. सेत्तं आउक्काइया ।१७। से किं तं वणस्सइकाइया ?, २ दुविहा पं० तं०-सुहुमवणस्सइकाइया य बायरवणस्सइकाइया य ।१८। से किं तं सुहुमवणस्सइकाइया ?, २ दुविहा पं० तं०-पज्जत्ता य अपज्जत्ता य तहेव णवरं अणित्थंत्थसंठिया दुगतिया दुआगतिया अपरित्ता अणंता, अवसेसं जहा पुढविकाइयाणं, सेत्तं सुहुमवणस्सइकाइया ।१९। से किं तं बायरवणस्सइकाइया ?, २ दुविहा पं० तं०-पत्तेयसरीरबायरवणस्सतिकाइया य साधारणसरीरबायरवणस्सइकाइया य ।२०। से किं तं पत्तेयसरीरबादरवणस्सतिकाइया ?, २ दुवालसविहा पं० तं०-रूक्खा गुच्छा गुम्मा लता य वल्ली य पव्वगा चेव । तणवलयरित्तओसहिजलरूहकुहणा य बोद्धव्वा ॥१॥ से किं तं रूक्खा ?, २ दुविहा पं० तं० एगट्ठिया य बहुवीया य, से किं तं एगट्ठिया ?, २ अणेगविहा पं० तं०-निंबंबजंबुजाव पुण्णागणागरूक्खे सीवणि तथा असोणे य । जे यावण्णे तहप्पगारा, एतेसिं पं मूलावि असंखेज्जजीविया एवं कंदा खंधा तथा साला पवालापत्ता पत्तेयजीवा पुप्फाइं अणेगजीवाइं फला एगट्ठिया, सेत्तं एगट्ठिया, से किं तं बहुबीया ?, २ अणेगविधा पं० तं०-अत्थियतंदुयउंबरकविट्ठे आमलकफणसदाडिमणग्गोधकाउंबरीयतिलयलउयलोद्धे धवे. जे यावण्णे तहप्पगारा, एतेसिं पं मूलावि असंखेज्जजीविंया जाव फला बहुबीयगा. सेत्तं बहुबीयगा, सेत्तं रूक्खा, एवं जहा पणवणाए तहा भाणियव्वं जाव जे यावन्ने तहप्पगारा०, सेत्तं कुहणा-‘नाणाविधसंठाणा रूक्खाणं एगजीविया पत्ता । खंधोवि एगजीवो तालसरलनालिएरीणं ॥२॥ जह सगलसरिसवाणं० पत्तेयसरीराणं० गाहा ॥३॥ जह वा तिलसक्कुलिया० गाहा ॥४॥ सेत्तं पत्तेयसरीरबायरवणस्सइकाइया ।२१। से किं तं साहारणसरीरबादरवणस्सइकाइया ?, २ अणेगविधा पं० तं०-आलुए मूलए सिंगबेरे हिरिलि सिरिलि सिस्सिरिलि किट्ठिया छिरिया छिरियविरालिया कण्हकंदे वज्जकंदे सूरणकंदे खल्लुडे किमिरासि भद्दे मोत्था पिंडहलिदा लोहारी णीहू थिभु अस्सकणी सीहकनी सीउंडी मुसंडी जे यावण्णे तहप्पगारा०, ते समासओ दुविहा पं० तं०-पज्जत्ता य अपज्जत्ता य तेसिं पं भंते ! जीवाणं कति सरीरगा पं० ?, गो० ! तओ सरीरगा पं० तं०-ओरालिए तेयए कम्मए तहेव जहा बायरपुढवीकाइयाणं, णवरं सरीरोगाहणा जह० अंगुलस्स असंखेज्जतिभागं उक्को० सातिरेगजोयणसहस्सं सरीरगा अणित्थंत्थसंठिता ठिती जह० अंतोमुहुत्तं उक्को० दसवाससहस्साइं जाव दुगतिया तिआ० अपरित्ता अणंता पं०. सेत्तं बायरवणस्सइकाइया. सेत्तं थावरा ।२२। से किं तं तसा ?, २ तिविहा पं० तं०-

तेउक्काइया वाउक्काइया ओराला तसा पाणा ।२३। से किं तं तेउक्काइया ?, २ दुविहा पं० तं०-सुहुमतेउक्काइया य बादरतेउक्काइया य ।२४। से किं तं सुहुमतेउक्काइया ? । २ जहा सुहुमपुढविकाइया नवरं सरीरगा सूइकलावसंठिया एगगइया दुआगइआ परित्ता असंखेज्जा पं०, सेसं तं चेव, सेत्तं सुहुमतेउक्काइया । २५ । से किं तं बादरतेउक्काइया ?, २ अणेगविहा पं० तं०- इंगाले जाले मुम्मुरे जाव सूरकंतमणिनिस्सिते, जे यावन्ने तहप्पगारा०, ते समासतो दुविहा पं० तं० पज्जत्ता य अपज्जत्ता य तेसिं णं भंते ! जीवाणं कति सरीरगा पं० ?, गो० ! तओ सरीरगा पं० तं० ओरालिए तेयए कम्मए सेसं तं चेव सरीरगा सूइकलावसंठिता तिन्नि लेस्सा ठिती जह० अंतोमुहुत्तं उक्को० तिन्नि राइंदियाइं तिरियमणुस्सेहिंतो उववाओ सेसं तं चेव एगगतिया उवागतिया परित्ता असंखेज्जा पं०, सेत्तं तेउक्काइया ।२६। से किं तं वाउक्काइया ?, २ दुविहा पं० तं० सुहुमवाउक्काइया य बादरवाउक्काइया य, सुहुमवाउक्काइया जहा तेउक्काइया णवरं सरीरा पडागसंठिता एगगतिया दुआगतिया परित्ता असंखिज्जा. सेत्तं सुहुमवाउक्काइया । से किं तं बादरवाउक्काइया ?, २ अणेगविधा पं० तं०-पाईणवाए पडीणवाए०. एवं जे यावण्णे तहप्पगारा०. ते समासतो दुविहा पं० तं०-पज्जत्ता य अपज्जत्ता य, तेसिं णं भंते ! जीवाणं कति सरीरगा पं० ?, गो० ! चत्तारि सरीरगा पं० तं०-ओरालिए वेउव्विए तेयए कम्मए. सरीरगा पडागसंठिता, चत्तारि समुग्घाता-वेयणासमुग्घाए कसायसमुग्घाए मारणंतियसमुग्घाए वेउव्वियसमुग्घाए. आहारो णिव्वाघातेणं छद्दिसिं वाघायं पडुच्च सिय तिव्दिसिं सिय चउदिसिं सिय पंचदिसिं, उववातो देवमणुयनेरइएसु णत्थि. ठिती जह० अंतोमुहुत्तं उक्को० तिन्नि वाससहस्साइं, सेसं तं चेव एगगतिया दुआगइया परित्ता असंखेज्जा पं० समणाउसो !, सेत्तं बायरवाऊ. सेत्तं वाउक्काइया ।२७। से किं तं ओराला तसा पाणा ? । २ चउव्विहा पं० तं०-बेइंदिया तेइंदिया चउरिंदिया पंचेंदिया ।२८। से किं तं बेइंदिया ?, २ अणेगविधा पं० तं०-पुलाकिमिया जाव समुद्धलिक्खा जे यावण्णे तहप्पगारा०, ते समासतो दुविहा पं० तं०-पज्जत्ता य अपज्जत्ता य, तेसिं णं भंते ! जीवाणं कति सरीरगा पं० ?, गो० ! तओ सरीरगा पं० तं०-ओरालिए तेयए कम्मए, तेसिं णं भंते ! जीवाणं केमहालिया सरीरओगाहणा पं० ?, जह० अंगुलासंखेज्जभागं उक्को० बारस जोयणाइं छेवट्ठसंघयणी हुंडसंठिता चत्तारि कसाया चत्तारि सण्णाओ तिण्णि लेसाओ दो इंदिया, तओ समुग्घाता-वेयणा० कसाय० मारणंतिय०, नो सन्नी असन्नी णपुंसकवेदगा पंच पज्जत्तीओ पंच अपज्जत्तीओ सम्मदिट्ठीवि मिच्छादिट्ठीवि नो सम्मामिच्छादिट्ठी णो चक्खुदंसणी अचक्खुदंसणी णो ओहिदंसणी नो केवलदंसणी, ते णं भंते ! जीवा कि णाणी अण्णाणी ?, गो० ! णाणीवि अण्णाणीवि, जे णाणी ते नियमा दुण्णाणी, तं०-आभिणिबोहियणाणी य सुयणाणी य, जे अन्नाणी ते नियमा दुअण्णाणी-मतिअण्णाणी य सुयअण्णाणी य, नो मणजोगी वइजोगी कायजोगी सागारोवउत्तावि अणागारोवउत्तावि आहारो नियमा छद्दिसिं उववातो तिरियमणुस्सेसु नेरइयदेवअसंखज्जवासाउयवज्जेसु ठिती जह० अंतोमुहुत्तं उक्को० बारस संवच्छराणि समोहतावि मरंति असमोहतावि मरंति, कहिं गच्छंति ?, नेरइयदेवअसंखेज्जवासाउयवज्जेसु गच्छंति, दुगतिया दुआगतिया परित्ता असंखेज्जा, सेत्तं बेइंदिया ।२९। से किं तं तेइंदिया ?, २ अणेगविधा पं० तं०-ओवइया रोहिणीया हत्थिसोडा० जे यावण्णे तहप्पगारा०, ते समासतो दुविहा पं० तं०-पज्जत्ता य अपज्जत्ता, तहेव जहा बेइंदियाणं, नवरं सरीरोगाहणा उक्को० तिन्नि गाउयाइं तिन्नि इंदिया ठिई जह० अंतोमुहुत्तं उक्को० एगूणपण्णराइंदिया सेसं तहेव दुगतिया दुआगतिया, परित्ता असंखेज्जा पं०, से तं तेइंदिया ।३०। से किं तं चउरिंदिया ?, २ अणेगविधा पं० तं०-अंधिया पुत्तिया जाव गोमयकीडा जे यावण्णे तहप्पगारा०, ते समासतो दुविहा पं० तं०-पज्जत्ता य अपज्जत्ता य, तेसिं णं भंते ! जीवाणं कति सरीरगा पं० ?, गो० ! तओ सरीरगा पं० तं० चेव, णवरं सरीरोगाहणा उक्को० चत्तारि गाउयाइं, इंदिया चत्तारि चक्खुदंसणी अचक्खुदंसणी ठिती उक्को० छम्मासा, सेसं जहा बेइंदियाणं जाव असंखेज्जा पं०. से तं चउरिंदिया ।३१। से किं तं पंचेंदिया ? । २ चउव्विहा पं० तं०-णेरतिया तिरिक्खजोणिया मणुस्सा देवा ।३२। से किं तं नेरइया ?, २ सत्तविहा पं० तं०-रयणप्पभापुढवीनेरइया जाव अहेसत्तमपुढवीनेरइया, ते समासओ दुविहा पं० तं०-पज्जत्ता य अपज्जत्ता य, तेसिं णं भंते ! जीवाणं कति सरीरगा पं० ?, गो० ! तओ सरीरगा पं० तं०-वेउव्विए तेयए कम्मए, तेसिं णं भंते ! जीवाणं केमहालिया सरीरोगाहणा पं० ?, गो० ! दुविहा सरीरोगाहणा पं० तं०-भवधारणिज्जा य उत्तरवेउव्विया य, तत्थ णं जा सा भवधारणिज्जा सा जह०

अंगुलस्स असंखेज्जइभागो उक्को० पंचधणुसयाइं, तत्थ णं जा सा उत्तरवेउव्विया सा जह० अंगुलस्स संखेज्जतिभागं उक्को० धणुसहस्सं, तेसिं णं भंते ! जीवाणं सरीरा किंसंघयणी पं० ?, गोयमा ! छण्हं संघयणाणं असंघयणी, णेवट्ठी णेव छिरा णेव ण्हारू संघयणमत्थि, जे पोग्गला अणिट्ठा अकंता अप्पिया असुभा अमणुण्णा अमणामा ते तेसिं संघातत्ताए परिणमंति, तेसिं णं भंते ! जीवाणं सरीरा किंसंठिता पं० ?, गो० ! दुविहा पं० तं०-भवधारणिज्जा य उत्तरवेउव्विया य, तत्थ णं जे ते भवधारणिज्जा ते हुंडसंठिया, तत्थ णं जे ते उत्तरवेउव्विया तेवि हुंडसंठिता पं०, चत्तारि कसाया चत्तारि सण्णाओ तिण्णि लेसाओ पंचेंदिया चत्तारि समुग्घाता आइल्ला सन्नीवि असन्नीवि नपुंसकवेदा छप्पज्जत्तीओ छ अपज्जत्तीओ तिविधा दिट्ठी तिन्नि दंसणा णाणीवि अण्णाणीवि, जे णाणी ते नियमा तिन्नाणी, तं०-आभिणिबोहियणाणी सुतणाणी ओहिनाणी, जे अण्णाणी ते अत्थेगतिया दुअण्णाणी अत्थेगतिया तिअण्णाणी, जे दुअण्णाणी ते णियमा मइअण्णाणी य सुयअण्णाणी य, जे तिअण्णाणी ते नियमा मतिअण्णाणी य सुयअण्णाणी य विभंगणाणी य, तिविधे जोगे दुविहे उवओगे, छद्दिसिं आहारो ओसण्णकारणं पडुच्च वण्णतो कालाईं जाव आहारमाहारेंति, उववाओ तिरियमणुस्सेसु, ठिती जह० दसवाससहस्साइं उक्को० तिन्नीसं सागरोवमाइं, दुविहा मरंति उव्वट्ठणा भाणियव्वा जतो आगता णवरी संमुच्छिमपंचेंदियतिरिक्खजोणिया य गम्भवक्कंतियपंचिंदियतिरिक्खजोणिया य ।३३। से किं तं पंचेदियतिरिक्खजोणिया ?, २ दुविहा पं० तं०-संमुच्छिमपंचेंदियतिरिक्खजोणिया य गम्भवक्कंतियपंचिंदियतिरिक्खजोणिया य ।३४। से किं संमुच्छिमपंचेंदियतिरिक्खजोणिया ?, २ तिविहा पं० तं०-जलयरा थलयरा खहयरा ।३५। से किं तं जलयरा ?, २ पंचविधा पं० तं०-मच्छगा कच्छभा मगरा गाहा सुंसुमारा. से किं तं मच्छा ?, एवं जहा पण्णवणाए जाव जे यावण्णे तहप्पगारा०, ते समासतो दुविहा पं० तं०-पज्जत्ता य अपज्जत्ता य, तेसिं णं भंते ! जीवाणं कति सरीरगा पं० ?, गो० ! तओ सरीरया पं० तं०-ओरालिए तेयए कम्मए. सरीरोगाहणा जह० अंगुलस्स असंखेज्जतिभागं उक्को० जोयणसहस्सं छेवट्ठसंघयणी हुंडसंठिता, चत्तारि कसाया चत्तारि सण्णाओ, छ लेसाओ इंदिया पंच, समुग्घाता तिण्णि णो सण्णी असण्णी णपुंसकवेदा पज्जत्तीओ अपज्जत्तीओ य पंच दो दिट्ठीओ दो दंसणा दो नाणा दो अन्नाणा दुविधे जोगे दुविधे उवओगे आहारो छद्दिसिं, उववातो तिरियमणुस्सेहिंतो नो देवेहिंतो नो नेरइएहिंतो, तिरिएहिंतो असंखेज्जवासाउवज्जेहिंतो अकम्मभूमगअंतरदीवगअसंखेज्जवासाउवज्जेहिंतो मणुस्सेहिंतो, ठिती जह० अंतोमुहुत्तं उक्को० पुव्वकोडी, मारणंतियसमुग्घातेणं दुविहावि मरंति, अणंतं उव्वट्ठिता कहिं० ?, नेरइएसुवि तिरिक्खजोणिएसुवि मणुस्सेसुवि देवेसुवि, नेरइएसु रयणप्पहाए सेसेसु पडिसेधो. तिरिएसु सव्वेसु उववज्जंति संखेज्जवासाउएसुवि असंखेज्जवासाउएसुवि चउप्पएसु पक्खीसुवि, मणुस्सेसु सव्वेसु कम्मभूमीसु नो अकम्मभूमीएसु अंतरदीवएसुवि संखिज्जवासाउएसुवि असंखिज्जवासाउएसुवि, देवेसु जाव वाणमंतरा, चउगइया दुआगतिया परित्ता असंखेज्जा पं०, से तं जलयरसंमुच्छिमपंचेंदियतिरिक्खा ।३६। से किं तं थलयरसंमुच्छिमपंचेंदियतिरिक्खजोणिया ?, २ दुविहा पं० तं०-चउप्पयथलयरसंमुच्छिमपंचें० परिसप्पसंमु०, से किं तं थलयरचउप्पयसंमुच्छिम० ?, २ चउव्विहा पं० तं०-एगखुरा दुखुरा गंडीपया सणप्फया जाव जे यावण्णे तहप्पकारा०, ते समासतो दुविहा पं० तं०-पज्जत्ता य अपज्जत्ता य, तओ सरीरगा ओगाहणा जह० अंगुलस्स असंखेज्जइभागं उक्को० गाउयपुहुत्तं ठिती जह० अंतोमुहुत्तं उक्को० चउरासीतिवाससहस्साइं, सेसं जहा जलयराणं जाव चउगतिया दुआगतिया परित्ता असंखेज्जा पं०, सेत्तं थलयरचउप्पदसंमु०, से किं तं थलयरपरिसप्पसंमुच्छिमा ?, २ दुविहा पं० तं०-उरपरिसप्पसंमुच्छिमा भुयपरिसप्पसंमुच्छिमा, से किं तं उरपरिसप्पसंमुच्छिमा ?, २ चउव्विहा पं० तं०-अही अयगरा आसालिया महोरगा, से किं तं अही ?, २ दुविहा पं० तं०-दव्वीकरा मउलिणो य, से किं तं दव्वीकरा ?, अणेगविधा पं० तं०-आसाविसा जाव से तं दव्वीकरा, से किं तं मउलिणो ?, २ अणेगविहा पं० तं०-दिव्वा गोणसा जाव सेत्तं मउलिणो, सेत्तं अही, से किं तं अयगरा ?, २ एगागरा पं०, से तं अयगरा, से किं तं आसालिया ?, जहा पण्णवणाए, से किं तं आसालिया, से किं तं महोरगा ? जहा पण्णवणाए, से तं महोरगा जे यावण्णे तहप्पगारा०, ते समासतो दुविहा पं० तं०-पज्जत्ता य अपज्जत्ता य, तं चेव णवरि सरीरोगाहणा जह०

अंगुलस्सऽसंखेज्जभागं उक्को०जोयणपुहुत्तं ठिई जह० अंतोमुहुत्तं उक्को० तेवण्णं वाससहस्साइं सेसं जहा जलयराणं जाव चउगतिया दुआगतिया परित्ता असंखेज्जा, सेत्तं उरपरिसप्पा०, से किं तं भुयपरिसप्पसंमुच्छिमथलयरा ?, २ अणेगविधा पं० तं०-गोहा णउला जाव जे यावन्ने तहप्पकारा०, ते समासतो दुविहा पं० तं०-पज्जत्ता य अपज्जत्ता य, सरीरोगाहणा जह० अंगुलासंखेज्जं उक्को० धणुपुहुत्तं ठिती उक्को० बायालीसं वाससहस्साइं सेसं जहा जलयराणं जाव चउगतिया दुआगतिया परित्ता असंखेज्जा पं०, (सेत्तं भुयपरिसप्पसंमुच्छिमा, से तं थलयरा, से किं तं खहयरा ?, २ चउव्विहा पं० तं०-चम्मपक्खी लोमपक्खी समुग्गपक्खी विततपक्खी, से किं तं चम्मपक्खी ?, २ अणेगविधा पं० तं०-वग्गुली जाव जे यावन्ने तहप्पगारा०, से तं चम्मपक्खी, से किं तं लोमपक्खी ?, २ अणेगविधा पं० तं०-ढंका कंका जाव जे यावन्ने तहप्पकारा०, से तं लोमपक्खी, से किं तं समुग्गपक्खी ?, २ एगागारा पं० जहा पणवणाए, एवं विततपक्खीविजाव जे यावन्ने तहप्पगारा०, ते समासतो दुविहा पं० तं०-पज्जत्ता य अपज्जत्ता य, णाणत्तं सरीरोगाहणा जह० अंगुलअसं० उक्को० धणुपुहुत्तं ठिती उक्को० बावत्तरिं वाससहस्साइं सेसं जहा जलयराणं जाव चउगतिया दुआगतिया परित्ता असंखेज्जा पं०, सेत्तं) खहयरसंमुच्छिमतिरिक्खजोणिया, से तं संमुच्छिमपंचेंदियतिरिक्खजोणिया ।३७। से किं तं गब्भवक्कंतियपंचेंदियतिरिक्खजोणिया ?, २ ति विहा पं० तं०-जलयरा थलयरा खहयरा ।३८। से किं तं जलयरा ?, २ पंचविधा पं० तं०-मच्छा कच्छभा मगरा गाहा सुंसुमारा, सव्वेसिं भेदो भाणियव्वो जाव जे यावण्णे तहप्पकारा०, ते समासतो दुविहा पं० तं०-पज्जत्ता य अपज्जत्ता य, तेसिं णं भंते ! जीवाणं कति सरीरगा (१५१) पं० ?, गो० ! चत्तारि सरीरगा पं० तं०-ओरालिए वेउव्विए तेयए कम्मए, सरीरोगाहणा जह० अंगुलस्स असंखेज्ज० उक्को० जोयणसहस्सं, छव्विहसंघयणी पं० तं०-वइरोसभनारायसंघयणी उसभनाराय० नाराय० अब्दनाराय० की (प्र० खी) लिया० से (प्र० छे) वट्टसंघयणी, उव्विहसंठिता पं० तं०-समचउरंससंठिता णग्गोधपरिमंडल० साति० खुज्ज० वामन० हुंडसंठिता, कसाया सव्वे सण्णाओ ४ लेसाओ ६ पंच इंदिया पंच समुग्घाता आदिल्ला सण्णी नो असन्नी तिविधवेदा छ पज्जत्तीओ छ अपज्जत्तीओ दिट्ठी तिविधावि तिण्णि दंसणा, णाणीवि अण्णाणीवि जे णाणी ते अत्थेगतिया दुणाणी अत्थेगतिया तिन्नाणी जे दुन्नाणी ते नियमा आभिणिबोहियणाणी य सुतणाणी य जे तिन्नाणी ते नियमा आभिणिबोहियणाणी सुत० ओहियणाणी एवं अण्णाणीवि, जोगे तिविहे उवओगे दुविधे आहारो छदिसिं उववातो नेरइएहिं जाव अहेसत्तमा तिरिक्खजोणिएसु सव्वेसु असंखेज्जवासाउयवज्जेसु मणुस्सेसु अकम्मभूमगअंतरदीवगअसंखेज्जवासाउयवज्जेसु देवेसु जाव सहस्सारो ठिती जह० अंतोमुहुत्तं उक्को० पुव्वकोडी दुविधावि मरंति, अणंतरं उव्वट्ठित्ता नेरइएसु जाव अहेसत्तमा० तिरिक्खजोणियमणुस्सेसु सव्वेसु देवेसु जाव सहस्सारो चउगतिया चउआगतिया परित्ता असंखेज्जा पं०, से तं जलयरा ।३९। से किं तं थलयरा ?, २ दुविहा पं० तं०-चउप्पदा य परिसप्पा य, से किं तं चउप्पया ?, २ चउव्विधा पं० तं०-एगक्खुरा सो चेव भेदो जाव जे यावन्ने तहप्पकारा०, ते समासतो दुविहा पं० तं०-पज्जत्ता य अपज्जत्ता य, चत्तारि सरीर ओगाहणा जह० अंगुलस्स असंखेज्ज० उक्को० छ गाउयाइं ठिती उक्को० तिन्नि पलिओवमाइं नवरं उव्वट्ठित्ता नेरइएसु चउत्थपुढवीं गच्छंति सेसं जहा जलयराणं जाव चउगतिया चउआगतिया परित्ता असंखिज्जा पं०, से तं चउप्पया, से किं तं परिसप्पा ?, २ दुविहा पं० तं०-उरपरिसप्पा य भुयपरिसप्पा य, से किं तं उरपरिसप्पा ? तहेव आसालियवज्जो भेदो भाणियव्वा (चत्तारि) सरीरा ओगाहणा जह० अंगुलस्स असंखे० उक्को० जोयणसहस्सं ठिती जह० अंतोमुहुत्तं उक्को० पुव्वकोडी उव्वट्ठित्ता नेरइएसु जाव पंचमं पुढवीं ताव गच्छंति तिरिक्खजो० मणुस्सेसु सव्वेसु देवेसु जाव सहस्सारो सेसं जहा जलयराणं जाव चउगतिया चउआगइया परित्ता असंखेज्जा, से तं उरपरिसप्पा, से किं तं भुयपरिसप्पा ?, भेदो तहेव चत्तारि सरीरगा ओगाहणा जह० अंगुलासंखे० उक्को० गाउयपुहुत्तं ठिती जह० अंतोमुहुत्तं उक्को० पुव्वकोडी सेसेसु ठाणेसुजहा उरपरिसप्पा णवरं दोच्चं पुढवीं गच्छंति, से तं भुयपरिसप्पा, से तं थलयरा ।४०। से किं तं खहयरा ?, २ चउव्विहा पं० तं०-चम्मपक्खी तहेव भेदो ओगाहणा जह० अंगुलस्स असंखे० उक्को० धणुपुहुत्तं ठिती जह० अंतोमुहुत्तं उक्को० पलिओवमस्स असंखेज्जतिभागो सेसं जहा जलयराणं नवरं जाव तच्चं पुढवीं गच्छंति जाव से तं खहयरगब्भवक्कंतियपंचेंदियतिरिक्खजोणिया, से तं तिरिक्खजोणिया ।४१। से किं तं मणुस्सा ?,

२ दुविहा पं० तं०-संमुच्छिममणुस्सा य गब्भवक्कंतियमणुस्सा य, कहिं णं भंते ! संमुच्छिममणुस्सा संमुच्छंति ?, गो० ! अंतो मणुस्सखेत्ते जाव करंति, तेसिं णं भंते ! जीवाणं कति सरीरगा पं० ?, गो० ! तिन्नि सरीरगा पं० तं०-ओरालिए तेयए कम्मए, सेत्तं संमुच्छिममणुस्सा, से किं तं गब्भवक्कंतियमणुस्सा ?, २ तिवाहा पं० तं०-कम्मभूमया अकम्मभूमगा अंतरदीवगा एवं मणुस्सभेदो भाणियव्वो जहा पण्णवणाए तहा णिरवसेसं भाणियव्वं जाव छउमत्था य केवली य, ते समासतो दुविहा पं० तं०-पज्जत्ता य अपज्जत्ता य, तेसिं णं भंते ! जीवाणं कति सरीरा पं० ?, गो० ! पंच सरीरया पं० तं०-ओरालिए जाव कम्मए, सरीरोगाहणा जहन्नेणं अंगुलअसंखेज्ज० उक्को० तिण्णि गाउयाइं छच्चेव संघयणा छसंठाणा, ते णं भंते ! जीवा किं कोहकसाई जाव अकसाई ?, गो० ! सव्वेवि ते णं भंते ! जीवा किं आहारसन्नोवउत्ता जाव नोसन्नोवउत्ता ?, गो० ! सव्वेवि, ते णं भंते ! जीवा किं कण्हलेसा य जाव अलेसा ?, गो० ! सव्वेवि, सोइंदियोवउत्ता जाव नोइंदियोवउत्तावि, सव्वे समुग्घाता तं०-वेयणासमुग्घाते जाव केवलिसमुग्घाए, सन्नीवि नोसन्नी असन्नीवि इत्थिवेयावि जाव अवेदावि पंच पज्जत्तीओ पंच अपज्जत्तीओ तिवाहावि दिट्ठी चत्तारि दंसणा, णाणीवि अण्णाणीवि जे णाणी ते अत्थेगतिया दुणाणी अत्थेगतिया तिणाणी अत्थेगइया चउणाणी अत्थेगतिया एगणाणी जे दुणाणी ते नियमा आभिणिबोहियणाणी सुतणाणी य जे तिणाणी ते आभिणिबोहियणाणी य सुतणाणी य ओहिणाणी य अहवा आभिणिबोहियणाणी सुयनाणी मणपज्जवणाणी य जे चउणाणी ते णियमा आभिणिबोहियणाणी सुत० ओहि० मणपज्जवणाणी य जे एगणाणी ते नियमा केवलनाणी एवं अन्नाणीवि दुअन्नाणी तिअण्णाणी मणजोगीवि वइ० काय० अजोगीवि दुविहउवओगो आहारो छदिसिं उववातो नेरइएहिं अहेसत्तमवज्जेहिं तिरिक्खजोणिएहिं तो उववाओ असंखेज्जवासाउयवज्जेहिं मणुएहिं अकम्मभूमगअंतरदीवगअसंखेज्जवासाउयवज्जेहिं देवेहिं सव्वेहिं ठिती जह० अंतोमुहुत्तं उक्को० तिण्णि पलिओवमाइं दुविधावि मरंति उव्वट्ठित्ता नेरइयादिएसु जाव अणुत्तरोववाइएसु अत्थेगतिया सिज्झंति जाव अंतं करंति, ते णं भंते ! जीवा कतिगतिया कइआगइया पं० ?, गो० ! पंचगतिया चउआगतिया परित्ता संखिज्जा पं०, सेत्तं मणुस्सा ।४२। से किं तं देवा ?, २ चउव्विहा पं० तं०-भवणवई वाणमंतरा जोइसिया वेमाणिया, से किं तं भवणवासी ?, २ दसविधा पं० तं०-असुरा जाव थणिया से तं भवणवासी, से किं तं वाणमंतरा ?, २ देवभेदो सव्वो भाणियव्वो जाव ते समासतो दुविहा पं० तं०-पज्जत्ता य अपज्जत्ता य, तओ सरीरगा-वेउव्विए तेयए कम्मए, ओगाहणा दुविधा-भवधारणिज्जा य उत्तरवेउव्विया य, तत्थ णं जा सा भवधारणिज्जा सा जह० अंगुलस्स असंखेज्जभागं उक्को० सत्त रयणीओ उत्तरवेउव्विया जह० अंगुलस्स संखेज्जति० उक्को जोयणसयसहस्सं, सरीरगा छण्हं संघयणाणं असंघयणी णेवट्ठी णेव छिरा णेव ण्हारू नेव संघयणमत्थि, जे पोग्गला इट्ठा कंता जाव ते तेसिं संघायत्ताए परिणमंति, किंसंठिता ?, गोयमा ! दुविहा पं० तं०-भवधारणिज्जा य उत्तरवेउव्विया य, तत्थ णं जे ते भवधारणिज्जा ते णं समचउरंससंठिया पं०, तत्थ णं जे ते उत्तरवेउव्विया ते णं नाणासंठाणसंठिया पं०, चत्तारि कसाया चत्तारि सण्णा छ लेस्साओ पंच इंदिया पंच समुग्घाता सन्नीवि असन्नीवि इत्थिवेदावि पुरिसवेदावि नो नपुंसगवेदा, पज्जत्तीअपज्जत्तीओ पंच, दिट्ठी तिन्नि तिण्णि दंसणा, णाणीवि अण्णाणीवि, जे नाणी ते नियमा तिण्णाणी अण्णाणी भयणाए, दुविहे उवओगे तिविहे जोगे आहारो णियमा छदिसिं, ओसन्नकारणं पडुच्च वण्णतो हालिइसुक्किल्लाई जाव आहारमाहारंति, उववातो तिरियमणुस्सेसु ठिती जह० दस वाससहस्साइं उक्को० तेत्तीसं सागरोवमाइं दुविधावि मरंति उव्वट्ठित्ता नो नेरइएसु गच्छंति तिरियमणुस्सेसु जहासंभवं नो देवेसु गच्छंति दुगतिया दुआगतिया परित्ता असंखेज्जा पं०, से तं देवा, से तं पंचेदिया, सेत्तं ओराला तसा पाणा ।४३। थावरस्स णं भंते ! केवतियं कालं ठिती पं० ?, गो० ! जह० अंतोमुहुत्तं उक्को० बावीसं वाससहस्साइं ठिती पं०. तसस्स णं भंते ! केवतियं कालं ठिती पं० ?, गो० ! जह० अंतोमुहुत्तं उक्को० तेत्तीसं सागरोवमाइं ठिती पं०. थावरे णं भंते ! थावरत्ति कालतो केवच्चिरं होति ?. जह० अंतोमुहुत्तं उक्को० अणंतं कालं अणंताओ उस्सप्पिणीओ (ओसप्पिणीओ) कालतो खेत्ततो अणंता लोया असंखेज्जा पुग्गलपरियट्ठा ते णं पुग्गलपरियट्ठा आवलियाए असंखेज्जतिभागो. तसे णं भंते ! तसत्ति कालतो केवच्चिरं होति ?. जह० अंतोमुहुत्तं उक्को० असंखेज्जं कालं असंखेज्जाओ उस्सप्पिणीओ (ओसप्पिणीओ) कालतो खेत्ततो असंखेज्जा लोगा. थावरस्स णं भंते ! केवति कालं अंतरं होति ?. जहा तससंचिट्ठणाए.

तसस्स णं भंते ! केवतिकालं अंतरं होति ? . जह० अंतोमुहुत्तं उक्को० वणस्सइकालं . एसिं णं भंते ! तसाणं थावराणं य कतरे कतरेहिंतो अप्पा वा बहुया वा तुल्ला वा विसेसाहिया वा ? , गो० ! सव्वत्थोवा तसा थावरा अणंतगुणा . सेत्तं दुविधा संसारसमावण्णगा जीवा पं० ★★ ★ १४४॥ दुविहपडिवत्ती समत्ता १

॥★★★ तत्थ णं जे ते एवमाहंसु ति विधा संसारसमावण्णगा जीवा पं० ते एवमाहंसु तं०-इत्थी पुरिसा णपुंसका ॥४५॥ से किं तं इत्थीओ ? , २ ति विधाओ पं० तं०-तिरिक्खजोणिणीओ मणुस्सित्थीओ देवित्थीओ . से किं तं तिरिक्खजोणित्थीओ ? . २ ति विधाओ पं० तं०-जलयरीओ थलयरीओ खहयरीओ . से किं तं जलयरीओ ? . २ पंचविधाओ पं० तं०-मच्छीओ जाव सुंसुमारीओ . से किं तं थलयरीओ ? . २ दुविधाओ पं० तं०-चउप्पदीओ य परिसप्पीओ य . से किं तं चउप्पदीओ ? . २ चउव्विधाओ पं० तं०-एगखुरीओ जाव सणप्फईओ , से किं तं परिसप्पीओ ? . २ दुविहा पं० तं०-उरपरिसप्पीओ य भुजपरिसप्पीओ य . से किं तं उरपरिसप्पीओ ? . २ ति विधाओ पं० तं०-अहीओ अयगरीओ महोरगाओ , सेत्तं उरपरिसप्पीओ . से किं तं भुयपरिसप्पीओ ? . २ अणेगविधाओ पं० तं०-सेरडीओ सेरंधीओ गोहीओ णउलीओ सेधाओ सण्णाओ सरडीओ भावाओ खाराओ पवण्णाइयाओ चउप्पइयाओ मूसियाओ मुगुसियाओ घोरोलियाओ गोव्हियाओ जोव्हियाओ विरचिरालियाओ . सेत्तं भुयपरिसप्पीओ . से किं तं खहयरीओ ? , २ चउव्विधाओ पं० तं०-चम्मपक्खीओ जाव सेत्तं खहयरीओ . सेत्तं तिरिक्खजोणिणीओ . से किं तं मणुस्सीओ ? . २ ति विधाओ पं० तं०-कम्मभूमियाओ अकम्मभूमियाओ अंतरदीवियाओ , से किं तं अंतरदीवियाओ ? . २ अट्ठावीसतिविधाओ पं० तं०-एगूरुइयाओ आभासियाओ जाव सुद्धदंतीओ . सेत्तं अंतरदीवियाओ से किं तं अकम्मभूमियाओ ? . २ तीसविधाओ पं० तं०-पंचसु हेमवएसु पंचसु एरणवएसु पंचसु हरिवंसेसु पंचसु रम्मगवासेसु पंचसु देवकुरासु पंचसु उत्तरकुरासु , सेत्तं अकम्म० . से किं तं कम्मभूमिया ? , २ पण्णरसविधाओ पं० तं०-पंचसु भरहेसु पंचसु एरवएसु पंचसु महाविदेहेसु , सेत्तं कम्मभूमगमणुस्सीओ , सेत्तं मणुस्सित्थीओ । से किं तं देवित्थियाओ ? . २ चउव्विधा पं० तं०-भवणवासिदेवित्थियाओ वाणमंतरदेवि० जोतिसि० वेमाणिय० , से किं तं भवणवासिदेवित्थियाओ ? . २ दसविहा पं० तं०-असुरकुमारभवणवासिदेवित्थियाओ जाव थणित० , से तं भवणवासिदेवित्थियाओ . से किं तं वाणमंतरदेवित्थियाओ ? , २ अट्ठविधाओ पं० तं०-पिसायवाणमंतरदेवित्थियाओ जाव से तं वाणमंतरदेवित्थियाओ . से किं तं जोतिसियदेवित्थियाओ ? . २ पंचविधाओ पं० तं०-चंदविमाणजोतिसियदेवित्थियाओ सूर० गह० नक्खत्त० ताराविमाण० सेत्तं जोतिसित्थियाओ . से किं तं वेमाणियदेवित्थियाओ ? . २ दुविहा पं० तं०-सोहम्मकप्पवेमाण० ईसाणकप्पवेमाण० सेत्तं वेमाणित्थीओ ॥४६॥ इत्थी णं भंते ! केवतियं कालं ठिती पं० ? , गो० ! एगेणं आएसेणं जह० अंतोमुहुत्तं उक्को० पणपणं पलिओवमाइं एकेणं आदेसेणं जह० अंतोमुहुत्तं उक्को० णव पलिओवमाइं एगेणं आदेसेणं जह० अंतोमुहुत्तं उक्को० सत्त पलिओवमाइं एगेणं आदेसेणं जह० अंतोमुहुत्तं उक्को० पण्णासं पलिओवमाइं ॥४७॥ तिरिक्खजोणित्थीणं भंते ! केवतियं कालं ठिती पं० ? , गो० ! जह० अंतोमुहुत्तं उक्को० तिणि पलिओवमाइं , जलयरतिरिक्खजोणित्थीणं भंते ! केवइयं कालं ठिती पं० ? , गो० ! जह० अंतो० उक्को० पुव्वकोडी , चउप्पदथलयरतिरिक्खजोणित्थीणं भंते ! केवतियं कालं ठिती पं० ? , गो० ! जहा तिरिक्खजोणित्थीओ . उरपरिसप्पथलयरतिरिक्खजोणित्थीणं भंते ! केवतियं कालं ठिती पं० ? , गो० ! जह० अंतोमुहुत्तं उक्कोसं पुव्वकोडी . एवं भुयपरिसप्प० , एवं खहयरतिरिक्खित्थीणं जह० अंतोमुहुत्तं उक्को० पलिओवमस्स असंखेज्जतिभागो . मणुस्सित्थीणं भंते ! केवतियं कालं ठिती पं० ? , गो० ! खेत्तं पडुच्च जह० अंतो० उक्को० तिणि पलिओवमाइं धम्मचरणं पडुच्च जह० अंतो० उक्को० देसूणा पुव्वकोडी , कम्मभूमयमणुस्सित्थीणं भंते ! केवइयं कालं ठिती पं० ? , गो० ! खित्तं पडुच्च जह० अंतोमुहुत्तं उक्को० तिन्नि पलिओवमाइं धम्मचरणं पडुच्च जह० अंतोमुहुत्तं उक्को० देसूणा पुव्वकोडी , भरहेरवयकम्मभूमगमणुस्सित्थीणं भंते ! केवतियं कालं ठिती पं० ? , गो० ! खेत्तं पडुच्च जह० अंतोमुहुत्तं उक्को० तिन्नि पलिओवमाइं धम्मचरणं पडुच्च जह० अंतो० उक्को० देसूणा पुव्वकोडी पुव्वविदेहअवरविदेहकम्मभूमगमणुस्सित्थीणं भंते ! केवतियं कालं ठिती पं० ? , गो० ! खेत्तं

पडुच्च जह० अंतो० उक्को० पुव्वकोडी धम्मचरणं पडुच्च जह० अंतोमुहुत्तं उक्को० देसूणा पुव्वकोडी, अकम्मभूमगमणुस्सिस्थीणं भंते ! केवतियं कालं ठिती पं० ?, गो० ! जम्मणं पडुच्च जह० देसूणं पलिओवमं असंखेज्जतिभागऊणगं उक्को० तिन्नि पलिओवमाइं संहरणं पडुच्च जह० अंतोमुहुत्तं उक्को० देसूणा पुव्वकोडी हेमवएरणवए जम्मणं पडुच्च जह० देसूणं पलिओवमं पलिओवमस्स असंखेज्जइभागेण ऊणगं उक्को० पलिओवमं संहरणं पडुच्च जह० अंतोमुहुत्तं उक्को० देसूणा पुव्वकोडी, हरिवासरम्मयवासअकम्मभूमगमणुस्सिस्थीणं भंते ! केवइयं कालं ठिई पं० ?, गो० ! जम्मणं पडुच्च जह० देसूणाइं दो पलिओवमाइं पलिओवमस्स असंखेज्जतिभागेण ऊणयाइं उक्को० दो पलिओवमाइं संहरणं पडुच्च जह० अंतो० उक्को० देसूणा पुव्वकोडी, देवकुरूत्तरकुरूअकम्मभूमगमणुस्सिस्थीणं भंते ! केवतियं कालं ठिई पं० ?, गो० ! जम्मणं पडुच्च जह० देसूणाइं तिण्णि पलिओवमाइं पलिओवमस्स असंखेज्जतिभागेण ऊणयाइं उक्को० तिन्नि पलिओवमाइं संहरणं पडुच्च जह० अंतोमुहु० उक्को० देसूणा पुव्वकोडी. अंतरदीवगअकम्मभूमगमणुस्सिस्थीणं भंते ! केवतियं कालं ठिती पं० ?, गो० ! जम्मणं पडुच्च जह० देसूणं पलिओवमस्स असंखेज्जइभागं पलिओवमस्स असंखेज्जतिभागेण ऊणयं उक्को० पलिओवमस्स असंखेज्जइभागं संहरणं पडुच्च जह० अंतोमु० उक्को० देसूणा पुव्वकोडी, देवित्थीणं भंते ! केवतियं कालं ठिती पं० ?, गो० ! जह० दसवाससहस्साइं उक्को० पणपणं पलिओवमाइं, भवणवासिदेवित्थीणं भंते !० ?, जह० दसवाससहस्साइं उक्को० अब्धपंचमाइं पलिओवमाइं, एवं असुरकुमारभवणवासिदेवित्थियाए, नागकुमारभवणवासिदेवित्थि-याएवि जह० दसवाससहस्साइं उक्को० देसूणं पलिओवमं, एवं सेसाणवि जाव थणियकुमाराणं, वाणमंतरीणं जह० दसवाससहस्साइं उक्को० अब्धपलिओवमं, जोइसियदेवित्थीणं भंते ! केवइयं कालं ठिती पं० ?, गो० ! जह० पलिओवमअट्ठभागं उक्को० अब्धपलिओवमं पण्णासाए वाससहस्सेहिं अब्भहियं चंदविमाणजोतिसियदेवित्थियाए जह० चउभागपलिओवमं उक्को० तं चेव सूरविमाणजोतिसियदेवित्थियाए जह० चउभागपलिओवमं उक्को० अब्धपलिओवमं पंचहिं वाससएहिमब्भहियं गहविमाणजोतिसियदेवित्थीणं जह० चउभागपलिओवमं उक्को० अब्धपलिओवमं णक्खत्तविमाणजोतिसियदेवित्थीणं जह० चउभागपलिओवमं उक्को० चउभागपलिओवमं साइरेणं ताराविमाणजोतिसियदेवित्थियाए जह० अट्ठभागं पलिओवमं उक्को० सातिरेणं अट्ठभागपलिओवमं, वेमाणियदेवित्थियाए जह० पलिओवमं उक्को० पणपन्नं पलिओवमाइं, सोहम्मकप्पवेमाणियदेवित्थीणं भंते ! केवतियं कालं ठिती पं० ?, जह० पलिओवमं उक्को० सत्त पलिओवमाइं, ईसाणदेवित्थीणं० जह० सातिरेणं पलिओवमं उक्को० णव पलिओवमाइं ।४८। इत्थी णं भंते ! इत्थित्ति कालतो केवच्चिरं होइ ?, गो० ! एक्केणादेसेणं जह० एक्कं समयं उक्कोसं दसुत्तरं पलिओवमसयं पुव्वकोडिपुहुत्तमब्भहियं एक्केणादेसेणं जह० एक्कं समयं उक्को० अट्ठारस पलिओवमाइं पुव्वकोडिपुहुत्तमब्भहियाइं एक्केणादेसेणं जह० एक्कं समयं उक्को० चउइस पलिओवमाइं पुव्वकोडिपु० एक्केणादेसेणं जह० एक्कं समयं उक्को० पलिओवमसयं पुव्वकोडीपु० एक्केणादेसेणं जहण्णेणं एक्कं समयं उक्को० पलिओवमपुहुत्तं पुव्वकोडीपु०, तिरिक्खजोणित्थी णं भंते ! तिरिक्खजोणित्थित्ति कालओ केवच्चिरं होति ?, गो० ! जह० अंतोमुहुत्तं उक्को० तिन्नि पलिओवमाइं पुव्वकोडीपुहु० जलयरीए जह० अंतोमुहुत्तं उक्को० पुव्वकोडिपुहुत्तं, चउप्पदथलयरतिरिक्खित्थीणं० जहा ओहिता तिरिक्ख० उरपरिसप्पिभुयगपरिसप्पित्थीणं जधा जलयरीणं, खहयरि० जह० अंतोमुहुत्तं उक्को० पलिओवमस्स असंखेज्जतिभागं पुव्वकोडिपुहु०, मणुस्सिस्थी णं भंते ! कालओ केवच्चिरं होति ?, गो० ! खेत्तं पडुच्च जह० अंतोमुहुत्तं उक्को० तिन्नि पलिओवमाइं पुव्वकोडिपुहुत्तं० धम्मचरणं पडुच्च जह० एक्कं समयं उक्को० देसूणा पुव्वकोडी, एवं कम्मभूमियावि भरहेरयावि णवरं खेत्तं पडुच्च जह० अंतो० उक्को० तिन्नि पलिओवमाइं देसूणपुव्वकोडीअब्भहियाइं धम्मचरणं पडुच्च जह० एक्कं समयं उक्को० देसूणा पुव्वकोडी, पुव्वविदेहअवरविदेहित्थीणं खेत्तं पडुच्च जह० अंतो० उक्को० पुव्वकोडीपुहुत्तं धम्मचरणं पडुच्च जह० एक्कं समयं उक्को० देसूणा पुव्वकोडी, अकम्मभूमगमणुस्सिस्थीणं भंते ! अकम्मभूम० कालओ केवच्चिरं होइ ?, गो० ! जम्मणं पडुच्च जह० देसूणं पलिओवमं पलिओवमस्स असंखेज्जतिभागेणं ऊणं उक्को० तिण्णि पलिओवमाइं संहरणं पडुच्च जह० अंतो० उक्को० तिन्नि पलिओवमाइं देसूणाए पुव्वकोडीए अब्भहियाइं. हिमवतेरणवतअकम्मभूमगमणुस्सिस्थीणं भंते ! हेम० कालतो केवच्चिरं

होइ ?, गो० ! जम्मणं पडुच्च जह० देसूणं पलिओवमं पलिओवमस्स असंखेज्जतिभागेणं ऊणगं उक्को० पलिओवमं साहरणं पडुच्च जह० अंतोमु० उक्को० पलिओवमं देसूणाए पुव्वकोडीए अब्भहियं, हरिवासरम्मयअकम्मभूमगमणुस्सिस्थीणं भंते !० जम्मणं पडुच्च जह० देसूणाइं दो पलिओवमाइं पलिओवमस्स असंखेज्जतिभागेणं ऊणगाइं उक्को० दो पलिओवमाइं संहरणं पडुच्च जह० अंतोमु० उक्को० दो पलिओवमाइं देसूणपुव्वकोडिमब्भहियाइं, उत्तरकुरूदेवकुरूणं० जम्मणं पडुच्च जह० देसूणाइं तिन्नि पलिओवमाइं पलितोवमस्स असंखेज्जभागेणं ऊणगाइं उक्को० तिन्नि पलिओवमाइं संहरणं पडुच्च जह० अंतोमु० उक्को० तिन्नि पलिओवमाइं देसूणाए पुव्वकोडिए अब्भहियाइं, अंतरदीवगकम्मभूमगमणुस्सिस्थीणं० ?, जम्मणं पडुच्च जह० देसूणं पलिओवमस्स असंखेज्जतिभागं पलिओवमस्स असंखेज्जतिभागेणं ऊणं उक्को० पलिओवमस्स असंखेज्जतिभागं साहरणं पडुच्च जह० अंतोमु० उक्को० पलिओवमस्स असंखेज्जतिभागं देसूणाए पुव्वकोडीए अब्भहियं, देवित्थी णं भंते ! देवित्थित्ति कालं जच्चेव संचिद्धणा १४९। इत्थीणं भंते ! केवतियं कालं अंतरं होति ? गो० ! जह० अंतोमु० उक्को० अणंतं कालं वणस्सतिकालो, एवं सव्वासिं तिरिक्खित्थीणं, मणुस्सिस्थीए खेत्तं पडुच्च जह० अंतो० उक्को० वणस्सतिकालो धम्मचरणं पडुच्च जह० एकं समयं उक्को० अणंतं कालं जाव अवड्ढपोग्गलपरियट्ठं देसूणं एवं जाव पुव्वविदेहअवरविदेहित्थियाओ, अकम्मभूमगमणुस्सिस्थीणं भंते ! केवतियं कालं अंतरं होति ?, गो० ! जम्मणं पडुच्च जह० दसवासहस्साइं अंतोमुहुत्तमब्भहियाइं उक्को० वरस्सतिकालो संहरणं पडुच्च जह० अंतोमु० उक्को० वणस्सतिकालो, एवं जाव अंतरदीवियाओ, देवित्थियाणं सव्वासिं जह० अंतो० उक्को० वणस्सतिकालो १५०। एतासिं णं भंते ! तिरिक्खजोणित्थियाणं मणुस्सिस्थियाणं देवित्थियाणं कतरा० ? गो० ! सव्वत्थोवा मणुस्सिस्थियाओ तिरिक्खजोणित्थियाओ असंखेज्जगुणाओ देवित्थियाओ असंखिज्जगुणाओ, एतासिं णं भंते ! तिरिक्खजोणित्थियाणं जलयरीणं थलयरीणं खहयरीणं य कतरा० ? गो० ! सव्वत्थोवाओ खहयरतिरिक्खजोणित्थियाओ थलयरतिरिक्खजोणित्थियाओ संखेज्जगुणाओ जलयरतिरिक्ख० संखेज्जगुणाओ, एतासिं णं भंते ! मणुस्सिस्थीणं कम्मभूमियाणं अकम्मभूमियाणं अंतरदीवियाणं य कतरा० ?, गो० ! सव्वत्थोवाओ अंतरदीवगअकम्मभूमगमणुस्सिस्थियाओ देवकुरूत्तरकुरूअकम्मभूमगमणुस्सिस्थियाओ दोवि तुल्लाओ संखेज्जगु० हरिवासरम्मयवासअकम्मभूमगमणुस्सिस्थियाओ दोवि तुल्लाओ संखेज्जगु० हेमवतेरणवयअकम्मभूमगमणुस्सिस्थियाओ दोवि तुल्लाओ संखेज्जगु० भरतेरवतवासकम्मभूमगमणुस्सि० दोवि तुल्लाओ संखिज्जगुणाओ पुव्वविदेहअवरविदेहकम्मभूमगमणुस्सिस्थियाओ दोवि तुल्लाओ संखेज्जगुणाओ. एतासिं णं भंते ! देवित्थियाणं भवणवासिणीणं वाणमंतरीणं जोइसिणीणं वेमाणिणीणं य कयरा० ?, गो० ! सव्वत्थोवाओ वेमाणियदेवित्थियाओ भवणवासिदेवित्थियाओ असंखेज्जगुणाओ वाणमंतरदेवित्थिओ असंखेज्जगुणाओ जोतिसियदेवित्थियाओ संखेज्जगुणाओ, एतासिं णं भंते ! तिरिक्खजोणित्थियाणं थलयरीणं जलयरीणं खहयरीणं मणुस्सिस्थीयाणं कम्मभूमियाणं अकम्मभूमियाणं अंतरदीवियाणं देवित्थीणं भवणवासिणीणं वाणमंतरीणं जोतिसिणीणं वेमाणिणीणं य कयरा कयराहिंतो अप्पा० ?, गो० ! सव्वत्थोवा अंतरदीवगअकम्मभूमगमणुस्सिस्थि-याओ देवकुरूत्तरकुरूअकम्मभूमगमणुस्सिस्थियाओ दोवि संखेज्जगुणाओ हरिवासरम्मगवासअकम्मभूमगमणुस्सिस्थियाओ दोवि संखेज्जगु० हेमवतेरणवयवासअकम्मभूमग० दोवि संखेज्जगु० भरहेरवतवासकम्मभूमगमणुस्सिस्थीओ दोवि तुल्लाओ संखेज्जगु० पुव्वविदेहअवरविदेहवासकम्मभूमगमणुस्सिस्थियाओ दोवि संखेज्जगु० वेमाणियदेवित्थियाओ असंखेज्जगु० भवणवासिदेवित्थियाओ असंखेज्जगु० खहयरतिरिक्खजोणित्थियाओ असंखेज्जगु० थलयरतिरिक्खजोणित्थियाओ संखिज्जगु० जलयरतिरिक्खजोणित्थियाओ संखेज्जगुणाओ वाणमंतरदेवित्थियाओ संखेज्जगुणाओ जोइसियदेवित्थियाओ संखेज्जगुणाओ १५१। इत्थिवेदस्स णं भंते ! कम्मस्स केवइयं कालं बंदठिती पं० ?, गो० ! जह० सागरोवमस्स दिव्हो सत्तभागो पलिओवमस्स असंखेज्जतिभागेण ऊणो उक्को० पण्णरस सागरोवमकोडाकोडीओ पण्णरस वाससयाइं अबाधा अबाहूणिया कम्मट्ठिती कम्मणिसेओ, इत्थिवेदे णं भंते ! किंपगारे पं० ?, गो० ! फुंफुअगिसमाणे पं०, सेत्तं इत्थियाओ १५२। से किं तं पुरिसा ?, २ तिविहा पं० तं० तिरिक्खजोणियपुरिसा मणुस्सपुरिसा

देवपुरिसा, से किं तं तिरिक्खजोणियपुरिसा ?, २ तिविहा पं० तं०- जलयरा थलयरा खहयरा, इत्थिभेदो भाणितव्वो जाव खहयरा, सेत्तं खहयरा, सेत्तं खहयरतिरिक्खजोणियपुरिसा, से किं तं मणुस्सपुरिसा ?, २ तिविधा पं० तं०- कम्मभूमगा अकम्मभूमगा अंतरदीवगा, सेत्तं मणुस्सपुरिसा, से किं तं देवपुरिसा ?, देवपुरिसा चउव्विहा पं० इत्थीभेदो भाणिव्वो जाव सव्वट्ठसिद्धा ।५३। पुरिसवेदस्स णं भंते ! केवतियं कालं ठिती पं० ?, गो० ! जह० अंतोमु० उक्को० तेत्तीसंसागरोवमाइं, तिरिक्खजोणियपुरिसाणं मणुस्साणं जा चेव इत्थिणं ठिती सा चेव भाणियव्वा, देवपुरिसाणवि जाव सव्वट्ठसिद्धाणंति ताव ठिती जहा पण्णवणाए तहा भाणियव्वा ।५४। पुरिसे णं भंते ! पुरिसेत्ति कालतो केवच्चिरं होइ ?, गो० ! जह० अंतो० उक्को० सागरोवमसतपुहुत्तं सातिरेगं, तिरिक्खजोणियपुरिसे णं भंते ! कालतो केवच्चिरं होइ ?, गो० ! जह० अंतो० उक्को० तिन्नि पलिओवमाइं पुव्वकोडिपुहुत्तमब्भहियाइं, एवं तं चेव संचिट्ठणा जहा इत्थीणं जाव खहयरतिरिक्खजोणियपुरिस्स संचिट्ठणा, मणुस्सपुरिसाणं भंते ! कालतो केवच्चिरं होइ ?, गो० ! खेत्तं पडुच्च जह० अंतो० उक्को० तिन्नि पलिओवमाइं पुव्वकोडिपुहुत्तमब्भहियाइं धम्मचरणं पडुच्च जह० अंतो० उक्को० देसूणा पुव्वकोडी, एवं सव्वत्थ जाव पुव्वविदेहअवरविदेहअकम्मभूमगमणुस्सपुरिसाणं जहा अकम्मभूमकमणुस्सिस्थीणं जाव अंतरदीवगाणं जच्चेव ठिती सच्चेव संचिट्ठणा जाव सव्वट्ठसिद्धाणं । ५५। पुरिसस्स णं भंते ! केवतियं कालं अंतरं होइ ?, गो० ! जह० एक्कं समयं उक्को० वणस्सतिकालो, तिरिक्खजोणियपुरिसाणं जह० अंतोमु० उक्को० वणस्सतिकालो, एवं जाव खहयरतिरिक्खजोणियपुरिसाणं, मणुस्सपुरिसाणं भंते ! केवतियं कालं अंतरं होइ ?, गो० ! खेत्तं पडुच्च जह० अंतोमु० उक्को० वणस्सतिकालो धम्मचरणं पडुच्च जह० एक्कं समयं उक्को० अणंतं कालं अणंताओ उस्स० जाव अवह्ठपोग्गलपरियट्ठं देसूणं, कम्मभूमकाणं जाव विदेहो जाव धम्मचरणे एक्को समओ सेसं जहित्थीणं जाव अंतरदीवकाणं, देवपुरिसाणं जह० अंतो० उक्को० वणस्सतिकालो, भवणवासिदेवपुरिसाणं तावजाव सहस्सारो जह० अंतो० उक्को० वणस्सतिकालो. आणतदेवपुरिसाणं भंते ! केवतियं कालं अंतरं होइ ?, गो० ! जह० वासपुहुत्तं उक्को० वणस्सतिकालो एवं जाव गेवेज्जदेवपुरिसस्सवि, अणुत्तरोववातियदेवपुरिसस्स जह० वासपुहुत्तं उक्को० संखेज्जाइं सागरोवमाइं । ५६। अप्पाबहुयाणि जहेवित्थीणं जाव एतेसिं णं भंते ! देवपुरिसाणं भवणवासीणं वाणमंतराणं जोतिसियाणं वेमाणियाणं य कतरे० ? ! सव्वत्थोवा वेमणियदेवपुरिसा भवणवइदेवपुरिसा असंखे० वाणमंतरदेवपुरिसा असंखे० जोतिसिया देवपुरिसा संखेज्जगुणा, एतेसिं णं भंते ! तिरिक्खजोणियपुरिसाणं जलयराणं थलयराणं खहयराणं मणुस्सपुरिसाणं कम्मभूमकाणं अकम्मभूमकाणं अंतरदीव० देवपुरिसाणं भवणवासीणं वाणमंतराणं जोइसियाणं वेमाणियाणं सोधम्माणं जाव सव्वट्ठसिद्धाणं य कतरे० जाव विसेसाहिया वा ?, गो० ! सव्वत्थोवा अंतरदीवगमणुस्सपुरिसा देवकुरूत्तरकुरुअकम्मभूमगमणुस्सपुरिसा दोवि संखेज्ज० हरिवासरम्मगवासअक० दोवि संखेज्जगुणा हेमवतहेरणवतवासअकम्म० दोवि संखि० भरहेरवतवासकम्मभूमगमणु० दोवि संखे० पुव्वविदेहअवरविदेहकम्मभू० दोवि संखे० अणुत्तरोववातियदेवपुरिसा असंखि० उवरिमगेविज्जदेवपुरिसा संखेज्ज० मज्झिमगेविज्जदेवपुरिसा संखेज्ज० हेट्ठिमगेविज्जदेवपुरिसा संखे० अच्चयकप्पदेवपुरिसा संखे० जाव आणतकप्पदेवपुरिसा संखेज्ज० सहस्सारकप्पदेवपुरिसा असंखे० महासुक्ककप्पदेवपुरिसा असंखे० जाव माहिंदकप्पदेवपुरिसा असंखे० सणंकुमारकप्पदेवपुरिसा असं० ईसाणकप्पदेवपुरिसा असंखे० सोधम्मकप्पदेवपुरिसा संखे० भवणवासिदेवपुरिसा असंखे० खहयरतिरिक्ख० असंखे० थलयरतिरिक्खजोणियपुरिसा संखे० जलयरतिरिक्खजोणियपुरिसा संखे० वाणमंतरदेवपुरिसा संखे० जोतिसियदेवपुरिसा संखेज्जगुणा ।५७। पुरिसवेदस्स णं भंते ! कम्मस्स केवतियं कालं बंधट्ठिती पं० ?, गो० ! जह० अट्ठ संवच्छराणि उक्को० दस सागरोवमकोडाकोडीओ दसवाससयाइं अबाहा अबाहूणिया कम्मठिती कम्मणिसेओ, पुरिसवेदे णं भंते ! किंपकारे पं० ? गो० ! वणदवग्गिजालसमाणे पं०, सेत्तं पुरिसा । ५८। से किं तं णपुंसका ?, २ तिविहा पं० तं०- नेरइयनपुंसका तिरिक्खजोणियनपुंसका मणुस्सणपुंसका, से किं तं नेरइयनपुंसका ?, २ सत्तविधा पं० तं०- रयणप्पभापुढविनेरइयनपुंसका जाव अधेसत्तमपुढविनेरइयणपुंसका, से तं नेरइयनपुंसका, से किं तं तिरिक्खजोणियणपुंसका ?, २ पंचविधा पं० तं०- एगिंदियतिरिक्खजोणियनपुंसका बेइंदि० तेइंदि० चउ०

पंचेंदियतिरिक्खजोणियणपुंसका, से किं तं एगिंदियतिरिक्खजोणियणपुंसका ?, २ पञ्चविधा पं० तं०- पु० आउ० तेउ० वाउ० वण० सेत्तं एगिंदियतिरिक्खजोणियणपुंसका, से किं तं बेइंदियतिरिक्ख० ?, अणेगविधा पं० सेत्तं बेइंदियतिरिक्खजोणिय०, एवं तेइंदियावि चउरिंदियावि, से किं तं पंचेंदियतिरिक्खजोणियणपुंसका ?, २ तिविधा पं० तं०- जलयरा थलयरा खहयरा, से किं तं जलयरा ?, सो चेव इत्थिभेदो आसालियसहितो भाणियव्वो, से तं पंचेंदियतिरिक्खजोणियणपुंसका, से किं तं मणुस्सनपुंसका ?, २ तिविधा पं० तं०- कम्मभूमगा अकम्मभूमगा अंतरदीवका भेदा भाणियव्वा । ५९ । णपुंसकस्स णं भंते ! केवतियं कालं ठिती पं० ?, गो० ! जह० अंतो० उक्को० तेत्तीसं सागरोवमाइं, नेरइयनपुंसगस्स णं भंते ! केवतियं कालं ठिती पं० ?, गो० ! जह० दसवाससहस्साइं उक्को० तेत्तीसं सागरोवमाइं, सेव्वसिं ठिती भाणियव्वा जाव अहेसत्तमापुढवीनेरइया, तिरिक्खजोणियणपुंसकस्स णं भंते ! केवइयं कालं ठिती पं० ?, गो० ! जह० अंतो० उक्को० पुव्वकोडी एगिंदियतिरिक्खजोणियणपुंसक० जह० अंतो० उक्को० बावीसं वाससहस्साइं, पुढवीकाइयएगिंदियतिरिक्खजोणियणपुंसकस्स णं भंते ! केवतियं कालं ठिती पं० ?, जह० अंतो० उक्को० बावीसं वाससहस्साइं सव्वेसिं एगिंदियणपुंसकाणं ठिती भाणियव्वा, बेइंदियतेइंदियचउरिंदियणपुंसकाणं ठिती भाणितव्वा, पंचिंदियतिरिक्खजोणियणपुंसकस्स णं भंते ! केवतियं कालं ठिती पं० ?, गो० ! जह० अंतो० उक्को० पुव्वकोडी एवं जलयरतिरिक्खचउप्पदथलयरउरपरिसप्पभुयपरिसप्पखहयरतिरिक्ख० सव्वेसिं जह० अंतो० उक्को० पुव्वकोडी, मणुस्सनपुंसकस्स णं भंते ! केवतियं कालं ठिती पं० ?, गो० ? खेत्तं पडुच्च जह० अंतो० उक्को० पुव्वकोडी धम्मचरणं पडुच्च जह० अंतो० उक्को० देसूणा पुव्वकोडी, कम्मभूमगभरहे- (१५२) रवयपुव्वविदेहअवरविदेहमणुस्सनपुंसकस्सवि तहेव, अकम्मभूमगमणुस्सनपुंसकस्स णं भंते ! केवतियं कालं ठिती पं० ?, गो० ! जम्मणं पडुच्च जह० अंतो० उक्को० अंतोमु० साहरणं पडुच्च जह० अंतो० उक्को० देसूणा पुव्वकोडी, एवं जाव अंतरदीवकाणं, णपुंसए णं भंते ! णपुंसएत्ति कालतो केवच्चिरं होइ ?, गो० ! जह० एक्कं समयं उक्को० तरूकालो, णेरइयणपुंसए णं भंते ! ०, गो० ! जह० दसवाससहस्साइं उक्को० तेत्तीसं सागरोवमाइं एवं पुढवीए ठिती भाणियव्वा, तिरिक्खजोणियणपुंसए णं भंते ! ति० ?, गो० ! जह० अंतो० उक्को० वणस्सतिकालो एवं एगिंदियणपुंसकस्स, वणस्सतिकाइयस्सवि एवमेव, सेसाणं जह० अंतो० उक्को० असंखिज्जं कालं असंखेज्जाओ उस्सप्पिणीओसप्पिणीओ कालतो खेत्तओ असंखेज्जा लोया, बेइंदियतेइंदियचउरिंदियनपुंसकाण य जह० अंतो० उक्को० संखेज्जं कालं, पंचिंदियतिरिक्खजोणियणपुंसए णं भंते ! ० ?, गो० ! जह० अंतो० उक्को० पुव्वकोडिपुहुत्तं एवं जलयरतिरिक्खचउप्पदथलचरउरपरिसप्पभुयपरिसप्पमहोरगाणवि, मणुस्सनपुंसकस्स णं भंते ! ० ?, खेत्तं पडुच्च जह० अंतो० उक्को० पुव्वकोडिपुहुत्तं धम्मचरणं पडुच्च जह० एक्कं समयं उक्को० देसूणा पुव्वकोडी, एवं कम्मभूमगभरहेरवयपुव्वविदेहअवरविदेहेसुवि भाणियव्वं, अकम्मभूमगमणुस्सनपुंसए णं भंते ! ० ?, जम्मणं पडुच्च जह० अंतो० उक्को० मुहुत्तपुहुत्तं साहरणं पडुच्च जह० अंतो० उक्को० देसूणा पुव्वकोडी एवं सव्वेसिं जाव अंतरदीवगाणं, णपुंसकस्स णं भंते ! केवतियं कालं अंतरं होइ ?, गो० ! जह० अंतो० उक्को० सागरोवमसयपुहुत्तं सातिरेगं, णेरइयणपुंसकस्स णं भंते ! केवतियं कालं अंतरं होइ ?, गो० ! जह० अंतो० उक्को० तरूकालो, रयणप्पभापुढवीनेरइयणपुंसकस्स जह० अंतो० उक्को० तरूकालो, एवं सव्वेसिं जाव अहेसत्तमा, तिरिक्खजोणियणपुंसकस्स० ?, जह० अंतो० उक्को० सागरोवमसयपुहुत्तं सातिरेगं, एगिंदियतिरिक्खजोणियणपुंसकस्स जह० अंतो० उक्को० दो सागरोवमसहस्साइं संखेज्जवासमब्भहियाइं, पुढवीआउतेउवाऊणं जह० अंतो० उक्को० वणस्सइकाला, वणस्सतिकाइयाणं जह० अंतो० उक्को० असंखेज्जं कालं जाव असंखेज्जा लोया, सेसाणं बेइंदियादीणं जाव खहयराणं जह० अंतो० उक्को० वणस्सतिकालो, मणुस्सनपुंसकस्स खेत्तं पडुच्च जह० अंतो० उक्को० वणस्सतिकालो धम्मचरणं पडुच्च जह० एगं समयं उक्को० अणंतं कालं जाव अवड्ढपोग्गलपरियट्ठं देसूणं एवं कम्मभूमकस्सवि भरतेरवतस्स पुव्वविदेहअवरविदेहकस्सवि, अकम्मभूमकमणुस्सनपुंसकस्स णं भंते ! केवतियं कालं० ?, जम्मणं पडुच्च जह० अंतो० उक्को० वणस्सतिकालो संहरणं पडुच्च जह० अंतो० उक्को० वणस्सतिकालो एवं जाव अंतरदीवगत्ति । ६० । एतेसिं णं भंते ! णेरइयणपुंसकाणं

तिरिक्खजोणियनपुंसकाणं मणुस्सणपुंसकाण य कयरे० ?, गो० ! सव्वत्थोवा मणुस्सणपुंसका नेरइयनपुंसगा असंखेज्जगुणा तिरिक्खजोणियणपुंसका अणंतगुणा, एतेसिं णं भंते ! रयणप्पहापुढवीणेरइयणपुंसकाणं जाव अहेसत्तमपुढविणेरइयणपुंसकाण य कयरे० ?, गो० ! सव्वत्थोवा अहेसत्तमपुढविनेरइयणपुंसका छट्ठपुढविणेरइयणपुंसका असंखेज्जगुणा जाव दोच्चपुढविणेरइयणपुंसका असंखेज्जगुणा इमीसे रयणप्पभाए पुढवीए णेरइयणपुंसका असंखेज्जगुणा, एतेसिं णं भंते ! तिरिक्खजोणियणपुंसकाणं एगिंदियतिरिक्खजोणियणपुंस-काणं पुढवीकाइय जाव वणस्सतिकाइयएगिंदियतिरिक्खजोणियणपुंसकाणं बेइंदियतेइंदियचउरिंदियतिरिक्खजोणियणपुंसकाणं जलयराणं थलयराणं खहयराणं य कतरे० ?, गो० ! सव्वत्थोवा खहयरतिरिक्खजोणियणपुंसका थलयरतिरिक्खजोणियणपुंसका संखेज्ज० जलयरतिरिक्खजोणियणपुंसका संखेज्ज० चतुरिंदियतिरि० विसेसाहिया तेइंदियति० विसेसाहिया बेइंदियति० विसेसा० तेउक्काइयएगिंदियतिरिक्ख० असंखेज्जगुणा पुढविकाइयएगिंदियतिरिक्खजोणिया विसेसाहिया एवं आउ० वाउ० वणस्सतिकाइयएगिंदियतिरिक्खजोणियणपुंसका अणंतगुणा, एतेसिं णं भंते ! मणुस्सणपुंसक० कम्मभूमिणपुंसकाणं अकम्मभूमिणपुंसकाणं अंतरदीवकाणं य कतरे० ?, गो० ! सव्वत्थोवा अंतरदीवगअकम्मभूमगमणुस्सणपुंसका देवकुरूउत्तरकुरूअकम्मभूमगा दोवि संखेज्जगुणा एवं जाव पुव्वविदेहअवरविदेहकम्म० दोवि संखेज्जगुणा, एतेसिं णं भंते ! णेरइयणपुंसकाणं रयणप्पभापुढविनेरइयनपुंसकाणं जाव अधेसत्तमपुढविणेरइयणपुंसकाणं तिरिक्खजोणियणपुंसकाणं एगिंदियतिरिक्खजोणिय० पुढविकाइयएगिंदियतिरिक्खजोणिय० जाव वणस्सतिकाइय० बेइंदियतेइंदियचउरिंदियपंचिंदियतिरिक्खजोणिय० जलयर० थलयर० खहयर० मणुस्सणपुंसकाणं कम्मभूमक० अकम्मभूमक० अंतरदीवकणपुंसकाणं य कतरे कयरेहिंतो अप्पा० ?, गो० ! सव्वत्थोवा अधेसत्तमपुढविणेरइयणपुंसका छट्ठपुढविनेरइयनपुंसका असंखेज्ज० जाव दोच्चपुढविणेरइयणपुंस० असंखे० अंतरदीवगमणुस्सणपुंसका असंखेज्जगुणा देवकुरूउत्तरकुरूअकम्मभूमक० दोवि संखेज्जगुणा जाव पुव्वविदेहअवरविदेहकम्मभूमगमणुस्सणपुंसका दोवि संखेज्जगुणा रयणप्पभापुढविणेरइयणपुंसका असंखे० खहयरपंचेदियतिरिक्खजोणियनपुंसका असं० थलयर० संखिज्ज० जलयर० संखिज्जगुणा चउरिंदियतिरिक्खजोणिय० विसेसाहिया तेइंदिय० विसे० बेइंदिय० विसे० तेउक्काइयएगिंदिय० असं० पुढविकाइयएगिंदिय० विसेसाहिया आउक्काइय० विसे० वाउकाइय० विसेसा० वणस्सइकाइयएगिंदियतिरिक्खजोणियणपुंसका अणंतगुणा ।६१। णपुंसकवेदस्स णं भंते ! कम्मस्स केवइयं कालं बंधठिई पं० ?, गो० ! जह० सागरोवमस्स दोन्नि सत्तभागा पलिओवमस्स असंखेज्जतिभागेण ऊणगा उक्को० वीसं सागरोवमकोडाकोडीओ दोण्णि य वाससहस्साइं अबाधा अबाहूणिया कम्मठिती कम्मणिसेगो, णपुंसकवेदे णं भंते ! किंपगारे पं० ?, गो० ! महाणगरदाहसमाणे पं० समणाउसो !, से तं णपुंसका ।६२। एतेसिं णं भंते ! इत्थीणं पुरिसाणं नपुंसकाणं य कतरे० ?, गो० ! सव्वत्थोवा पुरिसा इत्थीओ संखि० णपुंसका अणंत०, एतेसिं णं भंते ! तिरिक्खजोणिइत्थीणं तिरिक्खजोणियपुरिसाणं तिरिक्खजोणियणपुंसकाणं य कयरे० ?, गो० ! सव्वत्थोवा तिरिक्खजोणियपुरिसा तिरिक्खजोणिइत्थीओ संखे० तिरिक्खजोणियणपुंसगा अणंतगुणा, एतेसिं णं भंते ! मणुस्सिस्थीणं मणुस्सपुरिसाणं मणुस्सणपुंसकाणं य कयरे० ?, गो० ! सव्वत्थोवा मणुस्सपुरिसा मणुस्सिस्थीओ संखे० मणुस्सणपुंसका असंखेज्जगुणा, एतेसिं णं भंते ! देविस्थीणं देवपुरिसाणं णेरइयणपुंसकाणं य कयरे० ?, गो० ! सव्वत्थोवा णेरइयणपुंसका देवपुरिसा असं० देविस्थीओ संखेज्जगुणाओ, एतेसिं णं भंते ! तिरिक्खजोणिस्थीणं तिरिक्खजोणियपुरिसाणं तिरिक्खजोणियणपुंसकाणं मणुस्सिस्थीणं मणुस्सपुरिसाणं मणुस्सनपुंसकाणं देविस्थीणं देवपुरिसाणं णेरइयणपुंसकाणं य कतरे० ?, गो० ! सव्वत्थोवा मणुस्सपुरिसा मणुस्सिस्थीओ संखे० मणुस्सणपुंसका असं० णेरइयणपुंसका असं० तिरिक्खजोणियपुरिसा असं० तिरिक्खजोणित्थियाओ संखेज्ज० देवपुरिसा असं० देवित्थियाओ संखि० तिरिक्खजोणियणपुंसका अणंतगुणा, एतेसिं णं भंते ! तिरिक्खजोणिस्थीणं जलयरीणं थलयरीणं खहयरीणं तिरिक्खजोणियपुरिसाणं जलयराणं थलयराणं खहयराणं तिरिक्खजोणियणपुंसकाणं एगिंदियतिरिक्खजोणियणपुंसकाणं पुढविकाइयएगिंदियतिरिक्खजोणियणपुंसकाणं जाव वणस्सतिकाइय० बेइंदिय० तेइंदिय० चउरिंदिय० पंचेदियतिरिक्खजोणियणपुंसकाणं जलयराणं थलयराणं

खहयराणं कतरे० ?, गो० ! सव्वत्थोवा खहयरतिरिक्खजोणियपुरिसा खहयरतिरिक्खजोणित्थियाओ संखेज्ज० थलयरपंचिंदियतिरिक्खजोणियपु० संखे० थलयरित्थियाओ संखे० जलयरतिरिक्खपुरिसा संखि० जलयरतिरिक्खजोणित्थियाओ संखेज्जगु० खहयरपंचिंदियतिरिक्खजो० णपुंसका असंखे० थलयरपंचिंदियतिरिक्ख० नपुंसगा संखि० जलयरपंचिंदियतिरिक्खजोणियनपुंसका संखे० चउरिंदियतिरि० विसेसाहिया तेइंदियणपुंसका विसेसाहिया बेइंदियनपुंसका विसेसा० तेउकाइयएगिंदियतिरिक्खजोणियणपुंसका असं० पुढवि० णपुंसका विसेसाहिया आउ० विसेसाहिया वाउ० विसेसा० वणप्फतिएगिन्दियणपुंसका अणंतगुणा, एतेसिं णं भंते ! मणुस्सित्थीणं कम्मभूमयाणं अकम्मभूमगाणं अंतरदीवयाणं मणुस्सपुरिसाणं कम्मभूमकाणं अकम्मभूमकाणं अंतरदीवकाणं मणुस्सणपुंसकाणं कम्मभूमाणं अकम्म० अंतरदीवकाण य कयरे० ?, गो० ! अन्तरदीवकअकम्मभूमकमणुस्सित्थियाओ मणुस्सपुरिसा य एते णं दुन्नि य तुल्लावि सव्वत्थोवा देवकुरूउत्तरकुरूअकम्मभूमगमणुस्सित्थियाओ देव० मणुस्सपुरिसा एते णं दोन्निवि तुल्ला संखे० हरिवासरम्मगवाअमकम्मभूमकमणुस्सित्थियाउ हरि० मणुस्सपुरिसा य एते णं दोन्निवि तुल्ला संखे० हेमवतहेरणवतअकम्मभूमकमणुस्सित्थिया ओ हे० मणुस्सपुरिसा य दोवि तुल्ला संखे० भरहेरवतकम्मभूमगमणुस्सपुरिसा दोवि संखे० भरहेरवतकम्म० मणुस्सित्थियाओ दोवि संखे० पुव्वविदेहअवरविदेहकम्मभूमगपुरिसा पुव्व० मणुस्सित्थियाओ दोवि संखे० अंतरदीवगमणुस्सणपुंसका असंखे० देवकुरूउत्तरकुरूअकम्ममणुस्सणपुंसका दोवि संखेज्जगुणा एवं तहेव जाव पुव्वावरविदेहकम्मभूमकमणुस्सणपुंसका दोवि संखेज्जगुणा, एतासिं णं भंते ! देवित्थीणं भवणवासिणीणं वाणमन्तरीणं जोइसिणीणं वेमाणिणीणं देवपुरिसाणं भवणवासीणं जाव वेमाणियाणं सोधम्मकाणं जाव गेवज्जकाणं अणुत्तरोववातियाणं णेरइयणपुंसकाणं रयणप्पभापुढविणेरइयणपुंसगाणं जाव अहेसत्तमपुढविनेरइय० कतरे० ?, गो० ! सव्वत्थोवा अणुत्तरोववातियदेवपुरिसा उवरिमगेवेज्जदेवपुरिसा संखेज्जगुणा चेव जाव आणते कप्पे देवपुरिसा संखेज्जगुणा अहेसत्तमाए पुढवीए णेरइयणपुंसका असंखेज्जगुणा छट्ठीए पुढवीए नेरइय० असंखेज्जगुणा सहस्सारे कप्पे देवपुरिसा असंखेज्जगुणा महासुक्के कप्पे देवा असंखेज्जगुणा पंचमाए पुढवीए नेरइयणपुंसका असंखेज्जगुणा लंतए कप्पे देवा असंखेज्जगुणा चउत्थीए पुढवीए नेरइया असंखेज्जगुणा बंभलोए कप्पे देवपुरिसा असंखेज्जगुणा तच्चाए पुढवीए नेरइय० असंखेज्जगुणा माहिदे कप्पे देवपुरिसा असंखेज्जगुणा सणकुमारकप्पे देवपुरिसा असंखेज्जगुणा दोच्चाए पुढवीए नेरइया असंखेज्जगुणा ईसाणे कप्पे देवपुरिसा असंखेज्जगुणा ईसाणे कप्पे देवित्थियाओ संखेज्जगुणाओ सोधम्मे देवपुरिसा संखेज्ज० सोधम्मे कप्पे देवित्थियाओ संखे० भवणवासिदेवपुरिसा असंखेज्जगुणा भवणवासिदेवित्थियाओ संखेज्जगुणाओ इमीसे रयणप्पभापुढवीए नेरइया असंखेज्जगुणा वाणमंतरदेवपुरिसा असंखेज्जगुणा वाणमंतरदेवित्थियाओ संखेज्जगुणाओ जोतिसियदेवपुरिसा संखेज्जगुणा जोतिसियदेवित्थियाओ संखेज्जगुणा, एतासिं णं भंते ! तिरिक्खजोणित्थीणं जलयरीणं-खहयरीणं तिरिक्खजोणियपुरिसाणं जलयराणं थलयराणं खहयराणं तिरिक्खजोणियणपुंसकाणं एगिंदियतिरिक्खजोणियणपुंसकाणं पुढविक्काइयएगिंदियणपुंसकाणं आउक्काइयएगिंदियणपुंसकाणं जाव वणस्सतिकाइयएगिंदियणपुंसकाणं बेइंदियणपुंसकाणं तेइंदियणपुंसकाणं चउरिंदियनपुंसकाणं पंचिंदियणपुंसकाणं जलयराणं थलयराणं खहयराणं मणुस्सित्थीणं कम्मभूमियाणं अकम्मभूमियाणं अंतरदीवियाणं मणुस्सपुरिसाणं कम्मभूमयाणं अकम्म० अंतरदीवयाणं मणुस्सणपुंसकाणं कम्मभूमिकाणं अकम्मभूमिकाणं अंतरदीवकाणं देवित्थीणं भवणवासिणीणं वाणमन्तरीणं जोतिसिणीणं वेमाणिणीणं देवपुरिसाणं भवणवासीणं वाणमन्तराणं जोतिसियाणं वेमाणियाणं सोधम्मकाणं जाव गेवज्जकाणं अणुत्तरोववातियाणं नेरइयणपुंसकाणं रयणप्पभापुढविनेरइयनपुंसकाणं जाव अहेसत्तमपुढविणेरइयणपुंसकाण य कयरे० ?, गो० ! अंतरदीवअकम्मभूमकमणुस्सित्थीओ मणुस्सपुरिसा य एते णं दोवि तुल्ला सव्वत्थोवा देवकुरूउत्तरकुरूअकम्मभूमगमणुस्सित्थीओ पुरिसा य एते णं दोवि तुल्ला संखे० एवं हरिवासरम्मगवास० एवं हेमवतहेरणवय०. भरहेरवयकम्मभूमगमणुस्सपुरिसा दोवि संखे० भरहेरवतकम्ममणुस्सित्थीओ दोवि संखे० पुव्वविदेहअवरविदेहकम्मभूमकमणुस्सपुरिसा दोवि संखे० पुव्वविदेहअवरविदेहकम्ममणुस्सित्थियाओ

दोवि संखे० अणुत्तरोववातियदेवपुरिसा असंखेज्जगुणा उवरिमगेवेज्जा देवपुरिसा संखे० जाव आणते कप्पे देवपुरिसा संखे० अधेसत्तमाए पुढवीए नेरइयणपुंसका असंखे० छट्ठीए पुढवीए नेरइयणपुंसका असं० सहस्सारे कप्पे देवपुरिसा असंखे० महासुक्के कप्पे देव० असं० पंचमाए पुढवीए नेरइयणपुंसका असं० लंतए कप्पे देव० असं० चउत्थीए पुढवीए नेरइयणपुंसका असं० बंभलोए कप्पे देवपुरिसा असं० तच्चाए पुढवीए नेरइयण० असं० माहिदे कप्पे देवपु० असंखे० सणकुमारे कप्पे देवपुरिसा असं० दोच्चाए पुढवीए नेरइयणपुंसका असं० अंतरदीवगअकम्मभूमगमणुस्सणपुंसका असंखे० देवकुरूउत्तरकुरूअकम्मभूमगमणुस्सणपुंसका दोवि संखे० एवं जाव विदेहत्ति ईसाणे कप्पे देवपुरिसा असं० ईसाणे कप्पे देवित्थियाओ संखे० सोधम्मे कप्पे देवपुरिसा संखे० सोहम्मे कप्पे देवित्थियाओ संखेज्ज० भवणवासिदेवपुरिसा असंखे० भवणवासिदेवित्थियाओ संखिज्जगुणाओ इमीसे रयणप्पभाए पुढवीए नेरइयणपुंसका असं० खहयरतिरिक्खजोणियपुरिसा संखेज्जगुणा खहयरतिरिक्खजोणित्थियाओ संखे० थलयरतिरिक्खजोणियपुरिसा संखे० थलयरतिरिक्खजोणित्थियाओ संखे० जलयरतिरिक्खपुरिसा संखे० जलयरतिरिक्खजोणित्थियाउ संखे० वाणमंतरदेवपुरिसा संखे० वाणमंतरदेवित्थियाओ संखे० जोतिसियदेवपुरिसा संखे० जोतिसियदेवित्थियाओ संखे० खहयरपंचेदियतिरिक्खजोणियणपुंसगा संखे० थलयरणपुंसका संखे० जलयरणपुंसका संखे० चतुरिंदियणपुंसका विसेसाहिया तेइंदिय० विसेसा० बेइंदिय० विसेसा० तेउक्काइयएगिंदियतिरिक्खजोणियणपुंसका असं० पुढवी विसेसा० आऊ विसेसा० वाऊ विसेसा० वणप्फतिकाइयएगिंदियतिरिक्खणपुंसका अणंतगुणा ।६३। इत्थीणं भंते ! केवइयं कालं ठिती पं० ?, गो० ! एगेणं आएसेणं जहा पुव्विं भणियं एवं पुरिसस्सवि नपुंसकस्सवि, संचिट्ठणा पुनरवि तिण्हं पि जहा पुव्विं भणिया, अंतरं तिण्हं पि जहा पुव्विं भणियं ।६४। तिरिक्खजोणित्थियाओ तिरिक्खजोणियपुरिसेहिंतो तिगुणाउ तिरूवाधियाओ मणुस्सित्थियाओ मणुस्सपुरिसेहिंतो सत्तावीसतिगुणाओ सत्तावीसइरूवाहियाओ देवित्थियाओ देवपुरिसेहिंतो बत्तीसइगुणाओ बत्तीसइरूवाहियाओ, सेत्तं तिविधा संसारसमावण्णगा जीवा पण्णत्ता । ‘तिविहेसु होइ भेयो ठिई य संचिट्ठणंतरऽप्पबहुं । वेदाण य बंधठिई वेओ तह किंपगारो उ ॥५☆☆☆ ॥६५॥ तिविहपडिवत्ती समत्ता २॥☆☆☆ तत्थ जे ते एवमाहंसु चउव्विधा संसारसमावण्णगा जीवा पं० ते एवमाहंसु तं०-☆☆☆ नेरइया ☆☆☆ तिरिक्खजोणिया मणुस्सा देवा ।६६। से किं तं नेरइया ?, २ सत्तविधा पं० तं०-पढमपुढवीनेरइया दोच्चपुढवीने० तच्चपुढवीने० चउत्थपुढवीने० पंचमपु० छट्ठपु० सत्तमपुढवीनेरइया ।६७। पढमा णं भंते ! पुढवी किंनामा किंगोत्ता पं० ?, गो० ! णामेणं घम्मा गोत्तेणं रयणप्पभा, दोच्चा णं भंते ! पुढवी किंनामा किंगोत्ता पं० ?, गो० ! णामेणं वंसा गोत्तेणं सक्करप्पभा, एवं एतेणं अभिलावेणं सव्वासिं पुच्छा, णामाणि इमाणि-सेला तच्चा अंजणा चउत्थी रिट्ठा पंचमी मघा छट्ठी माघवती सत्तमी जाव तमतमा गोत्तेणं पं० (घम्मा वंसा सेला अंजण रिट्ठा मघा य माघवती । सत्तण्हं पुढवीणं एए नामा उ नायव्वा ॥१॥ रयणा सक्कर वालुय पंका धूमा तमा य तमतमा य । सत्तण्हं पुढवीणं एए गोत्ता मुणेयव्वा ॥२॥ पा०) ।६८। इमा णं भंते ! रयणप्पभापुढवी केवतिया बाहल्लेणं पं० ?, गो० ! इमा णं रयणप्पभापुढवी असिउत्तरं जोयणसयसहस्सं बाहल्लेणं पं०, एवं एतेणं अभिलावेणं इमा गाहा अणुगंतव्वा ‘आसीतं बत्तीसं अट्ठावीसं तहेव वीसं च । अट्ठारस सोलसगं अट्ठुत्तरमेव हिट्ठिमिया ॥६॥६९॥ इमा णं भंते ! रयणप्पभापुढवी कतिविधा पं० ?, गो० ! तिविहा पं० तं०-खरकंडे पंकबहुलकंडे आवबहुलकंडे, इमीसे णं भंते ! रय० पुढ० खरकंडे कतिविधे पं० ?, गो० ! सोलसविधे पं० तं०-रयणकंडे वइरे वेरुल्लिए लोहितक्खे मसारगल्ले हंसगब्भे पुलए सोयंधिए जोतिरसे अंजणे १० अंजणपुलए रयते जातरूवे अंके फलिहे रिट्ठे १६ कंडे, इमीसे णं भंते ! रयणप्पभापुढवीए रयणकंडे कतिविधे पं० ?, गो० ! एगागारे पं०, एवं जाव रिट्ठ, इमीसे णं भंते ! रयणप्पभापुढवीए पंकबहुले कंडे कतिविधे पं०?, गो० ! एकागारे पं०. एवं आवबहुले कंडे कतिविधे पं० ?, गो० ! एकागारे पं०, सक्करप्पभा णं भंते ! पुढवी कतिविधा पं० ?, गो० ! एकागारा पं०, एवं जाव अहेसत्तमा ।७०। इमीसे णं भंते ! रयणप्पभाए पुढवीए केवइया निरयावाससयसहस्सा पं० ?, गो० ! तीसं णिरयावाससयसहस्सा पं०, एवं एतेणं अभिलावेणं सव्वासिं पुच्छा, इमा गाहा

अणुगंतव्वा० तीसा य पण्णवीसा पण्णरसदसेव तिण्णि य हवन्ति । पंचूणसयसहस्सं पंचेव अणुत्तरा णरगा ॥७॥ जाव अहेसत्तमाए पंच अणुत्तरा महतिमहालया णिरया पं० तं०-काले महाकाले रोरूए महारोरूए अपतिट्ठाणे ॥७१॥ अत्थि णं भन्ते ! इमीसे रयणप्पभाए पुढवीए अहे घणोदधीति वा घणवातेति वा तणुवातेति वा ओवासंतरेति वा ?, हंता अत्थि, एवं जाव अहे सत्तमाए ॥७२॥ इमीसे णं भन्ते ! रयणप्पभाए पुढवीए खरकंडे केवतियं बाहल्लेणं पं० ?, गो० ! सोलस जोयणसहस्साइं बाहल्लेणं पं०, इमीसे णं भन्ते ! रयणप्पभाए पुढवीए रयणकंडे केवतियं बाहल्लेणं पं० ?, गो० ! एककं जोयणसहस्सं बाहल्लेणं पं०, एवं जाव रिट्ठे, इमीसे णं भन्ते ! रय० पु० पंकबहुले कंडे केवतियं बाहल्लेणं पं० ?, गो० ! चतुरसीतिजोयणसहस्साइं बाहल्लेणं पं०, इमीसे णं भन्ते ! रय० आउबहुले कंडे केवतियं बाहल्लेणं पं० ?, गो० ! असीतिजोयणसहस्साइं बाहल्लेणं पं०, इमीसे णं भन्ते ! रयणप्पभाए घणोदही केवतियं बाहल्लेणं पं० ?, गो० ! वीसं जोयणसहस्साइं बाहल्लेणं पं०, इमीसे णं भन्ते ! रय० घणवाए केवतियं बाहल्लेणं पं० ?, गो० ! असंखेज्जाइं जोयणसहस्साइं बाहल्लेणं पं०, एवं तणुवातेऽवि ओवासंतरेऽवि, सक्करप्प० भन्ते ! घणोदही केवतियं बाहल्लेणं पं० ?, गो० ! वीसं जोयणसहस्साइं बाहल्लेणं पं०, सक्करप्प० घणवाते केवतियं बाहल्लेणं पं० ?, गो० ! असंखेज्जाइं जोयणसहस्साइं बाहल्लेणं पं०, एवं तणुवातेवि ओवासंतरेवि, जहा सक्करप्पभा एवं जाव अधेसत्तमा ॥७३॥ इमीसे णं भन्ते ! रयणप्पभाए असीउत्तरजोयणसयसहस्सबाहल्लाए खेत्तच्छेएणं छिज्जमाणीए अत्थि दव्वाइं वण्णतो कालनीललोहितहालिदसुक्किल्लाइं गंधतो सुरभिदुब्धिगंधाइं रसतो तित्तकडुयकसायअंबिलमहुराइं फासतो कक्खडमउयगरूयलहुसीतउसिणणिद्धलुक्खाइं संठाणतो परिमंडलवट्ठतंसचउरंसआययसंठाणपरिणयाइं अन्नमन्नबद्धाइं अण्णमण्णपुट्ठाइं अण्णमण्णओगाढाइं अण्णमण्णसिणेहपडिबद्धाइं अण्णमण्णघडत्ताए चिट्ठंति ?, हंता अत्थि, इमीसे णं भन्ते ! रयणप्पभाए पु० खरकंडस्स सोलसजोयणसहस्सबाहल्लस्स खेत्तच्छेएणं छिज्जमाणस्स अत्थि दव्वाइं वण्णओ काल जाव परिणयाइं ?, हंता अत्थि, इमीसे णं रयणप्प० रयणनामगस्स कंडस्स जोयणसहस्सबाहल्लस्स खेत्तच्छेएणं तं चेव जाव हंता अत्थि, एवं जाव रिट्ठस्स, इमीसे णं भन्ते ! रयणप्प० पंकबहुलस्स चउरासीतिजोयणसहस्सबाहल्लस्स खेत्त० तं चेव, एवं आउबहुलस्सवि असीतिजोयणसहस्सबाहल्लस्स, इमीसे णं भन्ते ! रयणप्प० घणोदधिरस्स वीसजोयणसहस्सबाहल्लस्स खेत्तच्छेदेण तहेव, एवं घणवातस्स असंखेज्जजोयणसहस्सबाहल्लस्स तहेव, ओवासंतरस्सवि तं चेव, सक्करप्पभाए णं भन्ते ! पु० बत्तीसुत्तरजोयणसतसहस्सबाहल्लाए खेत्तच्छेएणं छिज्जमाणीए अत्थि दव्वाइं वण्णतो जाव घडत्ताए चिट्ठंति ?, हंता अत्थि, एवं घणोदधिरस्स वीसजोयणसहस्सबाहल्लस्स घणवातस्स असंखेज्जजोयणसहस्सबाहल्लस्स एवं जाव ओवासंतरस्स, जहा सक्करप्पभाए एवं जाव अहेसत्तमाए ॥७४॥ इमा णं भन्ते ! रयणप्पभा० किंसंठिता पं० ?, गो० ! झल्लरिसंठिता पं०, इमीसे णं भन्ते ! रयणप्पभा० खरकंडे किंसंठिते पं० ?, गो० ! झल्लरिसंठिते पं०, इमीसे णं भन्ते ! रयणप्पभा० रयणकंडे किंसंठिते पं० ?, गो० ! झल्लरिसंठिए पं०, एवं जाव रिट्ठे, एवं पंकबहुलेवि, एवं आवबहुलेवि घणोदधीवि घणवाएवि तणुवाएवि ओवासंतरेवि सव्वे झल्लरिसंठिते पं०, सक्करप्पभा णं भन्ते ! पुढवी किंसंठिता पं० ?, गो० ! झल्लरिसंठिता पं०, सक्करप्पभापुढवीए घणोदधी किंसंठिते पं० ?, गो० ! झल्लरिसंठिते पं०, एवं जाव ओवासंतरे, जहा सक्करप्पभाए वत्तव्वया एवं जाव अहेसत्तमाएवि ॥७५॥ इमीसे णं भन्ते ! रयणप्पभापुढवीए पुरत्थिमिल्लातो उवरिमंताओ केवतियं अबाधाए लोयंतं पं० ?, गो० ! दुवालसहिं जोयणेहिं अबाधाए लोयंतं पं०, एवं दाहिणिल्लातो पच्चत्थिमिल्लातो उत्तरिल्लातो, सक्करप्पभापुरत्थिमिल्लातो चरिमंतातो केवतियं अबाधाए लोयंतं पं० ?, गो० ! तिभागूणेहिं तेरसहिं जोयणेहिं अबाधाए लोयंतं पं०, एवं चउदिसिंपि, वालुयप्पभाए पुरत्थिमिल्लातो पुच्छा, गो० ! सतिभागेहिं तेरसहिं जोयणेहिं अबाधाए लोयंतं पं०, एवं चउदिसिंपि, एवं सव्वासिं चउसुवि दिसासु पुच्छितव्वं, पंकप्पभाए चोदसहिं जोयणेहिं अबाधाए लोयंतं पं०, पंचमाए तिभागूणेहिं पन्नरसहिं जोयणेहिं अबाधाए लोयंतं पं०, छट्ठीए सतिभागेहिं पन्नरसहिं जोयणेहिं अबाधाए लोयंतं पं०, सत्तमीए सोलसहिं जोयणेहिं अबाधाए लोयंतं पं०, एवं जाव उत्तरिल्लातो, इमीसे णं भन्ते ! रयणप्पभापुरत्थिमिल्ले चरिमंते कतिविधे पं० ?, गो० ! तिविहे पं० तं०-घणोदधिवलए घणवायवलए तणुवायवलए, इमीसे णं भन्ते ! रयणप्पभाए दाहिणिल्ले

चरिमंते कतिविधे पं० ?, गो० ! तिविधे पं० तं०-एवं जाव उत्तरिल्ले, एवं सव्वासिं जाव अधेसत्तमाए उत्तरिल्ले । ७६। इमीसे णं भंते ! रयणप्पभाए पुढवीए घणोदधिवलए केवतियं बाहल्लेणं पं० ?, गो० ! छ जोयणाणि बाहल्लेणं पं०, सक्करप्पभाए घणोदधिवलए केवतियं बाहल्लेणं पं० ?, गो० ! सतिभागाइं छजोयणाइं बाहल्लेणं पं०, वालुयप्पभाए पुच्छा, गो० ! तिभागूणाइं सत्त जोयणाइं बाहल्लेणं पं०, एवं एतेणं अभिलावेणं पंकप्पभाए सत्त जोयणाइं बाहल्लेणं पं०, धूमप्पभाए सतिभागाइं सत्त जोयणाइं पं०, तमप्पभाए तिभागूणाइं अट्ठजोयणाइं, तमतमप्पभाए अट्ठ जोयणाइं, इमीसे णं भंते ! रयणप्पभाए घणवायवलए केवतियं बाहल्लेणं पं० ?, गो० ! अद्धपंचमाइं जोयणाइं बाहल्लेणं, सक्करप्पभाए पुच्छा, गो० ! कोसूणाइं पंच जोयणाइं बाहल्लेणं पं०, एवं एतेणं अभिलावेणं वालुयप्पभाए पंच जोयणाइं बाहल्लेणं पं०, पंकप्पभाए सक्कोसाइं पंच जोयणाइं बाहल्लेणं पं०, धूमप्पभाए अद्धछट्ठाइं जोयणाइं बाहल्लेणं पं०, तमप्पभाए कोसूणाइं छजोयणाइं बाहल्लेणं पं०, अहेसत्तमाए छजोयणाइं बाहल्लेणं पं०, इमीसे णं भंते ! रयणप्पभाए तणुवायवलए केवतियं बाहल्लेणं पं० ?, गो० ! छक्कोसेणं बाहल्लेणं पं०, एवं एतेणं अभिलावेणं सक्करप्पभाए सतिभागे छक्कोसे बाहल्लेणं पं०, वालुयप्पभाए तिभागूणे सत्तकोसे बाहल्लेणं पं०, पंकप्पभाए पुढवीए सत्तकोसं बाहल्लेणं पं०, धूमप्पभाए सतिभागे सत्तकोसे तमप्पभाए तिभागूणे अट्ठकोसे बाहल्लेणं पं० अधेसत्तमाए पुढवीए अट्ठकोसे बाहल्लेणं पं०, इमीसे णं भंते ! रयणप्पभाए घणोदधिवलयस्स छज्जोयणबाहल्लस्स खेत्तच्छेदेणं छिज्जमाणस्स अत्थि दव्वाइं वण्णतो काल जाव हंता अत्थि, सक्करप्पभाए णं भंते ! पु० घणोदधिवलयस्स सतिभागछजोयणबाहल्लस्स खेत्तच्छेदेणं छिज्जमाणस्स जाव हंता अत्थि, एवं जाव अधेसत्तमाए जं जस्स बाहल्लं, इमीसे णं भंते ! रयणप्पभाए घणवातवलयस्स अद्धपंचमजोयणबाहल्लस्स खेत्तच्छेदेणं छिज्ज जाव हंता अत्थि, एवं जाव अहेसत्तमाए जं जस्स बाहल्लं, एवं तणुवायवलयस्सवि जाव अधेसत्तमा जं जस्स बाहल्लं, इमीसे णं भंते ! रयणप्पभाए पुढवीए घणोदधिवलए किंसंठिते पं० ?, गो० ! वट्ठे वलयागारसंठाणसंठिए पं० जेणं इमं रयणप्पभां पुढविं सव्वतो संपरिक्खिवित्ताणं चिट्ठंति, एवं जाव अधेसत्तमाए पु० घणोदधिवलए, णवरं अप्पणऽप्पणं पुढविं संपरिक्खिवित्ताणं चिट्ठंति, इमीसे णं रयणप्पभाए घणवातवलए किंसंठिते पं० ?, गो० ! वट्ठे वलयागारे तहेव जाव जेणं इमं रयणप्पभाए घणोदधिवलयं सव्वतो समंता संपरिक्खिवित्ताणं चिट्ठइ, एवं जाव अहेसत्तमाए घणवातवलए, इमीसे णं भंते ! रयणप्प० तणुवातवलए किंसंठिते पं० ?, गो० ! वट्ठे वलयागारसंठाणसंठिए जाव जेणं रयणप्पभाए घणवातवलयं सव्वतो समंता संपरिक्खिवित्ताणं चिट्ठइ, एवं जाव अधेसत्तमाए तणुवातवलए, इमा णं भंते ! रयणप्पभा केवतिआयामविक्रवंभेणं केवइयं परिक्रखेवेणं पं० ?, गो० ! असंखेज्जाइं जोयणसहस्साइं आयामविक्रवंभेणं असंखेज्जाइं जोयणसहस्साइं परिक्रखेवेणं जाव अधेसत्तमा, इमा णं भंते ! रयणप्पभाअंते य मज्झे य सव्वत्थ समा बाहल्लेणं पं० ?, हंता गो० ! इमा णं रयणप्पभा अंते य मज्झे य सव्वत्थ समा बाहल्लेणं, एवं अधेसत्तमा । ७७। इमीसे णं भंते ! रयणप्पभाए सव्वजीवा उववण्णपुव्वा सव्वजीवा उववण्णा ?, गो० ! इमीसे णं रयण० सव्वजीवा उववण्णपुव्वा नो चेव णं सव्वजीवा उव०, एवं जाव अहेसत्तमाए पुढवीए, इमा णं भंते ! रयण० सव्वजीवेहिं विजढपुव्वा सव्वजीवेहिं विजढा ?, गो० ! इमा णं रयण० सव्वजीवेहिं विजढपुव्वा नो चेव णं सव्वजीवविजढा, एवं जाव अधेसत्तमा, इमीसे णं भंते ! रयण० सव्वपोग्गला पविट्ठपुव्वा सव्वपोग्गला पविट्ठा ?, गो० ! इमीसे णं रयणप्पभापुढवीए सव्वपोग्गला पविट्ठपुव्वा नो चेव णं सव्वपोग्गला पविट्ठा, एवं जाव अधेसत्तमाए पुढवीए, इमा णं भंते ! रयणप्पभा पुढवी सव्वपोग्गलेहिं विजढपुव्वा सव्वपोग्गला विजढा ?, गो० ! इमा णं रयणप्पभा० सव्वपोग्गलेहिं विजढपुव्वा नो चेव णं सव्वपोग्गलेहिं विजढा, एवं जाव अधेसत्तमा । ७८। इमा णं भंते ! रयणप्पभापुढवीं किं सासया असासया ?, गो० ! सिय सासता सिय असासया, से केणट्ठेणं भंते ! एवं वुच्चइ-सिय सासया सिय (१५३) असासया ?, गो० ! दव्वट्ठयाए सासता वण्णपज्जवेहिं गंधपज्जवेहिं रसपज्जवेहिं फासपज्जवेहिं असासता. से तेणट्ठेणं गो० ! एवं वुच्चति-तं चेव जाव सिय असासता, एवं जाव अधेसत्तमा, इमा णं भंते ! रयणप्पभा० कालतो केवच्चिरं होइ ?, गो० ! न कयाई ण आसी ण कयाई णत्थि ण कयाई ण भविस्सति भुविं च भवइ य भविस्सति य धुवा णियया सासया अक्खया अव्वया अवट्ठित्ता णिच्चा, एवं जाव अधेसत्तमा । ७९। इमीसे णं भंते ! रयणप्पभाए पुढवीए उवरिल्लातो चरिमंतातो

हेट्टिल्ले चरिमंते एस णं केवतियं अबाधाए अंतरे पं० ?, गो० ! असिउत्तरं जोयणसतसहस्सं अबाधाए अंतरे पं०, इमीसे णं भंते ! रयणप्पभा० उवरिल्लातो चरिमंताओ खरस्स कंडस्स हेट्टिल्ले चरिमंते एस णं केवतियं अबाधाए अंतरे पं० ?, गो० ! सोलस जोयणसहस्साइं अबाधाए अंतरे पं०, इमीसे णं भंते ! रयणप्पभाए पुढवीए उवरिल्लातो चरिमंताओ रयणस्स कंडस्स हेट्टिल्ले चरिमंते एस णं केवतियं अबाधाए अंतरे पं० ?, गो० ! एक्कं जोयणसहस्सं अबाधाए अंतरे पं०, इमीसे णं भंते ! रयण० उवरिल्लातो चरिमंताओ वइरस्स कण्डस्स उवरिल्ले चरिमंते एस णं केवतियं अबाधाए अंतरे पं० ?, गो० ! एक्कं जोयणसहस्सं अंतरे पं०, इमीसे णं रयण० उवरिल्लाओ चरिमंताओ वइरस्स कंडस्स हेट्टिल्ले चरिमंते एस णं भंते ! केवतियं अबाधाए अंतरे पं० ?, गो० ! दो जोयणसहस्साइं अबाधाए अंतरे पं०, एवं जाव रिट्ठस्स उवरिल्ले पन्नरस जोयणसहस्साइं हेट्टिल्ले चरिमंते सोलस जोयणसहस्साइं, इमीसे णं भंते ! रयण० उवरिल्लाओ चरिमंताओ पंकबहुलस्स कंडस्स उवरिल्ले चरिमंते एस णं अबाधाए केवतियं अंतरे पं० ?, गो० ! सोलस जोयणसहस्साइं अबाधाए अंतरे पं०, हेट्टिल्ले चरिमंते एक्कं जोयणसयसहस्सं, आवबहुलस्स उवरि एक्कं जोयणसयसहस्सं हेट्टिल्ले चरिमंते असीउत्तरं जोयणसयसहस्सं, घणोदहि० उवरिल्ले असिउत्तरजोयणसयसहस्सं हेट्टिल्ले चरिमंते दो जोयणसयसहस्साइं, इमीसे णं भंते ! रयण० घणवातस्स उवरिल्ले चरिमंते० दो जोयणसयसहस्साइं हेट्टिल्ले चरिमंते असंखेज्जाइं जोयणसयसहस्साइं, इमीसे णं भंते ! रयण० तणुवातस्स उवरिल्ले चरिमंते असंखेज्जाइं जोयणसयसहस्साइं अबाधाए अंतरे हेट्टिल्लेवि असंखेज्जाइं जोयणसयसहस्साइं, एवं ओ वासंतरेवि, दोच्चाए णं भंते ! पुढवीए उवरिल्लातो चरिमंताओ हेट्टिल्ले चरिमंते एस णं केवतियं अबाधाए अंतरे पं० ?, गो० ! बत्तीसुत्तरं जोयणसयसहस्सं अबाधाए अंतरे पं०, सक्कर० उवरि घणोदधिसस्स हेट्टिल्ले चरिमंते बावणुत्तरं जोयणसयसहस्सं अबाधाए०, घणवातस्स असंखेज्जाइं जोयणसयसहस्साइं पं०, एवं जाव उवासंतरस्सवि, जावऽधेसत्तमाए णवरं जीसे जं बाहल्ल तेण घणोदधी संबधेतव्वो बुद्धीए सक्करप्पभाए अणुसारेणं, घणोदहिसहिताणं इमं पमाणं-तच्चाए णं भंते !० अडयालीसुत्तरं जोयणसतसहस्सं पंकप्पभाए पुढवीए चत्तालीसुत्तरं जोयणसयसहस्सं धूमप्पभाए अट्ठीसुत्तरं जोयणसतसहस्सं तमाए छत्तीसुत्तरं जोयणसतसहस्सं अधेसत्तमाए अट्ठावीसुत्तरं जोयणसतसहस्सं, जाव अधेसत्तमाए, एस णं भंते ! पुढवीए उवरिल्लातो चरिमंताओ उवासंतरस्स हेट्टिल्ले चरिमंते केवतियं अबाधाए अंतरे पं० ?, गो० ! असंखेज्जाइं जोयणसयसहस्साइं अबाधाए अंतरे पं० ।८०। इमा णं भंते ! रयणप्पभापुढवी दोच्चं पुढवीं पणिहाय बाहल्लेणं किं तुल्ला विसेसाहिया संखेज्जगुणा वित्थरेणं किं तुल्ला विसेसहीणा संखेज्जगुणहीणा ?, गो० ! इमा रयण० दोच्चं पुढवीं पणिहाय बाहल्लेणं नो तुल्ला विसेसाहिया नो संखेज्जगुणा वित्थारेणं नो तुल्ला विसेसहीणा णो संखेज्जगुणहीणा, दोच्चा णं भंते ! पुढवीं तच्चं पुढवि० बाहल्लेणं किं तुल्ला० ? एवं चेव भाणितव्वं एवं तच्चा चउत्थी पंचमी छट्ठी, छट्ठी णं भंते ! पुढवी सत्तमं पुढविं पणिहाय बाहल्लेणं किं तुल्ला विसेसाहिया संखेज्जगुणा ?, एवं चेव भाणियव्वं, सेवं भंते ! २ ☆☆☆ ।८१॥ चउविहपडिवत्तीए नेरइयउद्देसओ पढमो प्र० ३ना० १ उ० ॥ ☆☆☆ कइ णं भंते ! पुढवीओ पं० ?, गो० ? सत्त पुढवीओ पं० तं० रयणप्पभा जाव अहेसत्तमा, इमीसे णं रयण० असीउत्तरजोयणसयसहस्सबाहल्लाए उवरिं केवतियं ओगाहिता हेट्ठा केवइयं वज्जित्ता मज्झे केवतिए केवतिया निरयावाससयसहस्सा पं० ?, गो० ! इमीसे णं रयण० असीउत्तरजोयणसयसहस्सबाहल्लाए उवरिं एणं जोयणसहस्सं ओगाहिता हेट्ठावि एणं जोयणसहस्सं वज्जेत्ता मज्झे अडसत्तरी जोयणसयसहस्सा एत्थ णं रयणप्पभाए नेरइयाणं तीसं निरयावाससयसहस्साइं भवंतित्तिमक्खाया, ते णं णरगा अंतो वट्ठा बाहिं चउरंसा जाव असुभा णरएसु वेयणाएवं एएणं अभिलावेणं उवजुंजिऊण भाणियव्वं ठाणप्पयाणुसारेणं जत्थ जं बाहल्लं जत्थ जत्तिया वा नरयावाससयसहस्सा जाव अहेसत्तमाए पुढवीए, अहेसत्तमाए मज्झे केवतिए कति अणुत्तरा महइमहालता महाणिरया पं० ?, एवं पुच्छितव्वं वागरेयव्वं पि तहेव (प्र० छट्ठिसत्तमासु कावोयअगणिवन्नाभा भाणितव्वा) ।८२। इमीसे णं भंते ! रयणप्पभाए पुढवीए णरका किंसंठिया पं० ?, गो० ! दुविहा पं० तं० आवलियपविट्ठा

य आवलियबाहिरा य, तत्थ णं जे ते आवलियपविट्ठा ते तिविहा पं० तं० - वट्ठा तंसा चउरंसा, तत्थ णं जे ते आवलियबाहिरा ते णाणासंठाणसंठिया पं० तं० - अयकोट्टसंठिता पिट्ठपयणगं० कंडू ० लोही ० कडाह ० थाली ० पिहडग ० किमियडसंठिता किन्नपुडग ० उडव ० मुखसंठिता मुयंग ० नंदिमुयंगसंठिया आलिंगफ ० सुघोस ० दहरय ० पणव ० पडह ० भेरि ० झल्लरी ० कुतुंबक ० नालिसंठिया एवं जाव तमाए, अहेसत्तमाए, णं भंते ! पुढवीए णरका किंसंठिता पं० ?, गो ० ! दुविहा पं० तं० - वट्ठे य तंसा य, इमीसे णं भंते ! रयणप्पभाए पुढवीए नरका केवतियं बाहल्लेणं पं० ?, गो ० ! तिणिण जोयणसहस्साइं बाहल्लेणं पं० तं० - हेट्ठा घणा सहस्सं मज्झे झुसिरा सहस्सं उप्पिं संकुइया सहस्सं, एवं जाव अहेसत्तमाए, इमीसे णं भंते ! रयणप्प ० नरगा केवतियं आयामविक्रवंभेणं केवइयं परिक्रवेणं पं० ?, गो ० ! दुविहा पं० तं० - संखेज्जवित्थडा य असंखेज्जवित्थडा य, तत्थ णं जे ते संखेज्जवित्थडा ते णं संखेज्जाइं जोयणसहस्साइं आयामविक्रवंभेणं संखेज्जाइं जोयणसहस्साइं परिक्रवेणं पं०, तत्थ णं जे ते असंखेज्जवित्थडा ते णं असंखेज्जाइं जोयणसहस्साइं आयामविक्रवं ० असं ० जोयणसह ० परिक्रवेणं पं०, एवं जाव तमाए, अहेसत्तमाए णं भंते ! पुच्छा, गो ० ! दुविहा पं० तं० - संखेज्जवित्थडे य असंखेज्जवित्थडा य, तत्थ णं जे से संखेज्जवित्थडे से णं एक्कं जोयणसयसहस्सं आयामविक्रवंभेणं तिन्नि जोयणसयसहस्साइं सोलस सहस्साइं दोन्नि य सत्तावीसे जोयणसए तिन्नि कोसे य अट्ठावीसं च धणुसतं तेरस य अंगुलाइं अब्बंगुलयं च किंचिविसेसाधिए परिक्रवेणं पं०, तत्थ णं जे ते असंखेज्जवित्थडा ते णं असंखेज्जाइं जोयणसयसहस्साइं आयामविक्रवंभेणं असंखेज्जाइं जाव परिक्रवेणं पं० । ८३। इमीसे णं भंते रयणप्पभापुढवीए नरया केरिसया वण्णेणं पं० ?, गो ० ! काला कालावभासा गंभीरलोमहरिसा भीमा उत्तासणया परमकिण्हा वण्णेणं पं० एवं जाव अहेसत्तमाए, इमीसे णं भंते ! रयणप्पभाए पुढवीए णरका केरिसका गंधेणं पं० ?, गो ० ! से जहाणामए अहिमडेति वा गोमडेति वा सुणग ० वा मज्जार ० वा मणुस्स मडेति वा महिस ० वा मूसग ० वा आस ० वा हत्थि ० वा सीह ० वा वग्घ ० वा विग वा दीविय ० वा मयकुहियचिरविणट्ठकुणिमवावण्णदुब्धिगंधे असुइविलीणविगयबीभत्थदरिसणिज्जे किमिजालाउलसंसत्ते, भवे एयारूवे सिया ?, णो इणट्ठे, समट्ठे, गो ० ! इमीसे णं रयणप्पभाए पुढवीए णरगा एत्तो अणिट्ठतरका चेव अकंततरका चेव जाव अमणामतरा चेव गंधेणं पं०, एवं जाव अधेसत्तमाए पुढवीए, इमीसे णं भंते ! रयणप्प ० णरया केरिसया फासेणं पं० ?, गो ० ! से जहानामए असिपत्तेइ वा खुरपत्तेइ वा कलंबचीरियापत्तेइ वा सत्तग्गेइ वा कुंतग्गेइ वा तोमरग्गेइ वा नारायग्गेइ वा सूलग्गेइ वा लउलग्गेइ वा भिंडिमालग्गेइ वा सूचिकलावेति वा कवियच्छूति वा विंचुयकंटएति वा इंगालेति वा जालेति वा मुम्मुरेति वा अच्चित्ति वा अलाएति वा सुद्धागणीइ वा, भवे एतारूवे सिया ? णो तिणट्ठे समट्ठे, गो ० ! इमीसे णं रयणप्पभाए पुढवीए णरगा एत्तो अणिट्ठतरगा चेव जाव अमणामतरका चेव फासे णं पं०, एवं जाव अधेसत्तमाए पुढवीए । ८४। इमीसे णं भंते ! रयणप्पभाए पुढवीए नरका केमहालिया पं० ?, गो ० ! अयणं जंबुद्दीवे दीवे सव्वदीवसमुद्धानं सव्वब्भंतरए सव्वखुइडाए वट्ठे तेल्लापूवसंठाणसंठिते वट्ठे रथचक्रवालसंठाणसंठिते वट्ठे पुक्खरकणियासंठाणसंठिते वट्ठे पडिपुणचंदसंठाणसंठिते एक्कं जोयणसतसहस्सं आयामविक्रवंभेणं जाव किंचिविसेसाधिए परिक्रवेणं देवे णं महिइढीए जाव महाणुभागे जाव इणायेवत्तिकट्टु इमं केवलकप्पं जंबुद्दीवं दीवं तीहिं अच्छरानिवाएहिं तिसत्तक्खुत्तो अणुपरियट्ठित्ताणं हव्वमागच्छेज्जा, से णं देवे ताए उक्किट्ठाए तुरिताए चवलाए चंडाए सिग्घाए उद्धुयाए जयणाए छेगाए दीघाए दिव्वगीए वीतिवयमाणे २ जहण्णेणं एगाहं वा दुयाहं वा तिआहं वा उक्को ० छम्मासेणं वीतिवएज्जा, अत्थेगतिए वीइवएज्जा अत्थेगतिए नो वीतिवएज्जा, एमहालता णं गो ० ! इमीसे णं रयणप्पभाए पुढवीए णरगा पं०, एवं जाव अधेसत्तमाए णवरं अधेसत्तमाए अत्थेगतियं नरगं वीइवइज्जा अत्थेगइए नरगे नो वीतिवएज्जा । ८५। इमीसे णं भंते ! रयणप्पभाए पुढवीए णरगा किंमया पं० ?, गो ० ! सव्ववइरामया पं०, तत्थ णं नरएसु बहवे जीवा य पोग्गला य अवक्कमंति विउक्कमंति चयंति उववज्जंति सासता णं ते णरगा दव्वट्ठयाए वण्णपज्जवेहिं गंध ० रस ० फास ० असासया एवं जाव अहेसत्तमाए । ८६। इमीसे णं भंते ! रयणप्पभाए पुढवीए नेरइया कतोहिंतो उवव ० किं असण्णीहिंतो उव ० सरीसिवेहिंतो उव ० पक्खिहिंतो उव ० चउप्पएहिंतो उव ० उरगेहिंतो उव ० इत्थियाहिंतो उव ० मच्छमणुएहिंतो उव ०?, गो ० ! असण्णीहिंतो उव ० जाव मच्छमणुएहिंतोवि उव ०

‘अस्सण्णी खलु पढमं दोच्चं च सरीसिवा ततिय पक्खी । सीहा जंति चउत्थीं उरगा पुण पंचमीं जंति ॥८॥ छट्ठिं च इत्थियाओ मच्छा मणुया य सत्तमिं जंति । जाव अधेसत्तमाए पुढवीए नेरइया णो असण्णीहिंतो उवव ० जाव णो इत्थियाहिंतो उवव ० मच्छमणुस्सेहिंतो उवव ०, इमीसे णं भंते ! रयणप्पभाए ० णेरतिया एकसमएणं केवतिया उवव ० ?, गो ० ! जह ० एक्को वा दो वा तिन्नि वा उक्कोसेणं असंखिज्जा वा उववज्जंति, एवं जाव अधेसत्तमाए, इमीसे णं भंते ! रयणप्पभाए पुढवीए णेरतिया समए २ अवहीरमाणा २ केवतिकालेणं अवहिता सिता ?, गो ० ते णं असंखेज्जा समए २ अवहीरमाणा २ असंखेज्जाहिं उस्सप्पिणीहिं अवहीरंति नो चेव णं अवहिता सिता जाव अधेसत्तमा, इमीसे णं भंते ! रयणप्प ० णेरतियाणं केमहालिया सरीरोगाहणा पं ० ?, गो ० ! दुविहा सरीरोगाहणा पं ० तं ०-भवधारणिज्जा य उत्तरवेउव्विया य, तत्थ णं जा सा भवधारणिज्जा सा जह ० अंगुलस्स असंखेज्जतिभागं उक्को ० सत्त धणूइं तिण्णि य रयणीओ छच्च अंगुलाइं, तत्थ णं जा सा उत्तरवेउव्विया सा जह ० अंगुलस्स संखेज्जतिभागं उक्को ० पण्णरस धणूइं अइढाइज्जातो रयणीओ, दोच्चाए भवधारणिज्जा जहण्णओ अंगुलासंखेज्जभागं उक्को ० पण्णरस धणूइं अइढाइज्जातो रयणीओ उत्तरवेउव्विया जह ० अंगुलस्स संखेज्जभागं उक्को ० एकतीसं धणूइं एक्का रयणी तच्चाए भवधारणिज्जे एकतीसं धणू एक्का रयणी उत्तरवेउव्विया बासट्ठिं धणूइं दोण्णि रयणीओ चउत्थीए भवधारणिज्जे बासट्ठं धणूइं दोण्णि य रयणीओ उत्तरवेउव्विया पणवीसं धणुसयं पंचमीए भवधारणिज्जे पणवीसं धणुसयं उत्तरवे ० अइढाइज्जाइं धणुसयाइं छट्ठीए भवधारणिज्जा अइढाइज्जाइं धणुसयाइं उत्तरवेउव्विया पंचधणुसयाइं सत्तमाए भवधारणिज्जा पंचधणुसयाइं उत्तरवेउव्विया धणुसहस्सं ॥८७॥ इमीसे णं भंते ! रयणप्पभा ० णेरइयाणं सरीरया किंसंघयणी पं ० ?, गो ० ! छण्हं संघयणाणं असंघयणी णेवट्ठी णेव छिरा णवि ण्हारू णेव संघयणमत्थि जे पोग्गला अणिट्ठा जाव अमणामा ते तेसिं सरीरसंघायत्ताए परिणमंति एवं जाव अधेसत्तमाए, इमीसे णं भंते ! रयण ० नेरतियाणं सरीरा किंसंठिता पं ० ?, गो ० ! दुविहा पं ० तं ०-भवधारणिज्जा य उत्तरवेउव्विया य, तत्थ णं जे ते भवधारणिज्जा ते हुंडसंठिया पं ०, तत्थ णं जे ते उत्तरवेउव्विया तेवि हुंडसंठिता पं ० एवं जाव अहेसत्तमाए. इमीसे णं भंते ! रयण ० णेरतियाणं सरीरया केरिसता वण्णेणं पं ० ?, गो ० ! काला कालोभासा जाव परमकिण्हा वण्णेणं पं ० एवं जाव अहेसत्तमाए, इमीसे णं भंते ! रयण ० नेरइयाणं सरीरया केरिसया गंधेणं पं ० ?, गो ० ! से जहानामए अहिमडेइ वा तं चेव जाव अहेसत्तम ०, इमीसे णं रयण ० नेरइयाणं सरीरया केरिसया फासेणं पं ० ?, गो ० ! फुडितच्छविविच्छविया खरफरुसझामझुसिरा फासेणं पं ०, एवं जाव अधेसत्तमाए ॥८८॥ इमीसे णं भंते ! रयणप्पभाए पुढवीए णेरतियाणं केरिसया पोग्गला ऊसासत्ताए परिणमंति ?, गो ० ! जे पोग्गला अणिट्ठा जाव अमणामा ते तेसिं ऊसासत्तमाए परिणमंति एवं जाव अहेसत्तमाए, एवं आहारस्सवि, सत्तसुवि, इमीसे णं भंते ! रयण ० नेरतियाणं कति लेसाओ पं ० ?, गो ० ! एक्का काउलेसा पं ० एवं सक्करप्पभाएऽवि, वालुयप्पभाए पुच्छा दो लेसाओ पं ० तं ०-नीललेसा कापोतलेसा य, तत्थ जे काउलेसा ते बहुतरा जे णीललेस्सा ते थोवा, पंकप्पभाए पुच्छा, एक्का नीललेसा, धूमप्पभाए पुच्छा, गो ० ! दो लेसाओ पं ० तं ०-किण्हलेस्सा य नीललेस्सा य, तत्थ ते बहुतरका जे नीललेस्सा ते थोवरतका जे किण्हलेसा, तमाए पुच्छा, गो ० ! एक्का किण्हलेस्सा, अधेसत्तमाए एक्का परमकिण्हलेस्सा, इमीसे णं भंते ! रयण ० नेरइया किं सम्मादिट्ठी मिच्छादिट्ठी सम्मामिच्छादिट्ठी ?, गो ० ! सम्मादिट्ठीवि मिच्छादिट्ठीवि सम्मामिच्छादिट्ठीवि, एवं जाव अहेसत्तमाए, इमीसे णं भंते ! रयण ० णेरतिया किं नाणी अण्णाणी ?, गो ० ! णाणीवि अण्णाणीवि, जे णाणी ते णियमा तिणाणी, तं ०-आभिणिबोधितणाणी सुयणाणी अवधिणाणी, जे अण्णाणी ते अत्थेगतिया दुअण्णाणी अत्थेगइया तिअन्नाणी, जे दुअन्नाणी ते णियमा मतिअन्नाणी य सुयअण्णाणी य, जे तिअन्नाणी ते नियमा मतिअण्णाणी सुयअण्णाणी विभंगणाणी (सक्करपभापुढवीनेरइया किं नाणी अन्नाणी ?, गो ० ! नाणीवि अन्नाणीवि, जे नाणी ते नियमा तिन्नाणी आभि ० सुय ० ओहि ०, जे अन्नाणी ते नियमा तिअन्नाणी मतिअन्नाणी सुअअ ० विभंगनाणी, एवं पा ०) सेसा णाणीवि अण्णाणीवि तिण्णि जाव अधेसत्तमाए, इमीसे णं भंते ! रयण ० किं मणजोगी वइजोगी कायजोगी ?, तिण्णिवि, एवं जाव अहेसत्तमाए, इमीसे णं भंते ! रयणप्पभापु ० नेरइया किं सागारोवउत्ता अणागारोवउत्ता ?, गो ० ! सागारोवउत्तावि अणागारोवउत्तावि, एवं जाव अहेसत्तमाए पुढवीए, इमीसे णं भंते ! रयणप्प ०

नेरइया ओहिणा केवतियं खेतं जाणंति पासंति ?, गो० ! जह० अहुट्ठगाउताइं उक्को० चत्तारि गाउयाइं, सक्करप्पभापु० जह० तित्ति गाउयाइं अद्धुट्ठाइं, एवं अद्धगाउयं परिहायंति जाव अधेसत्तमाए जह० अद्धगाउयं उक्को० गाउयं, इमीसे णं भंते ! रयणप्पभाए पुढवीए नेरतियाणं कति समुग्घाता पं० ?, गो० ! चत्तारि समुग्घाता पं० तं०-वेदणासमुग्घाए कसायसमुग्घाए मारणंतियसमुग्घाए वेउव्वियसमुग्घाए, एवं जाव अहेसत्तमाए ।८९। इमीसे णं भंते ! रयणप्पभा० नेरतिया केरिसयं खुहप्पिवासं पच्चणुभवमाणा विहरंति ?, गो० ! एगमेगस्स णं रयणप्पभापुढविनेरतियस्स असब्भावपट्टवणाए सव्वोदधी वा सव्वपोग्गले वा आसगंसि पक्खिवेज्जा णो चेव णं से रयणप्प० णेरतिए तित्ते वा सिता वितण्हे वा सिता एरिसया णं गो० ! रयणप्पभाए णेरतिया खुधप्पिवासं पच्चणुभवमाणा विहरंति, एवं जाव अधेसत्तमाए, इमीसे णं भंते ! रयणप्पभाए० नेरतिया किं एकत्तं पभू विउव्वित्तए पुहुत्तंपि पभू विउव्वित्तए ?, गो० ! एगत्तंपि पभू पुहुत्तंपि पभू विउव्वित्तए, एगत्तं विउव्वेमाणा एगं महं मोग्गरखूवं वा एवं मुसुंढिकरवत्तअसिसत्तीहलगतामुसलचक्कणारायकुंततोमरसूललउडभिंडमालखूवं वा पुहुत्तं विउव्वेमाणा मोग्गरखूवाणि वा जाव भिंडमालखूवाणि वा ताइं संखेज्जाइं णो असंखेज्जाइं संबद्धाइं नो असंबद्धाइं सरिसाइं नो असरिसाइं विउव्वंति ता अणमणणस्स कायं अभिहणमाणा २ वेयणं उदीरंति उज्जलं विउलं पगाढं कक्कसं कडुयं फरूंसं निट्ठुरं चंडं तिव्वं दुक्खं दुग्गं दुरहियासं एवं जाव धूमप्पभाए पुढवीए, छट्ठसत्तमासु णं पुढवीसु नेरइया बहू महंताइं लोहियकुंथुरूवाइं वइरामयतुंडाइं गोमयकीडसमाणाइं विउव्वंति ता अन्नमन्नस्स कायं समतुरंगेमाणा २ खायमाणा २ सयपोरागकिमियाविव चालेमाणा २ अंतो अंतो अणुप्पविसमाणा २ वेदणं उदीरंति उज्जलं जाव दुरहियासं, इमीसे णं भंते ! रयणप्प० नेरइया किं सीतवेदणं वेइंति उसिणवेदणं वेइंति सीओसिणवेदणं वेदंति ?, गो० ! णो सीयं वेदणं वेदंति उसिणं वेदणं वेदंति नो सीतोसिणं एवं जाव वालुयप्पभाए, पंकप्पभाए पुच्छा, गो० ! सीयंपि वेदणं उसिणंपि वेयणं० नो सीओसिणवेयणं वेयंति, ते बहुतरगा जे उसिणं वेदणं वेदंति ते थोवयरगा जे सीतं वेदणं वेइंति, धूमप्पभाए पुच्छा, गो० ! सीतंपि वेदणं वेदंति उसिणंपि वेदणं वेदंति णो सीतो०, ते बहुतरगा जे सीयवेदणं वेदंति ते थोवयरका जे उसिणवेदणं वेदंति, तमाए पुच्छा, गो० ! सीयं वेदणं वेदंति नो उसिणं वेदणं वेदंति नो सीतोसिणं वेदणं वेदंति, एवं अहेसत्तमाए णवरं परमसीयं, इमीसे णं भंते ! रयणप्प० नेरइया केरिसयं णिरयभवं पच्चणुभवमाणा विहरंति ?, गो० ! ते णं तत्थ णिच्चं भीता णिच्चं तसिता णिच्चं छुहिया णिच्चं उव्विग्गा निच्चं उपप्पुआ णिच्चं वहिया निच्चं परममसुभमउलमणुबद्धं निरयभवं पच्चणुभवमाणा विहरंति एव जाव अधेसत्तमाए २ णं पुढवीए पंच अणुत्तरा महतिमहालया महानरगा पं० तं०-काले महाकाले रोरूए महारोरूए अप्पतिट्ठाणे, तत्थ इमे पंच महापुरिसा अणुत्तरेहिं दंडसमादाणेहिं कालमासे कालं किच्चा अप्पतिट्ठाणे णरए णेरतियत्ताए उववण्णा तं०-रामे जमदग्गिपुत्ते दढाऊ लेच्छतिपुत्ते वसु उवरिचरे सुभूमे कोरव्वे बंभदत्ते चुल्लणिसुते, ते णं तत्थ नेरतिया जाया काला कालो० जाव परमकिण्हा वण्णेणं पं० तं० चेव, ते णं तत्थ वेदणं वेदंति उज्जलं विउलं जाव दुरहियासं, उसिणवेदणिज्जेसु णं भंते ! णेरतिएसु णेरतिया केरिसयं उसिणवेदणं पच्चणुभवमाणा विहरंति, गो० ! से जहाणामए कम्मरदारए सिता तरूणे बलवं जुगवं अप्पायंके थिरग्गहत्थे दढपाणिपादपासपिट्ठंतरोरूंसंघायपरिणए लंघणपवणजवणवग्गणपमद्दणवायामसमत्थे तलजमलजुयलबहुफलहणिभबाहू घणणिचितवलियवट्ठखंधे चम्मेट्ठगदुहणमुट्ठियसमाहयणिचितगतगत्ते उरस्सबलसमण्णागए छेए दक्खे पट्ठे कुसले णिउणे मेहावी णिउणसिप्पोवगए एगं महं अयपिंडंउदगवारसमाणं गहाय तं ताविय २ कोट्ठित २ उब्भिंदिय २ चुण्णिय २ जाव एगाहं वा दुयाहं वा तियाहं वा उक्को० अद्धमासं संहणेज्जा, से णं तं सीतं सीतीभूतं अओमएणं संदंसएणं गहाय असब्भावपट्टवणाए उसिणवेदणिज्जेसु णरएसु पक्खिवेज्जा से णं तं उम्मिसियणिमिसियंतरेणं पुणरवि पच्चुद्धरिस्सामित्तिकट्ठ पविरायमेव पासेज्जा पविलीणमेव पासेज्जा पविद्धत्थमेव पासिज्जा णो चेव णं संचाएति अविरायं वा अविलीणं वा अविद्धत्थं वा पुणरवि पच्चुद्धरित्तए, से जहा वा मत्तमातंगे (पाए) कुंजरे सट्ठिहायणे पढमसरयकालसमतंसि वा चरमनिदाघकालसमयंसि वा उण्हाभिहए तण्हाभिहए दवग्गिजालाभिहए आउरे सुसिए पिवासिए दुब्बले किलंतंते एक्कं महं पुक्खरिणिं पासेज्जा, चाउक्कोणं समतीरं अणुपुव्वसुजायवप्पगंभीरसीतलजलं संछण्णपत्तभिसमुणालं बहुउप्पलकु मुदणलिणसुभगसोगंधियपुंडरीयमहा-

पुंडरीयसयपत्तसहस्सपत्तके सरफुल्लोवचियं छप्पयपरिभुज्जमाणकमलं अच्छविमलसलिलपुण्णं परिहत्थभमंतमच्छकच्छभं
 अणेगसउणगणमिहुणयविरइयसद्दुत्तइयमहुरसरनाइयं तं पासइ त्ता तं ओगाहइ त्ता से णं तत्थ उण्हंपि पविणेज्जा तण्हंपि पविणेज्जा खुहंपि पविणेज्जा जरंपि पविं
 दाहंपि पविं णिद्वाएज्ज वा पयलाएज्ज वा सतिं वा रतिं वा धितिं वा मतिं वा उबलभेज्जा, सीए सीयभूए संकसमाणे २ सायासोक्खबहुले यावि विहरिज्जा, एवामेव
 गो० ! असब्भावपट्टवणाए उसिणवेयणिज्जेहिंतो णरएहिंतो णेरइए उव्वट्टिए समाणे जाइं इमाइं मणुस्सलोयंसि भवन्ति गोलियालिंगाणि वा सोडियालिंगाणि वा
 भिंडियालिंगाणि वा अयागराणि वा तंबागराणि वा तउया० सीसा० रूप्पा० सुवन्नागराणि वा हिरण्णागराणि वा कुंभारागणीइ वा मुसागणी वा इट्टयागणी वा
 कवेल्लुयागणी वा लोहारंवरिसेइ वा जंतवाडचुल्ली वा हंडियलित्थाणि वा सोडियलि० णलागणीति वा तिलागणी वा तुसागणीति वा तत्ताइं समज्जोतीभूयाइं
 फुल्लकिंसुयसमाणाइं उक्कासहस्साइं विणिम्मयमाणाइं जालासहस्साइं पमुच्चमाणाइं इंगालसहस्साइं पविक्खिरमाणाइं अंतो २ हुहुयमाणाइं चिट्ठंति ताइं पासइ
 त्ता ताइं ओगाहइ त्ता से णं तत्थ उण्हंपि पविणेज्जा तण्हंपि पविणेज्जा खुहंपि पविणेज्जा जरंपि पविणेज्जा दाहंपि पविणेज्जा णिद्वाएज्ज वा पयलाएज्ज वा सतिं वा रतिं
 वा धिइं वा मतिं वा उबलभेज्जा. सीए सीयभूए संकसमाणे २ सायासोक्खबहुले यावि विहरेज्जा. भवे एयारूवे सिया ? . णो इणट्ठे समट्ठे. गो० ! उसिणवेदणिज्जेसु
 णरएसु नेरतिया एत्तो अणिट्ठतरियं चेव० उसिणवेदणं पच्चणुभवमाणा विहरंति, सीयवेदणिज्जेसु णं भंते ! णिरएसु णेरतिया केरिसयं सीयवेदणं पच्चणुभवमाणा
 विहरंति ? . गो० ! से जहाणामए कम्मरदारएसिया तरूणे जुगवं बलवं जाव सिप्पोवगते एगं महं अयपिंडं दगवारसमाणं गहाय ताविय २ कोट्टिय २ जह० एक्काहं
 वा दुआहं वा तियाहं वा उक्को० मासं हणेज्जा से णं तं उसिणं उसिणभूतं अयोमएणं संदंसएणं गहाय असब्भावपट्टवणाए सीयवेदणिज्जेसु णरएसु पक्खिवेज्जा से तं
 उम्मिसियनिमिसियंतरेण पुणरवि पच्चुद्धरिस्सामीतिकट्टु पविरायमेव० पासेज्जा. तं चेव णं जाव णो चेव णं संचाएज्जा पुणरवि पच्चुद्धरित्तए. से णं से जहाणामए
 मत्तमायंगे तहेव जास सोक्खबहुले यावि विहरेज्जा एवामेव गो० ! असब्भावपट्टवणाए सीतवेदणेहिंतो णरएहिंतो नेरतिए उव्वट्टिए समाणे जाइं इमाइं इहं माणुस्सलोए
 हवंति तं०-हिमाणि वा हिमपुंजाणि वा हिमपडलाणि वा हिमपडलपुंजाणि वा तुसाराणि वा तुसारपुंजाणि वा हिमकुंडाणि वा हिमकुंडपुंजाणि वा सीताणि वा. ताइं
 पासति त्ता ताइं ओगाहति त्ता से णं तत्थ तिसंपि पविणेज्जा तण्हंपि प० खुहंपि प० जरंपि प० दाहंपि प० निद्वाएज्ज वा पयलाएज्ज वा जाव उसिणे उसिणभूए
 संकसमाणे २ सायासोक्खबहुले यावि विहरेज्जा. गो० ! सीयवेयणिज्जेसु नरएसु नेरतिया एत्तो अणिट्ठयरियं चेव० सीतवेदणं पच्चणुभवमाणा विहरंति । ९०। इमीसे
 णं भंते ! रयणप्पभाए० णेरतियाणं केवतियं कालं ठिती पं० ? , गो० ! जहण्णेणवि उक्कोसेणवि ठिती भाणितव्वा जाव अधेसत्तमाए । ९१। इमीसे णं भंते ! रयणप्पभाए
 णेरतिया अणंतरं उव्वट्टिय कहिं गच्छति कहिं उववज्जंति किं नेरतिएसु उववज्जंति किं तिरिक्खजोणिएसु उववज्जंति ? , एवं उव्वट्टणा भाणितव्वा जहा वक्कंतीए तहा
 इहवि जाव अहेसत्तमाए । ९२। इमीसे णं भंते ! रयण० नेरतिया केरिसयं पुढविफासं पच्चणुभवमाणा विहरंति ? . गो० ! अणिट्ठं जाव अमणामं एवं जाव अहेसत्तमाए.
 इमीसे णं भंते ! रयणप्पभाए नेरइया केरिसयं आउफासं पच्चणुभवमाणा विहरंति ? , गो० ! अणिट्ठं जाव अमणामं, एवं जाव अहेसत्तमाए, एवं जाव वणप्फतिफासं
 अधेसत्तमाए पुढवीए. इमा णं भंते ! रयणप्पभापुढवी दोच्चं पुढवि पणिहाय सव्वमहंतिया बाहल्लेणं खुड्डिया सव्वंतेसु. हंता गो० ! इमा णं रयणप्पभापुढवी दोच्चं
 पुढवीं पणिहाय जाव सव्वक्खुड्डिया सव्वंतेसु. दोच्चा णं भंते ! पुढवी तच्चं पुढविं पणिहाय सव्वमहंतिया बाहल्लेणं पुच्छा. हंतागो० ! , दोच्चा पुढवी जाव सव्वक्खुड्डिया
 सव्वंतेसु, एवं एएणं अभिलावेणं जाव छट्ठिता पुढवी अहेसत्तमं पुढविं पणिहाय सव्वक्खुड्डिया सव्वंतेसु । ९३। इमीसे णं भंते ! रयणप्पभाए तीसाए
 नरयावाससयसहस्सेसु इक्कमिक्कंसि निरयावासंसि सव्वे पाणा सव्वे भूया सव्वे जीवा सव्वे सत्ता पुढवीकाइयत्ताए जाव वणस्सइकाइयत्ताए नेरइयत्ताए उववन्नपुव्वा ? ,
 हंता गो० ! असतिं अदुवा अणंतखुत्तो एवं जाव अहेसत्तमाए पुढवीए णवरं जत्थ जत्तिया णरका, इमीसे णं भंते ! रयणप्पभाए० निरयपरिसामंतेसु जे पुढविकाइया
 जाव वणप्फतिकाइया ते णं भंते ! जीवा महाकम्मतरा चेव महाकिरियतरा चेव महाआसवतरा चेव महावेयणतरा चेव ? , हंता गो० ! इमीसे णं भंते ! रयणप्पभाए

पुढवीए निरयपरिसामंतेसु तं चेव जाव महावेदणतरका चेव०. एवं जाव अधेसत्तमा ।९४। पुढवीं ओगाहिता नरगा संठाणमेव बाहल्लं । विक्खंभपरिक्खेवो वण्णो गंधो य फासो य ॥९॥ तेसिं महालयाए उवमा देवेण होइ कायव्वा । जीवा य पोग्गला वक्कमंति तह सासया निरया ॥१०॥ उववायपरीमाणं अवहारूच्चत्तमेव संघयणं । संठाणवण्णगंधा फासा ऊसासमाहारे ॥११॥ लेसा दिट्ठी नाणे जोगुवओगे तहा समुग्घाये । तत्तो खुहापिवासा विउव्वणा वेयणा य भए ॥१२॥ उववाओ पुरिसाणं ओवम्मं वेयणाइ दुविहाए । उव्वट्ठण पुढवीओ उववाओ सव्वजीवाणं ॥१३॥ एयाओ संगहणिगाहाओ ।९५॥

☆☆☆चउविहपडिवत्तीए बीओ उद्देसो प्र० ३ ना० २ उ० ॥ ☆☆☆ इमीसे णं भंते ! रयणप्पभाए पुढवीए नेरतिया केरिसयं पोग्गलपरिणामं पच्चणुभवमाणा विहरंति ? गो० ! अणिट्ठं जाव अमणामं एवं जाव अहेसत्तमाए (प्र० एवं नेयव्वं 'पुग्गलपरिमाणे वेदणा य लेसा य णामगोए य । अरती भए य सोगे खुहा पिवासा य वाही य ॥१॥ उस्सासे अणुतावे कोहे माणे य माय लोभे य । चत्तारि य सन्नाओ नेरइयाणं तु परिमाणं ॥२॥) 'एत्थ किर अतिवयंती नरवसभा केसवा जलचरा य । मंडलिया रायाणो जे य महारंभकोडुंबी ॥१४॥ भिन्नमुहुत्तो नरएसु होति (१५४) तिरिय (ए) मणुएसु (य) चत्तारि । देवसु अब्भमासो उक्कोस विउव्वणा भणिया ॥१५॥ जे पोग्गला अणिट्ठा नियमा सो तेसिं होइ आहारो । संठाणं तु जहणं नियमा हुंडं तु नायव्वं ॥१६॥ असुभा विउव्वणा खलु नेरइयाणं तु होइ सव्वेसिं । वेउव्वियं सरीरं असंघयणं हुंडसंठाणं ॥१७॥ अस्साओ उववण्णो अस्साओ चेव चयइ निरयभवं । सव्वपुढवीसु जीवो सव्वेसु ठिइविसेसेसुं ॥१८॥ उववाएण व सायं नेरइओ देवकम्मणा वावि । अज्झवसाणनिमित्तं अहवा कम्माणुभावेणं ॥१९॥ नेरइयाणुप्पाओ उक्कोसं पंच जोयणसयाइं । दुक्खेणभिद्दुयाणं वेयणसयसंपगाढाणं ॥२०॥ अच्छिनिमीलियमेत्तं नत्थि सुहं दुक्खमेव पडिबद्धं । नरए नेरइयाणं अहोनिंसं पच्चमाणाणं ॥२१॥ तेयाकम्मसरीरा सुहुमसरीरा य जे अपज्जत्ता । जीवेण मुक्कमेत्ता वच्चंति सहस्ससो भेयं ॥२२॥ अतिसीतं अतिउण्हं अतितण्हा अतिखुहा अतिभयं वा । निरए नेरइयाणं दुक्खसयाइं अविस्सामं ॥२३॥ एत्थ य भिन्नमुहुत्तो पोग्गल असुहा य होइ अस्साओ । उववाओ उप्पाओ अच्छि सरीरा उ बोद्धव्वा ॥२४॥

☆☆☆ नारयउद्देसओ तइओ, से तं नेरतिया ।९६॥ प्र० ३ ना० ३ उ० ॥ ☆☆☆ से किं तं तिरक्खजोणिया ?, २ पंचविधा पं० तं०-एगिंदियतिरिक्खजोणिया बेइंदिय० तेइंदिय० चउरिंदिय० पंचिंदियतिरिक्खजोणिया य, से किं तं एगिंदियतिरिक्खजोणिया ?, २ पंचविहा पं० तं०-पुढविकाइयएगिंदिय० जाव वणस्सइकाइयएगिंदिय०, से किं तं पुढविकाइयएगिंदियतिरिक्खजोणिया ?, २ दुविहा पं० तं०-सुहुमपुढविकाइय० बादरपुढविकाइयएगिंदिय०, से किं तं सुहुमपुढविकाइयएगिंदियतिरि० ?, २ दुविहा पं० तं०-पज्जत्तसुहुम० अपज्जत्तसुहुम०, से तं सुहुम०, से किं तं बादरपुढवीकाइयं० ?, २ दुविहा पं० तं०-पपज्जत्तबादरपु० अपज्जत्तबादरपु०, से तं बायरपुढवी काइयएगिंदिय०, से तं पुढविकाइयएगिंदिय०, से किं तं आउक्काइयएगिंदिय० ?, २ दुविहा पं० तं०-एवं जहेव पुढवीकाइयाणं तहेव, वाउकायभेदो एवं, जाव वणस्सतिकाइया, से तं वणस्सइकाइयएगिंदियतिरिक्ख०, से किं तं बेइंदियतिरिक्ख० ?, २ दुविधा पं० तं०-पज्जत्तकबेइंदियति० अपज्जत्तबेइंदियति०, से तं बेइंदियतिरि०, एवं जाव चउरिंदिया, से किं तं पंचेदियतिरिक्खजोणिया ?, २ तिविहा पं० तं०-जलयरपंचेदिय० थलयरपंचेदिय० खहयरपंचेदिय०, से किं तं जलयरपंचेदियतिरिक्खजोणिया ?, २ दुविहा पं० तं०-संमुच्छिमजलयरपंचेदिय० य गब्भवक्कंतियजलयरपंचिंदिय०, से किं तं संमुच्छिमजलयर० तिरिक्खजोणिया ?, २ दुविहा पं० तं०-पज्जत्तगसंमुच्छिम० अपज्जत्तयसंमुच्छिम०, सेत्तं जलयरा, से तं संमुच्छिम० पंचिंदियतिरिक्ख० से किं तं गब्भवक्कंतियजलयरपंचेदियतिरिक्खजोणिया ?, २दुविधा पं० तं०-पज्जत्तगब्भवक्कंतिय० अपज्जत्तगब्भ०, से तं गब्भवक्कंतियजलयरपंचेदियतिरि०, सेत्तं जलयरपंचेदियतिरि०, से किं तं थलयरपंचेदियतिरिक्खजोणिता ?, २ दुविधा पं० तं०-चउप्पयथलयरपंचेदिय० परिसप्पथलयरपंचेदिय०, से किं तं चउप्पदथलयरपंचिंदिय० ?, २ दुविहा पं० तं०-संमुच्छिमचउप्पयथलयर० गब्भवक्कंतियचउप्पयथलयर० य जहेव जलयराणं तहेव चउक्कतो भेदो, सेत्तं चउप्पदथलयरपंचेदिय०, से किं तं परिसप्पथलयरपंचेदियतिरिक्ख० ?, २ दुविहा

[illegible]

समणुपेहिज्जमाणा एवं समणुचिंतिज्जमाणा एएसु चेव दोसु काएसु समोयरंति, तं०-तसकाए चेव थावरकाए चेव, एवामेव सपुव्वावरेणं आजीवियदिट्ठतेणं चउरासीती जातिकुलकोडीजोणीपमुहसतसहस्सा भवंतीति मक्खाया ।९९। अत्थि णं भंते । विमाणाइं सोत्थियाणि सोत्थियावत्ताइं सोत्थियपभाइं सोत्थियकन्ताइं सोत्थियवन्नाइं सोत्थियलेसाइं सोत्थियज्झयाइं सोत्थियसिंगाइं सोत्थियकूडाइं सोत्थियसिद्धाइं सोत्थुत्तरवडिंसगाइं ?, हंता अत्थि, ते णं भंते ! विमाणा केमहालता पं० ?, गो० ! जावतिएणं सूरिए उदेति जावइएणं च सूरिए अत्थमति एवतिया तिण्णोवासंतराइं अत्थेगतियस्स देवस्स एगे विक्कमे सिता, से णं देवे ताए उक्किट्ठाए तुरियाए जाव दिव्वाए देवगतीए वीतीवयमाणे २ जाव एकाहं वा दुयाहं वा उक्को० छम्मासा वीतीवएज्जा अत्थेगतिया विमाणं वीतीवइज्जा अत्थेगतिया विमाणं नो वीतीवएज्जा, एमहालता णं गो० ! ते विमाणा पं०, अत्थि णं भंते ! विमाणाइं अच्चीणि अच्चिरावत्ताइं तहेव जाव अच्चुत्तरवडिंसगातिं ?, हंता अत्थि, ते विमाणा केमहालता पं० ?, गो० ! एवं जहा सोत्थि (याई) णि णवरं एवतियाइं पंच उवासंतराइं अत्थेगतियस्स देवस्स एगे विक्कमे सिता सेसं तं चेव, अत्थि णं भंते ! विमाणाइं कामाइं कामावत्ताइं जाव कामुत्तरवडिंसयाइं ?, हंता अत्थि, ते णं भंते ! विमाणा केमहालता पं० ?, गो० ! जहा सोत्थियाईणि णवरं सत्त उवासंतराइं विक्कमे सेसं तहेव, अत्थि णं भंते ! विमाणाइं विजयाइं वेजयंताइं जयंताइं अपराजिताइं ?, हंता अत्थि, ते णं भंते ! विमाणा के० ?, गो० ! जावतिए सूरिए उदेइ एवइयाइं नव ओवासंतराइं सेसं तं चेव, नो चेव णं ते विमाणे वीइवएज्जा, एमहालता पं० ते विमाणा पं० समणाउसो ! ।१००।

★ ★ ★ चउव्विहपडिवत्तीए तिरिक्खजोणियउद्देसओ पढमो ॥ प्र० ३

ति० उ० १॥ ★ ★ ★ कतिविहा णं भंते ! संसारसमावण्णगा जीवा पं० ?, गो० ! छव्विहा पं० तं०-पुढवीकाइया जाव तसकाइया, से किं तं पुढविकाइया ?, २ दुविहा पं० तं०-सुहुमपुढवीकाइया य बादरपुढवीकायिया य, से किं तं सुहुमपुढविकाइया ?, २ दुविहा पं० तं०-पज्जत्तगा य अपज्जत्तगा य, सेत्तं सुहुमपुढविकाइया, से किं तं बादरपुढविकाइया ?, २ दुविहा पं० तं०-पज्जत्तगाय अपज्जत्तगा य एवं जहा पण्णवणापदे सण्हा सत्तविधा पं० खरा अणेगविहा पं० जाव असंखेज्जा, सेत्तं बादरपुढविकाइया, सेत्तं पुढविकाइया, एवं चेव जहा पण्णवणापदे तहेव निरवसेसं भाणितव्वं जाव वणप्फतिकाइया एवं जाव जत्थेको तत्थ सिता संखेज्जा सिय असंखेज्जा सिता अणंता, सेत्तं बादरवणप्फतिकाइया, सेत्तं वणस्सइकाइया, से किं तं तसकाइया ?, २ चउव्विहा पं० तं०-बेइंदिया तेइंदिया चउरिंदिया पंचेदिया, से किं तं बेइंदिया ?, २ अणेगविधा पं०, एवं जं चेव पण्णवणापदे तं चेव निरवसेसं भाणितव्वं जाव सव्वट्ठसिद्धगदेवा, सेत्तं अणुत्तरोववाइया, सेत्तं देवा, सेत्तं पंचेदिया, सेत्तं तसकाइया ।१०१। कतिविधा णं भंते ! पुढवी पं० ?, गो० ! छव्विहा पुढवी पं० तं०-सण्हापुढवी सुद्धपुढवी वालुयापुढवी मणोसिलापु० सक्करापु० खरपुढवी, सण्हापुढवीणं भंते ! केवतियं कालं ठिती पं० ?, गो० ! जह० अंतोमु० उक्को० एणं वाससहस्सं, सुद्धपुढवीए पुच्छा, गो० ! जह० अंतोमु० उक्को० बारसवाससहस्साइं, वालुयापुढवीए पुच्छा, गो० ! जह० अंतोमु० उक्को० चोद्दस वाससहस्साइं, मणोसिलापुढवीणं पुच्छा, गो० ! जह० अंतोमु० उक्को० सोलस वाससहस्साइं, सक्करापुढवीए पुच्छा, गो० ! जह० अंतोमु० उक्को० अट्टारस वाससहस्साइं, खरपुढवीए पुच्छा, गो० ! जह० अंतोमु० उक्को० बावीसं वाससहस्साइं, नेरइयाणं भंते केवतियं कालं ठिती पं० ?, गो० ! जह० दस वाससहस्साइं उक्को० तेत्तीसं सागरोवमाइं ठितपदं सव्वं भाणियव्वं जाव सव्वट्ठसिद्धगदेवत्ति, जीवे णं भंते ! जीवेत्ति कालतो केवच्चिरं होइ ?, गो० ! सव्वद्धं, पुढवीकाइए णं भंते ! पुढवीकाइएत्ति कालतो केवच्चिरं होति ?, गो० ! सव्वद्धं, एवं जाव तसकाइए ।१०२। पडुप्पन्नपुढवीकाइया णं भंते ! केवतिकालस्स णिल्लेवा सिता ?, गो० ! जहण्णपदे असंखेज्जाहिं उस्सप्पिणिओसप्पिणीहिं उक्कोसपए असंखेज्जाहिं उस्सप्पिणीओसप्पिणीहिं जहन्नपदातो उक्कोसपयं असंखेज्जगुणं, एवं जाव पडुप्पन्नवाउक्काइया, पडुप्पन्नवणप्फइकाइया णं भंते ! केवतिकालस्स णिल्लेवा सिता ?, गो० ! पडुप्पन्नवण० जहण्णपदे अपदा उक्कोसपदे अपदा पडुप्पन्नवणप्फतिकाइयाणं णत्थि णिल्लेवणा, पडुप्पन्नतसकाइयाणं पुच्छा, जहण्णपदे सागरोवमसतपुहुत्तस्स उक्कोसपदे सागरोवमसतपुहुत्तस्स जहण्णपदा उक्कोसपदे विसेसाहिया ।१०३। अविस्सुद्धलेस्सेणं भंते ! अणगारे असमोहएणं अप्पाणेणं विस्सुद्धलेसं देवं देविं अणगारं जाणइ पासइ ?, गो० ! नो इणट्ठे समट्ठे, अविस्सुद्धलेसे अणगारे समोहएणं अप्पाणेणं अविस्सुद्धलेसं देवं देविं अणगारं जाणति पासति ?, गो० ! नो इणट्ठे समट्ठे,

अविसुद्धलेसे अणगारे समोहतेणं अप्पाणेणं विसुद्धलेसं देवं देविं अणगारं जाणति पासति ?, नो तिणट्ठे समट्ठे, अविसुद्धलेसे णं भंते ! अणगारे समोहयासमोहतेणं अप्पाणेणं अविसुद्धलेसं देवं देविं अणगारं जाणति पासति ?, नो तिणट्ठे समट्ठे, अविसुद्धलेसे अणगारे समोहतासमोहतेणं अप्पाणेणं विसुद्धलेस्सं देवं देविं अणगारं जाणति पासति ?, नो तिणट्ठ समट्ठे, विसुद्धलेसे णं भंते ! अणगारे असमोहतेणं अप्पाणेणं अविसुद्धलेसं देवं देविं अणगारं जाणति पासति ?, हंता जाणति पासति, जहा अविसुद्धलेसेणं छ आलावगा एवं विसुद्धलेस्सेणवि छ आलावा भाणितव्वा जाव विसुद्धलेस्से णं भंते ! अणगारे समोहतासमोहतेणं अप्पाणेणं विसुद्धलेस्सं देवं देविं अणगारं जाणति पासति ?, हंता जाणति पासति । १०४। अण्णउत्थिया णं भंते ! एवमाइक्खंति एवं भासेन्ति एवं पण्णवेति एवं परूवेति-एवं खलु एगे जीवेएगेणं समएणं दो किरियाओ पकरेति, तं०-सम्मत्तकिरियं च मिच्छत्तकिरियं च, जंसमयं संमत्तकिरियं पकरेति तंसमयं मिच्छत्तकिरियं पकरेति जंसमयं मिच्छत्तकिरियं पकरेइ तंसमयं समत्तकिरियं पकरेइ, संमत्तकिरियापकरणताए मिच्छत्तकिरियं पकरेति मिच्छत्तकिरियापकरणताए संमत्तकिरियं पकरेति, एवं खलु एगे जीवे एगेणं समएणं दो किरितातो पकरेति, तं०-संमत्तकिरियं च मिच्छत्तकिरियं च, से कहमेतं भंते ! एवं ?, गो० ! जन्नं ते अन्नउत्थिया एवमाइक्खंति एवं भासंति एवं पण्णवेति एवं परूवेति-एवं खलु एगे जीवे एगेणं समएणं दो किरियाओ पकरेति तहेव जाव सम्मत्तकिरियं च मिच्छत्तकिरियं च, जे ते एवमाहंसु तं णं मिच्छा, अहं पुण गो० ! एवमाइक्खामि जाव परूवेमि-एवं खलु एगे जीवे एगेणं समएणं एगं किरियं पकरेति, तं०-सम्मत्तकिरियं वा मिच्छत्तकिरियं वा, जंसमयंसंमत्तकिरियं पकरेति णो तंसमयं मिच्छत्तकिरियं पकरेति जंसमयं मिच्छत्तकिरियं पकरेति नो तंसमयं संमत्तकिरियं पकरेति, संमत्तकिरियापकरणयाए नो मिच्छत्तकिरियं पकरेति मिच्छत्तकिरियापकरणयाए णो संमत्तकिरियं पकरेति, एवं खलु एगे जीवे एगेणं समएणं एगं किरियं पकरेति, तं०-सम्मत्तकिरियं वा मिच्छत्तकिरियं वा । १०५। ★★से तं चउविहपडिवत्तीए तिरिक्खजोणियउद्देसओबीओ समत्तो ॥प्र० ३ ति० उ० ★★ २॥ से किं तं मणुस्सा ?, २ दुविहा पं० तं०-संमुच्छिममणुस्सा य गब्भवक्कंतियमणुस्सा य । १०६। से किं तं संमुच्छिममणुस्सा ? २ एगागारा पं०, कहिं णं भंते ! संमुच्छिममणुस्सा संमुच्छंति ?, गो ० ! अंतोमणुस्सखेत्ते जहा पण्णवणाए जाव सेत्तं संमुच्छिममणुस्सा । १०७। से किं तं गब्भवक्कंतियमणुस्सा ?, २ ति विधा पं० तं०- कम्मभूमगा अकम्मभूमगा अंतरदीवगा । १०८ । से किं तं अंतरदीवगा ?, २ अट्ठावीसतिविधा पं० तं०- एगोरूया आभासिता वेसाणिया णांगोली हयकण्णगा० आयंसमुहा० आसमुहा० आसकण्णा० उक्कामुहा० घणदंता जाव सुद्धदंता । १०९ । कहिं णं भंते ! दाहिणिल्लाणं एगोरुयमणुस्साणं एगोरुयदीवे णामं दीवे पं० ?, गो० ! जंबुदीवे दीवे मंदरस्स पव्वयस्स दाहिणेणं चुल्लहिमवंतस्स वासधरपव्वयस्स उत्तरपुरच्छिमिल्लाओ चरिमंताओ लवणसमुद्धं तिन्नि जोयणसयाइं ओगाहिता एत्थ णं दाहिणिल्लाणं एगोरुयमणुस्साणं एगोरुयदीवे णामं दीवे पं० तिन्नि जोयणसयाइं आयामविक्खंभेणं णव एकूणपण्णजोयणसए किंचिविसेसेण परिक्खेवेणं, से णं एगाए पउमवरवेदियाए एगेणं च वणसंडेणं सव्वओ समंता संपरिक्खित्ते, सा णं पउमवरवेदिया अट्ठ जोयणाइं उड्ढंउच्चत्तेणं पंचधणुसयाइं विक्खंभेणं एगोरुयदीवं समंता परिक्खेवेणं पं०, तीसे णं पउमवरवेदियाए अयमेयारूवे वण्णावासे पं० तं०- वइरामया निम्मा एवं वेतियावण्णओ जहा रायपसेईए तहा भाणियव्वो ॥११० । सा णं पउमवरवेतिया एगेणं वणसंडेणं सव्वओ समंता संपरिक्खित्ता, से णं वणसंडे देसूणाइं दो जोयणाइं चक्कवालविक्खंभेणं वेतियासमए परिक्खेवेणं पं०, से णं वणसंडे किणहे किण्होभासे एवं जहा रायपसेणिज्जवणसंडवण्णओ तहेव निरक्खेसं भाणियव्वं, तणाण य वण्णगंधफासो, सद्धो तणाणं, वावीओ उप्पायपव्वया पुढवीसिलापट्ठगा य भाणितव्वा जाव तत्थ णं बहवे वाणमंतरा देवा य देवीओ य आसयंति जाव विहरंति । १११ । एगोरुयदीवस्स णं दीवस्स अंतो बहुसमरमणिज्जे भूमिभागे पं० से जहाणामए आलिंगपुक्खरेति वा एवं सयणिज्जे भाणितव्वे जाव पुढवीसिलापट्ठगंसि तत्थ णं बहवे एगोरुयदीवया मणुस्सा य मणुस्सीओ य आसयंति जाव विहरंति, एगोरुयदीवे णं दीवे तत्थ २ देसे २ तहिं २ बहवे उद्दालका (प्र० मोद्दालका) कोद्दालका कतमाला णट्ठमाला सिंगमाला संखमाला दंतमाला सेलमालगा णामं दुमगणा पं०, समणाउसो ! कुसविकुसविसुद्धरुक्खमूला मूलमंतो कंदमंतो जाव बीयमंतो पत्तेहि य पुप्फेहि य अच्छण्णपडिच्छण्णा सिरीए अतीव

२ उवसोभेमाणा २ चिट्ठंति, एक्कोरुयदीवे णं दीवे तत्थ २ रुक्खा बहवे हेरुयालवणा भेरुयालवणा मेरुयालवणा सेरुयालवणा सालवणा सरलवणा सत्तवण्णवणा पूतफलिवणा खज्जूरिवणा णालिएरिवणा कुसविकुसवि जाव चिट्ठंति, एगुरुयदीवे णं तत्थ २ बहवे तिलया लपया नग्गोधा जाव रायरुक्खा णंदिरुक्खा कुसविकुसवि० जाव चिट्ठंति, एगुरुयदीवे णं तत्थ २ बहूओ पउमलयाओ जाव सामलयाओ निच्चं कुसुमिताओ एवं लयावण्णओ जहा उववाइए जाव पडिरूवाओ, एकोरुयदीवे णं तत्थ २ बहवे सेरियागुम्मा जाव महाजातिगुम्मा ते णं गुम्मा दसब्बवण्णं कुसुमं कुसुमंति विधूयग्गसाहा जेण वायविधूयग्गसाला एगोरुयदीवस्स बहुसमरमणिज्जं भूमिभागं मुक्कपुप्फपुंजोवयारकलियं करंति, एकोरुयदीवे णं तत्थ २ बहूओ वणरातीओ पं०, ताओ णं वणरातीतो किण्हातो किण्हो भासाओ जाव रम्माओ महामेहणिगुरुंबभूताओ जाव महइं गंधब्बणिं मुयंतीओ पासादीताओ०, एगुरुयदीवे तत्थ २ बहवे मत्तंगा णामं दुमगणा पं० समणाउसो !, जहा से चंदप्पभमणिसिलागवरसीधुपवरवारुणिसुजातफलपत्तपुप्फचोयणिज्जा संसारबहुदव्वजुत्तसंभारकालसंघायासवा महुमेरगरिद्धाभदुब्बजातीपसन्नमेल्लगसताउ खज्जूरमुद्धियासारकाविसायणसुपक्करवोयरसवरसुरावण्णरसगंधफरिसजुत्तबलवीरियपरिणामा मज्जविहित्थ बहुप्पगारा तहेव ते मत्तंगयावि दुमगणा अणेगबहुविहवीससापरिणयाए मज्जविहीए उववेदा फलेहिं पुण्णा वीसदं(सट्ठं)ति कुसविकुसविसुद्धरुक्खमूला जाव चिट्ठंति, एक्कोरुए दीवे तत्थ २ बहवे भिंगंगया णामं दुमगणा पं० समणाउसो ! जहा से वारगघडकरगकलसकक्करिपायकं चणिउदं कवब्बणिसुपविट्ठरपारीचस-कभिंंगारकरोडिसरगथरगपत्तीथा-लणत्थगववलियअवगदगवारकविचित्तवट्ठकमणिवट्ठकसुत्तिचारुपिणया कंचणमणिरयणभत्तिविचित्ता भायणविधीए बहुप्पगारा तहेव ते भिंगंगयावि दुमगणा अणेगबहुगविविहवीससापरिणयाए भाजणविधीए उववेया फलेहिं पुन्नाविव विसट्ठंति कुसविकुस० जाव चिट्ठंति, एगोरुयदीवे णं दीवे तत्थ २ बहवे तुडियंगा णामं दुमगणा पं० समणाउसो ! जहा से आलिंगमुयंगपणवपडहदरगकरडिडिंडिमभंभाहोरंभकणियारखरमुहिमुगुंदसंखियप-रिलीवच्चगपरिवाइणिवंस-वेणुवीणासुघोसविपंचिमहतिकच्छभिरगसगातलतालकंसतालसुसंवत्ता आतोच्चविधीणिउणगंधव्वसमयकुसलेहिं फंदिया तिट्ठाणकरणसुद्धा तहेव ते तुडियंगयावि दुमगणा अणेगबहुगविविहवीससापरिणयाए ततविततघणझुसिराए चउव्विहाए आतोच्चविहीए उववेया फलेहिं पुण्णा विसट्ठंति कुसविकुसविसुद्धरुक्खमूला जाव चिट्ठंति, एगोरुयदी० तत्थ २ बहवे दीवसिहा णामं दुमगणा पं० समणाउसो ! जहा से संज्ञाविरागसमए नवणिंहिपतिणो दीवियाचक्कवालविदे पभूयवट्ठिपलित्ताणेहिं धणिउज्जालियतिमिरमद्दए कणगणिगरकुसुमितपालियातयवणप्पगासो कंचणमणिरयणविमलमहरिहतवणिज्जुज्जलविचित्तदंडाहिं दीवियाहिं सहसा पज्जलिऊसवियणिद्धतेयदिप्पंतविमलगहगणसमप्पहाहिं वितिमिरकरसूरपसरिउल्लोयचिल्लियाहिं जालुज्जलपहसियाभिरामाहिं सोभेमाणा तहेव ते दीवसिहावि दुमगणा अणेगबहुगविविहवीससापरिणामाए, उज्जोयविधीए उववेदा फलेहिं पुण्णा विसट्ठंति कुसविकुसवि० जाव चिट्ठंति, एगुरुयदीवे तत्थ २ बहवे जोतिसिहा णामं दुमगणा पं० समणाउसो ! जहा से अचिरुग्गयसरयसूरमंडलपचंडउक्कासहस्सदिप्पंत- विज्जुज्जलहुयवहनिद्धूमजलिय- निब्बंतधोयतत्ततवणिज्जकिंसुया-सोयजावासुयणकुसुमविमउलियपुंजमणिरयणविमणजच्चहिं गुलयणिगररूवाइरेगरूवा तहेव ते जोतिसिहावि दुमगणा अणेगबहुगविविहवीससापरिणयाए उज्जोयविहीए उववेदा सुहलेस्सा मंदलेस्सा मंदायवलेस्सा कूडायइव ठाणठिया अन्नमन्नसमोगाढाहिं लेस्साहिं साए पभाए सपदेसे सव्वओ समंता ओभासंति उज्जोवेति पभासंति कुसविकुसवि० जाव चिट्ठंति, एगुरुयदीवे तत्थ २ बहवे चित्तंगा णामं दुमगणा पं० समणाउसो ! जहा से पेच्छणघरे विचित्ते रम्मे वरकुसुमदाममालुज्जले भासंतमुक्कपुप्फपुंजोवयारकलिए विरल्लियविचित्तमल्लसिरिदाममल्लसिरिसमुदयप्पगब्भे गंधिमवेढिमपूरिमसंघाइमेण मल्लेण छेयसिप्पियविभारतिएण सव्वतो चेव समणुबद्धे पविरललंबंतविप्पइट्ठेहिं पंचवण्णेहिं कुसुमदामेहिं सोभमाणेहिं सोभमाणे वणमालंतग्गए चेव दिप्पमाणे तहेव ते चित्तंगयावि दुमगणा अणेगबहुगविविहवीससापरिणयाए मल्लविहीए उववेया कुसविकुसवि० जाव चिट्ठंति, एगुरुयदीवे तत्थ २ बहवे चित्तरसा णामं दुमगणा पं० समणाउसो ! जहा से सुगंधवरकलमसालितन्दुलविसिट्ठणिरुवहतदुद्धरद्धे सारयघयगुडखंडमहुमेलिए अतिरसे परमण्णे होज्ज उत्तमवण्णगंधमंते रण्णो जहा वा चक्कवट्ठिस्स होज्ज णिउणेहिं

सूतपुरिसेहिं सज्जिएहिं वाउ(प्र०चउर)कप्पसेअसित्तेइव ओदणे कलमसालिणिज्जत्तिएवि ए(प)क्के सबप्फमिउविसयएगसित्थे अणेगसालस(ण)गसंजुत्ते अहवा पडिपुण्णदव्वुवक्खडेसु सक्कए वण्णगंधरसफग्मिजुत्तबलविरियपरिणामे इंदियबलपुट्टिवद्धणे खुप्पिवासमहणे पहाणे गुलकट्टियखंडमच्छंडियउवणीए पमोयगे सण्हसमियगब्भे हवेज्ज परमइट्ठंगसंजुत्ते तहेव ते चित्तरसावि दुमगणा अणेगबहुविविहवीससापरिणयाए भोजणविहीए उववेदा कुसविकुववि० जाव चिट्ठंति, एगुरुए दीवे णं तत्थ २ बहवे मणियंगा नाम दुमगणा पं० समणाउसो ! जहा से हारद्धहारवट्ठणगमउडकुं डलवासुत्तगहेमजालमणिजालकण- गजालगमुत्तगउच्चिइयकडगाखुट्टियएकावलिकंठसुत्तमंजरिमउरत्थगेवेज्जसोणिसुत्तगचूला-मणिकणगतिलगफुल्लसिद्धत्थयकण्णवालिससिसूरउस- भचक्कगतलभंगतुडियहत्थि-मालगवलक्खदीणारमालिता चंदसूरमालिता हरिसयकेयूरवलयपालंबअंगुलेज्जगकंचीमेहलाकलावपयरपायजालघंटियखिंखिणिरय- णोरुजाल(प्र०तुडिय)त्थगियवरणेउरचलणमालिया कणगणिगरमालिया कंचणमणिरयणभत्तिचित्ता भूसणविही बहुप्पगारा तहेव ते मणियंगावि दुमगणा अणेगबहुविविहवीससापरिणताए भूसणविहीए उववेया कुसवि० जाव चिट्ठंति, एगुरुयए दीवे तत्थ २ बहवे गेहागारा नाम दुमगणा पं० समणाउसो ! जहा से पागारट्टालगचरियदारगो पुरपासायाकासतलमंडवएगसालबिसालगतिसा-लगचउरंसचउसालगब्भघरमोहणघरवलभिघरचित्तसालमा- लयभत्तिघरवट्ठतंसचतुरंसणं- दियावत्तसंठियायतपंडुरतलमुंडमालहम्मियं अहवणं धवलहरअद्धमागहविब्भमसेलद्धसे- लसंठियकूडागारट्टसुविहिकोट्टगअणे- गघरसरणलेणआवणविडंगजालचंदणिज्जूहअपवर-कलियकवोतालिचंदसालियरूवविभत्तिकलिता भवण विही बहुविकप्पा तहेव ते गेहागारावि दुमगणा अणेगबहुविविहवीससापरिणयाए सुहारुहणे सुहोत्ताराए सुहनिक्खमणप्पवेसाए दहरसोपाणपंतिकलिताए पइरिक्काए सुहविहाराए मणोऽणुकूलाए भवणविहीए उववेया कुसवि० जाव चिट्ठंति, एगोरुयदीवे तत्थ २ बहवे अणिगणा णामं दुमगणा पं० समणाउसो ! जहा से अणेगआदिणगसोभंतणुतकंबलदुगुल्लकोसेज्ज- कालमिगपट्टचीणंसुयबरणातवारवणिगयतुआभरणचित्तसहिणगकल्लाणगभिंणिणीलकज्जलबहुवण्ण- रत्तपीतसुक्किल्लमक्खयमिगलोमहेमप्फरुण्णग- अवसरत्तगसिंधुओसभदामिलवंगकलिंगनेलिणतंतुमयभत्तिचित्ता वत्थविही बहुप्पकारा हवेज्ज वरपट्टणुगता वण्णरागकलिता तहेव ते अणियणावि दुमगणा अणेगबहुविविहवीससापरिणताए वत्थविहीए उववेया कुसविकुसवि० जाव चिट्ठंति, एगोरुयदीवे णं भंते ! दीवे मणुयाणं केरिसए आगारभावपडोयारे पं० ?, गो० ! ते णं मणुया अणुवमवरतरसोमचारुवा भोगुत्तमा भोगलक्खणधरा भोगसस्सिरीया सुजायसव्वंगसुंदरंगा सुपत्तिट्टियकुम्मचारुचलणा रत्तुप्पलपत्तमउयसुकुमालकोमलतला नगनगरसागरमगरचक्कं कवरंकलक्खणंकियचलणा अणुपुव्वसुसाहतंगुलीया उण्णयतणुतंबणिद्धणक्खा संठियसुसिलिट्ठगूढगुप्फा एणीकुरुविंदावत्तवट्ठाणुपुव्वजंधा समुग्गणिमग्गगूढजाणू गतससणसुजातसणिभोरू वरवारणमत्ततुल्लविक्रमविलासितगती (१५५) सुजातवरतुरगगुज्झदेसा आइण्णहतोव णिरुवलेवा पमुइयवरतुरियसीहअतिरेगवट्टियकडी साहयसोणंदमुसलदप्पणणिगरितवरकणगच्छ- रुसरिसवरवइइवलितमज्झा उज्जुयसमसहितसुजातजच्चतणुकसिणणिद्धआदेज्जलडहसुकुमालमउयरमणिज्जरोमराती गंगावत्तपयाहिणावत्ततरंगभंगुररविकिरण- तरुणबोधितअकोसायंतपउमगंभीरवियडणाभी इसविहगसुजातपीणकुच्छी इसोदरा सुइकरणा पम्हवियडणाभा सण्णयपासा संगतपासा सुंदरपासा सुजातपासा मितमाइयपीणरतियपासा अकरुंदुयकणगरुयगनिम्मलसुजायनिरुवहयदेहधारी पसत्थबत्तीसलक्खणधरा कणगसिलातलुज्जलपसत्तासमयलोवचिय- विच्छिन्नपिहुलवच्छासिरिवच्छंकियवच्छा पुरवरफलिहवट्टियभुयाभुयगीसरविपुलभोगआयाणफलिहउच्छूढदीहबाहू जूयसन्निभपीणरतियपीवरपउ- ट्टसंठियसुसिलिट्ठविसिट्ठघणथिरसुबद्धसुनिगूढपव्वसंधी रत्ततलोवइतमउयमंसलपसत्थलक्खणसुजायअच्छिहजालपाणी पीवरवट्टियसुजायकोमलवरंगुलीया तंबतलिणसुचिरुइरणिद्धणक्खा चंदपाणिलेहा सूरपाणिलेहा संखपाणिलेहा चक्कपाणिलेहा दिसासोअत्थियपाणिलेहा चंदसूरसंखचक्कदिसासोअत्थियपाणिलेहा अणेगवरलक्खणुत्तमपसत्थसुचिरतियपाणिलेहा वरमहिसवराहसीहसद्दूलउसमणागवरपडिपुत्तविउलउत्तमइंदखंधा चउरंगुलसुप्पमाणकंबुवरसरिसगीवा

अवट्टितसुविभत्तसुजातचित्तमंसू मंसलसंठियपसत्थसद्दूलविपुलहणुयाओ तावितसिलप्पपालबिंबफलसन्निभाहरोद्धा पंडुरससिसगलविमलनिम्मलसंखगोखीरफेण-
 दगरयमुणालियाधवलदंतसेढी अखंडदंता अफुडियदंता अविरलदंता सुजातदंता एगदंतसेढिव्व अणेगदंता हुतवहनिद्धंतधोततत्ततवणिज्जरत्ततललुतालुजीहा
 गरुलाययउज्जुतुंगणासा अवदालियपोंडरीयणयणा कोकासितधवलपत्तलच्छा आणामियचावरुइलकिण्हपूराइयसंठियसंगतआयतसुजाततणुकसिणनिद्धभुमया
 अल्लीणप्पमाणजुत्तसवणा पीणमंसलकवोलदेसभागा अचिरुग्गयबालचंदसंठियपसत्थविच्छिन्नसमणिडाला उडुवतिपडिपुण्णसोमवदणा छत्तागारुत्तमंगदेसा
 घणणिचियसुबद्धलकखणुण्णयकूडागारणिभपिंडियासरसा दाडिमपुप्फपगासतवणिज्जरसिरसनिम्मलसुजायके संतके सभूमी
 सामलिबोंडघणणिचियछोडियमिउविसयपसत्थसुहुम-लकखणसुगंधसुंदरभुयमोयगभिंणिगीलकज्जलपहट्टभमरगणणिद्धणिकुरुंबनिचियकुंचियपदा-
 हिणावत्तमुद्धसिरया लकखणवज्जणगुणोववेया सुजायसुविभत्तसुरूवगा(प्र० संगतंगा)पासाईया दरिसणिज्जा अभिरूवा पडिरूवा, ते णं मणुया हंसस्सरा कोंचस्सरा
 नंदिघोसा सीहस्सरा सीहघोसा मंजुस्सरा मंजुघोसा सुस्सरा सुस्सरणिग्घोसा छायाउज्जोतियंगमंगा वज्जरिसभनारायसंघयणा समचउरंसंठाणसंठिया
 सिणिद्धच्छवी णिरायंका उत्तमपसत्थअइसेसनिरुवमतणू जल्लमलकलंकसेयरयदोसवज्जियसरीरा निरुवलेवा अणुलोभवाउवेगा कंकग्गहणी कवोतपरिणामा
 सउणिव्व पोसपिट्ठंतरोरुपरिणता विग्गहियउन्नयकुच्छी पउमुप्पलसरिसगंधणिस्साससुरभिवदणा अट्टधणुसयं ऊसिया, तेसिं मणुयाणं चउसट्ठी पिट्टिकरंडगा
 पं० समणाउसो !, ते णं मणुया पगतिभद्दा पगतिविणीतगा पगतिउवसंता पगतिपयणुकोहमाणमायालोभा मिउमह्वसंपण्णा अल्लीणा भद्दा विणीता अप्पिच्छा
 असंनिहिसंचया अचंडा विडिमंतरपरिवसणा जहिच्छियकामगामिणो य ते मणुयगणा पं० समणाउसो !, तेसिं णं भंते ! मणुयाणं केवतिकालस्स आहारट्ठे
 समुप्पज्जति ?, गो० ! चउत्थभत्तस्स आहारट्ठे समुप्पज्जति, एगोरूयमणुईणं भंते ! केरिसए आगारभावपडोयारे पं० ?, गो० ! ताओ णं मणुईओ सुजायसव्वंगसुंदरीओ
 पहाणमहिलागुणेहिं जुत्ता अच्चंतविसप्पमाणपउमसूमालकुम्मसंठितविसिट्ठचलणाओ जुम्मीओ पीवरनिरंतरपुट्टसाहितंगुलीतो उण्णयरतियनलिणं व सुइणिद्धणखा
 रोमरहियवट्टलट्टसंठियअजहण्णपसत्थलकखणअकोप्पजंघजुयला सुणिम्मियसुगूढजाणू मंसलसुबद्धसंधी
 कयलिक्खंभातिरेगसंठियणिव्वणसुकुमालमउयकोमलअविरलसमसहितसुजातवट्टपीवरणिरंतरोरू अट्टावयवीचीपट्टसंठियपसत्थविच्छिन्नपिहुलसोणी
 वदणायामप्पमाणदुगुणितविसालमंसलसुबद्धजहणवरधारणीतो वज्जविराइयपसत्थलकखणणिरोदरा तिवलिवलीयतणुणमियमज्झितातो
 उज्जुयसमसहितजच्चतणुकसिणणिद्धआदेज्जलडहसुविभत्तसुजातकंसो भंतरुइलरमणिज्जरोमराई गंगावत्तपदाहिणावत्तरंगभंगुररविकिरण-
 तरुणबोधितअकोसायंतपउमवणगंभीरवियडणाभी अणुब्भडपसत्थपीणकुच्छी सण्णययासा संगयपासा सुजायपासा मितमातियपीणरइयपासा
 अकरंडुयकणगरुयगनिम्मलसुजायणिरुवहयगातलट्ठी कंचणकलससमपमाणसमसहितसुजातलट्टचूचुयआमेलगजमलजुगलवट्टियअब्भु(प्र०
 चु०)ण्णयरतियसंठियपयोधराओ भुयंगऽणुपुव्वतणुयगोपुच्छवट्टसमसहियणमियआए जललियवाहाओ तंबणहा मंसलग्गहत्था पीवरकोमलवरंगुलीओ
 णिद्धपाणिलेहा रविससिसंखचक्कसोत्थियसुविभत्तसुविरतियपाणिलेहा पीणुण्णयकक्खवत्थिदेसा पडिपुण्णगलकवोला चउरंगुलसुप्पमाणकं बुवरसरिसगी वा
 मंसलसंठियपसत्थहणुया दाडिमपुप्फपगासपीवरपलंबकुंचियवराधरा सुदरोत्तरोद्धा दधिदगरयचंदकुंदवासंतिमउलअच्छिद्धविमलदसणा
 रत्तुप्पलपत्तमउयसुकुमालतालुजीहा कणयवरमुउलअकुडिलअप्भुग्गतउज्जुतुंगणासा सारदणवकमलकुमुदकुवलयविमुक्कदलणिगरसरिसलकखणअंकियकंतणयणा
 पत्तलचवलायंततंबलोयणाओ आणामितचावरुइलकिण्हब्भराइसंठियसंगतआययसुजात(प्र० तणु)कसिणणिद्धभमुया अल्लीणपमाणजुत्तसवणा सुसवणा
 पीणमट्टरमणिज्जगंडलेहा चउरंसपसत्थसमणिडाला कोमुतिरयणिकरविमलपडिपुन्नसोमवयणा छत्तुन्नयउत्तिमंगा कुडिलसुसिणिद्धदीहसिरया
 छत्तज्झयजुगथूभदामिणिकमंडलुकलसवाविसोत्थियपडागजवमच्छकुम्मरहवरमगरसुकथालअंकुसअट्टावयवीइसुपइट्टकमयूरसरिदामाभिसेयतोरणमेइणिउदधिवरभवण-

गिरिवरआयंसललियगतउसभसीहचमरउत्तमपसत्थबत्तीसलक्खणधरीतो हंससरिसगतीतो कोतिलमधुरगिरिसुस्सराओ कंता सव्वस्स अणुनतातो ववगतवलिपलिया वंगदुव्वण्णवाहीदोभग्गसोगमुक्काओ उच्चत्तेण य नराण थोवूणमूसियाओ सभावसिंगाराचारचारुवेसासंगतहसितभणिय-चेट्टियविलाससंलावणिउणजुत्तोवयारकुसला सुंदरथणजहणवदणकरचलणणयणमाला वण्णरूवलावण्णजोव्वणविलासकलिया नंदणवणविवरचारिणीउव्व अच्छराओ अच्छेरगपेच्छाणिज्जा पासाईतातो दरिसणिज्जातो अभिरूवाओ पडिरूवाओ, तासिं णं भंते ! मणुईणं केवतिकालस्स आहारट्टे समुप्पज्जति ?, गो० ? चउत्थभत्तस्स आहारट्टे समुप्पज्जति, ते णं भंते ! मणुया किमाहारमारेंति ?, गो० ! पुढवीपुप्फफलाहारा ते मणुयगणा पं० समणाउसो !, तीसे णं भंते ! पुढवीए केरिसए आसाए पं० ?, गो० ! से जहाणामए गुलेति वा खंडेति वा सक्काराति वा मच्छंडियाति वा भिसकंदोति वा पप्पडमोयएति वा पुप्फदामतेति वा पुप्फुत्तराइ वा पउमुत्तराइ वा अकोसिताति वा विजताति वा महाविजयाइ वा आयंसोवमाति वा अणोवसाति वा चाउरक्के गोखीरे चउठाणपरिणए गुडखंडमच्छंडिउवणीए मंदगिकट्टिए वण्णेणं उववेए जाव फासेणं, भवे एतारूवे सिता ?, नो इणट्टे, समट्टे तीसे णं पुढवीए एत्तो इट्टयराए चेव जाव मणामतराए चेव आसाए पं०, तेसिं णं भंते ! पुप्फफलाणं केरिसए आसाए पं० ?, गो० ! से जहानामए चाउरंतचक्कवट्टिस्स कल्लाणे पवरभोयणे सतसहस्सनिप्फन्ने उववेते गंढ्ढेणं उववेते रसेणं ठववेते फासेणं उववेते आसायणिज्जे वीसायणिज्जे दीवणिज्जे बिंहणिज्जे दप्पणिज्जे मयणिज्जे सव्विंदियगातपल्हायणिज्जे, भवे एतारूवे सिता ?, णो तिणट्टे समट्टे, तेसिं णं पुप्फफलाणं एत्तो इट्टतराए चेव जाव आसाए णं पं०. ते णं भंते ! मणुया तमाहारमाहारित्ता कहिं वसहिं उवेंति ?, गो० ! रुक्खगेहालता णं ते मणुयगणा पं० समणाउसो !, ते णं भंते ! रुक्खा किंसंठिया पं० ?, गो० ! कूडागारसंठिता पेच्छाघरसंठिता सत्तागारसंठिया झयसंठिया थूभसंठिया तोरणसंठिया गोपुर० चेतियपा(या)लगसंठिया अट्टालगसंठिया पासादसंठिया हम्मतलसंठिया वालग्गपोत्तियासंठिता वलभीसंठिता अण्णे तत्थ बहवे वरभवणसयणविसिट्ठसंठाणसंठिता सुहसीयलच्छाया णं ते दुमगणा पं० समणाउसो !, अत्थि णं भंते ! एगोरुयदीवे दीवे गेहाणि वा गेहावणाणि वा ?, णो तिणट्टे समट्टे, रुक्खगेहा लया णं ते मणुयगणा पं० समणाउसो !, अत्थि णं भंते ! एगोरुयदीवे गामाति वा णगराति वा जाव सन्निवेसाति वा ?, णो तिणट्टे समट्टे, जहिच्छित्तकामगामिणो ते मणुयगणा पं० समणाउसो !, अत्थि णं भंते ! एगूरुदीवे असीति वा मसीइ वा कसीइ वा पणीति वा वाणिज्जाति वा ?, नो तिणट्टे समट्टे, ववगयअसिमसिकिसिपणियवाणिज्जा णं ते मणुयगणा पं० समणाउसो !, अत्थि णं भंते ! एगोरुयदीवे हिरण्णेति वा सुवन्नेति वा कंसेति वा दूसेति वा मणीति वा मुत्तिएति वा विपुलधणकणगरयणमणिमोत्तियसंखसिलप्पवालसंतसारसावएज्जेति वा ?, हंता अत्थि, णो चेव णं तेसिं मणुयाणं तिब्बे ममत्तभावे समुप्पज्जति, अत्थि णं भंते ! एगोरुयदीवे रायाति वा जुवरायाति वा ईसरेति वा तलवरेइ वा माडंबियाति वा कोडुंबियाति वा इब्भाति वा सेट्ठीति वा सेणावतीति वा सत्थवाहाति वा ?, णो तिणट्टे समट्टे, ववगयइट्ठीसक्कारा णं ते मणुयगणा पं० समणाउसो !, अत्थि णं भंते ! एगोरुयदीवे दीवे दासाति वा पेसाइ वा सिस्साति वा भयगाति वा भाइल्लगाइ वा कम्मगरपुरिसाति वा ?, णो तिणट्टे समट्टे, ववगतआभियोगिता णं ते मणुयगणा पं० समणाउसो ! अत्थि णं भंते ! एगोरुयदीवे दीवे माताति वा पियाति वा भायाति वा भइणीति वा भज्जाति वा पुत्ताति वा धूयाइ वा सुण्हाति वा ?, हंता अत्थि, नो चेव णं तेसिं णं मणुयाणं तिब्बे पेम्बंधणे समुप्पज्जति, पयणुपेज्जबंधणा णं ते मणुयगणा पं० समणाउसो ?, अत्थि णं भंते ! एगोरुयदीवे अरीति वा वेरिएति वा घातकाति वा वहकाति वा पडिणीताति वा पच्चमित्ताति वा ?, णो तिणट्टे समट्टे, ववगतवेराणुबंधा णं ते मणुयगणा पं० समणाउसो !, अत्थि णं भंते ! एगोरुए दीवे मित्ताति वा वतंसाति वा घडिताति वा सहीति वा सुहियाति वा महाभागाति वा संगतियाति वा ?, णो तिणट्टे समट्टे, ववगतपेम्मा ते मणुयगणा पं० समणाउसो !, अत्थि णं भंते ! एगोरुयदीवे आवाहाति वा वीवाहाति वा जण्णाति वा भद्दाति वा थालिपाकाति वा चेलोवणतणाति वा सीमंतुण्णयणाइ वा पितिपिंडनिवेदणाति वा ?, णो तिणट्टे समट्टे, ववगतआवाहविवाहजण्णभद्दथालिपागचोलोवणतणसीमंतुण्णयणभतपिंडनिवेदणा णं ते मणुयगणा पं० समणाउसो !,

अत्थि णं भंते ! एगोरुयदीवे दीवे इंदमहाति वा खंदमहाति वा रुद्धमहाति वा सिवमहाति वा वेसमणमहाइ वा मुगुंदमहाति वा णागमहाति वा जक्खमहाति वा भूतमहाति वा कूवमहाति वा तलाय०णदिमहाति वा दहमहाति वा पव्वयमहाति वा रुक्खरोवणमहाति वा चेइयमहाइ वा थूभमहाति वा ?, णो तिण्ढे समढ्ढे, ववगतमहमहिमा णं ते मणुयगणा पं० समणाउसो !, अत्थि णं भंते ! एगोरुयदीवे णडपेच्छाति वा णट्टपेच्छाति वा मल्लपेच्छाति वा मुट्ठियपेच्छाइ वा विडंबगपेच्छाइ वा कहगपेच्छाति वा पवगपेच्छाति वा अक्खायगपेच्छाति वा लासगपेच्छाति वा लंखपे० मंखपे० तूणइल्लपे० तुंबवीणपे० किविणपे० मागहपे० जल्लपे० ?, णो तिण्ढे समढ्ढे, ववगतकोउहल्ला णं ते मणुयगणा पं० समणाउसो !, अत्थि णं भंते ! एगूरुयदीवे सगडाति वा रहाति वा जाणाति वा जुग्गाति वा गिल्लीति वा थिल्लीति वा पिपिल्लीइ वा पवहणाणि वा सिवियाति वा संदमाणियाति वा ?, णो तिण्ढे समढ्ढे, पादचारविहारिणो णं ते मणुस्सगणा पं० समणाउसो !, अत्थि णं भंते ! एगूरुयदीवे आसाति वा हत्थीति वा उट्ठाति वा गोणाति वा महिसाति वा खराति वा घोडाति वा अजाति वा एलाति वा ?, हंता अत्थि, नो चेव णं तेसिं मणुयाणं परिभोगत्ताए हव्वमागच्छंति, अत्थि णं भंते ! एगूरुयगदीवे सीहाति वा वग्धाति वा विगाति वा दीवियाइ वा अच्छाति वा परच्छाति वा परस्सराति वा तरच्छाति वा बिडालाइ वा सुणगाति वा कोलसुणगाति वा कोकंतियाति वा ससगाति वा चित्तलाति वा चिल्ललगाति वा ?, हंता अत्थि, नो चेव णं ते अण्णमण्णस्स तेसिं वा मणुयाणं किंचि आबाहं वा पबाहं वा उप्पायंति छविच्छेदं वा करेंति, पगतिभद्दका णं ते सावयगणा पं० समणाउसो !, अत्थि णं भंते ! एगूरुयदीवे सालीति वा वीहीति वा गोधूमाति वा जवाति वा तिलाति वा इक्खूति वा ?, हंता अत्थि, नो चेव णं तेसिं मणुयाणं परिभोगत्ताए हव्वमागच्छंति, अत्थि णं भंते ! एगूरुयदीवे गत्ताइ वा दरीति वा घसाति वा भिगूति वा उवाएति वा विसमेति वा विज्जलेति वा धूलीति वा रेणूति वा पंकेइ वा चलणीति वा ?, णो तिण्ढे समढ्ढे, एगूरुयदीवे णं दीवे बहुसमरमणिज्जे भूमिभागे पं० समणाउसो !, अत्थि णं भंते ! एगूरुयदीवे दीवे खाणूति वा कंटएति वा हीरएति वा सक्कराति वा तणकयवराति वा पत्तकयवराइ वा असुतीति वा पूतियाति वा दुब्भिगंधाइ वा अचोक्खाति वा ?, णो तिण्ढे समढ्ढे, ववगयखाणुकंटकहीरसक्करतणकयवरपत्तकय-वरअसुतिपूतियदुब्भिगंधमचोक्खपरिवज्जिए णं एगोरुयदीवे पं० समणाउसो !, अत्थि णं भंते ! एगूरुयदीवे दंसाति वा मसगाति वा पिसुयाति वा जूताति वा लिक्खाति वा ढंकुणाति वा ?, णो तिण्ढे, समढ्ढे ववगतदंसमसगपिसुतजूतलिक्खढंकुणपरिवज्जिए णं एगूरुयदीवे पं० समणाउसो !, अत्थि णं भंते ! एगूरुयदीवे अहीइ वा अयगराति वा महोरगाति वा० ?, हंता अत्थि, नो चेव णं ते अन्नमन्नस्स तेसिं वा मणुयाणं किंचि आबाहं वा पबाहं वा छविच्छेयं वा करेंति, पगाइभद्दगा णं ते वालगगणा पं० समणाउसो !, अत्थि णं भंते ! एगूरुयदीवे गहदंडाति वा गहजुद्धाति वा गहमुसलाइ वा गहगज्जिताति वा गहसंधाडगाति वा गहअवसव्वाति वा अब्भाति वा अब्भरुक्खाति वा संझाति वा गंधव्वनगराति वा गज्जिताति वा विज्जुताति वा उक्कापाताति वा दिसादाहाति वा णिग्घाताति वा पंसुविट्ठीति वा जूवगाति वा जक्खालित्ताति वा धूमिताति वा महिताति रउग्घाताति वा चंदोवरागाति वा सूरुवरागाति वा चंदपरिवेसाइ वा सूरपरिवेसाति वा पडिचंदाति वा पडिसूराति वा इंदधणूति वा उदगमच्छाति वा अमोहाइ वा कविहसियाइ वा पाईणवायाइ वा पडीणवायाइ वा जाव सुद्धवाताति वा गामदाहाति वा नगरदाहाति वा जाव सण्णिवेसदाहाति वा पाणक्खतजणक्खयकुलक्खयधणक्खयवसणभूतमणारिताति वा ?, णो तिण्ढे समढ्ढे, अत्थि णं भंते ! एगूरुयदीवे डिंबाति वा डमराति वा कलहाति वा बोलाति वा खाराति वा वेराति वा विरुद्धरज्जाति वा ?, णो तिण्ढे समढ्ढे, ववगतडिंबडमरकलहबोलखारवेरविरुद्धरज्जिविवज्जिता णं ते मणुयगणा पं० समणाउसो !, अत्थि णं भंते ! एगूरुयदीवे महाजुद्धाति वा महासंगामाति वा महासंनाहाति वा महापुरिसनिवाडणाति वा महारुधिरबाणाति वा नागबाणाति वा खणबाणाइ वा तामसबाणाइ वा दुब्भूतियाइ वा कुलरोगाति वा गामरोगाति वा णगररोगाति वा मंडलरोगाति वा सिरोवेदणाति वा अच्छिवेदणाति वा कण्णवेदणाति वा णक्कवेदणाइ वा दंतवेदणाइ वा नखवेदणाइ वा कासांति वा सासाति वा सोसाति वा जराति वा दाहाति वा कच्छूति वा खसराति वा कुद्धाति वा कुट्ठाति वा दगराति

वा अरिसाति वा अजीरगाति वा भगंदराइ वा इंदग्गहाति वा खंदग्गहाति वा कुमारग्गहाति वा णागग्गहाति वा जक्खग्गहाति वा भूतग्गहाति वा उव्वेयग्गहाति वा धणुग्गहाति वा एगाहियग्गहाति वा बेयाहियग्गहाति वा तेयाहियग्गहाइ वा चाउत्थाहियग्गहाति वा हिययसूलाति वा मत्थगसूलाति पाससूलाइ वा कुच्छिसूलाइ वा जोणिसूलाइ वा गाममारीति वा जाव सन्निवेसमारीति वा पाणक्खयजाववसणभूतमणारिताति वा ?, णो तिण्ठे समट्ठे, ववगतरोगायंका णं ते मणुयगणा पं० समणाउसो !, अत्थि णं भंते ! एगुरुयदीवे अतिवासाति वा मंदवासाति वा सुवुट्ठीइ वा मंदवुट्ठीति वा उदवाहाति वा पवाहणाति वा दगुब्भेयाइ वा दगुप्पीलाइ वा गामवाहाति वा जाव सन्निवेसवाहाति वा पाणक्खयजाववसणभूतमणारिताति वा ?, णो तिण्ठे समट्ठे, ववगतदगोवद्दवा णं ते मणुयगणा पं० समणाउसो !, अत्थि णं भंते ! एगुरुयदीवे अयागराति वा तम्वागराइ वा सीसागराति वा सुवण्णागराति वा रतणागराति वा वइरागराइ वा वसुहाराति वा हिरण्णवासाति वा सुवण्णवासाति वा रयणवासाति वा वइरवासाति वा आभरणवासाति वा पत्तवासाति वा पुप्फवासाति वा फलवासाति वा बीयवासा० मल्लवासा० गंधवासा० वण्णवासा० चुण्णवासा० खीरवुट्ठीति वा रयणवुट्ठीति हिरण्णवुट्ठीति वा सुवण्ण० जाव चुण्णवुट्ठीति वा सुकालाति वा दुकालाति वा सुभिकखाति वा दुभिकखाति वा अप्पग्घाति वा महग्घाति वा कयाइ वा महाविक्रयाइ वा सण्णिहीइ वा संचयाइ वा निधीइ वा निहाणाति वा चिरपोराणाति वा पहीणसामियाति वा पहीणसेउयाइ वा पहीणगोत्तागाराइ वा जाइं इमाइं गामागरणगरखेडकब्बडमडं बदोणमुहपट्टणासमसंवाहसन्निवेसेसु सिंघाडगतिगचउक्कचच्चरचउमुहमहापहपहेसु णगरणिद्धमणसुसाणर्धिगरिकंदरसन्तिसेलोवट्ठाणभवणगिहेसु सन्निक्खित्ताइं चिट्ठंति ?, नो तिण्ठे समट्ठे, एगुरुयदीवे णं भंते ! दीवे मणुयाणं केवतियं कालं ठिती पं० ?, गो० ! जह० पलिओवमस्स असंखेज्जइभागं असंखेज्जतिभागेण ऊणगं उक्को० पलिओवमस्स असंखेज्जतिभागं, ते णं भंते ! मणुया कालमासे कालं किच्चा कहिं गच्छंति कहिं उववज्जंति ?, गो० ! ते णं मणुया छम्मासावसेसाउया मिहुणताइं पसवंति अउणासीइं राइंदियाइं मिहुणाइं सारक्खंति संगोविंति य त्ता य उस्ससित्ता निस्ससित्ता कासित्ता छीत्तित्ता अक्किट्ठा अव्वहिता अपरियाविया सुहंसुहेणं कालमासे कालं किच्चा अन्नयरेसु देवलोएसु देवत्ताएउववत्तारो भवन्ति, देवलोयपरिग्गहा णं ते मणुयगणा पं० समणाउसो !, कहिं णं भंते ! दाहिणिल्लाणं आभासियमणुस्साणं आभासियदीवे णामं दीवे पं० ?, गो० ! जंबुद्दीवे दीवे (प्र० तहेव चेव) चुल्लहिमवंतस्स वासधरपव्वतस्स दाहिणपुरच्छिमिल्लातो चरिमंतातो लवणसमुदं तिन्नि जोयण० सेसं जहा एगुरुयाणं णिरवसेसं सव्वं, कहिं णं भंते ! दाहिणिल्लाणं णंगोलि(प्र० वीसाणी)यमणुस्साणं पुच्छा, गो० ! जंबुद्दीवे दीवे मंदरस्स पव्वयस्स दाहिणेणं चुल्लहिमवंतस्स वासधरपव्वयस्स उत्तर(दाहिण)पच्छिमिल्लातो चरिमंतातो लवणसमुदं तिण्णिजोयणसत्ताइं सेसं जहा एगोरुयमणुस्साणं, कहिं णं भंते ! दाहिणिल्लाणं वेसाणियमणुस्साणं पुच्छा, गो० ! जंबुद्दीवे दीवे मंदरस्स पव्वयस्स दाहिणेणं चुल्लहिमवंतस्स वासधरपव्वयस्स दाहिण(उत्तर)पच्चत्थिमिल्लाओ चरिमंताओ लवणसमुदं तिण्णि जोयण० सेसं जहा एगोरुयाणं । ११२ । कहिं णं भंते ! दाहिणिल्लाणं हयकण्णमणुस्साणं हयकण्णदीवे णामं दीवे पं० ?, गो० ! एगुरुयदीवस्स उत्तरपुरच्छिमिल्लातो चरिमंतातो लवणसमुदं चत्तारि जोयणसयाइं ओगाहिता एत्थ णं दाहिणिल्लाणं हयकण्णमणुस्साणं हयकण्णदीवे णामं दीवे पं० चत्तारि जोयणसयाइं आयामविकखंभेणं बारस्स जोयणसया पन्नट्ठी किंचिविसेसूणा परिकखेवेणं, से णं एगाए पउमवरवेतियाए अवसेसंजहा एगुरुयाणं, कहिं णं भंते ! दाहिणिल्लाणं गजकण्णमणुस्साणं पुच्छा, गो० ! आभासियदीवस्स दाहिणपुरच्छिमिल्लातो चरिमंतातो लवणसमुदं चत्तारि जोयणसत्ताइं सेसं जहा हयकण्णाणं, एवं गोकण्णमणुस्सा पुच्छा, वेसाणितदीवस्स दाहिणपच्चत्थिमिल्लातो चरिमंतातो लवणसमुदं चत्तारि जोयणसत्ताइं सेसं जहा हयकण्णाणं, सक्कुलिकण्णाणं पुच्छा, गो० ! णंगोलिय दीवस्स उत्तरपच्चत्थिमिल्लातो चरिमंतातो लवणसमुदं चत्तारे जोयणसत्ताइं सेसं जहा हयकण्णाणं आतंसमुहाणं पुच्छाहयकण्णयदीवस्स उत्तरपुरच्छि मिल्लाता चरिमंताती

पंच जोयण सताइं ओगाहिता एत्थ णं दाहिणिल्लाणं आयंसमुहमणुस्साणं आयंसमुहदीवे णामं दीवे पं० पंच जोयणसयाइं आयामविक्रवंभेणं, आसमुहाईणं छ सया, आसकन्नाईणं सत्त, उक्कामुहाईणं अट्ठ, घणदंताईणं जाव नव जोयणसयाई- 'एगुरुयपरिक्खेवो नव चेव सयाइं अउणपन्नाइं । बारसपन्नट्ठाइं हयकण्णाईणं परिक्खेवो ॥२५॥ आयंसमुहाईणं पन्नरसेकासीए जोयणसते किंचिविसेसाधिए परिक्खेवेणं, एवं एतेणं कमेणं उवउञ्जिऊण णेतव्वा चत्तारि २ एगपमाणा, णाणत्तं ओगाहे विक्रवंभे परिक्खेवे, पढमबीतततियचउक्काणं उग्गहो विक्रवंभो परिक्खेवो भणितो, चउत्थचउक्के छजोयणसयाइं आयामविक्रवंभेणं अट्ठारसत्ताणउत्ते जोयणसते विक्रवंभेणं पंचमचउक्के सत्तजोयणसताइं आयामविक्रवंभेणं बावीसं तेरसोत्तरे जोयणसए परिक्खेवेणं छट्ठचउक्के अट्ठजोयणसताइं आयामविक्रवंभेणं पणवीसं गुणतीसजोयणसए परिक्खेवेणं सत्तमचउक्के नवजोयणसताइं आयामविक्रवंभेणं दो जोयणसहस्साइं अट्ठ पणयाले जोयणसए परिक्खेवेणं, 'जस्स य जो विक्रवंभो उग्गहो तस्स तत्तिओ चेव । पढमाइयाण परिरतो जाण सेसाण अहिओ उ ॥२६॥ सेसा जहा एगुरुयदीवस्स जाव सुद्धदंतदीवे, देवलोकपरिग्गहा णं ते मणुयगणा पं० समणाउसो !, कहिं णं भंते ! उत्तरिल्लाणं एगुरुयमणुस्साणं एगुरुयदीवे णामं दीवे पं० ?, गो० ! जंबुद्दीवे दीवे मंदरस्स पव्वयस्स उत्तरेणं सिंहिरस्स वासधरपव्वयस्स उत्तरपुरच्छिमिल्लाओ चरिमंताओ लवणसमुदं तिण्णि जोयणसताइं ओगाहिता एवं जहा दाहिणिल्लाणं तहा उत्तरिल्लाणं भाणितव्वं णवरं सिंहिरस्स वासहरपव्वयस्स विदिसासु एवं जाव सुद्धदंतदीवेत्ति जाव सेत्तं अंतरदीवका ।११३। से किं तं अकम्मभूमगमणुस्स ?, २ तीसविधा पं० तं०- पंचहिं हेमवएहिं एवं जहा पण्णवणापदे जाव पंचहिं उत्तरकुरूहिं, सेत्तं अकम्मभूमगा, से किं तं कम्मभूमगा ?, २ पण्णरसविधा पं० तं०- पंचहिं भरहेहिं पंचहिं एरवएहिं पंचहिं महाविदेहेहिं, ते समासतो दुविहा पं० तं०- आयरिया मिलेच्छा एवं जहा पण्णवणापदे जाव सेत्तं आयरिया, सेत्तं गम्भवक्कंतिया, **☆☆☆ सेत्तं मणुस्सा ।११४।** **☆☆☆** से किं तं देवा ?, २ चउव्विहा पं० तं०- भवणवासी वाणमंतरा जोइसिया वेमाणिया ।११५। से किं तं भवणवासी ?, २ दसविहा पं० तं०- असुरकुमारा जहा पण्णवणापदे देवाणं भेओ तहा भाणितव्वो जाव अणुत्तरोववाइआ पंचविधा पं० तं०- विजयवेजयंतजावसव्वट्ठसिद्धगा, सेत्तं अणुत्तरोववातिया ।११६। कहिं णं भंते ! भवणवासिदेवाणं भवणा पं०, कहिं णं भंते ! भवणवासी देवा परिवसंति ?, गो० ? इमीसे रयणप्पभाए पुढवीए असीउत्तरजोयणसयसहस्सबाहल्लाए एवं जहा पण्णवणाए जाव भवणावासाइ वा, त(ए)त्थ णं भवणवासीणं देवाणं सत्त भवणकोडीओ बावत्तरि भवणावासयसहस्सा भवंतित्तिमक्खाता, तत्थ णं बहवे भवणवासी देवा परिवसंति- असुरा नागा सुवन्ना य जहा पण्णवणाए जाव विहरंति ।११७। कहिं णं भंते ! असुरकुमाराणं देवाणं भवणा पं० ? पुच्छा एवं जहा पण्णवणाठाणपदे जाव विहरंति, कहिं णं भंते ! दाहिणिल्लाणं असुरकुमारदेवाणं भवणा पुच्छा, एवं जहा ठाणपदे जाव चमरे तत्थ असुरकुमारिदे असुरकुमारया परिवसति जाव विहरति ।११८। चमरस्स णं भंते ! असुरिंदस्स असुरकुमाररत्तो कति परिसातो पं० ?, गो० ! तओ परिसातो पं० तं०- समिता चंडा जाता अब्भितरिता समिता मज्झे चंडा बाहिं च जाया, चमरस्स णं भंते ! असुरिंदस्स असुररत्तो अब्भितरपरिसाए कति देवसाहस्सीतो पं० मज्झिमपरिसाए कति देवसाहस्सीओ पं० बाहिरियाए परिसाए कति देवसाहस्सीओ पं० ?, गो० ! चमरस्स णं असुरिंदस्स० अब्भितरपरिसाए चउवीसं देवसाहस्सीतो पं०, मज्झिमिताए परिसाए अट्ठावीसं देव०, बाहिरिताए परिसाए बत्तीसं देवसा०, चमरस्स णं भंते ! असुरिंदस्स असुररणो अब्भितरिताए परिसाए कति देविसता पं० मज्झिमियाए परिसाए कति देविसया पं० बाहिरियाए परिसाए कति देविसता पं० ?, गो० ! चमरस्स णं असुरिंदस्स असुररणो अब्भितरियाए परिसाए अब्बुट्ठा देविसता पं० मज्झिमियाए परिसाए तिन्नि देवी० बाहिरियाए अट्ठाइज्जा देवी० चमरस्स णं भंते ! असुरिंदस्स असुररणो अब्भितरियाए परिसाए देवाणं केवतियं कालं ठिती पं० मज्झिमियाए परिसाए० बाहिरियाए परिसाए देवाणं केवतियं कालं ठिती पं० अब्भितरियाए परि० देवीणं केवतियं कालं ठिती पं० मज्झिमियाए परि० देवीणं के० ?, गो० ! चमरस्स णं असुरिंदस्स असुररणो अब्भितरियाए परि० देवाणं अट्ठाइज्जाइं

पलिओवमाइं ठिई पं० मज्झिमाए परिसाए देवाणं दो पलिओवमाइं ठिई पं० बाहिरियाए परिसाए देवाणं दिपह्वं पलि० अब्भित्तरीयाए परिसाए देवीणं दिवह्वं पलिओवमं ठिती पं० मज्झिमियाए परिसाए देवीणं पलिओवमं ठिती पं० बाहिरियाए परि० देवीणं अब्धपलिओवमं ठिती पं०, से केणट्ठेणं भंते ! एवं वुच्चति ?- चमरस्स असुरिंदस्स० तओ परिसातो पं० तं०- समिया चंडा जाया, अब्भित्तरीया समिया मज्झिमिया चंडा बाहिरिया जाया ?, गो० ! चमरस्स णं असुरिंदस्स असुररत्तो अब्भित्तपरिसा देवा वाहिता हव्वमागच्छंति णो अवाहिता, मज्झिमपरिसाए देवा वाहिता हव्वमागच्छंति अवाहितावि, बाहिरपरिसा देवा अवाहिता हव्वमागच्छंति, अदुत्तरं च णं गो० ! चमरे असुरिदे असुरराया अन्नयरेसु उच्चावएसु कज्जकोडुंबेसु समुप्पन्नेसु अब्भित्तरीयाए परिसाए सद्धिं संमइसंपुच्छणाबहुले विहरइ, मज्झिमपरिसाए सद्धिं पयं पवंचेमाणे २ विहरति, बाहिरियाए परिसाइ सद्धिं पयंडेमाणे २ विहरति, से तेणट्ठेणं गो० ! एवं वुच्चइ- चमरस्स णं असुरिंदस्स असुरकुमाररण्णो तओ परिसाओ पं०- समिया चंडा जाता, अब्भित्तरीया समिया मज्झिमिया चंडा बाहिरिया जाता । ११९ । कहिं णं भंते ! उत्तरिल्लाणं असुरकुमाराणं भवणा पं० ?, जहा ठाणपदे जाव बली, एत्थ बली वइरोयणिदे वइरोयणराया परिवसति जाव विहरति, बलिस्स (१५६) णं भंते ! वयरोयणिंदस्स वइरोयणरत्तो कति परिसाओ पं० ?, गो० ! तिण्ण परिसा तं०- समिया चंडा जाया, अब्भित्तरीया समिया मज्झिमिया चंडा बाहिरिया जाया, बलिस्स णं वइरोयणिंदस्स वइरोयणरत्तो अब्भित्तरीयाए परिसाए कति देवसहस्सा मज्झिमियाए परिसाए कति देवसहस्सा जाव बाहिरियाए कति देवीसया पं० ?, गो० ! बलिस्स णं वयरोयणिंदस्स अब्भित्तरीयाए वीसं देवसहस्सा पं० मज्झिमियाए चउवीसं देवसहस्सा पं० बाहिरियाए परिसाए अट्ठावीसं देवसहस्सा पं० अब्भित्तरीयाए परिसाए अब्धपंचम देवीसता पं० मज्झिमियाए चत्तारि देवीसया पं० बाहिरियाए परिसाए अद्धुट्ठा देवीसता पं०, बलिस्स ठितीए पुच्छा जाव बाहिरियाए परिसाए देवीणं केवतियं कालं ठिती पं० ?, गो० ! बलिस्स णं वइरोयणिंदस्स अब्भित्तरीयाए परिसाए देवाणं अब्धुट्ठपलिओवमाइं ठिती पं० मज्झिमियाए परिसाए तिन्नि पलिओवमाइं ठिती पं० बाहिरियाए परिसाए देवाणं अट्ठाइज्जाइं पलिओवमाइं ठिई पं० अब्भित्तरीयाए परिसाए देवीणं अट्ठाइज्जाइं पलिओवमाइं ठिती पं० मज्झिमियाए परिसाए देवीणं दो पलिओवमाइं ठिती पं० बाहिरियाए परिसाए देवीणं दिवइह्वं पलिओवमं ठिती पं०, सेसं जहा चमरस्स असुरिंदस्स असुरकुमाररण्णो । १२० । कहिं णं भंते ! नागकुमाराणं देवाणं भवणा पं० ?, जहा ठाणपदे जाव दाहिणिल्लावि पुच्छियव्वा जाव धरणे इ (प्र० त) तथ नागकुमारिदे नागकुमारराया परिवसति जाव विहरति, धरणस्स णं भंते ! नागकुमारिंदस्स नागकुमाररण्णो कति परिसाओ पं० ?, गो० ! तिण्णि परिसाओ ताओ चेव जहा चमरस्स, धरणस्स णं भंते ! नागकुमारिन्दस्स नागकुमाररत्तो अब्भित्तरीयाए परिसाए कति देवसहस्सा पं० जाव बाहिरियाए परिसाए कति देवीसता पं० ?, गो० ! धरणस्स णं नागकुमारिंदस्स नागकुमाररण्णो अब्भित्तरीयाए परिसाए सद्धिं देवसहस्साइं मज्झिमियाए परिसाए सत्तरिं देवसहस्साइं बाहिरियाए असीतिदेवसहस्साइं अब्भित्तपरिसाए पण्णत्तरं देवीसतं पं० मज्झिमियाए परिसाए पण्णासं देवीसतं पं० बाहिरियाए परिसाए पण्णवीसं देवीसतं पं०, धरणस्स णं रत्तो अब्भित्तरीयाए परिसाए देवाणं केवतियं कालं ठिती पं० मज्झिमियाए० बाहिरियाए० देवाणं० अब्भित्तरीयाए देवीणं० पं० मज्झिमियाए० देवीणं० बाहिरियाए० देवीणं केवतियं कालं ठिती पं० ?, गो० ! धरणस्स रण्णो अब्भित्तरीयाए० देवाणं सातिरेगं अब्धपलिओवमं ठिती पं०, मज्झिमियाए परिसाए देवाणं अब्धपलिओवमं ठिती पं०, बाहिरियाए परिसाए देवाणं देसूणं अब्धपलिओवमं ठिती पं० अब्भित्तरीयाए परिसाए देवीणं देसूणं अब्धपलिओवमं ठिती पं०, मज्झिमियाए परिसाए देवीणं सातिरेगं चउभाणपलिओवमं ठिती पं०, बाहिरियाए परिसाए देवीणं चउभाणपलिओवमं ठिती पं०, अट्ठो जहा चमरस्स, कहिं णं भंते ! उत्तरिल्लाणं नागकुमाराणं जहा ठाणपदे जाव विहरति, भूयाणंदस्स णं भंते ! नागकुमारिंदस्स नागकुमाररण्णो अब्भित्तरीयाए० कतिदेवसाहस्सीओ पं० मज्झिमियाए० देवसाहस्सीओ पं० बाहिरियाए० देवसाहस्सीओ पं० अब्भित्तरीयाए० देवीसया पं० मज्झिमियाए० देवीसया पं० बाहिरियाए० देवीसया पं० ?, गो० ! भूयाणंदस्स णं भन्ते ! नागकुमाररत्तो अब्भित्तरीयाए० पन्नासं देवसहस्सा पं०

मज्झिमियाए० सट्ठिं देवसाहस्सीओ पं० बाहिरियाए० सत्तरि देवसाहस्सीओ पं० अब्भित्तोरियाए० दो पणवीसं देवीसयाणं पं० मज्झिमियाए० दो देवीसया पं० बाहिरियाए० पणत्तरं देवीसयं पं०, भूयाणंदस्स णं भंते ! नागकुमारिंदस्स नागकुमाररण्णो अब्भित्तोरियाए परिसाए देवाणं केवतियं कालं ठिती पं० जाव बाहिरियाए परिसाए देवीणं केवइयं कालं ठिई पं० ?, गो० ! भूताणंदस्स णं अब्भित्तोरियाए परिसाए देवाणं देसूणं पलिओवमंठिती पं० मज्झिमियाए परिसाए देवाणं साइरेगं अब्धपलिओवमं ठिती पं० बाहिरियाए परिसाए देवाणं अब्धपलिओवमं ठिती पं० अब्भित्तोरियाए परिसाए देवीणं अब्धपलिओवमंठिती पं०, मज्झिमियाए परिसाए देवीणं देसूणं अब्धपलिओवमं ठिती पं०, बाहिरियाए परिसाए देवीणं साइरेगं चउब्भागपलिओवमं ठिती पं०, अत्थो जहा चमरस्स, अवसेसाणं वेणुदेवादीणं महाघोसपज्जवसाणाणं ठाणपदवत्तव्वया णिरवयवा भाणियव्वा, परिसातो जहा धरणभूताणंदाणं (सेसाणं भवणवईणं) दाहिणिल्लाणं जहा धरणस्स उत्तरिल्लाणं जहा भूताणंदस्स, परिमाणं पि ठितीवि । १२१। कहिं णं भंते ! वाणमंतराणं देवाणं भवणा (भोमेज्जा णगरा) पं० ?, जहा ठाणपदे जाव विहरंति, कहिं णं भंते ! पिसायाणं देवाणं (प्र० यकुमाराणं) भवणा पं० ?, जहा ठाणपदे जाव विहरंति, कालमहाकाला य तत्थ दुवे पिसायकुमाररायाणो परिवसंति जाव विहरंति, कहिं णं भंते ! दाहिणिल्लाणं पिसायकुमाराणं जाव विहरंति, काले य एत्थ पिसायकुमारिंदे पिसायकुमारराया परिवसति महडिढए जाव विहरति, कालस्स णं भंते ! पिसायकुमारिंदस्स पिसायकुमाररण्णो कति परिसाओ पं० ?, गो० ! तिण्णि परिसाओ पं० तं०-ईसा तुडिया दढरहा, अब्भित्तोरिया ईसा मज्झिमिया तुडिया बाहिरिया दढरहा, कालस्स णं भंते ! पिसायकुमारिंदस्स पिसायकुमाररण्णो अब्भित्तोरपरिसाए कति देवसाहस्सीओ पं० जाव बाहिरियाए परिसाए कइ देवीसया पं० ?, गो० ! कालस्स णं पिसायकुमारिंदस्स पिसायकुमाररायस्स अब्भित्तोरियपरिसाए अट्ठ देवसाहस्सीओ पं० मज्झिमपरिसाए दस देवसाहस्सीओ पं० बाहिरियपरिसाए बारस देवसाहस्सीओ पं० अब्भित्तोरियाए परिसाए एगं देवीसतं पं० मज्झिमियाए परिसाए एगं देवीसतं पं० बाहिरियाए परिसाए एगं देवीसतं पं०, कालस्स णं भंते ! पिसायकुमारिंदस्स पिसायकुमाररण्णो अब्भित्तोरियाए परिसाए देवाणं केवतियं कालं ठिती पं० मज्झिमियाए परिसाए देवाणं केवतियं कालं ठिती पं० बाहिरियाए परिसाए देवाणं केवतियं कालं ठिती पं० जाव बाहिरियाए देवीणं केवतियं कालं ठिती पं० ?, गो० ! कालस्स णं पिसायकुमारिंदस्स पिसायकुमाररण्णो अब्भित्तोरपरिसाए देवाणं अब्धपलिओवमं ठिती पं० मज्झिमियाए परि० देवाणं देसूणं अब्धपलिओवमं ठिती पं० बाहिरियाए परि० देवाणं सातिरेगं चउब्भागपलिओवमं ठिती पं० अब्भित्तोरपरि० देवीणं सातिरेगं चउब्भागपलिओवमं ठिती पं० मज्झिमपरि० देवीणं चउब्भागपलिओवमं ठिती पं० बाहिरपरिसाए देवीणं देसूणं चउब्भागपलिओवमं ठिती पं०, अट्ठो जो चेव चमरस्स, एवं उत्तरस्सवि, एवं णिरंतरं जाव गीयजसस्स । १२२। कहिं णं भंते ! जोइसियाणं देवाणं विमाणा पं० ?, कहिं णं भंते ! जोतिसिया देवा परिवसंति ?, गो० ! उप्पिं दीवसमुद्दाणं इमीसे रयणप्पभाए पुढवीए बहुसमरमणिज्जातो भूमिभागातो सत्तणउए जोयणसते उड्ढं उप्पत्तिता दसुत्तरजोयणसया बाहल्लेणं तत्थ णं जोइसियाणं देवाणं तिरियमसंखेज्जा जोतिसियविमाणावाससतसहस्सा भवंतीतिमक्खायं, ते णं विमाणा अब्धकविट्ठकसंठाणसंठिया एवं जहा ठाणपदे जाव चंदिमसूरिया य तत्थ जोतिसिंदा जोतिसरायाणो परिवसंति महडिढया जाव विहरंति, सूरस्स णं भंते ! जोतिसिंदस्स जोतिसरण्णो कति परिसाओ पं० ?, गो० ! तिण्णि परिसाओ पं० तं०-तुंबा तुडिया पेच्चा, अब्भित्तोरया तुंबा मज्झिमिया तुडिया बाहिरिया पेच्चा, सेसं जहा कालस्स, परिमाणं ठितीवि, अट्ठो जहा चमरस्स, चंदस्सवि एवं चेव । १२३। कहिं णं भंते ! ☆☆☆ दीवसमुद्दा ☆☆☆ ? केवइया णं भंते ! दीवसमुद्दा ? केमहालया णं भंते ! दीवसमुद्दा ? किंसंठिया णं भंते ! दीवसमुद्दा ? किमाकारभावपडोयारा णं भंते ! दीवसमुद्दा पं० ?, गो० ! जंबुदीवाइया दीवा लवणादीया समुद्दा संठाणतो एक विहविधाणा वित्थारतो अणेगविधविधाणा दुगुणादुगुणे पडुप्पाएमाणा २ पवित्थरमाणा २ ओभासमाणवीचीया बहुउप्पलपउमकुमुदणलिणसुभगसोंगधियपों डरीयमहापों डरीयसत-पत्तसहस्सपत्तफुल्लकेसरोवचि-ता पत्तेयं २ पउमवरवेइयापरिक्खित्ता पत्तेयं २

वणसंडपरिक्खित्ता अस्सिं तिरितलोए असंखेज्जा दीवसमुद्दा सयंभूरमणपज्जवसाणा पं० समणाउसो ! ।१२४। तत्थ णं अयं जंबुद्वीवे णामं दीवे दीवसमुद्धानं अब्भित्तरिए सव्वखुड्डाए वट्ठे तेल्लापूयसंठाणसंठिते वट्ठे रहचक्कवालसंठाणसंठिते वट्ठे पुक्खरकण्णियासंठाणसंठिते वट्ठे पडिपुत्तचंदसंठाणसंठिते एक्कं जोयणसयसहस्सं आयामविकखंभेणं तिण्णिं जोयणसयसहस्साइं सोलस सहस्साइं दोण्णिं य सत्तावीसे जोयणसते तिण्णिं य कोसे अट्ठवीसं च धणुसयं तेरस अंगुलाइं अब्बंगुलकं च किंचिविसेसाहियं परिकखेवेणं पं०, से णं एक्काए जगतीए सव्वतो समंता संपरिक्खित्ते, सा णं जगती अट्ठ जोयणाइं उड्ढंउच्चत्तेणं मूले बारस जोयणाइं विकखंभेणं मज्झे अट्ठ जोयणाइं विकखंभेणं उप्पिं चत्तारि जोयणाइं विकखंभेणं मूले विच्छिण्णा मज्झे संखित्ता उप्पिं तणुया गोपुच्छसंठाणसंठिता सव्ववइरामई अच्छा सण्हा लण्हा घट्ठा मट्ठा णीरया णिम्मला णिप्पंका णिक्कंकडच्छाया सप्पभा समरीया सउज्जोया पासादीया दरिसणिज्जा अभिरूवा पडिरूवा, सा णं जगती एक्केणं जालकडणं सव्वतो समंता संपरिक्खित्ता, से णं जालकडाए अब्बजोयणं उड्ढंउच्चत्तेणं पंचधणुसयाइं विकखंभेणं सव्वरयणामए अच्छे सण्हे लण्हे घट्ठे मट्ठे णीरए णिम्मले णिप्पंके णिक्कंकडच्छाए सप्पभे सस्सिरीए समरीए सउज्जोए पासादीए दरिसणिज्जे अभिरूवे पडिरूवे ।१२५। तीसे णं जगतीए उप्पिं बहुमज्झेदेसभाए एत्थ णं एगा महई पउमवरवेदिया पं०, सा णं पउमवरवेदिया अब्बजोयणं उड्ढंउच्चत्तेणं पंचधणुसयाइं विकखंभेणं सव्वरयणामए जगतीसमिया परिकखेवेणं, तीसे णं पउमवरवेइयाए अयमेयारूवे वण्णावासे पं० तं०-वइरामया नेम्मा रिट्ठामया पडिट्ठाणा वेरूलियामया खंभा सुवण्णरूपमया फलगा वइरामया संधी लोहितक्खमईओ सूईओ णाणामणिमया कलेवरा कलेवरसंघाडा णाणामणिमया रूवा रूवसंघाडा अंकामया पक्खा पक्खबाहाओ जोतिरसामया वंसा वंसकवेल्लुया य रययामईओ पट्टियाओ जातरूवमयीओ ओहाडणीओ वइरामयीओ उवरि पुच्छणीओ सव्वेसेए रययामते छादणे, सा णं पउमवरवेइया एगमेगेणं हेमजालेणं एगमेगेणं गवक्खजालेणं एगमेगेणं खिंखिणिजालेणं एवं घंटाजालेणं जाव मणिजालेणं कणयजालेणं रयणजालेणं एगमेगेणं पउमवरजालेणं सव्वरयणामएणं सव्वतो समंता संपरिक्खित्ता, ते णं जाला (पा० दामा) तवणिज्जलंबूसगा सुवण्णपयरगमंडिया णाणामणिरयणविविहहारद्धहारउवसोभितसमुदया ईसिं अण्णमण्णमसंपत्ता पुव्वावरदाहिणउत्तरागतेहिं वाएहिं मंदागं २ एज्जमाणा २ कंपिज्जमाणा २ लंबमाणा पझंझमाणा सद्दायमाणा तेणं ओरालेणं मणुणेणं कण्णमणणेवुतिकरेणं सद्देणं सव्वतो समंता आपूरेमाणा सिरीए अतीव उवसोभेमाणा २ चिट्ठंति, तीसे णं पउमवरवेइयाए तत्थ २ देसे तहिं २ बहवे हयसंघाडा गयसंघाडा नरसंघाडा किण्णरसंघाडा किंपुरिससंघाडा महोरगसंघाडा गंधव्वसंघाडा वसहसंघाडा सव्वरयणामया अच्छा सण्हा लण्हा घट्ठा मट्ठा णीरया णीम्मला णिप्पंका णिक्कंकडच्छाया सप्पभा समरिया सउज्जोया पासाईया दरिसणिज्जा अभिरूवा पडिरूवा, तीसे णं पउमवरवेइयाए तत्थ २ देसे तहिं २ बहवे हयपंतीओ तहेव जाव पडिरूवाओ, एवं हयवीहीओ जाव पडिरूवाओ, एवं हयमिहुणाइं जाव पडिरूवाइं, तीसे णं पउमवरवेइयाए तत्थ २ देसे तहिं २ बहवे पउमलयाओ नागलताओ एवं असोग० चंपग० चूयवण० वासंति० अतिमुत्तग० कुंद० सामलयाओ णिच्चं कुसुमियाओ जाव सुविहत्तपिंडमंजरिवडिंसकधरीओ सव्वरयणामईओ सण्हाओ लण्हाओ घट्ठाओ मट्ठाओ णीरयाओ णिम्मलाओ णिप्पंकाओ णिक्कंकडच्छायाओ सप्पभाओ समरीयाओ सउज्जोयाओ पासाईयाओ दरिसणिज्जाओ अभिरूवाओ पडिरूवाओ, तीसे णं पउमवरवेइयाए तत्थ २ देसे तहिं २ बहवे अक्खयसोत्थिया पं० सव्वरयणामया अच्छा. से केणट्ठेणं भंते ! एवं वुच्चइ० पउमवरवेइया २ ? गो० ! पउमवरवेइयाए तत्थ २ देसे तहिं २ वेदियासु वेतियाबाहासु वेदियासीसफलएसु वेदियापुडंतरेसु खंभेसु खंभबाहासु खंभसीसेसु खंभपुडंतरेसु सूइसु सुइमुहेसु सुइफलएसु सूइपुडंतरेसु पक्खेसु पक्खबाहासु पक्खपेरंतरेसु बहूइं उप्पलाइं पउमाइं जाव सतसहस्सपत्ताइं सव्वरयणामयाइं अच्छाइं सण्हाइं लण्हाइं घट्ठाइं मट्ठाइं णीरयाइं णिम्मलाइं निप्पंकाइं निक्कंकडच्छायाइं सप्पभाइं समरीयाइं सउज्जोयाइं पासादीयाइं दरिसणिज्जाइं अभिरूवाइं पडिरूवाइं महता २ वासिक्कच्छत्तसमयाइं पं० समणाउसो !, से तेणट्ठेणं गो० ! एवं वुच्चइ-पउमवरवेदिया २, पउमवरवेइया णं भंते ! किं सासया असासया ? गो० ! सिय सासया सिय असासया, से केणट्ठेणं भंते ! एवं वुच्चइ-सिय सासया सिय असासया ? गो० ! दव्वट्ठयाए सासता वण्णपज्जवेहिं गंध० रस० फासपज्जवेहिं

असासता, से तेणट्ठेणं गो० ! एवं वुच्चइ-सिय सासता सिय असासता, पउमवरवेइया णं भंते ! कालओ केवच्चिरं होति ?, गो० ! ण कयावि णासि ण कयावि णत्थि ण कयावि न भविस्सति भुवि च भवति य भविस्सति य धुवा नियया सासता अक्खया अव्वया अवट्ठिया णिच्चा पउमवरवेइया । १२६। तीसे णं जगतीए उप्पिं बाहिं पउमवरवेइयाए एत्थ णं एगे महं वणसंडे पं० देसूणाइं दो जोयणाइं चक्कवालविकखंभेणं जगतीसमए परिकखेवेणं किणहे किणहोभासे जाव अणेगसगडरहजाणजुग्गपरिमोयणे सुरम्मे सणहे लणहे घट्टे मट्टे नीरए निप्पंके निम्मल्ले निक्कं कडच्छाए सप्पभे समरीए सउज्जोए पासादीए दरिसणिज्जे अभिरूवे पडिरूवे, तस्स णं वणसंडस्स अंतो बहुसमरमणिज्जे भूमिभागे पं० से जहानामए आलिंगपुक्खरेति वा मुङ्गपुक्खरेति वा सरतलेइ वा करतलेइ वा आयंसमंडलेति वा चंदमंडलेति वा सूरमंडलेति उरब्भचम्मेति वा उसभचम्मेति वा वराहचम्मेति वा सीहचम्मेति वा वग्घचम्मेति वा विगचम्मेति वा दीवितचम्मेति वा अणेगसंकु कीलगसहस्सवितते

आवडपच्चावडसेढीपसेढीसोत्थियसोवत्थियपूसमाणवद्धमाणमच्छंडक-मकरंडकजारमारफुल्ला-वलिपउमपत्तसागरतरंगवासंतिलयपउमलयभत्तिचित्तेहिं सच्छाएहिं समरीएहिं सउज्जोएहिं नाणाविहपंचवण्णेहिं तणेहिं य मणीहिं य उवसोहिए तं०-किणहेहिं जाव सुक्किल्लेहिं, तत्थ णं जे ते किणहा तणा य मणी य तेसिं णं अयमेतारूवे वण्णावासे पं०, से जहानामए-जीमूतेति वा अंजणेति वा खंजणेति वा कज्जलेति वा मसीइ वा गुलियाइ वा गवलेइ वा गवलगुलियाति वा भमरेति वा भमरावलिआति या भमरपत्तगयसारेति वा जंबूफलेति वा अद्धारिट्ठेति वा परपुट्ठाति वा गएति वा गयकलभेति वा कण्हसप्पेइ वा कण्हकेसरेइ वा आगासथिगलेति वा कण्हसोएति वा कण्हकणवीरेइ वा कण्हबंधुजीवएति वा, भवे एयारूवे सिया ?, गो० ! णो तिणट्ठे समट्ठे, तेसिं णं कण्हाणं तणाणं मणीण य एत्तो इट्ठराए चेव कंततराए चेव पिययराए चेव मणुण्णतराए चेव मणामतराए चेव वण्णेणं पं०, तत्थ णं जे ते णीलगा तणा य मणी य तेसिं णं इमेतारूवे वण्णावासे पं०, से जहानामए-भिंगेइ वा भिंणपत्तेति वा चासेति वा चासपिच्छेति वा सुएति वा सुयपिच्छेति वा णीलीति वा णीलीभेएति वा णीलीगुलियाति वा सामाएति वा उच्चंतएति वा वणराईइ वा हलहरवसणेइ वा मोरग्गीवाति वा पारेवयगीवाति वा अयसिकुसुमेति वा वाणकुसुमेइ वा अंजणकेसिगाकुसुमेति वा णीलुप्पलेति वा णीलासोएति या णीलकणवीरेति वा णीलबंधुजीवएति वा, भवे एयारूवे सिता ?, णो इणट्ठे समट्ठे, तेसिं णं णीलगाणं तणाणं मणीण य एत्तो इट्ठतराए चेव कंततराए चेव जाव वण्णेणं पं०, तत्थ णं जे ते लोहितगा तणा य मणी य तेसिं णं अयमेयारूवे वण्णावासे पं०, से जहानामए-ससकरूहिरेति वा उरब्भरूहिरेति वा णररूहिरेति वा वराहरूहिरेति वा महिसरूहिरेति वा बालिंदगोवएति वा बालदिवागरेति वा संझब्भरागेति वा गुंजब्भराएति वा जातिहिंगुलुएति वा सिलप्पवालेति वा पवालंकुरेति वा लोहितक्खमणीति वा लक्खारसएति वा किमिरागेइ वा रत्तकंबलेइ वा चीणपिट्ठरासीइ वा जासुयणकुसुमेइ वा किंसुअकुसुमेइ वा पालियायकुसुमेइ वा रत्तुप्पलेति वा रत्तासोगेति वा रत्तकण्णियारेति वा रत्तबंधुजीवेइ वा, भवे एयारूवे सिया ?, नो तिणट्ठे समट्ठे, तेसिं णं लोहियगाणं तणाणं य मणीण य एत्तो इट्ठयराए चेव जाव वण्णेणं पं०, तत्थ णं जे ते हालिद्दगा तणा य मणी य तेसिं णं अयमेयारूवे वण्णावासे पं०, से जहानामए-चंपए वा चंपगच्छल्लीइ वा चंपयभेएइ वा हालिद्दति वा हालिद्दभेएति वा हालिद्दगुलियाति वा हरियालेति वा हरियालभेएति वा हरियालगुलियाति वा चिहुरेति वा चिहुरंगरागेति वा वरकणएति वा वरकणगनिघसेति वा सुवण्णसिप्पिएति वा वरपुरिसवसणेति वा सल्लइकुसुमेति वा चंपककुसुमेइ वा कुहंडियाकुसुमेति वा कोरंटकदामेइ वा तडउहाकुसुमेति वा घोसाडियाकुसुमेति वा सुवण्णजूहियाकुसुमेति वा सुहिरन्नयाकुसुमेइ वा कोरिंटवरमल्लदामेति वा बीयगकुसुमेति वा पीयासोएति वा पीयकणवीरेति वा पीयबंधुजीवएति वा, भवे एयारूवे सिया ?, नो इणट्ठे समट्ठे, ते णं हालिद्दा तणा य मणी य एत्तो इट्ठयरा चेव जाव वण्णेणं पं०, तत्थ णं जे ते सुक्किल्लगा तणा य मणी य तेसिं णं अयमेयारूवे वण्णावासे पं०, से जहानामए-अंकेति वा संखेति वा चंदेति वा कुंदेति वा कुमुएति वा दयरएति वा दहिघणेइ वा खीरेइ खीरपूरेइ वा हंसावलीति वा कोंचावलीति वा हारावलीति वा बलायावलीति वा चंदावलीति वा सारतियबलाहएति वा धंतधोयरूपपट्ठेइ वा सालिपिट्ठरासीति वा कुंदपुप्फरासीति वा कुमुयरासीति वा सुक्कच्छिवाडीति वा पेहुणमिंजाति वा बिसेति वा मिणालियाति वा गयदंतेति वा लवंगदलेति वा पोंडरीयदलेति वा

सिंदुवारमल्लदामेति वा सेतासोएति वा सेयकणवीरेति वा सेयबंधुजीवएइ वा, भवे एयारूवे सिया ?, णो तिण्ठे समट्ठे तेसिं णं सुक्किल्लाणं तणाणं मणीणं य एत्तो इट्ठतराए चेव जाव वण्णेणं पं०, तेसिं णं भंते ! तणाण य मणीण य केरिसए गंधे पं० ?, से जहाणामए-कोट्टपुडाण वा पत्तपुडाण वा चोयपुडाण वा तगरपुडाण वा एलापुडाण वा किरिमरूपुडाण वा चंदणपुडाण वा कुंकुमपुडाण वा उसीरपुडाण वा चंपगपुडाण वा मरूयगपुडाण वा दमणगपुडाण वा जातिपुडाण वा जूहियापुडाण वा मल्लियापुडाण वा णोमालियापुडाण वा वासंतियपुडाण वा केयतिपुडाण वा कप्पूरपुडाण वा पाडलिपुडाण वा अणुवायंसि उब्भिज्जमाणाण वा णिब्भिज्जमाणाण वा कोट्टेज्जमाणाण वा रूविज्जमाणाण वा उक्किरिज्जमाणाण वा विकिरिज्जमाणाण वा परिभुज्जमाणाण वा परिभाएज्जमाणाण वा भंडाओ वा भंडं साहरिज्जमाणाणं ओराला मणुण्णा घाणमणिव्वुतिकरा सव्वतो समंता गंधा अभिणिस्सवंति, भवेएयारूवे सिया ?, णो तिण्ठे समट्ठे, तेसिं णं तणाणं मणीण य एत्तो इट्ठतराए चेव जाव गंधे पं०, तेसिं णं भंते ! तणाण य मणीण य केरिसए फासे पं० ?, से जहाणामए-आइणेति वा रूएति वा बूरेति वा णवणीतेति वा हंसगभ्तूलीति वा सिरीसकुसुमणिचतेति वा बालकुमुदपत्तरासीति वा, भवे एतारूवे सिया ?, णो तिण्ठे समट्ठे, तेसिं णं तणाण य मणीण य एत्तो इट्ठतराए चेव जाव फासेणं पं०, तेसिं णं तणाणं पुव्वावरदाहिणउत्तरागतेहिं वाएहिं मंदायं २ एइयाण वेइयाणं कंपियाणं खोभियाणं चालियाणं फंदियाणं घट्टियाणं उदीरियाणं केरिसए सट्ठे पं० ?, से जहाणामए-सिबियाए वा संदमाणीयाए वा रहवरस्स वा सच्छत्तस्स सज्झयस्स सघंटयस्स सतोरणवरस्स सणंदिघोसस्स सखिंखिणिहेमजालपेरंतपरिक्खित्तस्स हेमवयखेत्तचित्तिणिसकणगनिज्जुत्तदारूयागस्स सुपिणिद्धारक (प्र० सुविसुद्धचक्क) मंडलधुरागस्स कालायससुकयणेमिजंतकम्मस्स आइणवरतुरगसुसंपत्तस्स कुसलणरच्छेयसारहि सुसंपरिगगहितस्स सरसतबत्तीसतोणपरिमंडितस्स सकंकडवडिंसगस्स सचावसरपहरणावरणहरियस्स जोहजुद्धस्स रायंगणंसि वा अंतेपुरंसि वा रम्मंसि वा मणिकोट्टिमतलंसि अभिक्खणं २ अभिघट्टिज्जमाणस्स वा णियट्टिज्जमाणस्स वा परूढवरतुरंगस्स चंडवेगाइट्ठ (द्ध) स्स ओराला मणुण्णा कणमणिव्वुतिकरा सव्वतो समंता सद्दा अभिणिस्सवंति, भवे एतारूवे सिया ?, णो तिण्ठे समट्ठे, से जहाणामए-वेयालियाए वीणाए उत्तरमंदामुच्छिताए अंके सुपइट्टियाए चंदणसारकोणपडिघट्टियाए कुसलणरणारिसंपगहिताए पदोसपच्चूसकालसमयंसि (पा० पुव्वरत्तावरत्तकालसमयंसि) मंदं २ एइयाए वेइयाए खोभियाए उदीरियाए ओराला मणुण्णा कणमणिव्वुतिकरा सव्वतो समंता सद्दा अभिणिस्सवंति, भवे एयारूवे सिया ?, णो तिण्ठे समट्ठे, से जहाणामए-किण्णराण वा किंपुरिसाण वा महोरगाण वा गंधव्वाण वा भद्दसालवणगयाण वा नंदणवणगयाण वा सोमणसवणगयाण वा पंडगवणगयाण वा हिमवंतमहंतमलयमंदरगिरिगुहासमण्णागयाण वा एगतो सहिताणं संमुहा (समुवा) गयाणं समुवविट्ठानं संनिविट्ठानं पमुदियपक्कीलियाणं गीयरतिगंधव्वहरिसियमणाणं गेज्जं पज्जं कत्थं गेयं पायविद्धं उक्खित्तयं पवत्तयं मंदायं रोचियावसाणं सत्तसरसमण्णागयं अट्ठरससुसंपत्तं छट्ठोसविप्पमुक्कं एक्कारसगुणालंकारं अट्ठगुणोववेयं गुजंतवंसकुहरोवगूढं रत्तं तित्थाणकरणसुद्धं मधुरं समं सुललियं सकुहरगुजंतवंसतंतीतालसुसंपत्तं तालसमं लयसुसंपत्तं गहसुसंपत्तं मणोहरं मउयरिभियपयसंचारं सुरतिं सुणतिं वरचारूखं दिव्वं नट्ठं सज्जं गेयं पगीयाणं, भवे एयारूवे सिया ?, हंता एवंभूए सिया । १२७। तस्स णं वणसंडस्स तत्थ २ देसे २ तहिं २ बहवे खुड्ढा खुडिडयाओ वावीओ पुक्खरिणीओ गुंजालियाओ दीहियाओ सरसीओ सरपंतिओ सरसरपंतीओ बिलपंतीओ अच्छाओ सण्हाओ रयतामयकूलाओ वइरामयपासाणाओ तवणिज्जमयतलाओ वेरूलियमणिफालियपडलपच्चोयडाओ णवणीयतलाओ सुवण्णसुरयणमणिवालुयाओ सुहोयारसुउत्ताराओ णाणामणितित्थसुबद्धाओ चउक्कोणाओ समतीराओ आणुपुव्वसुजायवप्पगंभीरसीयलजलाओ संछण्णपत्तभिसमुणालाओ बहुउप्पलकुमुयणलिनसुभगसोंगधितपोंडरीयसयपत्तसहस्सपत्तफुल्लकेसरोवइयाओ छप्पयपरिभुज्जमाणकमलाओ अच्छविमलसलिलपुण्णाओ परिहत्थभमंतमच्छकच्छभअणेगसउणमिहुणपविचरिताओ पत्तेयं २ पउमवरवेदियापरिक्खित्ताओ पत्तेयं २ वणसंडपरिक्खित्ताओ अप्पेगतिआओ आसवोदाओ अप्पे० वारूणोदाओ अप्पे० खीरोदाओ अप्पे० घयोदाओ अप्पे० खोदोदाओ अमयरससमरसो (स्सा) दाओ अप्पे० पगतीए उदग (अमय) रसेणं पं० पासाईयाओ०,

तासिं णं खुडिडयाणं वावीणं जाव बिलपंतियाणं तत्थ २ देसे २ तहिं २ जाव बहवे तिसोवाणपडिरूवगा पं०, तेसिं णं तिसोवाणपडिरूवाणं अयमेयारूवे वण्णावासे पं० तं०-वइरामया नेम्मा रिट्टामया पतिट्टाणा वेरूलियामया खंभा सुवण्णरूप्यामया फलगा वइरामया संधी लोहितक्खमईओ सूईओ णाणामणिमया अवलंबणा अवलंबणवाहाओ, तेसिं णं तिसोवाणपडिरूवगाणं पुरतो पत्तेयं २ तोरणा पं०, ते णं तोरणा णाणामणिमया णाणामणिमय-(१५७) खंभेसु उवणिविट्ठसण्णिविट्ठा विविहमुत्तंतरोवइता विविहतारारूवोवचिता ईहामियउसभतुरगणरमगरविहगवालगकिण्णररूरुसरभचमरकुं जरवणलयपउमलयभत्तिचित्ता खंभुगयवइरवेदियापरिगताभिरामा विज्जाहरजमलजुयलजंतजुत्ताविव अच्चिसहस्समालणीया रूवगसहस्सकलिया भिसमाणा भिब्भिसमाणा चक्खुल्लोयणलेसा सुहफासा सस्सिरीयरूवा पासाईया०, तेसिं णं तोरणाणं उप्पिं बहवे अट्ठमंगलगा पं०-सोत्थियसिरिवच्छणंदियावत्तवद्धमाणभद्दासणकलसमच्छदप्पणा सव्वरतणामया अच्छा सण्हा जाव पडिरूवा, तेसिं णं तोरणाणं उप्पिं बहवे किण्हचामरज्झया जाव सुक्किल्लचामरज्झया अच्छा सण्हा रूपपट्टा वइरदंडा जलयामलगंधिया सुरूवा पासाईया०, तेसिं णं तोरणाणं उप्पिं बहवे छत्ताइच्छत्ता पडागाइपडागा घंटाजुयला चामरजुयला उप्पलहत्यया जाव सयसहस्सपत्तहत्यया सव्वरयणामया अच्छा जाव पडिरूवा, तासिं णं खुडिडया णं वावीणं जाव बिलपंतियाणं तत्थ २ देसे २ तहिं २ बहवे उप्पायपव्वया णियइपव्वया निययपव्वया जगतिपव्वया दारूपव्वयगा दगमंडवगा दगमंचका दगमालका दगपासायगा ऊसडा खुड्डा खडहडगा अंदोलगा पक्खंदोलगा सव्वरयणामया अच्छा जाव पडिरूवा, तेसु णं उप्पायपव्वतेसु जाव पक्खंदोलएसु बहवे हंसासणाइं कोंचासणाइं गरूलासणाइं उण्णयासणाइं पणयासणाइं दीहासणाइं भद्दासणाइं पक्खासणाइं मगरासणाइं उसभासणाइं सीहासणाइं पउमासणाइं दिसासोवत्थियासणाइं सव्वरयणामयाइं अच्छाइं सण्हाइं लण्हाइं घट्टाइं मट्टाइं णीरयाइं णिम्मलाइं निप्पंकाइं निक्कंकाडच्छायाइं सप्पभाइं समरीयाइं सउज्जोयाइं पासादीयाइं दरिसणिज्जाइं अभिरूवाइं पडिरूवाइं, तस्स णं वणसंडस्स तत्थ २ देसे २ तहिं २ बहवे आलिघरा मालिघरा कयलिघरा लयाघरा अच्छणघरा पेच्छणघरा मज्जणघरगा पसाहणघरगा गब्भघरगा मोहणघरगा सालघरगा जालघरगा कुसुमघरगा चित्तघरगा गंधव्वघरगा आयंसघरगा सव्वरयणामया अच्छा सण्हा लण्हा घट्टा मट्टा णीरया णिम्मला णिप्पंका निक्कंकाडच्छाया सप्पभा समरीया सउज्जोया पासाईया दरिसणिज्जा अभिरूवा पडिरूवा, तेसु णं आलिघरएसु जाव आयंसघरएसु बहूइं हंसासणाइं जाव दिसासोवत्थियासणाइं सव्वरयणामयाइं जाव पडिरूवाइं, तस्स णं वणसंडस्स तत्थ २ देसे २ तहिं २ बहवे जाइमंडवगा जूहियामंडवगा मल्लियामंडवगा णवमालियामंडवगा वासंतीमंडवगा दधिवासुयामंडवगा सूरिल्लिमंडवगा तंबोलीमंडवगा मुद्दियामंडवगा णागलियामंडवगा अतिमुत्तमंडवगा अप्फोतामंडवगा मालुयामंडवगा सामलियामंडवगा णिच्चं कुसुमिया णिच्चं जाव पडिरूवा, तेसु णं जातीमंडवएसु बहवे पुढवीसिलापट्टगा पं० तं०-हंसासणसंठिता कोंचासणसंठिता गरूलासणसंठिता उण्णयासणसंठिता पणयासणसंठिता दीहासणसंठिता भद्दासणसंठिता पक्खासणसंठिता मगरासणसंठिता उसभासणसंठिता सीहासणसंठिता पउमासणसंठिता दिसासोवत्थियासणसंठिता पं०, तत्थ बहवे वरसयणासणविसिट्ठसंठाणसंठिया पं० समणाउसो !, आइणगरूयबूणरवणीततूलफासा मउया सव्वरयणामया अच्छा जाव पडिरूवा, तत्थ णं बहवे वाणमंतरा देवा य देवीओ य आसयंतिसयंति चिट्ठंति णिसीदंति तुयट्ठंति रमंति ललंति कीलंति मोहंति पुरापोराणाणं सुचिण्णाणं सुपरक्कंताणं सुभाणं कल्लाणाणं कडाणं कम्माणं कल्लाणं फलवित्तिविसेसं पच्चणुब्भवमाणा विहरंति, तीसे णं जगतीए उप्पिं अंतो पउमवरवेदियाए एत्थ णं एगे महं वणसंडे पं० देसूणाइं दो जोयणाइं विक्रंभेणं वेइयासमएणं परिक्रवेवेणं किण्हे किण्होभासे वणसंडवण्णओ मणितणसद्विहूणो णेयव्वो, तत्थ णं बहवे वाणमंतरा देवा य देवीओ य आसयंति सयंति चिट्ठंति णिसीयंति तुयट्ठंति रमंति ललंति कीडंति मोहंति पुरा पोराणाणं सुचिण्णाणं सुपरक्कंताणं सुभाणं कंता (कडा) णं कम्माणं कल्लाणं फलवित्तिविसेसं पच्चणुब्भवमाणा विहरंति । १२८। जंबुदीवस्स णं भंते ! दीवस्स कति दारा पं० ?, गो० ! चत्तारि दारा पं० तं०-विजये वेजयंते जयंते अपराजिए । १२९। कहिं णं भंते ! जंबुदीवस्स दीवस्स विजये नामं दारे पं० ?, गो० ! जंबुदीवे दीवे मंदरस्स पव्वयस्स पुरत्थिमेणं पणयालीसं जोयणसहस्साइं अबाधाए जंबुदीवे दीवे पुरच्छिमपेरंते

लवणसमुद्दपुरच्छिमद्धस्स पच्चत्थिमेणं सीयाए महाणदीए उप्पिं एत्थ णं जंबुद्दीवस्स दीवस्स विजये णामं दारे पं० अट्ट जोयणाइं उट्ठंउच्चत्तेणं चत्तारि जोयणाइं विक्खंभेणं तावतियं चेव पवेसेणं सेए वरकणगथूभियागे इहामियउसभतुरगनरमगरविहगवालगकिण्णररूरूसरभचमरकुं जरवणलतप-उमलयभत्तिचित्ते खंभुगतवइरवेदियापरिगताभिरामे विज्जाहरजमलजुयलजंतजुत्तेइव अच्चीसहस्समालिणीए रूवगसहस्सकलिते भिसमाणे भिब्भिसमाणे चक्खुल्लोयणलेसे सुहफासे सस्सिरीयरूवे वण्णे दारस्स तं०-वइरामया णिम्मा रिद्धामया पतिट्ठाणा वेरूलिया खंभा जायरूवोवचियपवरपंचवण्णमणिरयणकोट्टिमतले हंसगब्भमए एलुए गोमेज्जमते इंदखीले लोहितक्खमईओ दारचेडीओ जोतिरसामते उत्तरंगे वेरूलियामया कवाडा वइरामया संधी लोहितक्खमईओ सूईओ णाणामणिमया समुग्गगा वईरामई अग्गलाओ अग्गलापासाया वइरामई आवत्तणपेढिया अंकुत्तरपासते णिरंतरितघणकवाडे भित्तीसु चेव भित्तिगुलिया छप्पण्णा तिण्णि होंति गोमाणसी तत्तिया णाणामणिरयणवालरूवगलीलट्ठियसालिभंजियाए वइरामए कूडे रययामए उस्सेहे सव्वतवणिज्जमए उल्लोए णाणामणिरयणजालपंजरमणिवंसगलोहितक्खपडिवंसगरयतभोम्मे अंकामया पक्खबाहाओ जोतिरसामया वंसा वंसकवेल्लुगा य रयतामयी पट्ठिताओ जायरूवमती ओहाडणी वइरामयी उवरि पुच्छणी सव्वसेतरययामए च्छायणे अंकमतकणगकूडतवणिज्जथूभियाए सेते संखतलविमलणिम्मलदधिघणगोखीरफेणरययणिगरप्प गासद्धचंदचित्ते तिलगरयणद्धचंदचित्ते णाणामणिमयदामालंकिए अंतो य बहिं च सण्हे तवणिज्जरूइलवालुयापत्थडे सुहफासे सस्सिरीयरूवे पासातीए०, विजयस्स णं दारस्स उभयो पासिं दुहतो णिसीहि याते दो दो चंदणकलसपरिवाडीओ पं०, ते णं चंदणकलसा वरकमलपडिट्ठाणा सुरभिवरवारिपडिपुण्णा चंदणकयचच्चागा आविद्धकंठेगुणा पउमुप्पलपिहाणा सव्वरयणामया अच्छा सण्हा जाव पडिरूवा महता २ महिंदकुंभसमाणा पं० समणाउसो !, विजयस्स णं दारस्स उभओ पासिं दुहतो णिसीहिआए दो दो णागदंतपरिवाडीओ, ते णं णागदंतगा मुत्ताजालंतरूसिता हेमजालगवक्खजालखिंखिणीघंटाजालपरिक्खित्ता अब्भुग्गता अभिणिसिद्धा तिरियं सुसंपगहिता अहेपण्णगद्धरूवा पण्णगद्धसंठाणसंठिता सव्वरयणामया अच्छा जाव पडिरूवा महता २ गयदंतसमाणा पं० समणाउसो !, तेसु णं णागदंतएसु बहवे किण्हसुत्तबद्ध (वट्ठ) वग्घारितमल्लदामकलावा जाव सुक्किल्लसुत्तवट्ठवग्घारियमल्लदामकला वा, तेणं दामा तवणिज्जलंबूसगा सुवण्णपतरगमंडिता णाणामणिरयणविविधहारद्धहार जाव सिरीए अतीव २ उवसोभेमाणा २ चिट्ठंति, तेसिं णं णागदंतकाणं उवरिं अण्णाओ दो दो णागदंतपरिवाडीओ पं०, तेसिं णं णागदंतगाणं (उप्पिं दो दो णागदंतगा) मुत्ताजालंतरूसिया तहेव जाव समणाउसो !, तेसु णं णागदंतएसु बहवे रयतामया सिक्कया पं० तेसु णं रयतामएसु सिक्कएसु बहवे वेरूलियामतीओ धूवघडीओ पं० तं०-ताओ णं धूवघडीओ कालागुरूपवरकुंदुरुतुरुक्कधूवमघमघंतगंधुद्धुयाभिरामाओ सुगंधवरगंधगंधियाओ गंधवट्ठिभूयाओ ओरालेणं मणुण्णेणं घाणमणिव्वुइकरेणं गंधेणं तप्पएसे सव्वतो समंता आपूरेमाणीओ २ अतीव सिरीए जाव चिट्ठंति, विजयस्स णं दारस्स उभयतो पासिं दुहतो णिसीधियाए दो दो सालभंजियापरिवाडीओ पं० ताओ णं सालभंजियाओ लीलट्ठिताओ सुपडिट्ठियाओ सुअलंकिताओ णाणागारवसणाओ णाणामल्लपिणद्धाओ मुट्ठीगेज्झमज्झाओ आमेलगजमलजुयलवट्ठिअच्चुण्णयपीणरचियसंवट्ठिपओहराओ रतावंगाओ असियकेसीओ मिदुविसयपसत्थलक्खणसंवेल्लितगसिरयाओ ईसिं असोगवरपादवसमुट्ठिताओ वामहत्थगहितगसालाओ ईसिं अद्धच्छिकडक्खचेट्ठिएहिं लूसेमाणीतोइव चक्खुल्लोयणलेसाहिं अण्णमण्णं खिज्जमाणीओइव पुढवीपरिणामाओ सासयभावमुवगताओ चंदाणणाओ चंदविलासिणीओ चंदद्धसमनिडालाओ चंदाहियसोमदंसणाओ उक्काइव उज्जोएमाणीओ विज्जुघणमरीचिसूरदिप्पंततेयअहिययरसं निकासाओ सिंगारागारचारूवेसाओ पासाईयाओ० तेयसा अतीव २ उवसोभेमाणीओ चिट्ठंति, विजयस्स णं दारस्स उभयतो पासिं दुहतो णिसीहियाए दो दो जालकडगा पं०, ते णं जालकडगा सव्वरयणामया अच्छा जाव पडिरूवा, विजयस्स णं दारस्स उभओपासिं दुहओ णिसीहियाए दो दो घंटापरिवाडीओ पं०, तासिं णं घंटाणं अयमेयरूवे वण्णावासे पं० तं०-जंबूणयामतीओ घंटाओ वइरामतीओ लालाओ णाणामणिमया घंटापासगा तवणिज्जमतीओ संकलाओ रयतामतीओ रज्जूओ, ताओ णं घंटाओ ओहस्सराओ मेहस्सराओ हंसस्सराओ कोंचस्सराओ णंदिस्सराओ णंदिघोसाओ सीहस्सराओ

सीहघोसाओ मंजुस्सराओ मंजुघोसाओ सुस्सराओ सुस्सरणिग्घोसाओ ते पदेसे ओरालेणं मणुणेणं कण्णमणनिव्वुइकरेण सद्देण जाव चिट्ठंति, विजयस्स णं दारस्स उभओपासिं दुहतो णिसीधिताए दो दो वणमालापरिवाडीओ पं०, ताओ णं वणमालाओ णाणादुमलताकिसलयपल्लवसमाउलाओ छप्पयपरिभुज्जमाणकमलसोभंतस्सिरियाओ पासाईआओ० ते एसे उरालेणं जाव गंधेणं आपूरेमाणीओ जाव चिट्ठंति । १३०। विजयस्स णं दारस्स उभओ पासिं दुहतो णिसीधियाए दो दो पंगंठा पं०, ते णं पंगंठा चत्तारि जोयणाइं आयामविकखंभेणं दो जोयणाइं बाहल्लेणं सव्ववइरामता अच्छा जाव पडिरूवा, तेसिं णं पयंठाणं उवरिं पत्तेयं २ पासायवडंसगा पं०, ते णं पासायवडंसगा चत्तारि जोयणाइं उड्ढंउच्चत्तेणं दो जोयणाइं आयामविकखंभेणं अब्भुगयमूसितपहसिताविव विवहमणिरयणभत्तिचित्ता वाउद्धयविजयवेजयंतीपडागच्छत्तातिच्छत्तकलिया तुंगा गगणतलमभिलंघमाणसिहरा जालंतररयणपंजरुम्मिलितव्व मणिकणगथूभियागा वियसियसयवत्तपोंडरीयतिलकरयणद्धचंदचित्ता णाणामणिमयदामालंकिया अंतो बाहिं च सण्हा० तवणिज्जरूइलवालुयापत्थडगा सुहफासा सस्सिरियरूवा पासातीया०, तेसिं णं पासायवडंसगाणं उल्लोया पउमलताजावसामलयाभत्तिचित्ता सव्वतवणिज्जमता अच्छा जाव पडिरूवा, तेसिं णं पासायवडंसगाणं पत्तेयं २ अंतो बहुसमरमणिज्जे भूमिभागे पं०, से जहाणामए आलिंणपुक्खरेति वा जाव मणीहिं उवसोभिए, मणीणं गंधो वण्णो फासो य नेयव्वो, तेसिं णं बहुसमरमणिज्जाणं भूमिभागाणं बहुमज्झदेसभाए पत्तेयं २ मणिपेढियाओ पं०, ताओ णं मणिपेढियाओ जोयणं आयामविकखंभेणं अब्भजोयणं बाहल्लेणं सव्वरयणामईओ जाव पडिरूवाओ, तासिं णं मणिपेढियाणं उवरिं पत्तेयं २ सीहासणे पं०, तेसिं णं सीहासणाणं अयमेयारूवे वण्णावासे पं० तं०-तवणिज्जमया चक्कला रयतामया सीहा सोवणिण्या पादा णाणामणिमयाइं पायवीढगाइं जंबूणयमताइं गत्ताइं वतिरामया संधी नाणामणिमए वेच्चे, ते णं सीहासणा इहामियउसभजावपउमलयभत्तिचित्ता ससारसारोवइयविविहमणिरयणपायपीढा अच्छरगमिउमसूरगनवतयकुसंतलिच्च सीहकेसरपच्चत्थुताभिरामा उवचियखोमदुगुल्लपट्टपडिच्छायणा सुविरचितरयत्ताणा रत्तंसुयसंवुया सुरम्मा आइणगरुयबूरणवनीततूलमउयफासा पासाईया०, तेसिं णं सीहासणाणं उप्पिं पत्तेयं २ विजयदूसे पं०, ते णं विजयदूसा सेता संखकुंददगरयअमत्तमहियफेणपुंजसन्निकासा सव्वरयणामया अच्छा जाव पडिरूवा, तेसिं णं विजयदूसाणं बहुमज्झदेसभाए पत्तेयं २ वइरामया अकुंसा पं०, तेसु णं वइरामएसु अकुंसेसु पत्तेयं २ कुंभिक्का मुत्तादामा पं०, ते णं कुंभिक्का मुत्तादामा अन्नेहिं चउहिं २ तदद्धुच्चप्पमाणमेत्तेहिं अट्टकुंभिक्केहिं मुत्तादामेहिं सव्वतो समंता संपरिकिखत्ता, ते णं दामा तवणिज्जलंबूसका सुव्वणपयरगमंडिता जाव चिट्ठंति, तेसिं णं पासायवडंसगाणं उप्पिं बहवे अट्टमंगलगा पं० सोत्थिय तथेव छत्ता । १३१ । विजयस्स णं दारस्स उभओ पासिं दुहतो णिसीधियाए दो दो तोरणा पं०, ते णं तोरणा णाणामणिमया तहेव जाव अट्टमंगलगा य छत्तातिच्छत्ता, तेसिं णं तोरणाणं पुरतो दो दो सालभंजिताओ पं० जहेव णं हेट्ठा तहेव, तेसिं णं तोरणाणं पुरतो- दो दो णागदंतगा पं०, ते णं णागदंतगा मुत्ताजालंतरूसिया तहेव, तेसु णं णागदंतएसु बहवे किण्हसुत्तवट्टवघारितमल्लदामकलावा जाव चिट्ठंति, तेसिं णं तोरणाणं पुरतो दो दो ह्यसंघाडगा जाव उसभसंघाडगा पं० सव्वरयणामया अच्छा जाव पडिरूवा, एवं पंतीओ वीहीओ मिहुणगा दो दो पउमलयाओ जाव पडिरूवाओ, तेसिं णं तोरणाणं पुरतो दो दो चंदणकलसा पं०, ते णं चंदणकलसा वरकमलपइट्ठाणा तहेव सव्वरयणामया जाव पडिरूवा समणाउसो !, तेसिं णं तोरणाणं पुरतो दो दो भिंगारगा पं० वरकमलपइट्ठाणा जाव सव्वरयणामया अच्छा जाव पडिरूवा महतामहतामत्तगयमुहागितिसमाणा समणाउसो !, तेसिं णं तोरणाणं पुरतो दो दो आतंसगा पं०, तेसिं णं आतंसगाणं अयमेयारूवे वण्णावासे पं० तं०- तवणिज्जमया पयंठा वेरुलियमया छरूहा वइरामया वरंगा णाणामणिमया वलक्खा अंकमया मंडला अणोघसियनिम्मलाए छायाए सव्वतो चेव समणुबद्धा चंदमंडलपडिणिकासा महतामहतामब्भकायसमाणा पं० समणाउसो !, तेसिं णं तोरणाणं पुरतो दो दो वइरणाभे थाले पं०, ते णं थाला अच्छतिच्छडियसालितंदुलनहसंदडुबहुपडिपुण्णा चेव चिट्ठंति सव्वजंबूणतामता अच्छा जाव पडिरूवा महतामहतारहचक्कसमाणा समणाउसो !, तेसिं णं तोरणाणं पुरतो दो दो पातीओ पं०, ताओ णं पातीओ अच्छोदयपडिहत्थाओ णाणाविधपंचवण्णस्स फलहरितगस्स बहुपडिपुण्णाओविव चिट्ठंति सव्वरयणामतीओ जाव

पडिरूवाओ महयामहयागोकलिंजगचक्कसमाणाओ पं० समणाउसो !, तेसिं णं तोरणाणं पुरतो दो दो सुपतिट्ठगा पं०, ते णं सुपतिट्ठगा णाणाविधपंचवण्णपसाहणगभंडविरचिया सव्वोसधिपडिपुण्णा सव्वरयणामया अच्छा जाव पडिरूवा, तेसिं णं तोरणाणं पुरतो दो दो मणोगुलियाओ पं०, तासु णं मणोगुलियासु बहवे सुवण्णरुप्पामया फलगा पं०, तेसु णं सुवण्णरुप्पामएसु फलएसु बहवे वइरामया णागदंतगा मुत्ताजालंतरूसिता हेम जाव गयदंगसमाणा पं०, तेसु णं वइरामएसु णागदंतएसु बहवे रययामया सिक्कया पं०, तेसु णं रययामएसु सिक्कएसु बहवे वायकरगा पं०, ते णं वायकरगा किण्हसुत्तसिक्कगवच्छिया जाव सुक्किल्लसुत्तसिक्कगवच्छिया सव्वे वेरुलिया मया अच्छा जाव पडिरूवा, तेसिं णं तोरणाणं पुरओ दो दो चित्ता रयणकरंडगा पं० से जहाणामएरण्णो चाउरंतचक्कवट्ठिस्स चित्ते रयणकरंडे वेरुलियमणिफालियपडलपच्चोयडे साए पभाए ते पदेसे सव्वतो समंता ओभासइ उज्जोवेति तावेइ पभासेति एवामेव ते चित्तरयणकरंडगा पं० वेरुलियपडलपच्चोयडा साए पभाए ते पदेसे सव्वतो समंता ओभासेति०, तेसिं णं तोरणाणं पुरतो दो दो हयकंठगा जाव दो दो उसभकंठगा पं० सव्वरयणामया अच्छा जाव पडिरूवा, तेसु णं हयकंठएसु जाव उसभकंठएसु दो दो पुप्फचंगेरीओ, एवं मल्लगंधचुण्णवत्थाभरणचंगेरीओ सिद्धत्थचंगेरीओ लोमहत्थचंगेरीओ सव्वरयणामतीओ अच्छाओ जाव पडिरूवाओ, तेसिं णं तोरणाणं पुरतो दो दो पुप्फपडलाइं जाव लोमहत्थपडलाइं सव्वरयणामयाइं जाव पडिरूवाइं, तेसिं णं तोरणाणं पुरतो दो दो सीहासणाइं पं०, तेसिं णं सीहासणाणं अयमेवारूवे वण्णावासे पण्णत्ते तहेव जाव पासातीया०, तेसिं णं तोरणाणं पुरतो दो दो रुप्पछदा छत्ता पं०, ते णं छत्ता वेरुलियभिसंतविमलदंडा जंबूणयकन्निका वइरसंधी मुत्ताजालपरिगता अट्ठसहस्सवरकंचणसलागा दरमलयसुगंधी सव्वोउअसुरभिसीयलच्छाया मंगलभत्तिचित्ता चंदागारोवमा वट्ठा, तेसिं णं तोरणाणं पुरतो दो दो चामराओ पं०, ताओ णं चामराओ णाणामणिकणगरयणविमलमहरिहतवणिज्जुज्जलविचित्तदंडाओ (चन्दप्पभवइरवेरुलियनानामणिरयणखचियदंडा)चिल्लिआओ संखंककुंददगरयअमयमहियफेणपुंजसण्णिकासाओ सुहुमरयतदीहवालाओ सव्वरयणामताओ अच्छाओ जाव पडिरूवाओ, तेसिं णं तोरणाणं पुरतो दो दो तिल्लसमुग्गा कोट्टसमुग्गा पत्तसमुग्गा चोयसमुग्गा तयरसमुग्गा एलासमुग्गा हरियालसमुग्गा हिंगुलयसमुग्गा मणोसिलासमुग्गा अंजणसमुग्गा सव्वरयणामया अच्छा जाव पडिरूवा । १३२। विजये णं दारे अट्ठसत्तं चक्कब्बयाणं अट्ठसयं मिगब्बयाणं अट्ठसयं गरुडज्झयाणं अट्ठसयं विगब्बयाणं अट्ठसयं रुरुयज्झयाणं अट्ठसत्तं छत्तज्झयाणं अट्ठसयं पिच्छज्झयाणं अट्ठसयं सउणिज्झयाणं अट्ठसत्तं सीहज्झयाणं अट्ठसत्तं उसभज्झयाणं अट्ठसत्तं सेयाणं चउविसाणाणं णागवरकेतूणं, एवामेव सपुव्वावरेणं विजयदारे य आसीयं केउसहस्सं भवत्तिमक्खायं, विजये णं दारे नव भोमा पं०, तेसिं णं भोमाणं अंतो बहुसमरमणिज्जा भूमिभागा पं० जाव मणीणं फासो, तेसिं णं भोमाणं उप्पिं उल्लोया पउमलयाजावसामलताभत्तिचित्ता जाव सव्वतवणिज्जमता अच्छा जाव पडिरूवा, तेसिं णं भोमाणं बहुमज्झदेसभाए जे से पंचमे भोम्मे तस्स णं भोमस्स बहुमज्झदेसभाए एत्थ णं एगे महं सीहासणे पं० सीहासणवण्णतो विजयदूसे जाव अंकुसे जाव दामा चिट्ठंति, तस्स णं सीहासणस्स अवरुत्तरेणं उत्तरेणं उत्तरपुरत्थिमेणं एत्थ णं विजयस्स देवस्स चउण्हं सामाणियसहस्साणं चत्तारि भद्दासणसाहस्सीओ पं०, तस्स णं सीहासणस्स पुरच्छिमेणं एत्थ णं विजयस्स देवस्स चउण्हं अग्गमहिसीणं सपरिवाराणं चत्तारि भद्दासणा पं०, तस्स णं सीहासणस्स दाहिणपुरत्थिमेणं एत्थ णं विजयस्स देवस्स अब्भित्तरीयाए परिसाए अट्ठण्हं देवसाहस्सीणं अट्ठ भद्दासणसाहस्सीओ पं०, तस्स णं सीहासणस्स दाहिणेणं विजयस्स देवस्स मज्झिमियाए परिसाए दसण्हं देवसाहस्सीणं दस भद्दासणसाहस्सीओ पं०, तस्स णं सीहासणस्स दाहिणपच्चत्थिमेणं एत्थ णं विजयस्स देवस्स बाहिरियाए परिसाए बारसण्हं देवसाहस्सीणं बारस भद्दासणसाहस्सीओ पं०, तस्स णं सीहासणस्स पच्चत्थिमेणं एत्थ णं विजयस्स देवस्स सत्तण्हं अणियाहिवतीणं सत्त भद्दासणा पं०, तस्स णं सीहासणस्स पुरत्थिमेणं दाहिणेणं पच्चत्थिमेणं उत्तरेणं एत्थ णं विजयस्स देवस्स सोलस आयरक्खदेवसाहस्सीणं सोलस भद्दासणसाहस्सीओ पं०, तं०- पुरत्थिमेणं चत्तारि साहस्सीओ एवं चउसुवि जाव उत्तरेणं चत्तारि साहस्सीओ, अवसेसेसु भोमेसु पत्तयं २ भद्दासणा पं० । १३३। विजयस्स णं दारस्स उवरिमागारा सोलसविहेहिं रतणेहिं उवसोभिता, तं०- रयणेहिं वयरेहिं वेरुलिएहिं जाव रिट्ठेहिं,

विजयस्स णं दारस्स उप्पिं बहवे अट्ठमंगलगा पं० तं०- सोत्थितसिरिवच्छजावदप्पणा सव्वरयणामया अच्छा जाव पडिरूवा, विजयस्स णं दारस्स उप्पिं बहवे कण्हचामरज्झया जाव सव्वरयणामया अच्छा जाव पडिरूवा, विजयस्स णं दारस्स उप्पिं बहवे छत्तातिच्छत्ता तहेव । १३४। से केणट्ठेणं भंते ! एवं वुच्चति ?- विजए णं दारे २ ?, गो० ! विजए णं दारे विजए णाम देवे महिद्धीए महज्जुतीए जाव महाणुभावे पलिओवमट्ठितीए परिवसति, से णं तत्थ चउण्हं सामाणियसाहस्सीणं चउण्हं अग्गमहिस्सीणं सपरिवाराणं तिण्हं परिसाणं सत्तण्हं अतणयाणं दत्तण्हं अणियाहिवईणं सोलसण्हं आयरक्खदेवसाहस्सीणं विजयस्स णं दारस्स विजयाए रायहाणीए अण्णेसिं बहूणं विजयारायहाणीवत्थव्वगाणं देवाणं देवीण य आहेवच्चं जाव दिव्वाइं भोगभोगां भुंजमाणे विहरइ, से तेणट्ठेणं गो० ! एवं वुच्चति- विजये दारे २, अदुत्तरं च णं गो० ! विजयस्स णं दारस्स सासए णामधेज्जे पं० जण्ण कयाई णत्थि ण कयाई ण भविस्सति जाव अवट्ठिए णिच्चे विजए दारे । १३५। कहिं णं भंते ! विजयस्स देवस्स विजया णाम रायहाणी पं० ?, गो० ! विजयस्स णं दारस्स पुरत्थिमेणं तिरियमसंखेज्जे दीवसमुद्दे वीतिवत्तिता अण्णमि जंबुद्धीवे बारस जोयणसहस्साइं ओगाहिता एत्थ णं विजयस्स देवस्स विजया णाम रायहाणी पं० बारस जोयणसहस्साइं आयामविक्खंभेणं सत्तत्तीसजोयणसहस्साइं नव य अडयाले जोयणसए किंचिविसेसाहिए परिक्खेवेणं पं०, सा णं एगेणं पागारेणं सव्वतो समंता संपरिक्खित्ता, से णं पागारे सत्तत्तीसं जोयणाइं अब्बजोयणं च उड्ढंउच्चत्तेणं मूले अब्बतेरस जोयणाइं विक्खंभेणं मज्झेत्थ सक्कोसाइं छजोयणाइं विक्खंभेणं उप्पिं तिण्णि सद्धकोसाइं जोयणाइं विक्खंभेणं मूले विच्छिण्णे मज्झे संखित्ते उप्पिं तणुए बाहिं वट्ठे अंतो चउरंसे गोपुच्छसंठाणसंठिते सव्वकणगामए अच्छे जाव पडिरूवे, से णं पागारे णाणाविहपंचवण्णेहिं कविसीसएहिं उवसोभिए, तं०-किण्हेहिं जाव सुक्किल्लेहिं, ते णं कविसीसका अब्बकोसं आयामेणं पंचधणुसताइं विक्खंभेणं देसोणमद्धकोसं उड्ढंउच्चत्तेणं सव्वमणिमया अच्छा जाव पडिरूवा, विजयाए णं रायहाणीए एगमेगाए बाहाए पणुवीसं २ दारसतं भवतीतिमक्खायं, ते णं दारा बावट्ठिं जोयणाइं अब्बजोयणं च उड्ढंउच्चत्तेणं एकत्तीसं जोयणाइं कोसं च विक्खंभेणं तावतियं चेव पवेसेणं सेता वरकणगथूभियागा ईहामिय तहेव जथा विजए दारे जाव तवणिज्जवालुगपत्थडा सुहफासा सस्सि (म)रीए सरूवा पासातीया०, तेसिं णं दाराणं उभयपासिं दुहतो णिसीयाए दो चंदणकलसपरिवाडीओ पं० तहेव भाणियव्वं जाव वणमालाओ, तेसिं णं दाराणं उभओ पासिं दुहतो णिसीयाए दो दो पंगंठा पं०, ते णं पंगंठा एकत्तीसं जोयणाइं कोसं च आयामविक्खंभेणं पन्नरस जोयणाइं अड्ढाइज्जे कोसे बाहल्लेणं पं० सव्ववइरामया अच्छा जाव पडिरूवा, तेसिं णं पंगंठाणं उप्पिं पत्तेयं २ पासायवडिंसगा पं०, ते णं पासायवडिंसगा एकत्तीसं जोयणाइं कोसं च उड्ढंउच्चत्तेणं पन्नरस जोयणाइं अड्ढाइज्जे य कोसे आयामविक्खंभेणं सेसं तं चेव जाव समुग्गया णवरं बहुवयणं भाणितव्वं, विजयाए णं रायहाणीए एगमेगे दारे अट्ठसयं चक्कज्झयाणं जाव अट्ठसतं सेयाणं चउविसाणाणं णागवरकेऊणं, एवामेव सपुव्वावरेणं विजयाए रायहाणीए एगमेगे दारे आसीतं २ केउसहस्सं भवतीतिमक्खायं, विजयाए णं रायहाणीए एगमेगे दारे तेसिं णं दाराणं पुरओ सत्तरस भोमा पं०, तेसिं णं भोमाणं भूमिभागा उल्लोया (य) पउमलया० भत्तिचित्ता, तेसिं णं भोमाणं बहुमज्झदेसभाए जे ते नवमनवमा भोमा तेसिं णं भोमाणं बहुमज्झदेसभाए पत्तेयं २ सीहासणा पं० सीहासणवण्णओ जाव दामा जहा हेट्ठा, एत्थ णं अवसेसेसु भोमेसु पत्तेयं २ भद्दासणा पं०, तेसिं णं दाराणं उत्तिमा (उवरिमा) गारा सोलसविधेहिं रयणेहिं उवसोभिया तं चेव जाव छत्ताइच्छत्ता, एवामेव सपुव्वावरेणं विजयाए रायहाणीए पंच दारसता भवन्तीतिमक्खाया । १३६। विजयाए णं रायहाणीए चउदिसिं पंचजोयणसताइं अबाहाए एत्थ णं चत्तारि वणसंडा पं० तं०-(१५८) असोगवणे सत्तवण्णवणे चंपगवणे चूतवणे पुरत्थिमेणं असोगवणे दाहिणेणं सत्तवण्णवणे पच्चत्थिमेणं चंपगवणे उत्तरेणं चूतवणे, ते णं वणसंडा साइरेगाइं दुवालस जोयणसहस्साइं विक्खंभेणं पत्तेयं २ पागारपरिक्खित्ता किण्हा किण्होभासा वणसंडवण्णओ भाणियव्वो जाव बहवे वाणमंतरा देवा य देवीओ य आसयंति सयंति चिट्ठंति णिसीदंति तुयट्ठंति रमंति ललंति कीलंति मोहंति पुरापोराणाणं सुचिण्णाणं सुरक्कंताणं सुभाणं कडाणं कम्माणं कल्लाणं फलवित्तिविसेसं पच्चणुभवमाणा विहरंति, तेसिं णं वणसंडाणं बहुमज्झदेसभाए पत्तेयं २ पासायवडिंसगा पं०, ते णं पासायवडिंसगा बावट्ठिं जोयणाइं अब्बजोयणं च उड्ढंउच्चत्तेणं एकत्तीसं जोयणाइं कोसं च आयामविक्खंभेणं अब्भुग्गतमूसिया तहेव

जाव अंतो बहुसमरमणिज्जा भूमिभागा पं० उल्लोया० पउमभत्तिचित्ता भाणियव्वा, तेसिं णं पासायवडेसगाणं बहुमज्झदेसभाए पत्तेयं २ सीहासणा वण्णावासो सपरिवारा, तेसिं णं पासायवडिंसगाणं उप्पिं बहवे अट्ठमंगलगा झया छत्तातिच्छत्ता, तत्थ णं चत्तारि देवा महिड्ढीया जाव पलिओवमट्ठितीया परिविसंति तं०- असोए सत्तवण्णे चंपए चूते, तत्थ णं ते साणं साणं वणसंडाणं साणं २ पासायवडेसयाणं साणं २ सामाणियाणं साणं २ अग्गमहिंसीणं साणं २ परिसाणं साणं २ आयरक्खदेवाणं आहेवच्चं जाव विहरंति, विजयाए णं रायहाणीए अंतो बहुसमरमणिज्जे भूमिभागे पं० जाव पंचवण्णेहिं मणीहिं उवसोभिए तणसद्विहूणे जाव देवा य देवीओ य आसयंति जाव विहरंति, तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं एगे महं ओवरियालेणे पं० बारस जोयणसयाइं आयामविक्रखंभेणं तिन्नि जोयणसहस्साइं सत्त य पंचाणउते जोयणसते किंचिविसेसाहिए परिक्रखेवेणं अद्धकोसं बाहल्लेणं सव्वजंबूणतामते अच्छे जाव पडिरूवे, से णं एगाए पउमवरवेइयाए एगेणं वणसंडेणं सव्वतो समंता संपरिक्रखत्ते पउमवरवेतियाए वण्णओ वणसंडवण्णओ जाव विहरंति, से णं वणसंडे देसूणाइं दो जोयणाइं चक्कवालविक्रखंभेणं ओवारियालयणसमे परिक्रखेवेणं, तस्स णं ओवारियालयणस्स चउद्दिसिं चत्तारि तिसोवाणपडिरूवगा पं० वण्णओ, तेसिं णं तिसोवाणपडिरूवगाणं पुरतो पत्तेयं २ तोरणा पं० छत्ताति०, तस्स णं उवारियालयणस्स उप्पिं बहुसमरमणिज्जे भूमिभागे पं० जाव मणीहिं उवसोभिते मणिवण्णओ गंधरसफासो, तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं एगे महं मूलपासायवडिंसए पं०, से णं पासायवडिंसए बावट्ठिं जोयणाइं अद्धजोयणं च उड्ढंउच्चत्तेणं एकतीसं जोयणाइं कोसं च आयामविक्रखंभेणं अब्भुग्गयमूसियप्पहसिते तहेव, तस्स णं पासायवडिंसगस्स अंतो बहुसमरमणिज्जे भूमिभागे पं० जाव मणिफासे उल्लोए तस्स णं बहुसमरमणिज्जस्स भूमिभागस्स बहुमज्झदेसभागे एत्थ णं एगा महं मणिपेढिया पं०, सा य एगं जोयणमायामविक्रखंभेणं अद्धजोयणं बाहल्लेणं सव्वमणिमई अच्छा सण्हा०, तीसे णं मणिपेढियाए उवरिं एगं महं सीहासणे पं०, एवं सीहासणवण्णओ सपरिवारो, तस्स णं पासायवडिंसगस्स उप्पिं बहवे अट्ठमंगलगा झया छत्तातिच्छत्ता, से णं पासायवडिंसए अण्णेहिं चउहिं तदद्धुच्चत्तप्पमाणमेत्तेहिं पासायवडिंसएहिं सव्वतो समंता संपरिक्रखत्ते, ते णं पासायवडिंसगा एकतीसं जोयणाइं कोसं च उड्ढंउच्चत्तेणं अद्धसोलसजोयणाइं अद्धकोसं च आयामविक्रखंभेणं अब्भुग्गत० तहेव, तेसिं णं पासायवडिंसयाणं अंतो बहुसमरमणिज्जा भूमिभागा उल्लोया, तेसिं णं बहुसमरमणिज्जाणं भूमिभागाणं बहुमज्झदेसभाए पत्तेयं २ सीहासणं पं० वण्णओ, तेसिं परिवारभूता भद्दासणा पं०, तेसिं णं अट्ठमंगलगा झया छत्तातिच्छत्ता, ते णं पासायवडिंसका अण्णेहिं चउहिं २ तदद्धुच्चत्तप्पमाणमेत्तेहिं पासायवडेसएहिं सव्वतो समंता संपरिक्रखत्ता, ते णं पासायवडेसका अद्धसोलसजोयणाइं अद्धकोसं च उड्ढंउच्चत्तेणं देसूणाइं अट्ठ जोयणाइं आयामविक्रखंभेणं अब्भुग्गयं तहेव, तेसिं णं पासायवडेसगाणं अंतो बहुसमरमणिज्जा भूमिभागा उल्लोया, तेसिं णं बहुसमरमणिज्जाणं भूमिभागाणं बहुमज्झदेसभाए पत्तेयं २ पउमासणा पं०, तेसिं णं पासायाणं अट्ठमंगलगा झया छत्तातिच्छत्ता, ते णं पासायवडेसगा अण्णेहिं चउहिं तदद्धुच्चत्तप्पमाणमेत्तेहिं पासायवडेसएहिं सव्वतो समंता संपरिक्रखत्ता, ते णं पासायवडेसका देसूणाइं अट्ठजोयणाइं उड्ढंउच्चत्तेणं देसूणाइं चत्तारि जोयणाइं आयामविक्रखंभेणं अब्भुग्गत० भूमिभागा उल्लोया भद्दासणाइं उवरिं मंगलगा झया छत्तातिच्छत्ता, ते णं पासायवडिंसगा अण्णेहिं चउहिं तदद्धुच्चत्तप्पमाणमेत्तेहिं पासायवडिंसएहिं सव्वतो समंता संपरिक्रखत्ता, ते णं पासायवडिंसगा देसूणाइं चत्तारि जोयणाइं उड्ढंउच्चत्तेणं देसूणाइं दो जोयणाइं आयामविक्रखंभेणं अब्भुग्गयमूसिय० भूमिभागा उल्लोया पउमासणाइं उवरिं मंगलगा झया छत्ताइच्छत्ता । १३७। तस्स णं मूलपासायवडेसगस्स उत्तरपुरत्थिमे णं एत्थ णं विजयस्स देवस्स सभा सुधम्मा पं० अद्धत्तेरसजोयणाइं आयामेणं छ सक्कोसाइं जोयणाइं विक्रखंभेणं णव जोयणाइं उड्ढंउच्चत्तेणं अणेगखंभसतसंनिविट्ठा अब्भुग्गयसुकयवइरवेदिया तोरणवररतियसालभंजियागा सुसिलिड्विसिडुलड्वसंठियपसत्थवेरूलियविमलखंभा णाणामणिकणगरयणखइयउज्जलबहुसमसुविभत्तचित्त (णिचिय) रमणिज्जकु ट्ठिमतला

अच्चिसहस्समालणीया रूवगसहस्सकलिया भिसमाणी भिब्भिसमाणी चक्खुल्लोयणलेसा सुहफासा सस्सिरीयरूवा कंचणमणिरयणथूभियागा नाणाविहपंचवण्णघंटापडागपडिमंडितगगसिहरा धवला मिरीइकवचं विणिमुयंती लाउल्लोइयमहिया गोसीससरसरत्तचंदणददरदिन्नपंचंगुलितला उवचियचंदणकलसा चंदणघडसुकयतोरणपडिदुवारदेसभागा आसत्तोसत्तविउलवट्टवघारियमल्लदामकलावा पंचवण्णसरससुरभिमुक्कपुप्फुपुंजोवयारकलिता कालागुरुपवरकुंदुरुक्कतुरुक्कधूवमघमघेतंगंधुद्धुया-भिरामा सुगंधवरगंधिया गंधवट्ठिभूया अच्छरणगणसंघसंविकिन्ना दिव्वतुडियमधुरसदसंपणाइया सुरम्मा सव्वरयणामती अच्छा जाव पडिरूवा, तीसे णं सुहम्माए सभाए तिदिसिं तओ दारा पं०, ते णं दारा पत्तेयं २ दो दो जोयणाइं उड्ढंउच्चत्तेणं एगं जोयणं विकखंभेणं तावइयं चेव पवेसेणं सेया वरकणगथूभियागा जाव वणमालादारवन्नओ, तेसिं णं दाराणं पुरओ मुहमंडवा पं०, ते णं मुहमंडवा अब्बतेरसजोयणाइं आयामेणं छजोयणाइं सक्कोसाइं विकखंभेणं साइरेगाइं दो जोयणाइं उड्ढंउच्चत्तेणं, ते णं मुहमंडवा अणेगखंभसयसंनिविट्ठा जाव उल्लोया भूमिभागवण्णओ, तेसिं णं मुहमंडवाणं उवरिं पत्तेयं २ अट्टट्टमंगलग्गा पं० सोत्थियजावमच्छ०, तेसिं णं मुहमंडवाणं पुरओ पत्तेयं २ पेच्छाघरमंडवा पं०, ते णं पेच्छाघरमंडवा अब्बतेरसजोयणाइं आयामेणं जाव दो जोयणाइं उड्ढंउच्चत्तेणं जाव मणिफासो, तेसिं णं बहुमज्झदेसभाए पत्तेयं २ वइरामयअक्खाडगा पं०, तेसिं णं वइरामयाणं अक्खाडगाणं बहुमज्झदेसभाए पत्तेयं २ मणिपीढिया पं०, ताओ णं मणिपीढियाओ जोयणमेगं आयामविकखंभेणं अब्बजोयणं बाहल्लेणं सव्वमणिमईओ अच्छाओ जाव पडिरूवाओ, तासिं णं मणिपेढियाणं उप्पिं पत्तेयं २ सीहासणा पं० सीहासणवण्णओ जाव दामा परिवारो, तेसिं णं पेच्छाघरमंडवाणं उप्पिं अट्टट्टमंगलग्गा इया छत्तातिच्छत्ता, तेसिं णं पेच्छाघरमंडवाणं पुरतो तिदिसिं तओ मणिपेढियाओ पं०, ताओ णं मणिपेढियाओ दो जोयणाइं आयामविकखंभेणं जोयणं बाहल्लेणं सव्वमणिमतीओ अच्छाओ जाव पडिरूवाओ, तासिं णं मणिपेढियाणं उप्पिं पत्तेयं २ चेइयथूभा पं०, ते णं चेइयथूभा दो जोयणाइं आयामविकखंभेणं सातिरेगाइं दो जोयणाइं उड्ढंउच्चत्तेणं सेया संखंकुंददगरयामयमहितफेणपुंजसण्णिकासा सव्वरयणामया अच्छा जाव पडिरूवा, तेसिं णं चेइयथूभाणं उप्पिं अट्टट्टमंगलग्गा बहुकिण्हचामरइया पं० छत्तातिच्छत्ता, तेसिं णं चेतियथूभाणं चउद्दिसिं पत्तेयं २ चत्तारि मणिपेढियाओ पं०, ताओ णं मणिपेढियाओ जोयणं आयामविकखंभेणं अब्बजोयणं बाहल्लेणं सव्वमणिमईओ, तासिं णं मणिपेढियाणं उप्पिं पत्तेयं २ चत्तारि जिणपडिमाओ जिणुस्सेहपमाणमेत्ताओ पलियंकणिसण्णाओ थूभाभिमुहीओ सन्निविट्ठाओ चिट्ठंति, तं०-उसभा वद्धमाणा चंदाणणा वारिसेणा, तेसिं णं चेतियथूभाणं पुरतो तिदिसिं पत्तेयं २ मणिपेढियाओ पं०, ताओ णं मणिपेढियाओ दो दो जोयणाइं आयामविकखंभेणं जोयणं बाहल्लेणं सव्वमणिमईओ अच्छाओ लण्हाओ सण्हाओ घट्ठाओ मट्ठाओ णिप्पंकाओ० सस्सिरीयाओ जाव पडिरूवाओ, तासिं णं मणिपेढियाणं उप्पिं पत्तेयं २ चेइयरूक्खा पं०, ते णं चेतियरूक्खा अट्टजोयणाइं उड्ढंउच्चत्तेणं अब्बजोयणं उव्वेहेणं दो जोयणाइं खंधो अब्बजोयणं विकखंभेणं छजोयणाइं विडिमा बहुमज्झदेसभाए अट्टजोयणाइं आयामविकखंभेणं साइरेगाइं अट्टजोयणाइं सव्वगेणं पं०, तेसिं णं चेइयरूक्खाणं अयमेतारूवे वण्णावासे पं० तं०-वइरामया मूला रययसुपतिट्ठिता विडिमा रिट्ठामयविपुलकंदवेरूलियरूतिलखंधा सुजातरूवपढमगविसालसाला नाणामणिरयणविविधसाहप्पसाहवेरूलियपत्ततवणिज्जपत्तबंटा जंबूणयरत्तमउयसुकुमालपवालपल्लवसोभंतवरंकुरगगसिहरा विचित्तमणिरयणसुरभिकुसुमफलभरणमियसाला सच्छाया सप्पभा समरीया सउज्जोया अमयरससमरसफला अधियं णयणमणिवुतिकरा पासातीया दरिसणिज्जा अभिरूवा पडिरूवा, ते णं चेइयरूक्खा अन्नेहि बहूहिं तिलयलवयच्छत्तोवगसिरीससत्तवन्नदहिवन्नलोद्धवचंदणनीवकुंडयकयंबपणसतालतमालपियालपियंगुपारावयरायरूक्खनंदिरूक्खेहिं सव्वओ समंता संपरिक्खित्ता, ते णं तिलया जाव नंदिरूक्खा मूलमंतो कन्दमंतो जाव सुरम्मा, ते णं तिलया जाव नंदिरूक्खा अन्नेहिं बहूहिं पउमलयाहिं जाव सामलयाहिं सव्वतो समंता संपरिक्खित्ता, ताओ णं पउमलयाओ जाव सामलयाओ निच्चं कुसुमियाओ जाव पडिरूवाओ, तेसिं णं चेतियरूक्खाणं उप्पिं बहवे अट्टट्टमंगलग्गा इया छत्तातिच्छत्ता, तेसिं णं चेइयरूक्खाणं पुरतो तिदिसिं तओ मणिपेढियाओ पं०, ताओ णं मणिपेढियाओ जोयणं आयामविकखंभेणं अब्बजोयणं बाहल्लेणं

सव्वमणिमतीओ अच्छाओ जाव पडिरूवाओ, तासिं णं मणिपेढियाणं उप्पिं पत्तेयं २ महिंदझया अद्धट्टमाइं जोयणाइं उड्ढंउच्चत्तेणं अद्धकोसं उव्वेहेणं अद्धकोसं विक्रवंभेणं वइरामयवट्टलट्टसंठियसुसिलिट्टपरिघट्टमट्टसुपतिट्टिता विसिट्टा अणेगवरपंचवण्णकुडभीसहस्सपरिमंडियाभिरामा वाउद्धुयविजयवेजयंतीपडागा छत्तातिच्छत्तकलिया तुंगा गगणतलमभिलंघमाणसिहरा पासादीया जाव पडिरूवा, तेसिं णं महिंदझयाणं उप्पिं अट्टमंगलगा झया छत्तातिच्छत्ता, तेसिं णं महिंदझयाणं पुरतो तिदिसिं तओ णंदाओ पुक्खरिणीओ पं०, ताओ णं पुक्खरिणीओ अद्धतेरसजोयणाइं आयामेणं सक्कोसाइं छजोयणाइं विक्रवंभेणं दसजोयणाइं उव्वेहेणं अच्छाओ सण्हाओ पुक्खरिणीवण्णओ पत्तेयं २ पउमवरवेइयापरिक्खित्ताओ पत्तेयं २ वणसंडपरिक्खित्ताओ वण्णओ जाव पडिरूवाओ, तासिं णं पुक्खरिणीणं पत्तेयं २ तिदिसिं तिसोवाणपडिरूवगा पं०, तेसिं णं तिसोवाणपडिरूवाणं वण्णओ, तोरणा भाणियव्वा जाव छत्तातिच्छत्ता सभाए णं सुहम्माए छ मणोगुलियासाहस्सीओ पं० तं०-पुरच्छिमे णं दो साहस्सीओ पच्चत्थिमेणं दो साहस्सीओ दाहिणेणं एगा साहस्सी उत्तरेणं एगा साहस्सी, तासु णं मणोगुलियासु बहवे सुवण्णरूपमया फलगा पं०, तेसु णं सुवण्णरूपमएसु फलगेसु बहवे वइरामया णागदंतगा पं०, तेसु णं वइरामएसु नागदंतएसु बहवे किण्हसुत्तवट्टवग्धारितमल्लदामकलावा जाव सुक्किल्लवणट्टवग्धारितमल्लदामकलावा, ते णं दामा तवणिज्जलंबूसगा जाव चिट्ठंति, सभाए णं सुहम्माए छ गोमाणसीसाहस्सीओ पं० तं०-पुरच्छिमेणं दो साहस्सीओ एवं पच्चत्थिमेणवि, दाहिणेणं सहस्सं एवं उत्तरेणवि, तासु णं गोमाणसीसु बहवे सुवण्णरूपमया फलगा पं० जाव तेसु णं वइरामएसु नागदंतएसु बहवे रयतामया सिक्कता पं०, तेसु णं रयतामयेसु सिक्कएसु बहवे वेरुलियामईओ धूवघडिताओ पं०, ताओ णं धूवघडियाओ कालागुरूपवरकुंदुरूक्कतुरूक्क जाव घाणमणिवुड्ढकरेणं गंधेणं सव्वतो समंता आपूरेमाणीओ चिट्ठंति, सभाए णं सुधम्माए अंतो बहुसमरमणिज्जे भूमिभागे पं० जाव मणीणं फासो उल्लोया पउमलयभत्तिचित्ता जाव सव्वतवणिज्जमए अच्छे जाव पडिरूवे । १३८। तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं एगा महं मणिपीढिया पं०, सा णं मणिपीढिया दो जोयणाइं आयामविक्रवंभेणं जोयणं बाहल्लेणं सव्वमणिमता, तीसे णं मणिपीढियाए उप्पिं एत्थ णं माणवए णाम चेइयखंभे पं० अद्धट्टमाइं जोयणाइं उड्ढंउच्चत्तेणं अद्धकोसं उव्वेहेणं अद्धकोसं विक्रवंभेणं छकोडीए छलंसे छविग्गहिते वइरामयवट्टलट्टसंठिते एवं जहा महिंदझयस्स वण्णओ जाव पासातीए०, तस्स णं माणवकस्स चेतियखंभस्स उवरिं छक्कोसे ओगाहिता हेट्ठावि छक्कोसे वज्जेत्ता मज्झे अद्धपंचमेसु जोयणेसु एत्थ णं बहवे सुवण्णरूपमया फलगा पं०, तेसु णं सुवण्णरूपमएसु फलएसु बहवे वइरामया णागदंता पं०, तेसु णं वइरामएसुनागदंतएसु बहवे रययामता सिक्कगा पं०, तेसु णं रययामयसिक्कएसु बहवे वइरामगा गोलवट्टसमुग्गका पं०, तेसु णं वइरामएसु गोलवट्टसमुग्गएसु बहवे जिणसकहाओ संनिक्खित्ताओ चिट्ठंति जाओ णं विजयस्स देवस्स अण्णेसिं च बहूणं वाणमंतराणं देवाण य देवीण य अच्चणिज्जाओ वंदणिज्जाओ पूयणिज्जाओ सक्कारणिज्जाओ सम्माणणिज्जाओ कल्लाणं मंगलं देवयं चेतियं पज्जुवासणिज्जाओ, माणवगस्स णं चेतियखंभस्स उवरिं अट्टमंगलगा झया छत्तातिच्छत्ता, तस्स णं माणवकस्स चेतियखंभस्स पुरच्छिमेणं एत्थ णं एगा महं मणिपेढिया पं०, सा णं मणिपेढिया दो जोयणाइं आयामविक्रवंभेणं जोयणं बाहल्लेणं सव्वमणिमई जाव पडिरूवा, तीसे णं मणिपेढियाए उप्पिं एत्थ णं एगे महं सीहासणे पं०, सीहासणवण्णओ, तस्स णं माणवगस्स चेतियखंभस्स पच्चत्थिमेणं एत्थ णं एगा महं मणिपेढिया पं० जोयणं आयामविक्रवंभेणं अद्धजोयणं बाहल्लेणं सव्वमणिमती अच्छा, तीसे णं मणिपेढियाए उप्पिं एत्थं णं एगे महं देवसयणिज्जे पं०, तस्स णं देवसयणिज्जस्स अयमेयारूवे वण्णावासे पं० तं०-नाणामणिमया पडिपादा सोवणिया पादा नाणामणिमया पायसीसा जंबूणयमयाइं गत्ताइं वइरामया संधी णाणामणिमते वेच्चे रययामता तूली लोहियक्खमया बिब्बोयणा तवणिज्जमती गंडोवहाणिया, से णं देवसयणिज्जे उभओबिब्बोयणे दुहओउण्णए मज्झेणयगंभीरे सालिंगणवट्टिए गंगापुलिणवालुउद्दालसालिसए ओतवितक्खोमदुगुलपट्टपडिच्छायणे सुविरचितरयत्ताणे रत्तंसुयसंवुते सुरम्मे आइणगरूतबूरणवणीयतूलफासमउए पासाईए०, तस्स णं देवसयणिज्जस्स उत्तरपुर० एत्थ णं महई एगा मणिपीढिगा पं० जोयणमेणं आयामविक्रवंभेणं अद्धजोयणं बाहल्लेणं सव्वमणिमई जाव अच्छा, तीसे णं

मणिपीढियाए उप्पिं एगे महं खुड्डए महिंदज्झए पं० अब्बट्टमाइं जोयणाइं उड्ढंउच्चत्तेणं अब्बकोसं उव्वेधेणं अब्बकोसं विक्रवंभेणं वेरुलियामयवट्टलट्टसंठिते तहेव जाव मंगलगा झया छत्तातिच्छत्ता, तस्स णं खुड्डमहिंदज्झयस्स पच्चत्थिमेणं एत्थ णं विजयस्स देवस्स चुप्पालए नाम पहरणकोसे पं०, तत्थ णं विजयस्स देवस्स फलिहरयणपामोक्खा बहवे पहरणरयणा संनिक्खित्ता चिट्ठंति उज्जलसुणिसियसुतिक्रखधारा पासाईया०, तीसे णं सभाए सुहम्माए उप्पिं बहवे अट्टट्टमंगलगा झया छत्तातिच्छत्ता । १३९। सभाए णं सुधम्माए उत्तरपुरच्छिमेणं एत्थ णं एगे महं सिद्धायतणे पं० अब्बतेरस जोयणाइं आयामेणं छजोयणाइं सकोसाइं विक्रवंभेणं नव जोयणाइं उड्ढंउच्चत्तेणं जाव गोमाणसियावत्तव्वया जा चेव सहाए सुहम्माए वत्तव्वया सा चेव निरवसेसा भाणियव्वा तहेव दारा मुहमंडवा पेच्छाघरमंडवा झया थूभा चेइयरूक्खा महिंदज्झया णंदाओ पुक्खरिणीओ, तओ य सुधम्माए जहा पमाणं, मणगुलिया गोमाणसीया धूवघडियाओ तहेव भूमिभागे उल्लोए य जाव मणिफासे, तस्स णं सिद्धायतणस्स बहुमज्झदेसभाए एत्थ णं एगा महं मणिपेढिया पं० दो जोयणाइं आयामविक्रवंभेणं जोयणं बाहल्लेणं सव्वमणिमया अच्छा०, तीसे णं मणिपेढियाए उप्पिं एत्थ णं एगे महं देवच्छंदए पं० दो जोयणाइं आयामविक्रवंभेणं साइरेगाइं दो जोयणाइं उड्ढंउच्चत्तेणं सव्वरयणामए अच्छे०, तत्थ णं देवच्छंदए अट्टसतं जिणपडिमाणं जिणुस्सेहप्पमाणमेत्ताणं सण्णिक्रिक्खत्तं चिट्ठइ, तासिं णं जिणपडिमाणं अयमेयारूवे वण्णावासे पं० तं०-तवणिज्जमता हत्थतला अंकामयाइं णक्खाइं अंतोलोहियक्खपरिसेयाइं कणगमया पादा कणगामया गोप्फा कणगामतीओ जंघाओ कणगामया जाणू कणगामया ऊरू कणगामयाओ गायलट्टीओ तवणिज्जमतीओ णाभीओ रिट्टामतीओ रोमरातीओ तवणिज्जमया चुच्चुया तवणिज्जमता सिरिवच्छा कणगमयाओ बाहाओ कणगमईओ पासाओ कणगमतीओ गीवाओ रिट्टामते मंसू सिलप्पवालमया उट्टा फलिहामया दंता तवणिज्जमतीओ जीहाओ तवणिज्जमया तालुया कणगमतीओ णासाओ अंतोलोहितक्खपरिसेयाओ अंकामयाइं अच्छीणि अंतोलोहितक्खपरिसेताइं पुलगमतीओ दिट्टीओ रिट्टामतीओ तारगाओ रिट्टामयाइं अच्छिपत्ताइं रिट्टामतीओ भमुहाओ कणगामया कवोला कणगामया सवणा कणगामया णिडाला वट्टा वइरामतीओ सीसघडीओ तवणिज्जमतीओ केसंतकेसभूमीओ रिट्टामया उवरिमुद्धजा, तासिं णं जिणपडिमाणं पिट्ठतो पत्तेयं २ छत्तधारपडिमाओ पं०, ताओ णं छत्तधारपडिमाओ हिमरततकुंदेंदुसप्पकासाइं सकोरेंटमल्लदामधवलाइं आतपत्तातिं सलीलं ओहारेमाणीओ चिट्ठंति, तासिं णं जिणपडिमाणं उभओ पासिं पत्तेयं २ चामरधारपडिमाओ पं०, ताओ णं चामरधारपडिमाओ चंदप्पहवइरवेरुलियनानाणामणिकणगरयणविमलमहरिहतवणिज्जुअलविचित्तदंडाओ चिल्लियाओ संखंककुं ददगरयअमतमथितफेणपुंजसण्णिकासाओ सुहुमरयतदीहवालाओ धवलाओ चामराओ सलीलं ओहारेमाणीओ चिट्ठंति, तासिं णं जिणपडिमाणं पुरतो दो दो नागपडिमाओ दो दो जक्खपडिमाओ दो दो भूतपडिमाओ दो दो कुंडधारपडिमाओ विणओणयाओ पायवडियाओ पंजलिउडाओ सण्णिक्रिक्खित्ताओ चिट्ठंति सव्वरयणामतीओ अच्छाओ सण्हाओ लण्हाओ घट्टाओ मट्टाओ णीरयाओ णिप्पंकाओ जाव पडिरूवाओ, तासिं णं जिणपडिमाणं पुरतो अट्टसतं घंटाणं अट्टसतं चंदणकलसाणं एवं अट्टसतं भिंगारगाणं एवं आयंसगाणं थालाणं पातीणं सुपतिट्टकाणं मणयगुलियाणं वातकरगाणं चित्ताणं रयणकरंडगाणं हयकंठगाणं जाव उसभकंठगाणं पुप्फचंगेरीणं जाव लोमहत्थचंगेरीणं अट्टसयं पुप्फपडलगाणं अट्टसयं तेल्लसमुग्गाणं जाव धुवकडुच्छुयाणं सण्णिक्रिक्खत्तं चिट्ठति, तस्स णं सिद्धायतणस्स णं उप्पिं बहवे अट्टट्टमंगलगा झया छत्तातिच्छत्ता उत्तिमागारा सोलसविहेहिं रयणेहिं उवसोभिया तं०-रयणेहिं जाव रिट्ठेहिं । १४०। तस्स णं सिद्धाययणस्स उत्तरपुरच्छिमेणं एत्थ णं एगा महं उववायसभा पं० जहा सुधम्मा तहेव जाव गोमाणसीओ उववायसभाएवि दारा मुहमंडवा सव्वं भूमिभागे तहेव जाव मणिफासो (सुहम्मसभावत्तव्वया भाणियव्वा जाव भूमीए फासो पा०), तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं एगा महं मणिपेढिया पं० जोयणं आयामविक्रवंभेणं अब्बजोयणं बाहल्लेणं सव्वमणिमतीओ अच्छा०, तीसे णं मणिपेढियाए उप्पिं एत्थ णं एगे महं देवसयणिज्जे पं०, तस्स णं देवसयणिज्जस्स वण्णओ, उववायसभाए णं उप्पिं अट्टट्टमंगलगा झया छत्तातिच्छत्ता जाव उत्तिमागारा, तीसे णं उववायसभाए उत्तरपुरच्छिमेणं एत्थ णं एगे महं हरए पं०, से णं हरए अब्बतेरसजोयणाइं आयामेणं छकोसाति जोयणाइं विक्रवंभेणं दस

जोयणाइं उव्वेहेणं अच्छे सण्हे वण्णओ जहेव पंदाणं पुक्खरिणीणं जाव तोरणवण्णओ, तस्स णं हरतस्स उत्तरपुरच्छिमेणं एत्थ णं एगा महं अभिसेयसभा पं० जहा सभा सुधम्मा तं चेव निरवसेसं जाव गोमाणसीओ भूमिभाए उल्लोए तहेव, तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं एगा महं मणिपेढिया पं० जोयणं आयामविक्रंभेणं अब्धजोयणं बाहल्लेणं सव्वमणिमया अच्छा०, तीसे णं मणिपेढियाए उप्पिं एत्थ णं महं एगे सीहासणे पं०, सीहासणवण्णओ अपरिवारो, तत्थ णं विजयस्स देवस्स सुबहू अभिसेक्के भंडे संणिक्खित्ते चिट्ठति, अभिसेयसभाए उप्पिं अट्ठमंगलए जाव उत्तिमागारा सोलसविधेहिं रयणेहिं०, तीसे णं अभिसेयसभाए उत्तरपुरच्छिमेणं एत्थ णं एगा महं अलंकारियसभावत्तव्वया भाणियव्वा जाव गोमाणसीओ मणिपेढियाओ जहा अभिसेयसभाए उप्पिं सीहासणं स (अ) परिवारं, तत्थ णं विजयस्स देवस्स सुबहू अलंकारिए भंडे संनिक्खित्ते चिट्ठति, उत्तिमागारा अलंकारिय० उप्पिं मंगलगा झया जाव छत्ताति०, तीसे णं आलंकारियसहाए उत्तरपुरच्छिमेणं एत्थ णं एगा महं ववसातसभा पं०, अभिसेयसभावत्तव्वया जाव सीहासणं अपरिवारं, त (ए) त्थ णं विजयस्स देवस्स एगे महं पोत्थयरयणे संनिक्खित्ते चिट्ठति, तस्स णं पोत्थयरयणस्स अयमेयारूवे वण्णावासे पं० तं०-रिट्ठामतीओ कंबियाओ तवणिज्जमए दोरे णाणामणिमए गंठी अंकमयाइं पत्ताइं वेरूलियमए लिप्पासणे तवणिज्जमती संकला रिट्ठमए छादणे रिट्ठामया मसी वइरामयी लेहणी रिट्ठामयाइं अक्खराइं धम्मिए सत्थे, ववसायसभाए णं उप्पिं अट्ठमंगलगा झया छत्तातिच्छत्ता उत्तिमागारेति, तीसे णं ववसा (उववा पा०) यसभाए उत्तरपुरच्छिमेणं एगे महं बलिपेढे पं० दो जोयणाइं आयामविक्रंभेणं जोयणं बाहल्लेणं सव्वरयतामए अच्छे जाव पडिरूवे, तस्स णं बलिपेढस्स उत्तरपुरच्छिमेणं एगा महं पंदापुक्खरिणी पं० जं चेव माणं हरयस्स तं चेव सव्वं । १४१। तेणं कालेणं० विजए देवे विजयाए रायहाणीए उववातसभाए देवसयणिज्जंसि देवदूसंतरिते अंगुलस्स असंखेज्जतिभागमेत्तीए बोंदीए विजयदेवत्ताए उववण्णे, तए णं से विजये देवे अहुणोववण्णमेत्ताए चेव समाणे पंचविहाए पज्जत्ताए पज्जत्तीभावं गच्छति, तं०-आहारपज्जत्तीए सरीर० इंदिय० आणापाणु० भासामणपज्जत्तीए, तए णं तस्स विजयस्स देवस्स पंचविहाए पज्जत्तीए पज्जत्तीभावं गयस्स इमे एयारूवे अज्झत्थिए चिंतिए पत्थिते मणोगए संकप्पे समुप्पज्जित्था-किं मे पुव्वं सेयं ? किं मे पच्छा सेयं ? किं मे पुव्विं करणिज्जं ? किं मे पच्छा करणिज्जं ? किं मे पुव्विं वा पच्छा वा हिताए सुहाए खमाए णिस्सेयसाते आणुगामियत्ताए भविस्सतीतिकट्ठ एवं संपेहेति, तते णं तस्स विजयस्स देवस्स सामाणियपरिसोवव-(१५९) णगा देवा विजयस्स देवस्स इमं एतारूवं अज्झत्थितं० समुप्पण्णं जाणित्ता जेणामेव से विजए देवे तेणामेव उवागच्छंति ता विजयं देवं करतलपरिगगहिं० सिरसावत्तं मत्थए अंजलिं कट्ठु जएणं विजएणं वद्धावेति ता एवं व०-एवं खलु देवाणुप्पियाणं विजयाए रायहाणीए सिद्धायतणंसि अट्ठसतं जिणपडिमाणं जिणुस्सेहपमाणमेत्ताणं संनिक्खित्तं चिट्ठति सभाए य सुधम्माए माणवए चेतियखंभे वइरामएसु गोलवट्टसमुगतेसु बहूओ जिणसकहाओ सन्निक्खित्ताओ चिट्ठति जाओ णं देवाणुप्पियाणं अन्नेसिं च बहूणं विजयरायहाणि वत्थव्वाणं देवाण य देवीण य अच्चणिज्जाओ वंदणिज्जाओ पूयणिज्जाओ सक्कारणिज्जाओ सम्माणणिज्जाओ कल्लाणं मंगलं देवयं चेतियं पज्जुवासणिज्जाओ एतण्णं देवाणुप्पियाणं पुव्विंपि सेयं एतण्णं देवाणुप्पियाणं पच्छावि सेयं एतण्णं देवा० पुव्विं करणिज्जं एतं० पच्छा करणिज्जं एतण्णं देवा० पुव्विं वा पच्छा वा जाव आणुगामियत्ताते भविस्सतीतिकट्ठ महता २ जय (जय) सद्दं पउंजंति, तए णं से विजए देवे तेसिं सामाणियपरिसोववण्णगाणं देवाणं अंतिए एयमट्ठं सोच्चा णिसम्म हट्ठुट्ठजावहियते देवसयणिज्जाओ अब्भुट्ठे ता दिव्वं देवदूस जुयलं परिहेइ ता देवसयणिज्जाओ पच्चोरूहइ ता उपपातसभाओ पुरत्थिमेणं बारेणं णिगच्छइ ता जेणेव हरते तेणेव उवागच्छति ता हरयं अणुपदाहिणं करेमाणे २ पुरत्थिमेणं तोरणेणं अणुप्पविसति ता पुरत्थिमिल्लेणं तिसोवाणपडिरूवएणं पच्चोरूहति ता हरयं ओगाहति ता जलावगाहणं करेति ता जलमज्जणं करेति जलकिइडं करेति आयंते चोक्खे परमसूतिभूते हरतातो पच्चुत्तरति ता जेणामेव अभिसेयसभा तेणामेव उवागच्छति ता अभिसेयसभं पदाहिणं करेमाणे पुरत्थिमिल्लेणं बारेणं अणुपविसति ता जेणेव सए सीहासणे तेणेव उवागच्छति ता सीहासणवरगते पुरच्छाभिमुहे सण्णिसण्णे, तते णं तस्स विजयस्स देवस्स सामाणियपरिसोववण्णगा देवा आभिओगिते देवे सद्दवेति ता एवं व०-खिप्पामेव भो देवाणुप्पिया ! विजयस्स देवस्स महत्थं महग्घं महरिहं विपुलं इंदाभिसेयं

उवट्टवेह, तते णं ते आभिओगिता देवा सामाणियपरिसोववण्णेहिं देवेहिं एवं वुत्ता समाणा हट्टुट्टजावहितया करतलपरिग्गहियं० सिरसावत्तं मत्थए अंजलिं कट्टु एवं देवा ! तहत्ति आणाए विणएणं वयणं पडिसुणंति ता उत्तरपुरत्थिमं दिसिभागं अवक्कमंति ता वेउव्वियसमुग्घाएणं समोहणंति ता संखेज्जाइं जोयणाइं दंडं णिसरंति तं०-रयणाणं जाव रिट्ठाणं, अहाबायरे पोग्गले परिसाडंति ता अहासुहुमे पोग्गले परियायंति ता दोच्चंपि वेउव्वियसमुग्घाएणं समोहणंति ता अट्टसहस्सं सोवण्णियाणं कलसाणं अट्टसहस्सं रूप्पामयाणं कलसाणं अट्टसहस्सं मणिमयाणं अट्टसहस्सं सुवण्णरूप्पामयाणं अट्टसहस्सं सुवण्णमणिमयाणं अट्टसहस्सं रूप्पामणिमयाणं अट्टसहस्सं सुवण्णरूप्पामणिमताणं अट्टसहस्सं भोमेज्जाणं अट्टसहस्सं भिंगारगाणं एवं आयंसगाणं थालाणं पातीणं सुपतिट्टकाणं (मणोगुलियाणं वायकरगाणं) चित्ताणं रयण करंडगाणं पुप्फचंगेरीणं जाव लोमहत्थचंगेरीणं पुप्फपडलगाणं जाव लोमहत्थगपडलगाणं अट्टसतं सीहासणाणं छत्ताणं चामराणं अवएडगाणं वट्टकाणं तवसिप्पाणं खोरकाणं पीणकाणं तेल्लसमुग्गकाणं अट्टसतं धूवकडुच्छुयाणं विउव्वंति ते साभाविए विउव्विए य कलसे य जाव धूवकडुच्छुए य गेण्हंति ता विजयातो रायहाणीतो पडिनिक्खमंति ता ताए उक्किट्ठाए जाव उब्भुताए दिव्वाए देवगतीए तिरियमसंखेज्जाणं दीवसमुद्दाणं मज्झिमज्झेणं वीयीवयमाणा २ जेणेव खीरोदे समुद्दे तेणेव उवागच्छंति ता खीरोदगं गिण्हंति ता जातिं तत्थ उप्पलाइं जाव सतसहस्सपत्तातिं तातिं गिण्हंति ता जेणेव पुक्खरोदे समुद्दे तेणेव उवागच्छंति ता पुक्खरोदगं गेण्हंति ता जातिं तत्थ उप्पलाइं जाव सतसहस्सपत्तातिं तातिं गिण्हंति ता जेणेव समयखेत्ते जेणेव भरहेरवयातिं वासाइं जेणेव मागधवरदामपभासाइं तित्थाइं तेणेव उवागच्छंति ता तित्थोदगं गिण्हंति ता तित्थमट्ठियं गेण्हंति ता जेणेव गंगासिंधुरत्तारत्तवतीसलिला तेणेव उवागच्छंति ता सरितोदगं गेण्हंति ता उभओ तडमट्ठियं गेण्हंति ता जेणेव चुल्लहिमवंतसिहरिवासधरपव्वता तेणेव उवागच्छंति ता सव्वतूवरे य सव्वपुप्फे य सव्वगंधे य सव्वमल्ले य सव्वोसहिसिद्धत्थए य गिण्हंति ता जेणेव पउमद्वहपुंडरीयद्वहा तेणेव उवागच्छंति ता दहोदगं गेण्हंति जातिं तत्थ उप्पलाइं जाव सतसहस्सपत्ताइं ताइं गेण्हंति ता जेणेव हेमवयहेरणवयाइं जेणेव रोहियरोहितंससुवण्णकूलरूप्पकूलाओ तेणेव उवागच्छंति ता सलिलोदहगं गेण्हंति ता उभओ तडमट्ठियं गिण्हंति ता जेणेव सद्दावातिमालवंतपरियागा वट्टवेतड्ढपव्वता तेणेव उवागच्छंति ता सव्वतूवरे य जाव सव्वोसहिसिद्धत्थए य गेण्हंति ता जेणेव महाहिमवंतरूप्पिवासधरपव्वता तेणेव उवागच्छंति ता सव्वपुप्फे तं चेव जेणेव महापउमद्वहमहापुंडरीयद्वहा तेणेव उवागच्छंति ता जाइं तत्थ उप्पलाइं तं चेव जेणेव हरिवासरम्मावासे जेणेव हरकान्तहरिकंतणरकंतनारीकंताओ सलिलाओ तेणेव उवागच्छंति ता सलिलोदगं गेण्हंति ता जेणेव वियडावाइंगंधावातिवट्टवेयड्ढपव्वया तेणेव उवागच्छंति सव्वपुप्फे य तं चेव जेणेव णिसहनीलवंतवासहरपव्वता तेणेव उवागच्छंति सव्वतूवरे य तहेव जेणेव तिगिच्छिदहकेसरिदहा तेणेव उवागच्छंति ता जाइं तत्थ उप्पलाइं तं चेव जेणेव पुव्वविदेहावरविदेहवासाइं जेणेव सीयासीओयाओ महाणईओ जहा णईओ जेणेव सव्वचक्कवट्ठिविजया जेणेव सव्वमागहवरदामपभासाइं तित्थाइं तहेव जेणेव सव्ववक्खारपव्वता सव्वतूवरे य० जेणेव सव्वंतरणदीओ सलिलोदगं गेण्हंति ता जेणेव मंदरे पव्वते जेणेव भद्दसालवणे तेणेव उवागच्छंति सव्वतूवरे य जाव सव्वोसहिसिद्धत्थए य गिण्हंति ता जेणेव गंदणवणे तेणेव उवागच्छन्ति ता सव्वतूवरे जाव सव्वोसहिसिद्धत्थे य सरसं च गोसीसचंदणं गिण्हंति ता जेणेव सोमण सवणे तेणेव उवागच्छंति ता सव्वतूवरे य सव्वोसहिसिद्धत्थए य सरसगोसीसचंदणं दिव्वं च सुमणदामं गेण्हंति ता जेणेव पंडगवणे तेणामेव समुवागच्छंति ता सव्वतूवरे जाव सव्वोसहिसिद्धत्थए य सरसं च गोसीसचंदणं दिव्वं च सुमणोदामं दद्वरयमलयसुंगधिए य गंधे गेण्हंति ता एगतो मिलंति ता जंबुदीवस्स पुरत्थिमिल्लेणं दारेणं णिग्गच्छंति ता ताए उक्किट्ठाए जावदिव्वाए देवगतीए तिरियमसंखेज्जाणं दीवसमुद्दाणं मज्झिमज्झेणं वीयीवयमाणा २ जेणेव विजया रायहाणी तेणेव उवागच्छंति ता विजयं रायहाणिं अणुप्पयाहिणं करेमाणा जेणेव अभिसेयसभा जेणेव विजए देवे तेणेव उवागच्छंति ता करतलपरिग्गहितं सिरसावत्तं मत्थए अंजलिं कट्टु जएणं विजएणं वद्धावेति विजयस्स देवस्स तं महत्थं महग्घं महरिहं विपुलं अभिसेयं उवट्टवेति, तते णं तं विजयदेवं चत्तारि य सामाणियसाहस्सीओ चत्तारि अग्गमहिसीओ सपरिवाराओ तिण्णि परिसाओ सत्त अणिया सत्त अणियाहिवई सोलस आयरक्खदेवसाहस्सीओ अन्ने य बहवे

विजयरायधाणिवत्थव्वगा वाणमंतरा देवा य देवीओ य तेहिं साभावितेहिं उत्तरवेउव्वितेहि य वरकमलपतिट्ठाणेहिं सुरभिवरवारिपडिपुण्णेहिं चंदणकयचच्चातेहिं आविद्धकंठेगुणेहिं पउमुप्पलपिधाणेहिं करतलसुकुमालकोमलपरिग्गहिएहिं अट्टसहस्साणं सोवणियाणं कलसाणं जाव अट्टसहस्साणं भोमेयाणं कलसाणं सव्वोदएहिं सव्वमट्टियाहिं सव्वतुवरेहिं सव्वपुप्फेहिं जाव सव्वोसहिसिद्धत्थएहिं सव्विड्ढीए सव्वजुत्तीए सव्वबलेणं सव्वसमुदएणं सव्वायरेणं सव्वविभूतीए सव्वविभूसाए सव्वसंभमेणं सव्वोरोहेणं सव्वणाडएहिं सव्वपुप्फगंधमल्लालंकारविभूसाए सव्वदिव्वतुडियणिणाएणं महया २ जुत्तीए महया २ समुदएणं महता २ तुरियजमगसमगपडुप्पवादितरवेणं संखपणवपडहभेरिझल्लरिखरमुहिमुरवमुयंगदुंदुहिहुडुक्कणिग्घोससंनिनादितरवेणं महता २ इंदाभिसेगेणं अभिसिंचंति, तए णं तस्स विजयस्स देवस्स महता २ इंदाभिसेगंसि वट्टमाणंसि अप्पेगतिया देवा णच्चोदगं णातिमट्टियं पविरलपप्फुसियं दिव्वं सुरभिं रयरेणुविणासणं गंधोदगवासं वासंति, अप्पेगतिया देवा णिहतरयं णट्टरयं भट्टरयं पसंतरयं उवसंतरयं करेन्ति अप्पे० विजयं रायहाणि सव्विंतरबाहिरियं आसितसम्मज्जितोवलितं सित्तसुइसम्मट्टरत्थंतरावणवीहियं करेन्ति, अप्पे० विजयं रायहाणि मंचातिमंचकलितं करेन्ति अप्पे० विजयं रायहाणि णाणाविहरागरंजियऊसियजयविजयवेजयन्तीपडागातिपडागमंडितं करेन्ति, अप्पे० विजयं रायहाणि लाउल्लोइयमहियं करेन्ति, अप्पे० गोसीसरसरत्तचंदणदहरदिण्णपंचंगु-लितलं करेन्ति, अप्पे० उवचियचंदणकलसं चंदणघडसुकयतोरणपडिदुवारदेसभागं करेन्ति, अप्पे० आसत्तोसत्तविपुलवट्टवग्घारितमल्लदामकलावं करेन्ति, अप्पे० पंचवणसरससुरभिमुक्कपुप्फपुंजोवयारकलितं करेन्ति, अप्पे० काला गुरुपवरकुंदुरूक्कतुरूक्कधूवडज्झंतमघमघंतंगंधुद्धुयाभिरामं सुगंधवरगंधियं गंधवट्टिभूयं करेन्ति, अप्पे० हिरणवासं वासंति अप्पे० सुवणवासं अप्पे० एवं रयणवासं वइरवासं पुप्फवासं मल्लवासं गंधवासं चुण्णवासं वत्थवासं आहरणवासं अप्पे० हिरणविधिं भाइन्ति एवं सुवणविधिं रयणविधिं वतिरविधिं पुप्फविधिं मल्लविधिं चुण्णविधिं गंधविधिं वत्थविधिं भाइन्ति आभरणविधिं, अप्पे० दुयं णट्टविधिं उवदंसेन्ति अप्पे० विलंबितं० अप्पे० दुतविलंबितं णाम णट्टविधिं उवदंसेन्ति अप्पे० अंचियं० अप्पे रिभितं० अप्पे० अंचितरिभितं० अप्पे० आरभडं अप्पे० भसोलं अप्पे० आरभडभसोलं अप्पे० उप्पायणिवायपवुत्तं संकुचियपसारियं रियारियं भंतसंभंतं णाम दिव्वं णट्टविधिं उवदंसेन्ति, अप्पे० चउव्विधं वातियं वादेन्ति, तं०-ततं विततं घणं झुसिरं, अप्पे० चउव्विधं गेयं गातंति, तं०-उक्खित्तयं पवत्तयं मंदायं रोइदावसाणं, अप्पे० चउव्विधं अभिणयं अभिणयंति, तं०-दिट्ठितियं पाडंतियं सामन्तोवणिवातियं लोगमज्झावसाणियं, अप्पे० देवा पीणंति अप्पे० वुक्कारेन्ति अप्पे० तंडवेन्ति अप्पे० लासंति अप्पे० वुक्कारेन्ति अप्पे० अप्फोडंति अप्पे० वग्गंति अप्पे० तिवतिं छिंदंति अप्पे० अप्फोडंति वग्गंति तिवतिं छिंदंति अप्पे० देवा हतहेसियं करेन्ति अप्पे० हत्थिगुलगुलाइयं करेन्ति अप्पे० रहघणघणातियं करेन्ति अप्पे० हयहेसियं करेन्ति हत्थिगुलगुलाइयं करेन्ति रहघणघणाइयं करेन्ति अप्पे० उच्छोलेंति अप्पे० पच्छोलेंति अप्पे० उक्किट्ठीओ करेन्ति अप्पे० उच्छोलिन्ति पच्छोलिन्ति उक्किट्ठीओ करेन्ति अप्पे० सीहणादं करेन्ति अप्पे० पाददहरयं करेन्ति अप्पे० भूमिचवेडं दलयंति अप्पे० सीहनादं पाददहरयं क० भूमिचवेडं दलयंति अप्पे० हक्कारेन्ति अप्पे० वुक्कारेन्ति अप्पे० थक्कारेन्ति अप्पे० पुक्कारेन्ति अप्पे० देवा नामाइं सावेन्ति अप्पे० हक्कारेन्ति वुक्कारेन्ति थक्कारेन्तिपुक्कारेन्ति णामाइं सावेन्ति अप्पे० उप्पतंति अप्पे० णिवयंति अप्पे० परिवयंति अप्पे० उप्पयंति णिवयंति परिवयंति अप्पे० जलेन्ति अप्पे० तवंति अप्पे० पतवंति अप्पे० जलंति तवंति पतवंति अप्पे० गज्जंति अप्पे० विज्जुयायंति अप्पे० वासंति अप्पे० गज्जंति विज्जुयायंति वासंति अप्पे० देवसन्निवायं करेन्ति अप्पे० देवुक्कलियं करेन्ति अप्पे० देवकहकहं करेन्ति अप्पे० देवदुहदुहं करेन्ति अप्पे० देवसन्निवायं देवउक्कलियं देवकहकहं देवदुहदुहं करेन्ति अप्पे० देवुज्जोयं करेन्ति अप्पे० विज्जुयारं करेन्ति अप्पे० चेलुक्खेवं करेन्ति अप्पे० देवुज्जोयं विज्जुतारं चेलुक्खेवं करेन्ति अप्पे० उप्पलहत्थगता जाव सयसहस्सपत्त० घंटाहत्थगता कलसहत्थगता जाव धूवकडुच्छुयहत्थगता हट्टतुट्ठा जाव हरिसवसविसप्पमाणहियपा विजयाए रायहाणीए सव्वतो समंता आधावेन्ति पधावेन्ति, तए णं विजयं देवं चत्तारि सामाणियसाहस्सीओ चत्तारि अग्गमहिस्सीओ सपरिवाराओ जाव सोलस आयरक्खदेवसाहस्सीओ अण्णे य बहवे

विजयरायहाणीवत्थव्वा वाणमंतरा देवा य देवीओ य तेहिं वरकमलपतिट्ठाणेहिं जाव अट्ठसतेणं सोवणियाणं कलसाणं तं चेव जाव अट्ठसएणं भोमज्जाणं कलसाणं सव्वोदगेहिं सव्वमट्ठियाहिं सव्वतुवरेहिं सव्वपुप्फेहिं जाव सव्वोसहिसिद्धत्थएहिं सव्विड्ढीए जाव निग्घोसनाइयरवेणं महया २ इंदाभिसेएणं अभिसिंचंति ता पत्तेयं २ सिरसावत्तं अंजलिं कट्ठु एवं व०-जय जय नंदा ! जय जय भद्दा ! जय जय नंदा ! भद्दं ते अजियं जिणेहिं जियं पालयाहि अजितं जिणेहि सत्तुपक्खं जित्तं पालेहिं मित्तपक्खं जियमज्झे वसाहि तं देव ! निरूवसग्गं इंदोइव देवाणं चंदोइव ताराणं चमरोइव असुराणं धरणोइव नागाणं भरहोइव मणुयाणं बहूणि पलिओवमाइं बहूणि सागरोवमाणि चउण्हं सामाणियसाहस्सीणं जाव आयरक्खदेवसाहस्सीणं विजयस्स दारस्स विजयाए रायहाणीए अण्णेसिं च बहूणं विजयरायहाणिवत्थव्वाणं वाणमंतराणं देवाण य देवीण य आहेवच्चं जाव आणाईसरसेणावच्चं कारेमाणे पालेमाणे विहराहिति कट्ठु महता २ सदेणं जयजयसद्दं पउंजंति । १४२। तए णं से विजए देवे महया २ इंदाभिसेएणं अभिसित्ते समाणे सीहासणाओ अब्भुट्ठेइ ता अभिसेयसभातो पुरत्थिमेणं दारेणं पडिनिक्खमति ता जेणामेव अलंकारियसभा तेणामेव उवागच्छति ता अलंकारियसभं अणुप्पयाहिणीकरेमाणे २ पुरत्थिमेणं दारेणं अणुपविसति ता जेणेव सीहासणे तेणेव उवागच्छति ता सीहासणवरगते पुरत्थाभिमुहे सण्णिसण्णे, तए णं तस्स विजयस्स देवस्स सामाणियपरिसोवण्णगा देवा आभिओगिए देवे सद्दावेंति ता एवं व०-खिप्पामेव भो देवाणुप्पिया ! विजयस्स देवस्स आलंकारियं भंडं उवणेह, तेणेव ते० आलंकारियं भंडं जाव उवट्ठवेंति, तए णं से विजए देवे तप्पढमयाए पम्हलसूमालाए दिव्वाए सुरभीए गंधकासाईए गाताइं लूहेति ता सरसेणं गोसीसचंदणेणं गाताइं अणुलिंपति ता ततोऽणंतरं च णं नासाणीसासवायवोज्झं चक्खुहरं वण्णफरिसजुत्तं हतलालापेलवातिरेणं धवलं कणगखइयंतकम्मं आगासफलिह सरिसप्पभं अहतं दिव्वं देवदूसजुयलं णियंसेइ ता हारं पिणद्धेइ ता एवं एक्कावलिं० एवं एतेणं अभिलावेणं मुत्तावलिं कणगावलिं रयणावलिं कडगाइं तुडियाइं अंगयाइं केयूराइं दसमुद्धिताणंतकं कडिसुत्तकं तेअच्छिसुत्तगं मुरविं कंठमुरविं पालंबं कुंडलाइं चूडामणिं चित्तरयणुक्कडं मउडं पिणद्धेइ ता गंठिमवेढिमपूरिमसंघाइमेणं चउव्विहेणं मल्लेणं कप्परूक्खयंपिव अप्पाणं अलंकियविभूसितं करेति ता दहरमलयसुगंधितेहिं गंधेहिं गाताइं सुक्कि (भुक्कु) डति ता दिव्वं च सुमणदामं पिणद्धति, तए णं से विजए देवे केसालंकारेणं वत्थालंकारेणं मल्लालंकारेणं आभरणालंकारेणं चउव्विहेणं अलंकारेणं अलंकितविभूसिए समाणे पडिपुण्णालंकारे सीहासणाओ अब्भुट्ठेइ ता अलंकारियसभाओ पुरच्छिमिल्लेणं दारेणं पडिनिक्खमति ता जेणेव ववसायसभा तेणेव उवागच्छति ता ववसायसभं अणुप्पदाहिणं करेमाणे पुरत्थिमिल्लेणं दारेणं अणुपविसति ता जेणेव सीहासणे तेणेव उवागच्छति ता सीहासणवरगते पुरत्थाभिमुहे सण्णिसण्णे, तते णं तस्स विजयस्स देवस्स आहिओगिया देवा पोत्थयरयणं उवणेति, तए णं से विजए देवे पोत्थयरयणं गेण्हति ता पोत्थयरयणं मुयति ता पोत्थयरयणं विहाडेति ता पोत्थयरयणं वाएति ता धम्मियं ववसायं पगेण्हति ता पोत्थयरयणं पडिणिक्खिवेइ ता सीहासणाओ अब्भुट्ठेइ ता ववसायसभाओ पुरत्थिमिल्लेणं दारेणं पडिणिक्खमइ ता जेणेव णंदापुक्खरिणी तेणेव उवागच्छति ता णंदं पुक्खरिणिं अणुप्पयाहिणीकरेमाणे पुरत्थिमिल्लेणं दारेणं अणुपविसति ता पुरत्थिमिल्लेणं तिसोवाणपडिरूवएणं पच्चोरूहति ता हत्थं पादं पक्खालेति ता एगं महं सेतं रयतामयं विमलसलिलपुण्णं मत्तगयमहामुहाकितिसमाणं भिंजारं पणिण्हति ता जाइं तत्थ उप्पलाइं पउमाइं जाव सतसहस्सपत्ताइं ताइं णि ण्हति ता णंदातो पुक्खरिणीतो पच्चुत्तरेइ ता जेणेव सिद्धायतणे तेणेव पहारेत्थ गमणाए, तए णं तस्स विजयस्स देवस्स चत्तारि सामाणियसाहस्सीओ जाव अण्णे य बहवे वाणमंतरा देवा य देवीओ य अप्पेगइया उप्पलहत्थगया जाव सयसहस्सपत्तहत्थगया विजयं देवं पिट्ठतो २ अणुगच्छंति, तए णं तस्स विजयस्स देवस्स बहवे आभिओगिया देवा य देवीओ य कलसहत्थगता जाव धूवकडुच्छुयहत्थगता विजयं देवं पिट्ठतो २ अणुगच्छंति, तते णं से विजए देवे चउहिं सामाणियसाहस्सीहिं जाव अण्णेहि य बहूहिं वाणमंतरेहिं देवेहि य देवीहि य सद्धिं संपरिवुडे सव्विड्ढीए सव्वजुत्तीए जाव णिग्घोसनाइयरवेणं जेणेव सिद्धायतणे तेणेव उवागच्छति ता सिद्धायतणं अणुप्पयाहिणीकरेमाणे २ पुरत्थिमिल्लेणं दारेणं अणुपविसति ता जेणेव देवच्छंदए तेणेव उवागच्छति ता आलोए जिणपडिमाणं पणामं करेति ता लोमहत्थगं

गेण्हति ता जिणपडिमाओ लोमहत्थएणं पमज्जति ता सुरभिणा गंधोदएणं ण्हाणेति ता दिव्वाए सुरभिगंधकासाईए गाताइं लूहेति ता सरसेणं गोसीसचंदणेणं गाताणि अणुलिंपइ ता जिणपडिमाणं अहयाइं सेताइं दिव्वाइं देवदूसजुयलाइं णियंसेइ ता अग्गेहिं वरेहिं गंधेहि य मल्लेहि य अच्चेति ता पुप्फारूहणं गंधारूहणं मल्लारूहणं वण्णारूहणं चुण्णारूहणं आभरणारूहणं करेति ता आसत्तोसत्तविउलवट्टवग्घारितमल्लदामकलावं करेति ता अच्छेहिं सणहेहिं रययामएहिं अच्छरसातंदुलेहिं जिणपडिमाणं पुरतो अट्ठमंगलए आलिहति, सोत्थियसिरिवच्छजावदप्पणा अट्ठमंगलगे आलिहति ता कयग्गाहग्गहितकरतलपब्भट्टवि प्पमुक्केणं दसद्धवन्नेणं कुसुमेणं मुक्कपुप्फपुंजोवयारकलितं करेति ता चंदप्पभवइरवेरूलियविमलदंडं कंचणमणिरयणभत्तिचित्तं कालागुरुपवरकुंदुरुक्कतुरुक्कधूवगंधुत्तमाणुविद्धं धूमवट्ठिं विणिम्मयंतं वेरूलियामयं कडुच्छुयं पग्गहित्तु धूवं पयत्तेण दाऊण जिणवराणं अट्ठसयविसुद्धगंधजुत्तेहिं महावित्तेहिं अत्थजुत्तेहिं अपुणरुत्तेहिं संथुणइ ता सत्तट्ट पयाइं ओसरति सत्तट्टपयाइं ओसरित्ता वामं जाणुं अंचेइ ता दाहिणं जाणुं धरणितलंसि णिवाडेइ ता तिक्खुत्तो मुद्धाणं धरणियलंसि णमेइ ता ईसिं पच्चुणमति ता कडयतुडियथंभियाओ भुयाओ पडिसाहरति ता करयलपरिग्गहियं सिरसावत्तं मत्थए अंजलिं कट्ठु एवं व०-णमोऽत्थु णं अरिहंताणं भगवंताणं जाव सिद्धिगइणामधेयं ठाणं संपत्ताणंतिकट्ठु वंदति णमंसति ता जेणेव सिद्धायतणस्स बहुमज्झदेसभाए तेणेव उवागच्छति ता दिव्वाए उदगधाराए अब्भुक्खेति ता सरसेणं गोसीसचंदणेणं पंचंगुलितलेणं मंडलं आलिहति ता चच्चए दलयति ता कयग्गाहग्गहियकरतलपब्भट्टविप्पमुक्केणं दसद्धवण्णेणं कुसुमेणं मुक्कपुप्फपुंजोवयारकलियं करेति ता धूवं दलयति ता जेणेव सिद्धायतणस्स दाहिणिल्ले दारे तेणेव उवागच्छति ता लोमहत्थयं गेण्हइ ता दारचेडीओ य सालिभंजियाओ य वालरूवए य लोभहत्थएणं पमज्जति ता बहुमज्झदेसभाए सरसेणं गोसीसचंदणेणं पंचंगुलितलेणं अणुलिंपति ता चच्चए दलयति ता पुप्फारूहणं जाव आहरणारूहणं करेति ता आसत्तोसत्तविपुलजावमल्लदामकलावं करेति ता कयग्गाहग्गहित जाव पुंजोवयारकलितं करेति ता धूवं दलयति ता जेणेव मुहमंडवस्स बहुमज्झदेसभाए तेणेव उवागच्छति ता बहुमज्झदेसभाए लोमहत्थेणं पमज्जति ता दिव्वाए उदगधाराए अब्भुक्खेति ता सरसेणं गोसीसचंदणेणं पंचंगुलितलेणं मंडलगं आलिहति ता चच्चए दलयति ता कयग्गाह जाव धूवं दलयति ता जेणेव मुहमंडवगस्स पच्चत्थिमिल्ले दारे तेणेव उवा० लोमहत्थयं गेण्हति तर दारचेडीओ य सालिभंजियाओ य वालरूवए य लोमहत्थेणं पमज्जति ता दिव्वाए उदगधाराए अब्भुक्खेति ता सरसेणं गोसीसचंदणेणं जाव चच्चए दलयति ता आसत्तोसत्त० कयग्गाह० धूवं दलयति ता जेणेव मुहमंडवगस्स उत्तरिल्ला खंभपंती तेणेव उवागच्छइ ता लोमहत्थयं परा० सालिभंजियाओ दिव्वाए उदगधाराए सरसेणं गोसीसचंदणेणं पुप्फारूहणं जाव आसत्तोसत्त० कयग्गाह० धूवं दलयति जेणेव मुहमंडवस्स पुरत्तिथिमिल्ले दारे तं चेव सव्वं भाणियव्वं जाव दारस्स अच्चणिया जेणेव दाहिणिल्ले दारे तं चेव जेणेव पेच्छाघरमंडवस्स बहुमज्झदेसभाए जेणेव वइरामए अक्खाडए जेणेव मणिपेढिया जेणेव सीहासणे तेणेव उवागच्छति ता लोमहत्थयं गिण्हति अक्खाडगं च सीहासणं च लोमहत्थेणं पमज्जति ता दिव्वाए उदगधाराए अब्भु० पुप्फारूहणं जाव धूवं दलयति ता जेणेव पेच्छाघरमंडवस्स पच्चत्थिमिल्ले दारे दारच्चणिया उत्तरिल्ला खंभपंती तहेव, पुरत्थिमिल्ले दारे तहेव जेणेव दाहिणिल्ले दारे तहेव, जेणेव चेतियथूभे तेणेव उवागच्छति ता लोमहत्थयं गेण्हति ता चेतियथूभं लोमहत्थएणं पमज्जति ता दिव्वाए दग० सरसेण० पुप्फारूहणं आसत्तोसत्त जाव धूवं दलयति ता जेणेव पच्चत्थिमिल्ला मणिपेढिया जेणेव जिणपडिमा तेणेव उवागच्छति जिणपडिमाए आलोए पणामं करेइ ता लोमहत्थयं गेण्हति ता तं चेव सव्वं जं जिणपडिमाणं जाव सिद्धिगइणामधेज्जं ठाणं संपत्ताणं, वंदति णमंसति, एवं उत्तरिल्लाएवि, एवं पुरत्थिमिल्लाएवि, एवं दाहिणिल्लाएवि, जेणेव चेइयरूक्खा दारविही य मणिपेढिया जेणेव महिंदज्झए दारविही, जेणेव दाहिणिल्ला नंदा पुक्खरिणी तेणेव उवा० लोभहत्थयं गेण्हति वेतियाओ य तिसोवाणपडिरूवए य तोरणे य सालिभंजियाओ य वालरूवए य लोमहत्थएणं पमज्जति ता दिव्वाए उदगधाराए सिंचति सरसेणं गोसीसचंदणेणं अणुलिंपति ता पुप्फारूहणं जाव धूवं दलयति ता सिद्धायतणं अणुप्पयाहिणं करेमाणे जेणेव उत्तरिल्ला णंदापुक्खरिणी तेणेव उवागच्छति ता तहेव महिंदज्झया चेतियरूक्खा चेतियथूभे पच्चत्थिमिल्ला मणिपेढिया जिणपडिमा उत्तरिल्ला पुरत्थिमिल्ला दक्खिणिल्ला,

पेच्छाघरमंडवस्सवि तहेव जहा दक्खिणिल्लस्स पच्चत्थिमिल्ले दारे जाव दक्खिणिल्ला णं खंभपंती मुहमंडवस्सवि तिण्हं दाराणं अच्चणिया भणिऊणं दक्खिणिल्ला णं खंभपंती उत्तरे दारे पुरच्छिमे दारे सेसं तेणेव कमेणं जाव पुरत्थिमिल्ला णंदापुक्खरिणी जेणेव सभा सुधम्मा तेणेव पहारेत्थ गमणाए, तते णं तस्स विजयस्स चत्तारि सामाणियसाहस्सीओ एयप्पभित्तिं जाव सव्विड्ढीए जाव णाइयरवेणं जेणेव सभा सुधम्मा तेणेव उवागच्छंति, तं णं सभं सुधम्मं अणुप्पयाहिणीकरेमाणे पुरत्थिमिल्लेणं० अणुपविसति आलोए जिणसकहाणं पणामं करेति जेणेव मणिपेढिया जेणेव माणवचेतियक्खंभे जेणेव वइरामया गोलवट्टसमुग्गका तेणेव उवागच्छति ता लोमहत्थयं गेण्हति ता वइरामए गोलवट्टसमुग्गए लोमहत्थएण पमज्जइ ता वइरामए गोलवट्टसमुग्गए विहाडेति ता जिणसकहाओ लोमहत्थएणं पमज्जति ता सुरभिणा गंधोदएणं तिसत्तखुत्तो जिणसकहाओ पक्खालेति ता सरसेणं गोसीसचंदणेणं अणुलिंपइ ता अग्गेहिं वरेहिं गंधेहिं मल्लेहि य अच्चिणति ता धूवं दलयति ता वइरामएसु गोलवट्टसमुग्गएसु पडिणिक्खिवति ता माणवकं चेतियक्खंभं लोमहत्थएणं पमज्जति ता दिव्वाए उदगधाराए अब्भुक्खेइ ता सरसेणं गोसीसचंदणेणं चच्चए दलयति ता पुप्फारूहणं जाव आसत्तोसत्त० कयग्गाह० धूवं दलयति ता जेणेव सभाए सुधम्माए बहुमज्झदेसभाए तं चेव जेणेव सीहासणे तेणेव जहा दारच्चणित्ता जेणेव देवसयणिज्जे तं चेव जेणेव खुड्डागे महिंदज्झए तं चेव जेणेव पहरणकोसे चोप्पाले तेणेव उवागच्छति ता पत्तेयं २ पहरणाइं लोमहत्थएणं पमज्जति ता सरसेणं गोसीसचंदणेणं तहेव सव्वं, सेसंपि (१६०) दक्खिणदारं आदिकाउं तहेव णेयव्वं जाव पुरच्छिमिल्ला णंदापुक्खरिणी सव्वाणं सभाणं जहा सुधम्माए सभाए तहा अच्चणिया उववायसभाए णवरि देवसयणिज्जस्स अच्चणिया सेसासु सीहासणाण अच्चणिया हरयस्स जहा णंदाए पुक्खरिणीए अच्चणिया, ववसायसभाए पोत्थयरयणं लोम० दिव्वाए उदगधाराए सरसेणं गोसीसचंदणेणं अणुलिंपति अग्गेहिं वरेहिं गंधेहिं मल्लेहि य अच्चिणति ता सीहासणं लोमहत्थएणं पमज्जति जाव धूवं दलयति सेसं तं चेव, णंदाए जहा हरयस्स तहा, जेणेव बलिपीढं तेणेव उवागच्छति ता आभिओगिए देवे सद्दावेति ता एवं व०-खिप्पामेव भो देवाणुप्पिया ! विजयाए रायहाणीए सिंघाडगेसु य तिएसु य चउक्केसु य चच्चरेसु य चतुमुहेसु य महापहपहेसु य पासाएसु य पागारेसु य अट्टालएसु य चरियासु य दारेसु य गोपुरेसु य तोरणेसु य वावीसु य पुक्खरिणीसु य जाव बिलपंतियासु य आरामेसु य उज्जाणेसु य काणणेसु य वणेसु य वणसंडेसु य वणराईसु य अच्चणियं करेह करेत्ता ममेयमाणत्तियं खिप्पामेव पच्चप्पिणह, तए णं ते आभिओगिया देवा विजएणं देवेणं एवं वुत्ता समाणा जाव हट्टतुट्ठा विणएणं पडिसुणेति ता विजयाए रायहाणीए सिंघाडगेसु य जाव अच्चणियं करेत्ता जेणेव विजए देवे तेणेव उवागच्छंति ता एयमाणत्तियं पच्चप्पिणंति, तए णं से विजए देवे तेसिं आभिओगियाणं देवाणं अंतिए एयमट्ठं सोच्चा णिसम्म हट्टतुट्ठचित्तमाणंदियजावहयहियएजेणेव णंदापुक्खरिणी तेणेव उवागच्छति ता पुरत्थिमिल्लेणं तोरणेणं जाव हत्थपायं पक्खालेति ता आयंते चोक्खे परमसुइभूए णंदापुक्खरिणीओ पच्चुत्तरति ता जेणेव सभा सुधम्मा तेणेव पहारेत्थ गमणाए, तए णं से विजए देवे चउहिं सामाणियसाहस्सीहिं जाव सोलसहिं आयरक्खदेवसाहस्सीहिं सव्विड्ढीए जाव निग्घोसनाइयरवेणं जेणेव सभा सुधम्मा तेणेव उवागच्छति ता सभं सुधम्मं पुरत्थिमिल्लेणं दारेणं अणुपविसति ता जेणेव मणिपेढिया तेणेव उवागच्छति ता सीहासणवरगते पुरच्छाभिमुहे सणिसण्णे । १४३। तए णं तस्स विजयस्स चत्तारि सामाणियसाहस्सीओ अवरूत्तरेणं उत्तरेणं उत्तरपुरच्छिमेणं पत्तेयं २ पुव्वणत्थेसु भद्दासणेसु णिसीयंति, चत्तारि अग्गमहिस्सीओ पुरत्थिमेणं पत्तेयं०, तए णं० दाहिणपुरत्थिमेणं अब्भित्तारियाए परिसाए अट्ठ देवसाहस्सीओ पत्तेयं २ जाव णिसीयंति, एवं दक्खिणेणं मज्झिमियाए परिसाए दस देवसाहस्सीओ जाव णिसीदंति, दाहिणपच्चत्थिमेणं बाहिरियाए परिसाए बारस देवसाहस्सीओ पत्तेयं २ जाव णिसीदंति, पच्चत्थिमेणं सत्त अणियाहिवती पत्तेयं २ जाव णिसीयंति, तए णं० पुरत्थिमेणं दाहिणेणं पच्चत्थिमेणं उत्तरेणं सोलस आयरक्खदेवसाहस्सीओ पत्तेयं २ पुव्वणत्थेसु भद्दासणेसु णिसीदंति, तं०-पुरत्थिमेणं चत्तारि साहस्सीओ जाव उत्तरेणं०, ते णं आयरक्खा सन्नद्धबद्धवम्मियकवया उप्पीलियसरासणपट्टिया पिणद्धगेवेज्जविमलवरचिंधपट्टा गहियाउहपहरणा तिणयाइं तिसंधीणि वइरामयाकोडीणि धणूइं अहिगिज्झं परियाइयकंडकलावा णीलपाणिणो पीय० रत्त० चाव० चारू० चम्म० खग्ग० दंड० पास० णीलपीयरत्तचावचारूचम्मखग्गदंडपासवरधरा आयरक्खा रक्खोवगा

गुत्ता गुत्तपालिता जुत्ता जुत्तपालिता पत्तेयं २ समयतो विणयतो किंकरभूताविव चिट्ठंति, विजयस्स णं भंते ! देवस्स केवतियं कालं ठिती पं० ?, गो० एगं पलिओवमं ठिती पं०, विजयस्स णं भंते ! देवस्स सामाणियमाणं देवाणं केवतियं कालं ठिती पं० ?, एगं पलिओवमं ठिती पं०, एवमहिड्ढीए एवमहज्जुतीए एवमहब्बले एवमहायसे एवमहासुक्खे एवमहाणुभागे विजए देवे २ । १४४। कहिं णं भंते ! जंबुदीवस्स वेजयंते णामं दारे पं० ?, गो० ! जंबुदीवे दीवे मंदरस्स पव्वयस्स दक्खिणेणं पणयालीसं जोयणसहस्साइं अबाधाए जंबुदीवदाहिणपेरंते लवणसमुद्ददाहिणद्धस्स उत्तरेणं एत्थ णं जंबुदीवस्स वेजयंते णामं दारे पं० अट्ठ जोयणाइं उड्ढंउच्चत्तेणं सच्चवे सव्वा वत्तव्वता जाव णिच्चे, कहिं णं भंते ! रायहाणी ?, दाहिणे णं जाव वेजयंते देवे, कहिं णं भंते ! जंबुदीवस्स जयंते णामं दारे पं० ?, गो० ! जंबुदीवे मंदरस्स पव्वयस्स पच्चत्थिमेणं पणयालीसं जोयणसहस्साइं जंबुदीवपच्चत्थिमपेरंते लवणसमुद्दपच्चत्थिमद्धस्स पुरच्छिमेणं सीओ दाए महाणदीए उप्पिं एत्थ णं जंबुदीवस्स जयंते णामं दारे पं०, तं चेव से पमाणं जयंते देवे, पच्चत्थिमेणं से रायहाणी जाव महिड्ढीए, कहिं णं भंते ! जंबुदीवस्स अपराइए णामं दारे पं० ?, गो० ! मंदरस्स उत्तरेणं पणयालीसं जोयणसहस्साइं अबाधाए जंबुदीवे उत्तरपेरंते लवणसमुद्दस्स उत्तरद्धस्स दाहिणेणं एत्थ णं जंबुदीवे अपराइए णामं दारे पं० तं० चेव पमाणं रायहाणी उत्तरेणं जाव अपराइए देवे, चउण्हवि अण्णमि जंबुदीवे । १४५। जंबुदीवस्स णं भंते ! दीवस्स दारस्स य दारस्स य एस णं केवतियं अबाधाए अंतरे पं० ?, गो० ! अउणासीतिं जोयणसहस्साइं बावणं च जोयणाइं देसूणं च अद्धजोयणं दारस्स य २ अबाधाए अंतरे पं० । १४६। जंबुदीवस्स णं भंते ! दीवस्स पएसा लवणं समुद्दं पुट्ठा ?, हंता पुट्ठा, ते णं भंते ! किं जंबुदीवे लवणसमुद्दे ?, गो० ! जंबुदीवे० नो खलु ते लवणसमुद्दे, लवणस्स णं भंते ! समुद्दस्स पदेसा जंबुदीवं पुट्ठा ?, हंता पुट्ठा, ते णं भंते ! किं लवणसमुद्दे जंबुदीवे ?, गो० ! लवणे णं ते समुद्दे नो खलु जंबुदीवे, जंबुदीवे णं भंते ! दीवे जीवा उद्दाइत्ता २ लवणसमुद्दे पच्चायंति ?, गो० ! अत्थेगतिया पच्चायंति अत्थेगतिया नो पच्चायंति, लवणे णं भंते ! समुद्दे जीवा उद्दाइत्ता २ जंबुदीवे दीवे पच्चायंति ?, गो० ! अत्थेगतिया पच्चायंति अत्थेगतिया नो पच्चायंति । १४७। से केणट्ठेणं भंते ! एवं वुच्चति-जंबुदीवे दीवे ?, गो० ! जंबुदीवे मंदरस्स पव्वयस्स उत्तरेणं णीलवंतस्स दाहिणेणं मालवंतस्स वक्खारपव्वयस्स पच्चत्थिमेणं गंधमायणस्स वक्खारपव्वयस्स पुरत्थिमेणं एत्थ णं उत्तरकुरा णामं कुरा पं० पाईणपडीणायता उदीणदाहिणविच्छिण्णा अद्धचंदसंठाणसंठिता एक्कारस जोयणसहस्साइं अट्ठ बायाले जोयणसते दोण्णि य एक्कोणवीसतिभागे जोयणस्स विक्खंभेणं. तीसे जीवा पाईणपडीणायता दुहओ वक्खारपव्वयं पुट्ठा, पुरत्थिमिल्लाए कोडीए पुरत्थिमिल्लं वक्खारपव्वतं पुट्ठा पच्चत्थिमिल्लाए कोडीए पच्चत्थिमिल्लं वक्कारपव्वयं पुट्ठा तेवणं जोयणसहस्साइं आयामेणं, तीसे धणुपट्ठं दाहिणेणं सट्ठिं जोयणसहस्साइं चत्तारि य अट्ठारसुत्तरे जोयणसते दुवालस य एकूणवीसतिभाए जोयणस्स परिक्खेवेणं पं०, उत्तरकुराए णं भंते ! कुराए केरिसए आगारभावपडोयारे पं० ?, गो० ! बहुसमरमणिज्जे भूमिभागे पं०, से जहाणामए आलिंगपुक्खरेति वा जाव एवं एक्कोरूयदीववत्तव्वया जाव देवलोगपरिगगहा णं ते मणुयगणा पं० समणाउसो !. णवरि इमं णाणत्तं-छधणुसहस्समूसिता दोछप्पन्ना पिट्ठकरंडसता अट्ठमभत्तस्स आहारट्ठे समुप्पज्जति तिण्णि पलिओवमाइं देसूणाइं पलिओवमस्सासंखिज्जिभागेण ऊणगाइं जह० तिन्नि, पलिओवमाइं उक्को०, एकूणपणराइंदियाइं अणुपालणा, सेसं जहा एगूरूयाणं, उत्तरकुराए णं कुराए छव्विहा मणुस्सा अणुसज्जंति, तं०-पम्हगंधा मियगंधा अम (अन) मा सहा तेयालीसे सणिच्चारी । १४८। कहिं णं भंते ! उत्तरकुराए कुराए जमगा नामं दुवे पव्वता पं० ?, गो० ! नीलवंतस्स वासधरपव्वयस्स दाहिणेणं अट्ठचोत्तीसे जोयणसते चत्तारि य सत्तभागे जोयणस्स अबाधाए सीताए महाणईए (पुव्वपच्छिमेणं) उभओ कूले इत्थ णं उत्तरकुराए जमगा णामं दुवे पव्वता पं० एगमेगं जोयणसहस्सं उड्ढंउच्चत्तेणं अट्ठाइज्जाइं जोयणसताणि उव्वेहेणं मूले एगमेगं जोयणसहस्सं आयामविक्खंभेणं मज्झे अद्धमाइं जोयणसताइं आयामविक्खंभेणं उवरिं पंचजोयणसयाइं आयामविक्खंभेणं मूले तिण्णि जोयणसहस्साइं एगं च बावट्ठिं जोयणसतं किंचिविसेसाहियं परिक्खेवेणं मज्झे दो जोयणसहस्साइं तिन्नि य बावत्तरे जोयणसते किंचिविसेसाहिए परिक्खेवेणं पं० उवरिं पन्नरस एक्कासीते जोयणसते किंचिविसेसाहिए परिक्खेवेणं पं० मूले विच्छिण्णा मज्झे संखित्ता उप्पिं तणुया गोपुच्छसंठाणसंठिता सव्वकणगामया अच्छा सण्हा जाव पडिरूवा

पत्तेयं २ पउमवरवेइयापरिक्खित्ता पत्तेयं २ वणसंडपरिक्खित्ता वण्णओ दोणहवि, तेसिं णं जमगपव्वयाणं उप्पिं बहुसमरमणिज्जे भूमिभागे पं० वण्णओ जाव आसयंति०, तेसिं णं बहुसमरमणिज्जाणं भूमिभागाणं बहुमज्झदेसभाए पत्तेयं २ पासायवडेंसगा पं०, ते णं पासायवडेंसगा बावट्ठिं जोयणाइं अद्धजोयणं उड्ढंउच्चत्तेणं एकत्तीसं जोयणाइं कोसं च विक्खंभेणं अब्भुग्गतमूसिता वण्णओ भूमिभागा उल्लोता दो जोयणाइं मणिपेढियाओ वरसीहासणा सपरिवारा जाव जमगा चिट्ठंति, से केणट्ठेणं भंते ! एवं वुच्चति-जमगा पव्वता २ ?, गो० ! जमगेसु णं पव्वतेसु तत्थ २ देसे २ तहिं २ बहुइओ खुड्डाखुड्डियाओ वावीओ जाव बिलपंतिताओ तासु णं खुड्डाखुड्डियासु जाव बिलपंतियासु बहूइं उप्पलाइं जाव सतसहस्सपत्ताइं जमगप्पभाइं जमगवण्णाइं जमगवण्णाभाइं जमगा य एत्थ दो देवा महिड्डिया जाव पलिओवमट्ठितीया परिवसंति, ते णं तत्थ पत्तेयं २ चउण्हं सामाणियसाहस्सीणं जाव जमगाण पव्वयाणं जमगाण य रायधाणीणं अण्णेसिं च बहूणं वाणमंतराणं देवाण य देवीण य आहेवच्चं जाव पालेमाणा विहरंति, से तेणट्ठेणं गो० ! एवं०-जमगपव्वया २, अदुत्तरं च णं गो० ! जाव णिच्चा, कहिं णं भंते ! जमगाणं देवाणं जमगाओ नाम रायहाणीओ पं० ?, गो० ! जमगाणं पव्वयाणं उत्तरेणं तिरियमसंखेज्जे दीवसमुद्दे वीईवत्तित्ता अण्णंमि जंबुद्वीवे बारस जोयणसहस्स जहा विजयस्स जाव महिड्डिया जमगा देवा जमगा देवा । १४९। कहिं णं भंते ! उत्तरकुराए कुराए नीलवंतदह्हे णामं दहे पं० ?, गो० ! जमगपव्वयाणं दाहिणेणं अट्ठचोत्तीसे जोयणसते चत्तारि सत्तभागा जोयणस्स अबाहाए सीताए महाणईए बहुमज्झदेसभाए एत्थ णं उत्तरकुराए कुराए नीलवंतदह्हे नामं दहे पं० उत्तरदक्खिणायए पाईणपडीणविच्छिन्ने एगं जोयणसहस्सं आयामेणं पंच जोयणसताइं विक्खंभेणं दस जोयणाइं उव्वेहेणं अच्छे सण्हे रयतामतकूले चउक्कोणे समतीरे जाव पडिरूवे, उभओ पासिं दोहि य पउमवरवेइयाहिं वणसंडेहिं सव्वतो समंता संपरिक्खित्ते दोणहवि वण्णओ, नीलवंतदहस्स णं दहस्स तत्थ २ जाव बहवे तिसोवाणपडिरूवगा पं० वण्णओ भणियव्वो जाव तोरणत्ति, तस्स णं नीलवंतदहस्स णं दहस्स बहुमज्झदेसभाए एत्थ णं एगे महं पउमे पं० जोयणं आयामविक्खंभेणं तं तिगुणं सविसेसं परिक्खेवेणं अद्धजोयणं बाहल्लेणं दस जोयणाइं उव्वेहेणं दो कोसे ऊसिते जलंतातो साति रेगाइं दसद्धजोयणाइं सव्वग्गेणं पं०, तस्स णं पउमस्स अयमेयारूवे वण्णावासे पं० तं०- वइरामता मूला रिट्ठामते कंदे वेरूलियामए नाले वेरूलियामता बाहिरपत्ता जंबुणयमया अब्भित्तरपत्ता तवणिज्जमया केसरा कणगामई कणिया नाणामणिमया पुक्खरत्थिभुया, सा णं कणिया अद्धजोयणं आयामविक्खंभेणं तं तिगुणं सविसेसं परिक्खेवेणं कोसं बाहल्लेणं सव्वप्पणा कणगमई अच्छा सण्हा जाव पडिरूवा, तीसे णं कणियाए उवरिं बहुसमरमणिज्जे देसभाए पं० जाव मणीहिं०, तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं एगे महं भवणे पं०, कोसं आयामेणं अद्धकोसं विक्खंभेणं देसूणं कोसं उड्ढंउच्चत्तेणं अणेगखंभसतसंनिविट्ठं जाव वण्णओ, तस्स णं भवणस्स तिदिसिं ततो दारा पं०. पुरत्थिमेणं दाहिणेणं उत्तरेणं, ते णं दारा पंचधणुसयाइं उड्ढंउच्चत्तेणं अट्ठाइज्जाइं धणुसताइं विक्खंभेणं तावतियं चेव पवेसेणं सेया वरकणगथूभियागा जाव वणमालाउत्ति, तस्स णं भवणस्स अंतो बहुसमरमणिज्जे भूमिभागे पं०, से जहानामए- आलिंगपुक्खरेति वा जाव मणीणं वण्णओ, तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं मणिपेढिया पं० पंचधणुसयाइं आयामविक्खंभेणं अट्ठाइज्जाइं धणुसताइं बाहल्लेणं सव्वमणिमई, तीसे णं मणिपेढियाए उवरि एत्थ णं एगे महं देवसयणिज्जे पं० देवसयणिज्जस्स वण्णओ, से णं पउमे अण्णेणं अट्ठसतेणं तद्धुच्चत्तप्पमाणमेत्तेहिं पउमेहिं सव्वतो समंता संपरिक्खित्ते, ते णं पउमा अद्धजोयणं आयामविक्खंभेणं तिगुणं सविसेसं परिक्खेवेणं कोसं बाहल्लेणं दस जोयणाइं उव्वेहेणं कोसं ऊसिया जलंताओ साइरेगाइं ते दस जोयणाइं सव्वग्गेणं पं०, तेसिं णं पउमाणं अयमेयारूवे वण्णावासे पं० तं०- वइरामया जाव णाणामणिमया पुक्खरत्थिभुया, ताओ णं कणियाओ कोसं आयामविक्खंभेणं तं तिगुणं स० परि० अद्धकोसं बाहल्लेणं सव्वकणगामईओ अच्छाओ जाव पडिरूवाओ, तासिं णं कणियाणं उप्पिं बहुसमरमणिज्जा भूमिभागा जाव मणीणं वण्णो गंधो फासो, तस्स णं पउमस्स अवरुत्तरेणं उत्तरपुरच्छिमेणं नीलवंतदहस्स कुमारस्स चउण्हं सामाणियसाहस्सीणं चत्तारि पउमसाहस्सीओ पं० एवं सव्वो परिवारो नवरि पउमाणं भाणितव्वो, से णं पउमे अण्णेहिं तीहिं पउमवरपरिक्खेवेहिं सव्वतो समंता संपरिक्खित्ते, तं०- अब्भित्तरेणं मज्झिमेणं बाहिरएणं, अब्भित्तरेणं पउमपरिक्खेवे

बत्तीसं पउमसयसाहस्सीओ पं० मज्झिमए णं पउमपरिक्खेवे चत्तालीसं पउमसयसाहस्सीओ पं० बाहिरए णं पउमपरिक्खेवे अडयालीसं पउमसयसाहस्सीओ पं०, एवामेव सपुव्वावरेणं एगा पउमकोडी वीसं च पउमसतसहस्सा भवंतीतिमक्खाया, से केणट्ठेणं भंते ! एवं वुच्चति- णीलवंतदहे दहे ?, गो० ! णीलवंतदहे णं तत्थ २ जाइं उप्पलाइं जाव सतसहस्सपत्ताइं नीलवंतप्पभातिं० नीलवंतदहकुमारे य सो चेव गमो जाव नीलवंतदहे २ । १५० । नीलवंतदहस्स णं पुरत्थिमपच्चत्थिमेणं दस जोयणाइं अबाधाए एत्थ णं दस दस कंचणगपव्वता एगमेणं जोयणसतं उड्डंउच्चत्तेणं पणवीसं २ जोयणाइं उव्वेहेणं मूले एगमेणं जोयणसते विक्खंभेणं मज्झे पणत्तरिं जोयणाइं विक्खंभेणं उवरिं पण्णासं जोयणाइं विक्खंभेणं मूले तिण्णि सोले जोयणसते किंचिविसेसाहिए परिक्खेवेणं मज्झे दोन्नि सत्ततीसे जोयणसते किंचिविसेसाहिए परिक्खेवेणं उवरिं एणं अट्ठावण्णं जोयणसतं किंचिविसेसाहिए परिक्खेवेणं मूले विच्छिण्णा मज्झे संखित्ता उप्पिं तणुया गोपुच्छसंठाणसंठिता सव्वकंचणमया० अच्छा० पत्तेयं २ पउमवरवेतिया० पत्तेयं २ वणसंडपरिक्खित्ता, तेसिं णं कंचणगपव्वताणं उप्पिं बहुसमरमणिज्जे भूमिभागे जाव आसयंति०, तेसिं० णं० पत्तेयं २ पासायवडेंसगा सट्ठबावट्ठिं जोयणाइं उड्डं उच्चत्तेणं एकतीसं० कोसं च विक्खंभेणं मणिपेढिया दोजोयणिया सीहासणा सपरिवारा, से केणट्ठेणं भंते ! एवं वुच्चति- कंचणगपव्वता २ ?, गो० ! कंचणगेसु णं पव्वतेसु तत्थ २ वावीसु० उप्पलाइं जाव कंचणगवण्णाभातिं कंचणगा जाव देवा महिड्ढीया जाव विहरंति, उत्तरेणं कंचणगाणं कंचणियाओ रायहाणीओ अण्णंमि जंबू० तहेव सव्वं भाणितव्वं, कहिं णं भंते ! उत्तराए कुराए उत्तरकुरूदहे पं० ? . गो० ! नीलवंतदहस्स दाहिणेणं अद्धचोत्तीसे जोयणसते एवं सो चेव गमो नेतव्वो जो णीलवंतदहस्स सव्वेसिं सरिसको दहसरिनामा य देवा. सव्वेसिं पुरत्थिमपच्चत्थिमेणं कंचणगपव्वता दस २ एकप्पमाणा उत्तरेणं रायहाणीओ अण्णंमि जंबूदीवे, कहिं णं भंते ! चंददहे एरावणदहे मालवंतदहे एवं एक्केक्को णेयव्वो । १५१ । कहिं णं भंते ! उत्तरकुराए कुराए जंबूसुदंसणाए जंबूपेढे नामं पेढे पं० ?, गो० ! जंबूदीवे दीवे मंदरस्स पव्वयस्स उत्तरपुरच्छिमेणं नीलवंतस्स वासधरपव्वतस्स दाहिणेणं मालवंतस्स वक्खारपव्वयस्स पच्चत्थिमेणं गंधमादणस्स वक्खारपव्वयस्स पुरत्थिमेणं सीताए महाणदीए पुरत्थिमिल्ले कूले एत्थ णं उत्तरकुरूकुराए जंबूपेढे नाम पेढे पंचजोयणसताइं आयामविक्खंभेणं पण्णरस एक्कासीते जोयणसते किंचिविसेसाहिए परिक्खेवेणं बहुमज्झदेसभाए बारस जोयणाइं बाहल्लेणं तदाणंतरं च णं माताए २ पदेसपरिहाणीए सव्वेसु चरमंतेसु दो कोसे बाहल्लेणं पं० सव्वजंबूणतामए अच्छे जाव पडिरूवे, से णं एगाइ पउमवरवेयाए एगेण य वणसंडेणं सव्वतो समंता संपरिक्खित्ते वण्णओ दोणहवि, तस्स णं जंबूपेढस्स चउद्दिसिं चत्तारि तिसोवाणपडिरूवगा पं० तं० चेव जाव तोरणा जाव चत्तारि छत्ता, तस्स णं जंबूपेढस्स उप्पिं बहुसमरमणिज्जे भूमिभागे पं० से जहाणामए आलिङ्गपुक्खरेति वा जाव मणीणं०. तस्स णं बहुसमरमणिज्जस्स भूमिभागस्सबहुमज्झदेसभाए एत्थ णं एगा महं मणिपेढिया पं० अट्ठ जोयणाइं आयामविक्खंभेणं चत्तारि जोयणाइं बाहल्लेणं मणिमती अच्छा सण्हा जाव पडिरूवा. तीसे णं मणिपेढियाए उवरि एत्थ णं महं जंबूसुदंसणा पं० अट्ठजोयणाइं उड्डंउच्चत्तेणं अद्धजोयणं उव्वेहेणं दो जोयणातिं खंधे अट्ठ जोयणाइं विक्खंभेणं छजोयणाइं विडिमा बहुमज्झदेसभाए अट्ठ जोयणाइं विक्खंभेणं सातिरेगाइं अट्ठ जोयणाइं सव्वग्गेणं पं० वइरामयमूला रयतसुपतिट्ठियविडिमा एवं चेतियरूक्खवण्णओ जाव सव्वो रिट्ठामयविउलकंदा वेरूलियरूइरक्खंधा सुजायवरजायरूवपढमगविसालसाला नाणामणिरयणविविहसाहप्पसाहवेरूलियपत्ततवणिज्जपत्तबिंटा जंबूणयरत्तमउयसुकुमालपवाल (कोमल पा०) पल्लवंकुरधरा (गसिहरा पा०) विचित्तमणिरयणसुरहिकुसुमा फलभारनमियसाला सच्छाया सप्पभा सस्सिरीया सउज्जोया अहियं णयणमणोनिव्वुइकरा पासाईया दरिसणिज्जा अभिरूवा पडिरूवा । १५२ । जंबूए णं सुदंसणाए चउद्दिसिं चत्तारि साला पं० तं०-पुरत्थिमेणं दक्खिणेणं पच्चत्थिमेणं उत्तरेणं, तत्थ णं जे से पुरत्थिमिल्ले साले एत्थ णं एगे महं भवणे पं० एणं कोसं आयामेणं अद्धकोसं विक्खंभेणं देसूणं कोसं उड्डंउच्चत्तेणं अणेगखंभ० वण्णओ जाव भवणस्स दारं तं चेव पमाणं पंचधणुसतातिं उड्डंउच्चत्तेणं अड्डांइज्जाइं विक्खंभेणं जाव वणमालाओ भूमिभागा उल्लोया मणिपेढिया पंचधणुसतिया देवसयणिज्जं भाणियव्वं, तत्थ णं जे से दाहिणिल्ले साले एत्थ णं एगे महं पासायवडेंसए पं० कोसं च उड्डंउच्चत्तेणं अद्धकोसं आयामविक्खंभेणं अभुग्गयमूसिय० अंतो बहुसम० उल्लोता, तस्स

णं बहुसमरमणिज्जस्स भूमिभागस्स बहुमज्झदेसभाए सीहासणं सपरिवारं भाणियव्वं, तत्थ णं जे से पच्चत्थिमिल्ले साले एत्थ णं पासायवडेंसए पं० तं चेव पमाणं सीहासणं सपरिवारं भाणियव्वं, तत्थ णं जे से उत्तरिल्ले साले एत्थ णं एगे महं पासायवडेंसए पं० तं चेव पमाणं सीहासणं सपरिवारं, तत्थ णं जे से उवरिमविडिमे एत्थ णं एगे महं सिद्धायतणे कोसं आयामेणं अद्धकोसं विक्खंभेणं देसूणं कोसं उड्ढंउच्चत्तेणं अणेगखंभसतसन्निविट्ठं वण्णओ तिदिसिं तओ दारा पंचधणुसइता अड्ढाइज्जधणुसयविक्खंभा मणिपेढिया पंचधणुसतिया देवच्छंदओ पंचधणुसतविक्खंभो सातिरेगपंचधणुसउच्चत्ते, तत्थ णं देवच्छंदए अट्ठसयं जिणपडिमाणं जिणुस्सेधप्पमाणाणं, एवं सव्वा सिद्धायतणवत्तव्वया भाणियव्वा जाव धूवकडुच्छुया उत्तिमागारा सोलसविधेहिं रयणेहिं उवेए चेव, जंबू णं सुदंसणा मूले बारसहिं पउमवरवेदियाहिं सव्वतो समंता संपरिक्रिखत्ता, ताओ णं पउमवरवेतियाओ अद्धजोयणं उड्ढंउच्चत्तेणं पंचधणुसताइं विक्खंभेणं वण्णओ जंबूसुदंसणा अण्णेणं अट्ठसतेणं जंबूणं तयद्धुच्चत्तप्पमाणमेत्तेणं सव्वतो समंता संपरिक्रिखत्ता, ताओ णं जंबूओ चत्तारि जोयणाइं उड्ढंउच्चत्तेणं कोसं चोव्वेधेणं जोयणं खंधो कोस विक्खंभेणं तिण्णि जोयणाइं विडिमा बहुमज्झदेसभाए चत्तारि जोयणाइं विक्खंभेणं सातिरेगाइं चत्तारि जोयणाइं सव्वग्गेणं वइरामयमूला सो चेव चेतियरूक्खवण्णओ, जंबूए णं सुदंसणाए अवरूत्तरेणं उत्तरेणं उत्तरपुरत्थिमेणं एत्थ णं अणाढियस्स चउण्हं सामाणियसाहस्सीणं चत्तारि जंबूसाहस्सीओ पं०, जंबूए णं सुदंसणाए पुरत्थिमेणं एत्थ णं अणाढियस्स देवस्स चउण्हं अग्गमहिसीणं चत्तारि जंबूओ पं०, एवं परिवारो सव्वो णायव्वो जंबूए जाव आयरक्खाणं, जंबू णं सुदंसणा तीहिं जोयणसतेहिं वणसंडेहिं सव्वतो समंता संपरिक्रिखत्ता तं०-पढमेणं दोच्चेणं तच्चेणं, जंबूए सुदंसणाए पुरत्थिमेणं पढमं वणसंडं पण्णासं जोयणाइं ओगाहिता एत्थ णं एगे महं भवणे पं०, पुरत्थिमिल्ले भवणसरिसे भाणियव्वे जाव सयणिज्जे, एवं दाहिणेणं पच्चत्थिमेणं उत्तरेण, जंबूए णं सुदंसणाए उत्तरपुरत्थिमेणं पढमं वणसंडं पण्णासं जोयणाइं ओगाहिता चत्तारि णंदापुक्खरिणीओ पं० तं०-पउमा पउमप्पभा चेव, कुमुदा कुमुयप्पभा, ताओ णं णंदाओ पुक्खरिणीओ कोसं आयामेणं अद्धकोसं विक्खंभेणं पंचधणुसयाइं उव्वेहेणं अच्छाओ सण्हाओ लण्हाओ घट्ठाओ मट्ठाओ णिप्पंकाओ णीरयाओ जाव पडिरूवाओ वण्णओ भाणियव्वो जाव तोरणत्ति, तासिं णं णंदापुक्खरिणीणं बहुमज्झदेसभाए एत्थ णं पासायवडेंसए पं० कोसप्पमाणे अद्धकोसं विक्खंभो सो चेव सो वण्णओ सीहासणं सपरिवारं, एवं दक्खिणपुरत्थिमेणं पण्णासं जोयणा० चत्तारि णंदापुक्खरिणीओ उप्पलगुम्मा नलिणा उप्पला उप्पलुज्जला तं चेव पमाणं तहेव पासायवडेंसगा तप्पमाणा, एवं दक्खिणपच्चत्थिमेणवि पण्णासं जोयणाणं परं-भिंगा भिंणिभा चेव, अंजणा कज्जलप्पभा, सेसं तं चेव, जंबूए णं सुदंसणाए उत्तरपुरत्थिमे पढमं वणसंडं पण्णासं जोयणाइं ओगाहिता एत्थ णं चत्तारि णंदाओ पुक्खरिणीओ पं० तं०-सिरिकंता सिरिमहिया सिरिचंदा चेव तह य सिरिणिलया । तं चेव पमाणं तहेव पासायवडेंसओ, जंबूए णं सुदंसणाए पुरत्थिमिल्लस्स भवणस्स उत्तरेणं उत्तरपुरत्थिमेणं पासायवडेंसगस्स दाहिणेणं एत्थ णं एगे महं कूडे पं० अट्ठ जोयणाइं उड्ढंउच्चत्तेणं मूले बारस जोयणाइं विक्खंभेणं मज्झे अट्ठ जोयणाइं आयामविक्खंभेणं उवरि चत्तारि जोयणाइं आयामविक्खंभेणं मूले सातिरेगाइं सत्ततीसं जोयणाइं परिक्रिखेवेणं मज्झे सातिरेगाइं पणुवीसं जोयणाइं परिक्रिखेवेणं उवरिं सातिरेगाइं बारस जोयणाइं परिक्रिखेवेणं मूले विच्छिन्ने मज्झे संखित्ते उप्पिं तणुए गोपुच्छसंठाणसंठिए सव्वजंबूणयामए अच्छे जाव पडिरूवे, से णं एगाए पउमवरवेइयाए एगेणं वणसंडेणं सव्वतो समंता संपरिक्रिखत्ते दोणहवि वण्णओ, तस्स णं कूडस्स उवरिं बहुसमरमणिज्जे भूमिभागे पं० जाव आसयंति०, तस्स णं बहुसमरमणिज्जस्स भूमिभागस्स बहुमज्झदेसभाए एगं सिद्धायतणं कोसप्पमाणं सव्वा सिद्धायतणवत्तव्वया, जंबूए णं सुदंसणाए पुरत्थिमस्स भवणस्स दाहिणेणं दाहिणपुरत्थिमिल्लस्स पासायवडेंसगस्स उत्तरेणं एत्थ णं एगे महं कूडे पं० तं चेव पमाणं सिद्धायतणं च, जंबूए णं सुदंसणाए दाहिणिल्लस्स भवणस्स पुरत्थिमेणं दाहिणपुरत्थिमस्स पासायवडेंसगस्स पच्चत्थिमेणं एत्थ णं एगे महं कूडे पं०, दाहिणस्स भवणस्स पुरतो दाहिणपच्चत्थिमिल्लस्स पासायवडेंसगस्स पुरत्थिमेणं एत्थ णं एगे महं कूडे० जंबूतो पच्चत्थिमिल्लस्स भवणस्स दाहिणेणं दाहिणपच्चत्थिमिल्लस्स पासायवडेंसगस्स उत्तरेणं एत्थ णं एगे महं कूडे पं० तं चेव पमाणं सिद्धायतणं च, जंबूए पच्चत्थिमे णं भवणस्स

उत्तरेणं उत्तरपच्चत्थिमस्स पासायवडेंसगस्स दाहिणेणं एत्थ णं एगे महं कूडे पं० तं चेव पमाणं सिद्धायतणं च, जंबूए० उत्तरस्स भवणस्स पच्चत्थिमेणं उत्तरपच्चत्थिमस्स (१६१) पासायवडेंसगस्स पुरत्थिमेणं एत्थ णं एगे कूडे पं० तं चेव, जंबूए उत्तर० भवणस्स पुरत्थिमेणं उत्तरपुरत्थिमिल्लस्स पासायवडेंसगस्स पच्चत्थिमेणं एत्थ णं एगे महं कूडे पं० तं चेव पमाणं तहेव सिद्धायतणं, जंबू णं सुदंसणा अण्णेहिं बहूहिं तिलएहिं लउएहिं जाव रायरूक्खेहिं हिंगुरूक्खेहिं जाव सव्वतो समंता संपरिक्खित्ता, जंबूते णं सुदंसणाए उवरिं बहवे अट्ठमंगलगा.पं० तं०-सोत्थियसिरिवच्छ० किण्हा चामरज्झया जाव छत्तातिच्छत्ता, जंबूए णं सुदंसणाए दुवालस णामधेज्जा पं० तं०-‘सुदंसणा अमोहा य, सुप्पबुद्धा जसोधरा । विदेहजंबू सोमणसा, णियया णिच्चमंडिया ॥२७॥ सुभद्दा य विसाला य, सुजाया सुमणीतिया । सुदंसणाए जंबूए, नामधेज्जा दुवालस ॥२८॥ से केणट्ठेणं भंते ! एवं वुच्चइ-जंबू सुदंसणा २ ?, गो० ! जंबूते णं सुदंसणाते जंबूदीवाहिवती अणाढिते णामं देवे महिइढीए जाव पलिओवमट्ठितीए परिवसति, से णं तत्थ चउण्हं सामाणियसाहस्सीणं जाव जंबूदीवस्स जंबूए सुदंसणाए अणाढियाते य रायधाणीए जाव विहरति, कहिं णं भंते ! अणाढियस्स जाव समत्ता वत्तव्वया रायधाणीए महिइढीए, अदुत्तरं च णं गो० ! जंबूदीवे दीवे तत्त्थ २ देसे २ तहिं २ बहवे जंबूरूक्खा जंबूवणा जंबूवणसंडा णिच्चं कुसुमिया जाव सिरीए अतीव उवसोभेमाणा २ चिट्ठंति, से तेणट्ठेण गो० ! एवं वुच्चइ-जंबूदीवे दीवे २, अदुत्तरं च णं गो० ! जंबूदीवस्स सासते णामधेज्जे पं०, जन्न कयावि णासी जाव णिच्चे । १५३। जंबूदीवे णं भंते ! दीवे कति चंदा पभासिंसु वा पभासेंति वा पभासिस्संति वा ? कति सूरिया तविंसु वा तवंति वा तविस्संति वा ? कति नक्खत्ता जोयं जोइंसु वा जोयंति वा जोएस्संति वा ? कति महग्गहा चारं चरिंसु वा चरंति वा चरिस्संति वा ? केवतिताओ तारागणकोडाकोडीओ सोहंसु वा सोहंतिवा सोहेस्संति वा ?, गो० ! जंबूदीवे णं दीवे दो चंदा पभासिंसु वा० दो सूरिया तविंसु वा० छप्पन्नं नक्खत्ता जोमं जोएंसु वा० छावत्तरं गहसत्तं चारं चरिंसु वा० ‘एग च सतसहस्सं तेत्तीसं खलु भवे सहस्साइं । णव य सया पन्नासा तारागणकोडाकोडीणं ॥२९॥ सोभिंसु वा० । १५४। जंबूदीवं णामं दीवं लवणे णामं समुद्दे वट्ठे वलयागारसंठाणसंठिते सव्वतो समंता संपरिक्खित्ताणं चिट्ठति, लवणे णं भंते ! समुद्दे किं समचक्कवालसंठिते विसमचक्कवालसंठिते ?, गो० ! समचक्कवालसंठिए नो विसमचक्कवालसंठिए, लवणे णं भंते ! समुद्दे केवतियं चक्कवालविक्खंभेणं केवतियं परिक्खेवेणं पं० ?, गो० ! लवणे णं समुद्दे दो जोयणसतसहस्साइं चक्कवालविक्खंभेणं पन्नरस जोयणसयसहस्साइं एगासीइसहस्साइं सयमेगोणचत्तालीसे किंचिविसेसाहिए चक्कवालपरिक्खेवेणं, से णं एक्काए पउमवरवेदियाए एगेण य वणसंडेणं सव्वतो समंता संपरिक्खित्ते चिट्ठइ दोण्हवि वण्णओ, सा णं पउमवर० अब्बजोयणं उड्ढं० पंचधणुसयविक्खंभेणं लवणसमुद्दसमिए परिक्खेवेणं सेसं तहेव, से णं वणसंडे देसूणाइं दो जोयणाइं जाव विहरइ, लवणस्स णं भंते ! समुद्दस्स कति दारा पं० ?, गो० ! चत्तारि दारा पं० तं०-विजये वेजयंते जयंते अपराजिते, कहिं णं भंते ! लवणसमुद्दस्स विजए णामं दारे पं० ?, गो० ! लवणसमुद्दस्स पुरत्थिमपेरंते धायइखंडस्स दीवस्स पुरत्थिमब्दस्स पच्चत्थिमेणं सीओदाए महानदीए उप्पिं एत्थ णं लवणस्स समुद्दस्स विजए णामं दारे पं० अट्ठ जोयणाइं उड्ढंउच्चत्तेणं चत्तारि जोयणाइं विक्खंभेणं एवं तं चेव सव्वं जहा जंबूदीवस्स, रायहाणी पुरत्थिमेणं अण्णंमि लवणसमुद्दे, कहिं णं भंते ! लवणसमुद्दे वेजयंते नामं दारे पं० ?, गो० ! लवणसमुद्दस्स दाहिणपेरंते धातइसंडदीवस्स दाहिणब्दस्स उत्तरेणं सेसं तं चेव सव्वं, एवं जयंतेऽवि णवरि सीयाए महाणदीए उप्पिं भाणियव्वे, एवं अपराजितेवि, णवरं दिसीभागो भाणियव्वो, लवणस्स णं भंते ! समुद्दस्स दारस्स य २ एस णं केवतियं अबाधाए अंतरे पं० ?, गो० !-‘तिण्णेव सतसहस्सा पंचाणउत्तिं भवे सहस्साइं । दो जोयणसत असिता कोसं दारंतरे लवणे ॥३०॥ जाव अबाधाए अंतरे पं०, लवणस्स णं भंते ! पएसा धायइसंडं दीवं पुट्ठा, तहेव जहा जंबूदीवे, धायइसंडेवि सो चेव गमो, लवणे णं भंते ! समुद्दे जीवा उद्दाइत्ता सो चेव विही, एवं धायइसंडेवि, से केणट्ठेणं भंते ! एवं वुच्चइ-लवणसमुद्दे २ ?, गो० ! लवणे णं समुद्दे उदगे आविले रइले लोणे लिदे खारए कडुए, अप्पेज्जे बहूणं दूपयचउप्पयमियपसुपक्खिसरीसवाणं नण्णत्थ तज्जोणियाणं सत्ताणं, सोत्थिए एत्थ लवणाहिवई देवे महिइढीए पलिओवमट्ठिईए, से णं तत्थ सामाणिय जाव लवणसमुद्दस्स सुत्थियाए रायहाणीए अण्णेसिं जाव विहरइ, से एणट्ठेणं गो० ! एवं वुच्चइ-लवणे णं

समुद्दे २ अदुत्तरं च णं गो० ! लवणसमुद्दे सासए जाव णिच्चे । १५५। लवणे णं भंते ! समुद्दे कति चंदा पभासिंसु वा पभासिंति वा पभासिस्संति वा ?, एवं पंचणहवि पुच्छा, गो० ! लवणसमुद्दे चत्तारि चंदा पभासिंसु० चत्तारि सूरिया तविंसु वा० बारसुत्तरं नक्खत्तसयं जोगं जोएसु वा० तिणि बावण्णा महग्गहसया चारं चरिसुं वा० दुणि सयसहस्सा सत्तट्ठिं च सहस्सा नव सया तारागणकोडाकोडीणं सोभं सोभिंसु वा० । १५६। कम्हा णं भंते ! लवणसमुद्दे चाउद्दसट्ठमुद्दिट्ठपुण्णमासिणीसु अतिरेगं २ वड्ढति वा हायति वा ?, गो० ! जंबुदीवस्स णं दीवस्स चउद्दिसिं बाहिरिल्लाओ वेइयंताओ लवणसमुद्दं पंचाणउतिं जोयणसहस्साइं ओगाहिता एत्थ णं चत्तारि महालिंजरसंठाणसंठिया महइमहालया महापायाला पं० तं०-वलयामुद्दे केतूए जूवे ईसरे, ते णं महापाताला एगमेगं जोयणसयसहस्सं उव्वेहेणं मूले दस जोयणसहस्साइं विक्खंभेणं मज्झे एगपदेसियाए सेठीए एगमेगं जोयणसतसहस्सं विक्खंभेणं उवरिं मुहमूले दस जोयणसहस्साइं विक्खंभेणं, तेसिं णं महापायालाणं कुड्डा सव्वत्थ समा दसजोयणसतबाहल्ला पं० सव्ववइरामया अच्छा जाव पडिरूवा, तत्थ णं बहवे जीवा पोगगला य अवक्कमंति विउक्कमंति चयंति उवचयंति सासया णं ते कुड्डा दव्वट्ठयाए वण्णपज्जवेहिं० असासया, तत्थ णं चत्तारि देवा महइढीया जाव पलिओवमट्ठितीया परिवसंति, तं०-काले महाकाले वेलंबे पभंजणे, तेसिं णं महापायालाणं तओ तिभागा पं० तं०-हेट्ठिल्ले तिभागे मज्झिल्ले तिभागे उवरिमे तिभागे, ते णं तिभागा तेत्तीसं जोयणसहस्सा तिणि य तेत्तीसं जोयणसतं जोयणतिभागं च बाहल्लेणं, तत्थ णं जे से हेट्ठिल्ले तिभागे एत्थ णं वाउकाओ संचिट्ठति, तत्थ णं जे से मज्झिल्ले तिभागे एत्थ णं वाउकाए य आउकाए य संचिट्ठति, तत्थ णं जे से उवरिल्ले तिभागे एत्थ णं आउकाए संचिट्ठति, अदुत्तरं च णं गो० ! लवणसमुद्दे तत्थ २ देसे बहवे खुड्डालिंजरसंठाणसंठिया खुड्डपायालकलसा पं०, ते णं खुड्डा पाताला एगमेगं जोयणसहस्सं उव्वेहेणं मूले एगमेगं जोयणसतं विक्खंभेणं मज्झे एगपदेसियाए सेठीए एगमेगं जोयणसहस्सं विक्खंभेणं उप्पिं मुहमूले एगमेगं जोयणसतं विक्खंभेणं, तेसिं णं खुड्डागपायालाणं कुड्डा सव्वत्थ समा दस जोयणाइं बाहल्लेणं पं० सव्ववइरामया अच्छा जाव पडिरूवा, तत्थ णं बहवे जीवा पोगगला य जाव असासयावि, पत्तेयं २ अब्बपलिओवमट्ठितिताहिं देवताहिं परिग्गहिया, तेसिं णं खुड्डागपातालाणं ततो तिभागा पं० तं०-हेट्ठिल्ले तिभागे मज्झिल्ले तिभागे उवरिल्ले तिभागे, ते णं तिभागा तिणि तेत्तीसं जोयणसते जोयणतिभागं च बाहल्लेणं पं०, तत्थ णं जे से हेट्ठिल्ले तिभागे एत्थ णं वाउकाओ मज्झिल्ले तिभागे वाउआए आउयाते य उवरिल्ले आउकाए, एवामेव सपुव्वावरेणं लवणसमुद्दे सत्त पायालसहस्सा अट्ठ य चुलसीता पातालसता भवंतीतिमक्खाया, तेसिं णं महापायालाणं खुड्डागपायालाण य हेट्ठिममज्झिमिल्लेसु तिभागेसु जया बहवे ओराला वाया संसेयंति संमुच्छंति एयंति चलंति कंपंति खुब्भंति घट्ठंति फंदंति तं तं भावं परिणमंति तया णं से उदए उण्णामिज्जति, जया णं तेसिं महापायालाणं खुड्डागपायालाण य हेट्ठिल्लमज्झिल्लेसु तिभागेसु नो बहवे ओराला जाव तं तं भावं न परिणमंति तया णं से उदए नो उन्नामिज्जइ, अंतरावि य णं ते वायं उदीरंति अंतरावि य णं से उदगे उण्णामिज्जइ अंतरावि य ते वाया नो उदीरंति अंतरावि य णं से उदगे णो उण्णामिज्जइ, एवं खलु गो० ! लवणसमुद्दे चाउद्दसट्ठमुद्दिट्ठपुण्णमासिणीसु अइरेगं २ वड्ढति वा हायति वा । १५७। लवणे णं भंते ! समुद्दे तीसाए मुहुत्ताणं कतिखुत्तो अतिरेगं २ वड्ढति वा हायति वा ?, गो० ! लवणे णं समुद्दे तीसाए मुहुत्ताणं दुक्खुत्तो अतिरेगं २ वड्ढति वा हायति वा, से केणट्ठेणं भंते ! एवं वुच्चइ-लवणे णं समुद्दे तीसाए मुहुत्ताणं दुक्खुत्तो अइरेगं २ वड्ढइ वा हायइ वा ?, गो० ! उड्ढमंतेसु पायालेसु वड्ढइ आपूरितेसु पायालेसु हायइ, से तेणट्ठेणं गो० ! लवणे णं समुद्दे तीसाए मुहुत्ताणं दुक्खुत्तो अइरेगं २ वड्ढइ वा हायइ वा । १५८। लवणसिहा णं भंते ! केवतियं चक्कवालविक्खंभेणं केवतियं अइरेगं २ वड्ढति वा हायति वा ?, गो० ! लवणसीहाए णं दस जोयणसहस्साइं चक्कवालविक्खंभेणं देसूणं अब्बजोयणं अतिरेगं वड्ढति वा हायति वा, लवणस्स णं भंते ! समुद्दस्स कति णागसाहस्सीओ अब्भितरियं वेलं धारंति कइ नागसाहस्सीओ बाहिरियं वेलं धारंति कइ नागसाहस्सीओ अग्गोदयं धारंति ?, गो० ! लवणसमुद्दस्स बायालीसं णागसाहस्सीओ अब्भितरियं वेलं धारंति बावत्तरिं णागसाहस्सीओ बाहिरियं वेलं धारंति सट्ठिं णागसाहस्सीओ अग्गोदयं धारंति, एवामेव सपुव्वावरेणं एगा णागसतसाहस्सी चोवत्तरिं च णागसहस्सा भवंतीतिमक्खाया । १५९। कति णं भंते ! वेलंधरा णागराया पं० ?, गो० ! चत्तारि वेलंधरा

णागराया पं० तं०-गोथूमे सिवए संखे मणोसिलए, एतेसिं णं भंते ! चउण्हं वेलंधरणागरायाणं कति आवासपव्वता पं० ?, गो० ! चत्तारि आवासपव्वता पं० तं०-गोथूमे उदगभासे संखे दगसीमाए, कहिं णं भंते ! गोथूभस्स वेलंधरणागरायस्स गोथूमे णामं आवासपव्वते पं० ?, गो० ! जंबुद्दीवे दीवे मंदरस्स पुरत्थिमेणं लवणं समुद्दं बायालीसं जोयणसहस्साइं ओगाहिता एत्थ णं गोथूभस्स वेलंधरणागरायस्स गोथूमे णामं आवासपव्वते पं० सत्तरसएक्कवीसाइं जोयणसताइं उड्डंउच्चत्तेणं चत्तारि तीसे जोयणसते कोसं च उव्वेधेणं मूले दसबावीसे जोयणसते आयामविक्रवंभेणं मज्झे सत्तवीसे जोयणसते उवरिं चत्तारि चउवीसं जोयणसए आयामविक्रवंभेणं मूले तिण्णि जोयणसहस्साइं दोण्णि य बत्तीसुत्तरे जोयणसए किंचिविसेसूणे परिक्रखेवेणं मज्झे दो जोयणसहस्साइं दोण्णि य छलसीते जोयणसते किंचिविसेसाहिए परिक्रखेवेणं उवरिं एणं जोयणसहस्सं तिण्णि य ईयाले जोयणसते किंचिविसेसूणे परिक्रखेवेणं मूले वित्थिण्णे मज्झे संखित्ते उप्पिं तणुए गोपुच्छसंठाणसंठिए सव्वकणगामए अच्छे जाव पडिरूवे, से णं एगाए पउमवरवेदियाए एगेण य वणसंडेणं सव्वतो समंता संपरिक्रित्ते दोण्हवि वण्णओ, गोथूभस्स णं आवासपव्वतस्स उवरिं बहुसमरमणिज्जे भूमिभागे पं० जाव आसयंति०, तस्स णं बहुसमरमणिज्जस्स भूमिभागस्स बहुमज्झदेसभाए एत्थ णं एगे महं पासायवडेंसए बावट्टं जोयणद्धं च उड्डंउच्चत्तेणं तं चेव पमाणं अद्धं आयामविक्रवंभेणं वण्णओ जाव सीहासणं सपरिवारं, से केणट्ठेणं भंते ! एवं वुच्चइ गोथूमे आवासपव्वए २ ?, गो० ! गोथूमे णं आवासपव्वते तत्थ २ देसे २ तहिं २ बहुओ खुड्डाखुड्डिडयाओ जाव गोथूभवण्णाइं० बहूइं उप्पलाइं तहेव जाव गोथूमे तत्थ देवे महिड्डीए जाव पलिओवमट्ठितीए परिवसति, से णं तत्थ चउण्हं सामणियसाहस्सीणं जाव गोथूभस्स आवासपव्वतस्स गोथूभाए रायहाणीए जाव विहरति, से तेणट्ठेणं जाव णिच्चा, रायहाणिपुच्छा, गो० ! गोथूभस्स आवासपव्वतस्स पुरत्थिमेणं तिरियमसंखेज्जे दीवसमुद्दे वीतिवइत्ता अण्णंमि लवणसमुद्दे तं चेव पमाणं तहेव सव्वं, कहिं णं भंते ! सिवगस्स वेलंधरणागरायस्स दओभासे णामं आवायपव्वते पं० ?, गो० ! जंबुद्दीवे णं दीवे मंदरस्स पव्वयस्स दक्खिणेणं लवणसमुद्दं बायालीसं जोयणसहस्साइं ओगाहिता एत्थ णं सियगस्स वेलंधरणागरायस्स दओभासे णामं आवासपव्वते पं०, तं चेव पमाणं जं गोथूभस्स, णवरि सव्वअंकामए अच्छे जाव पडिरूवे जाव अट्ठो भाणियव्वो, गो० ! दओभासे णं आवासपव्वते लवणसमुद्दे अट्ठजोयणियखेत्ते दगं सव्वतो समंता ओभासेति उज्जोवेति तवति पभासेति सिवए इत्थ देवे महिड्डीए जाव रायहाणी से दक्खिणेणं सिविगा दओभासस्स सेसं तं चेव, कहिं णं भंते ! संखस्स वेलंधरणागरायस्स संखे णामं आवासपव्वते पं० ?, गो० ! जंबुद्दीवे णं दीवे मंदरस्स पव्वयस्स पच्चत्थिमेणं बायालीसं जोयणसहस्साइं एत्थ णं संखस्स वेलंधर० संखे णामं आवासपव्वते० तं चेव पमाणं णवरं सव्वरयणामए अच्छे०, से णं एगाए पउमवरवेदियाए एगेण य वणसंडेणं जाव अट्ठो बहूओ खुड्डाखुड्डिडआओ जाव बहूइं उप्पलाइं संखाभाइं संखवण्णाइं संखवण्णाभाइं संखे य एत्थ देवे महिड्डीए जाव रायहाणीए पच्चत्थिमेणं संखस्स आवासपव्वयस्स संखा नाम रायहाणी तं चेव पमाणं, कहिं णं भंते ! मणोसिलकस्स वेलंधरणागरायस्स उदगसीमाए णामं आवासपव्वते पं० ?, गो० ! जंबुद्दीवे मंदरस्स उत्तरेणं लवणसमुद्दं बायालीसं जोयणसहस्साइं ओगाहिता एत्थ णं मणोसिलगस्स वेलंधरणागरायस्स उदगसीमाए णामं आवासपव्वते पं० तं चेव पमाणं णवरिं सव्वफलिहामए अच्छे जाव अट्ठो, गो० ! दगसीमंते णं आवासपव्वते सीतासीतोदगाणं महाणदीणं तत्थ गते सोए पडिहम्मति से तेणट्ठेणं जाव णिच्चे मणोसिलए एत्थ देवे महिड्डीए जाव से णं तत्थ चउण्हं सामाणिय० जाव विहरति, कहिं णं भंते ! मणोसिलगस्स वेलंधरणागरायस्स मणोसिला णाम रायहाणी ?, गो० ! दगसीमस्स आवासपव्वयस्स उत्तरेणं तिरि० अण्णंमि लवणे एत्थ णं मणोसिलिया णाम रायहाणी पं० तं चेव पमाणं जाव मणोसिलाए देवे-‘कणगंकरययफालियमया य वेलंधराणमावासा । अणुवेलंधरराईण पव्वया होंति रयणमया ॥३१॥ १६०। कइ णं भंते ! अणुवेलंधररायाणो पं० ?, गो० ! चत्तारि अणुवेलंधरणागरायाणो पं० तं०-कक्कोडए कद्दमए केलासे अरूणप्पभे, एतेसिं णं भंते ! चउण्हं अणुवेलंधरणागरायाणं कति आवासपव्वया पं० ?, गो० ! चत्तारि आवासपव्वया पं० तं०-कक्कोडए कद्दमए कइलासे अरूणप्पभे, कहिं णं भंते ! कक्कोडगस्स अणुवेलंधरणागरायस्स कक्कोडए णाम आवासपव्वते पं० ?, गो० ! जंबुद्दीवे मंदरस्स पव्वयस्स उत्तरपुरच्छिमेणं लवणसमुद्दं बायालीसं जोयणसहस्साइं ओगाहिता एत्थ णं कक्कोडगस्स

नागरायस्स कक्कोडए णामं आवासपव्वते पं० सत्तरसएक्कवीसाइं जोयणसताइं तं चेव पमाणं जं गोथूभस्स णवरि सव्वरयणामए अच्छे जाव निरवसेसं जाव सपरिवारं अट्ठो से बहूइं उप्पलाइं कक्कोडगप्पभाइं सेसं तं चेव णवरि कक्कोडगपव्वयस्स उत्तरपुरच्छिमेणं एवं तं चेव सव्वं, कद्दमस्सवि सो चेव गमओ अपरिसेसिओ, णवरि दाहिणपुरच्छिमेणं आवासो विज्जुप्पभा रायहाणी दाहिणपुरत्थिमेणं, कइलासेवि एवं चेव, णवरि दाहिणपच्चत्थिमेणं कइलासावि रायहाणी ताए चेव दिसाए, अरूणप्पभेवि उत्तरपच्चत्थिमेणं रायहाणीवि ताए चेव दिसाए, चत्तारिविगप्पमाणा सव्वरयणामया य । १६१। कहिं णं भंते ! सुट्ठियस्स लवणाहिवइस्स गोयमदीवे णामं दीवे पं० ?, गो० ! जंबुद्दीवे दीवे मंदरस्स पव्वयस्स पच्चत्थिमेणं लवणसमुद्दं बारसजोयणसहस्साइं ओगाहिता एत्थ णं सुट्ठियस्स लवणाहिवइस्स गोयमदीवे णामं दीवे पं०, बारसजोयणसहस्साइं आयामविकखंभेणं सत्ततीसं जोयणसहस्साइं नव य अडयाले जोयणसए किंचिविसेसोणे परिकखेवेणं जंबुदीवन्तेणं अब्देकोणणउत्ते जोयणाइं चत्तालीसं पंचणउतिभागे जोयणस्स ऊसिए जलन्ताओ लवणसमुद्दंतेणं दो कोसे ऊसिते जलन्ताओ, से णं एगाए य पउमवरवेइयाए एगेणं वणसंडे सव्वतो समन्ता तहेव वण्णओ दोण्हवि, गोयमदीवस्स णं दीवस्स अंतो जाव बहुसमरमणिज्जे भूमिभागे पं०, से जहानामएआलिंगं जाव आसयन्ति०, तस्स णं बहुसमरमणिज्जेस्स भूमिभागस्स बहुमज्झदेसभागे एत्थ णं सुट्ठियस्स लवणाहिवइस्स एगे महं अइक्कीलावासे नामं भोमेज्जविहारे पं० बावट्ठिं जोयणाइं अब्दजोयणं उड्ढंउच्चत्तेणं एक्कतीसं जोयणाइं कोसं च विकखंभेणं अणेगखंभसतसन्निविट्ठे भवणवण्णओ भाणियव्वो, अइक्कीलावासस्स णं भोमेज्जविहारस्स अंतो बहुसमरमणिज्जे भूमिभागे पं० जाव मणीणं फासो, तस्स णं बहुसमरमणिज्जस्स भूमिभागस्स बहुमज्झदेसभाए एत्थ एगा मणिपेढिया पं०, सा णं मणिपेढिया दो जोयणाइं आयामविकखंभेणं जोयणं बाहल्लेणं सव्वमणिमयी अच्छा जाव पडिरूवा, तीसे णं मणिपेढियाए उवरि एत्थ णं देवसयणिज्जे पं० वण्णओ, से केणट्ठेणं भंते ! एवं वुच्चति-गोयमदीवे णं दीवे २ ?, गो० ! तत्थ २ तहिं २ बहूइं उप्पलाइं जाव गोयमप्पभाइं गोयमवन्नाइं गोयमवण्णाभाइं से एणट्ठेणं गो० ! जाव णिच्चे, कहिं णं भंते ! सुट्ठियस्स लवणाहिवइस्स सुट्ठिया णामं रायहाणी पं० ?, गो० ! गोयमदीवस्स पच्चत्थिमेणं तिरियमसंखेज्जे जाव अण्णंमि लवणसमुद्दे बारसजोयणसहस्साइं ओगाहिता एवं तहेव सव्वं णेयव्वं जाव सुत्थिए देवे २ । १६२। कहिं णं भंते ! जंबुद्दीवगाणं चंदाणं चंददीवा णामं दीवा पं० ?, गो० ! जंबुद्दीवे मंदरस्स पव्वयस्स पुरच्छिमेणं लवणसमुद्दं बारस जोयणसहस्साइं ओगाहिता एत्थ णं जंबुद्दीवगाणं चंदाणं चंददीवा णामं दीवा पं०, जंबुद्दीवन्तेणं अब्देकोणणउई जोयणाइं चत्तालीसं पंचाणउतिभागे जोयणस्स ऊसिया जलन्तातो लवणसमुद्दंतेणं दो कोसे ऊसिता जलन्ताओ बारस जोयणसहस्साइं आयामविकखंभेणं सेसं तं चेव जहा गोतमदीवस्स परिकखेवो पउमवरवेइया पत्तेयं २ वणसंडपरि० दोण्हवि वण्णओ बहुसमरमणिज्जा भूमिभागा जाव जोइसिया देवा आसयन्ति०, तेसि णं बहुसमरमणिज्जे भूमिभागे पासायवडेंसगा बावट्ठिं जोयणाइं बहुमज्झं मणिपेढियाओ दो जोयणाइं जाव सीहासणा सपरिवारा भाणियव्वा तहेव अट्ठो, गो० ! बहूसु खुड्डाखुड्डियासु० बहूइं उप्पलाइं चंदवण्णाभाइं० चंदा एत्थ देवा महिड्ढीया जाव पलिओवमट्ठितीया परिवसन्ति, ते णं तत्थ पत्तेयं २ चउण्हं सामाणियसाहस्सीणं जाव चंददीवाणं चंदाणं य रायहाणीणं अन्नेसिं च बहूणं जोतिसियाणं देवाणं देवीणं य आहेवच्चं जाव विहरन्ति, से तेणट्ठेणं गो० ! चंददीवा जाव णिच्चा, कहिं णं भंते ! जंबुद्दीवगाणं चंदाणं चंदाओ नाम रायहाणीओ पं० ?, गो० ! चंददीवाणं पुरत्थिमेणं तिरियं जाव अण्णंमि जंबुद्दीवे बारस जोयणसहस्साइं ओगाहिता तं चेव पमाणं जाव एमहिड्ढीया चंदा देवा, कहिं णं भंते ! जंबुद्दीवगाणं सूराणं सूरदीवा णामं दीवा पं० ?, गो० ! जंबुद्दीवे मंदरस्स पव्वयस्स पच्चत्थिमेणं लवणसमुद्दं बारस जोयणसहस्साइं ओगाहिता तं चेव उच्चत्तं आयामविकखंभेणं परिकखेवो वेदिया वणसंडा भूमिभागा जाव आसयन्ति०, पासायवडेंसगाणं तं चेव पमाणं मणिपेढिया सीहासणा सपरिवारा अट्ठो उप्पलाइं सूरप्पभाइं० सूरा एत्थ देवा जाव रायहाणीओ सकाणं दीवाणं पच्चत्थिमेणं अण्णंमि जंबुद्दीवे सेसं तं चेव जाव सूरा देवा । १६३। कहिं णं भंते ! अब्भितरलावणगाणं चंदाणं चंददीवा णामं दीवा पं० ?, गो० ! जंबुद्दीवे मंदरस्स पव्वयस्स पुरत्थिमेणं लवणसमुद्दं बारस जोयणसहस्साइं ओगाहिता एत्थ णं अब्भितरलावणगाणं चंदाणं चंददीवा णामं दीवा पं०, जहा जंबुद्दीवगा चंदा तहा भाणियव्वा णवरि रायहाणीओ अण्णंमि लवणे सेसं तं चेव, एवं अब्भितरलावणगाणं

सूराणवि लवणसमुद्दं बारस जोयणसहस्साइं तहेव सव्वं जाव रायहाणीओ, कहिं णं भंते ! बाहिरलावणगाणं चंदाणं चंददीवा पं० ?, गो० ! लवणस्स समुद्दस्स पुरत्थिमिल्लाओ वेदियंताओ लवणसमुद्दं पच्चत्थिमेणं बारस जोयणसहस्साइं ओगाहिता एत्थ णं बाहिरलावणगाणं चंददीवा नामं दीवा पं० धायतिसंडदीवतेणं अब्बेकोणणवतिजोयणाइं चत्तालीसं च पंचणउतिभागे जोयणस्स ऊसिता जलंतातो लवणसमुद्दंतेणं दो कोसे ऊसिता बारस जोयणसहस्साइं आयामविक्रवंभेणं पउमवरवेइया वणसंडा बहुसमरमणिज्जा भूमिभागा मणिपेढिया सीहासणा सपरिवारा सो चेव अट्ठो रायहाणीओ सगाण दीवाणं पुरत्थिमेणं तिरियमसं० अण्णंमि लवणसमुद्दे तहेव सव्वं, कहिं णं भंते ! बाहिरलावणगाणं सूराणं सूरदीवा णामं दीवा पं० ?, गो० ! लवणसमुद्दपच्चत्थिमिल्लातो वेदियंताओ लवणसमुद्दं पुरत्थिमेणं बारस जोयणसहस्साइं धायतिसंडदीवतेणं अब्बेकूणणउतिं जोयणाइं चत्तालीसं च पंचनउतिभागे जोयणस्स दो कोसे ऊसिया सेसं तहेव जाव रायहाणीओ सगाण दीवाणं पच्चत्थिमेणं तिरियमसंखेज्जे लवणे चेव बारस जोयण० तहेव सव्वं भाणियव्वं, ।१६४। कहिं णं भंते ! धायतिसंडदीवगाणं चंदाणं चंददीवा पं० ?, गो ! धायतिसंडस्स दीवस्स पुरत्थिमिल्लाओ वेदियंताओ कालोयं णं समुद्दं बारस जोयणसहस्साइं ओगाहिता एत्थ णं धायतिसंडदीवाणं चंदाणं चंददीवा णामं दीवा पं० सव्वतो समंता दो कोसा ऊसिता जलंताओ बारस जोयणसहस्साइं तहेव विक्रवभपरिक्रवो भूमिभागो पासायवडिंसया मणिपेढिया सीहासणा सपरिवारा अट्ठो तहेव रायहाणीओ सकाणं दीवाणं पुरत्थिमेणं अण्णंमि धायतिसंडे दीवे सेसं तं चेव, एवं सूरदीवावि, नवरं धायइसंडस्स दीवस्स पच्चत्थिमिल्लातो वेदियंताओ कालोयं णं समुद्दं जोयण० तहेव सव्वं जाव रायहाणीओ सूराणं दीवाणं पच्चत्थिमेणं अण्णंमि धायइसंडे दीवे सव्वं तहेव ।१६५। कहिं णं भंते ! कालोयगाणं चंदाणं चंददीवा पं० ?, गो० ! कालोयसमुद्दस्स पुरच्छिमिल्लाओ वेदियंताओ कालोयणं समुद्दं पच्चत्थिमेणं बारस जोयणसहस्साइं ओगाहिता एत्थ णं कालोयगचंदाणं चंददीवा सव्वतो समंता दो कोसा ऊसिता जलंतातो सेसं तहेव जाव रायहाणीओ सगाणं दीवाणं पुरच्छिमेणं अण्णंमि कालोयगसमुद्दे बारस जोयण० तं चेव सव्वं जाव चंदा देवा, एवं सूराणवि णवरं कालोयगपच्चत्थिमिल्लातो वेदियंताओ कालोयसमुद्दपुरच्छिमेणं बारस जोयणसहस्साइं ओगाहिता तहेव रायहाणीओ सगाणं दीवाणं पच्चत्थिमेणं अण्णंमि कालोयगसमुद्दे तहेव सव्वं, एवं पुक्खवरगाणं चंदाणं पुक्खवरस्स दीवस्स पुरत्थिमिल्लाओ वेदियंताओ पुक्खरसमुद्दं बारस जोयणसहस्साइं ओगाहिता चंददीवा अण्णंमि पुक्खवरे दीवे रायहाणीओ तहेव, एवं सूराणवि दीवा पुक्खवरदीवस्स पच्चत्थिमिल्लाओ वेदियंताओ पुक्खरोदं समुद्दं बारस जोयणसहस्साइं ओगाहिता तहेव जाव रायहाणीओ, दीवल्लगाणं दीवे समुद्दगाणं समुद्दे चेव एगाण अब्भितरपासे एगाणं बाहिरपासे रायहाणीओ, दीवल्लगाणं दीवेसु समुद्दगाणं समुद्देसु सरिणामतेसु ।१६६। इमे णामा अणुगंतव्वा- ‘जंबुदीवे लवणे घायइ कालोद पुक्खरे वरुणे । खीर घय इक्खु णंदी अरुणवरे कुंडले रुयगे ॥३२॥ आभरणवत्थगंधे उप्पलतिलते य पुढवी णिहिरयणे । वासहरदइनईओ विजया वक्खारकप्पिंदा ॥३३॥ पुर(कुरु)मंदरआवासा कूडा णक्खत्तचंदसूरा य । एवं भाणियव्वं ।१६८। कहिं णं भंते ! देवदीवगाणं चंदाणं चंददीवा णामं दीवा पं० ?, गो० ! देवदीवस्स देवोदं समुद्दं बारस जोयणसहस्साइं ओगाहिता (१६२) तेणेव कमेणं पुरत्थिमिल्लाओ वेदियंताओ जाव रायहाणीओ सगाणं दीवाणं पुरत्थिमेणं देवदीवं (वोदं) समुद्दं असंखेज्जाइं जोयणसहस्साइं ओगाहिता एत्थ णं देवदीवयाणं चंदाणं चंदाओ णामं रायहाणीओ पं० सेसं तं चेव देवदीवचंदा दीवा, एवं सूराणवि, णवरं पच्चत्थिमिल्लाओ वेदियंताओ पच्चत्थिमेणं च भाणितव्वा तंमि चेव समुद्दे, कहिं णं भंते ! देवसमुद्दगाणं चंदाणं चंददीवा णामं दीवा पं० ?, गो० ! देवोदगस्स समुद्दस्स पुरत्थिमिल्लाओ वेदियंताओ देवोदगं समुद्दं पच्चत्थिमेणं बारस जोयणसहस्साइं तेणेव कमेणं जाव रायहाणीओ सगाणं दीवाणं पच्चत्थिमेणं देवोदगं समुद्दं असंखेज्जाइं जोयणसहस्साइं ओगाहिता एत्थ णं देवोदगाणं चंदाणं चंदाओ णामं रायहाणीओ पं० तं चेव सव्वं, एवं सूराणवि, णवरि देवो दगस्स पच्चत्थिमिल्लातो वेदियंताओ देवोदगसमुद्दं पुरत्थिमेणं बारस जोयणसहस्साइं ओगाहिता रायहाणीओ सगाणं दीवाणं पुरत्थिमेणं देवोदगं समुद्दं असंखेज्जाइं जोयणा सहस्साइं, एवं णागे जक्खे भूतेवि चउण्हं दीवसमुद्दाणं, कहिं णं भंते ! सयंभूरमणदीवगाणं चंदाणं चंददीवा णामं दीवा पं० ?, सयंभूरमणस्स दीवस्स पुरत्थिमिल्लातो वेदियंताओ सयंभूरमणोदगं समुद्दं बारसजोयणसहस्साइं तहेव

रायहाणीओ सगाणं दीवाणं पुरत्थिमेणं सयंभूरमणोदगं समुद्दं पुरत्थिमेणं असंखेज्जाइं जोयण० तं चेव एवं सूरणवि. सयंभूरमणस्स पच्चत्थिमिल्लातो वेदियंताओ रायहाणीओ सकलं दीवाणं पच्चत्थिमिल्लाणं सयंभूरमणोदं समुद्दं - असंखेज्जा० सेसं तं चेव, कहिं णं भंते ! सयंभूरमणसमुद्दकाणं चंदाणं० ? सयंभूरमणस्स समुद्दस्स पुरत्थिमिल्लाओ वेतियंतातो सयंभूरमणं समुद्दं पच्चत्थिमेणं बारस जोयणसहस्साइं ओगाहिता सेसं तं चेव, एवं सूरणवि, सयंभूरमणस्स पच्चत्थिमिल्लाओ सयंभूरमणोदं समुद्दं पुत्थिमेणं बारस जोयणसहस्साइं ओगाहिता रायहाणीओ सगाणं दीवाणं पुरत्थिमेणं सयंभूरमणं समुद्दं असंखेज्जाइं जोयणसहस्साइं ओगाहिता एत्थ णं सयंभूरमण जाव सूरं देवा । १६८ । अत्थि णं भंते ! लवणसमुद्दे वेलंधराति वा णागरायाति वा खन्नाति वा अग्घाति वा सिंहाति वा विजातीइ वा हासवट्ठीति ?, हंता अत्थि, जहा णं भंते ! लवणसमुद्दे अत्थि वेलंधराति वा णागराया० अग्घा० सिंहा० विजाती० वा हासवट्ठीति वा तहा णं बाहिरतेसुवि समुद्देसु अत्थि वेलंधराइ वा णागरायाति वा अग्घाति वा सीहाति वा विजातीति वा हासवट्ठीति वा ?, णो तिणट्ठे समट्ठे । १६९ । लवणे णं भंते ! समुद्दे किं ऊसितोदगे किं पत्थडोदगे किं खुभियजले किं अखुभियजले ?, गो० ! लवणे णं समुद्दे ऊसितोदगे नो पत्थडोदगे खुभियजले नो अक्खुभियजले, जहा णं भंते ! लवणे समुद्दे ओसितोदगे नो पत्थडोदगे खुभियजले नो अक्खुभियजले तहा णं बाहिरगा समुद्दा किं ऊसितोदगा पत्थडोदगा खुभियजला अक्खुभियजला ?, गो० ! बाहिरगा समुद्दा नो उस्सितोदगा पत्थडोदगा नो खुभियजला अक्खुभियजला पुण्णा पुण्णप्पमाणा वोल्हमाणा वोसट्ठमाणा समभरघडत्ताए चिट्ठंति, अत्थि णं भंते ! लवणसमुद्दे बहवो ओराला बलाहका संसेयंति वा संमुच्छंति वा वासं वासंति वा ?, हंता अत्थि, जहा णं भंते ! लवणसमुद्दे बहवे ओराला बलाहका संसेयंति संमुच्छंति वासं वासंति वा तहा णं बाहिरएसुवि समुद्देसु बैवे ओराला बलाहका संसेयंति संमुच्छंति वासं वासंति ?, णो तिणट्ठे समट्ठे, से केणट्ठेणं भंते ! एवं वुच्चति बाहिरगा णं समुद्दा पुण्णा पुण्णप्पामाणावोल्हमाणा वोसट्ठमाणा समभरघडियाए चिट्ठंति ?, गो० ! बाहिरएसु णं समुद्देसु बहवे उदगजोणिया जीवा पोग्गला य उदगत्ताए वक्कमंति विउक्कमंति चयंति उवचयंति, से तेणट्ठेणं एवं वुच्चति- बाहिरगा समुद्दा पुण्णा पुण्ण० जाव समभरघडत्ताए चिट्ठंति । १७० । लवणे णं भंते ! समुद्दे केवतियं उव्वेहपरिवुट्ठीते पं० ?, गो० ! लवणस्स णं समुद्दस्स उभओपासिं पंचाणउत्तिं २ पदेसे गंता पदेसं उव्वेहपरिवुट्ठीए पं०, पंचाणउत्तिं २ वालग्गाइं गंता वालग्गं उव्वेहपरिवुट्ठीए पं०, लिक्खाओ गंता उव्वेहपरि० पंचाणउत्तिं जवाओ जवमज्झे अंगुलविहत्थिरयणीकुच्छीधणुगाउयजोयणजोयणसत० जोयणसहस्साइं गंता जोयणसहस्सं उव्वेहपरिवुट्ठीए, लवणे णं भंते ! समुद्दे केवतियं उस्सेहपरिवुट्ठीए पं० ?, गो० ! लवणस्स णं समुद्दस्स उभओपासिं पंचाणउत्तिं पदेसे गंता सोलसपएसे उस्सेहपरिवुट्ठीए पं०, एएणेव कमेणं जाव पंचाणउत्तिं २ जोयणसहस्साइं गंता सोलस जोयणसहस्साइं उस्सेधपरिवुट्ठीए पं० । १७१ । लवणस्स णं भंते ! समुद्दस्स केमहालए गोतित्थे पं० ?, गो० ! लवणस्स णं समुद्दस्स उभओपासिं पंचाणउत्तिं २ जोयणसहस्साइं गोतित्थं पं०, लवणस्स णं भंते ! समुद्दस्स केमहालए गोतित्थविरहिते खेत्ते पं० ?, गो० ! लवणस्स णं समुद्दस्स दस जोयणसहस्साइं गोतित्थविरहिते खेत्ते पं०, लवणस्स णं भंते ! समुद्दस्स केमहालए उदगमाले पं० ?, गो० ! दस जोयणसहस्साइं उदगमाले पं० । १७२ । लवणे णं भंते ! समुद्दे किंसंठिए पं० ?, गोह ! गोतित्थसंठिते नावासंठाणसंठिते सिप्पिसंपुडसंठिए आसखंधसंठिते वलभिसंठिते वट्ठे वलयागारसंठाणसंठिते पं०, लवणे णं भंते ! समुद्दे केवतियं चक्कवालविकखंभेणं केवतियं उव्वेहेणं केवतियं उस्सेहेणं केवतियं सव्वग्गेणं पं० ?, गो० ! लवणे णं समुद्दे दो जोयणसयसहस्साइं चक्कवालविकखंभेणं पण्णरस जोयणसतसहस्साइं एकासीतिं च सहस्साइं सतं च इगुयालं किंचिविसेसूणे परिकखेवेणं एगं जोयणसहस्सं उव्वेधेणं सोलस जोयणसहस्साइं उस्सेहेणं सत्तरस जोयणसहस्साइं सव्वग्गेणं पं० । १७३ । जइ भंते ! लवणसमुद्दे दो जोयणसतसहस्साइं चक्कवालविकखंभेणं पण्णरस जोयणसतसहस्साइं एकासीतिं च सहस्साइं सतं इगुयालं किंचिविसेसूणं परिकखेवेणं एगं जोयणसहस्सं उव्वेहेणं सोलस जोयणसहस्साइं उस्सेधेणं सत्तरस जोयणसहस्साइं सव्वग्गेणं पं०, कम्हा णं भंते ! लवणसमुद्दे जंबुदीवं नो उवीलेति नो उप्पीलेति नो चेव णं एक्कोदगं करंति ?,

गो० ! जंबुदीवे णं दीवे भरहेरवएसु वासेसु अरहंतचक्कवट्टिबलदेवा वासुदेवा चारणा विज्जाधरा समणा समणीओ सावया सावियाओ मणुया पगतिभद्दया पगतिविणीया पगतिउवसंता पगतिपयणुकोहमाणमायालोभा मिउमद्वसंपन्ना अल्लीणा भद्दगा विणीता तेसिं णं पणिहाते लवणे समुद्दे जंबुदीवं दीवं नो उपीलेति नो उप्पीलेति नो चेव णं एगोदगं करेति, गंगासिंधुरत्तारत्तवईसु सलिलासु देवया महिद्धियाओ जाव पलिओवमट्टितीया परिवसंति तेसिं णं पणिहाए लवणसमुद्दे जाव नो चेव णं एगोदगं करेति चुल्लहिमवंतसिहरेसु वासहरपव्वतेसु देवा महिद्धिया० तेसिं णं पणिहाए०, हेमवतेरणवतेसु मणुया पगतिभद्दगा० रोहितंसासुवण्णकूलारूप्पकूलासु सलिलासु देवयाओ महिद्धियाओ तासिं पणि० सद्दावातिवट्टवेयड्डपव्वतेसु देवा महिद्धिया जाव पलिओवमट्टितीया परिव० महाहिमवंतरूप्पिसु वासहरपव्वतेसु देवा महिद्धिया जाव पलिओवमट्टितीया० हरिवासरम्मयवासेसु मणुया पगतिभद्दगा गंधावातिमालवंतपरिताएसु वट्टवेयड्डपव्वतेसु देवा महिद्धिया० णिसढनीलवंतेसु वासधरपव्वतेसु देवा महिद्धिया० सव्वाओ दहदेवयाओ भाणियव्वा पउमद्वहतिगिच्छिकेसरिदहावसाणेसु देवा महिद्धियाओ० तासिं पणिहाए० पुव्वविदेहावरविदेहेसु वासेसु अरहंतचक्कवट्टिबलदेववासुदेवा चारणा विज्जाधरा समणा समणीओ सावगा सावियाओ मणुया पगति० तेसिं पणिहाए लवण०, सीयासीतोदगासु सलिलासु देवता महिद्धिया० देवकुरुत्तरकुरुसु मणुया पगतिभद्दगा० मदरे पव्वते देवता महिद्धिया० जंबूए य सुदंसणाए जंबुदीवाहिवती अणाढिए णामं देवे महिद्धीए जाव पलिओवमठितीए परिवसति तस्स पणिहाए लवणसमुद्दे नो उवीलेति नो उप्पीलेति नो चेव णं एकोदगं करेति, अदुत्तरं च णं गो० ! लोगट्टिती लोगाणुभावे जण्णं लवणसमुद्दे जंबुदीवं नो उवीलेति नो उप्पीलेति नो चेव णमेगोदगं करेति । १७४। लवणसमुद्दं धायइसंडे नाम दीवे वट्टे वलयागारसंठाणसंठिते सव्वतो समंता संपरिक्खित्ताणं चिय्ठंति, धायतिसंडे णं भंते ! दीवे किं समचक्कवालसंठिते विसमचक्कवालसंठिते ?, गो० ! समचक्कवालसंठिते नो विसमचक्कवालसंठिते, धायइसंडे णं भंते ! दीवे केवतियं चक्कवालविक्खंभेणं केवइयं परिक्खेवेणं पं० ?, गो० ! चत्तारि जोयणसतसहस्साइं चक्कवालविक्खंभेणं एगयालीसं जोयणसतसहस्साइं दसजोयणसहस्साइं णवएगट्टे जोयणसते किंचिविसेसूणे परिक्खेवेणं पं०, से णं एगाए पउमवरवेदियाए एगेणं वणसंडेणं सव्वतो समंता संपरिक्खित्ते दोणहवि वण्णओ दीवसमिया परिक्खेवेणं, धायइसंडस्स णं भंते ! दीवस्स कति दारा पं० ? गो० ! चत्तारि दारा पं० तं०- विजए वेजयंते जयंते अपराजिए, कहिं णं भंते ! धायइसंडस्स दीवस्स विजए णामं दारे पं० ?, गो० ! धायइसंडपुरत्थिमपेरंते कालोयसमुद्दपुरत्थिमद्वस्स पच्चत्थिमेणं सीयाए महाणदीए उप्पिं एत्थ णं धायइसंडे विजए णामं दारे पं० तं चेव पमाणं, रायहाणीओ अण्णंमि धायइसंडे सीदे, दीवस्स वत्तव्वया भाणियव्वा, एवं चत्तारिवि दारा भाणियव्वा, धायइसंडस्स णं भंते ! दीवस्स दारस्स य २ एस णं केवइयं अबाहाए अंतरे पं० ?, गो० ! दस जोयणसयसहस्साइं सत्तावीसं च जोयणसहस्साइं सत्तपणतीसे जोयणसए तिन्नि य कोसे दारस्स य २ अबाहाए अंतरे पं०, धायइसंडस्स णं भंते ! दीवस्स पदेसा कालोयगं समुद्दं पुट्ठा ?, हंता पुट्ठा, ते णं भंते ! किं धायइसंडे दीवे कालोए समुद्दे ?, गो० ! ते खलु धायइसंडे नो खलु ते कालोयसमुद्दे, एवं कालोयस्सवि, धायइसंडदीवे जीवा उद्दाइत्ता २ कालोए समुद्दे पच्चायंति ?, गो० ! अत्थेगतिया नो पच्चायंति, एवं कालोएवि अत्थे० पच्चा० अत्थेगतिया णो पच्चायंति, से केणट्टेणं भंते ! एवं वुच्चति- धायइसंडे दीवे २ ?, गो० ! धायइसंडे णं दीवे तत्थ २ देसे तहिं २ पएसे धायइरुक्खा धायइवण्णा धायइसंडा णिच्चं कुसुमिया जाव उवसोभेमाणा २ चिट्ठंति, धायइमहाधायइरुक्खेसु सुदंसणापियदंसणा दुवे महिद्धिया जाव पलिओवमट्टितीया परिवसंति से एणट्टेणं० अदुत्तरं च णं गो० ! जाव णिच्चे, धायइसंडे णं भंते ! दीवे कति चंदा पभासिंसु वा० ? कति सूरिया तविंसु वा० ? कइ महग्गहा चारं चरिसुं वा० कइ णक्खत्ता जोगं जोइंसु वा० कइ तारागणकोडाकोडीओ सोभेंसु वा० ?, गो० ! बारस चंदा पभासिंसु वा० एवं- 'चउवीसं ससिरविणो णक्खत्तसत्ता य तिन्नि छत्तीसा । एणं च गहसहस्सं छप्पन्नं धायइसंडे ॥३४॥ अट्टेव सयसहस्सा तिण्णि सहस्साइं सत्त य सयाइं । धायइसंडे

दीवे तारागरकोडिकोडीणं ।३५। सोभेंसु वा० ।१७५। धायइसंडं णं दीवं कालोदे णामं समुद्दे वट्टे वलयागारसंठाणसंठिते सव्वतो समंता संपरिक्खित्ताणं चिट्ठइ, कालोदे णं समुद्दे किं समचक्कवालसंठाणसंठिते विसमं ?, गो० ! समचक्कवाल० णो विसमचक्कवाल० संठिते, कालोदे णं भंते ! समुद्दे केवतियं चक्कवालविक्रवभेणं केवतियं परिक्रवेणं पं० ?, गो० ! अट्ट जोजणसयसहस्साइं चक्कवालविक्रवभेणं एकाणउती जोजणसयसहस्साइं सत्तरिं सहस्साइं छच्च पंचुत्तरे जोजणसते किंचिविसेसाहिए परिक्रवेणं पं०, से णं एगाए पउमवरवेदियाए एगेणं वणसंडेणं दोण्हवि वण्णओ, कालोयस्स णं भंते ! समुद्दस्स कति दारा पं० ?, गो० ! चत्तारि दारा पं० तं०- विजए वेजयंते जयंते अपराजिए, कहिं णं भंते ! कालोदस्स समुद्दस्स विजए णामं दारे पं० ?, गो० ! कालोदे समुद्दे पुरत्थिमपेरंते पुक्खवरदीवपुरत्थिमद्वस्स पच्चत्थिमेणं सीतोदाए महाणदीए उप्पिं एत्थ णं कालोदस्स समुद्दस्स विजये णामं दारे पं० अट्टेव जोजणाइं तं चेव पमाणं जाव रायहाणीओ, कहिं णं भंते ! कालोयस्स समुद्दस्स वेजयंते णामं दारे पं० ?, गो० ! कालोयसमुद्दस्स दक्खिणपेरंते पुक्खवरदीवस्स दक्खिणद्वस्स उत्तरेणं एत्थ णं कालोयसमुद्दस्स वेजयंते नामं दारे पं०, कहिं णं भंते ! कालोयसमुद्दस्स जयंते नामं दारे पं० ?, गो० ! कालोयसमुद्दस्स पच्चत्थिमपेरंते पुक्खवरदीवस्स पच्चत्थिमद्वस्स पुरत्थिमेणं सीताए महाणदीए उप्पिं जयंते नामं दारे पं०, कहिं णं भंते ! अपराजिए नामं दारे पं० ?, गो० ! कालोयसमुद्दस्स उत्तरद्वपेरंते पुक्खवरदीवोत्तरद्वस्स दाहिणओ एत्थ णं कालोयसमुद्दस्स अपराजिए रामं दारे० सेसं तं चेव, कालोयस्स णं भंते ! समुद्दस्स दारस्स य २ एस णं केवतियं अबाहाए अंतरे पं० ?, गो०- 'बावीस सयसहस्सा बाणउती खलु भवे सहस्साइं । छच्च सया बायाला दारंतर तिन्नि कोसा य ॥३६॥ दारस्स य २ आबाहाए अंतरे पं०, कालोदस्स णं भंते ! समुद्दस्स पएसा पुक्खवरदीव० तहेव, एवं पुक्खवरदीवस्सवि, जीवा उद्दाइत्ता तहेव भाणियव्वं, से केणट्ठेणं भंते ! एवं वुच्चति- कालोए समुद्दे २ ?, गो० ! कालोयस्स णं समुद्दस्स उदके आसाले मांसले पेसले कालए मासरासिवण्णाभे पगतीए उदगरसेणं पं०, कालमहाकाला एत्थ दुवे देवा महिद्धीया जाव पलिओवमट्ठितीया परिवसंति, से तेणट्ठेणं गो० ! जाव णिच्चे, कालोए णं भंते ! समुद्दे कति चंदा पभासिंसु वा० पुच्छा, गो० ! कालोए णं समुद्दे बायालीसं चंदा पभासिंसु वा०- 'बायालीसं चंदा बायालीसं च दिणयरा दित्ता । कालोदधिम्मि एते चरंति संबद्धलेसागा ।३७॥ णक्खत्ताण सहस्सं एगं बावत्तरं च सतमण्णं । छच्च सता छण्णउया महागहा तिण्णि य सहस्सा ।३८॥ अट्ठावीसं कालोदहिम्मि बारस य सयसहस्साइं । नव य सया पन्नासा तारागणकोडाकोडीणं ॥३९॥ सोभेंसु वा० ।१७६। कालोयं समुद्दं पुक्खवरे णामं दीवे वट्टे वलयागारसंठाणसंठिते सव्वतो समंता संपरि० तहेव जाव समचक्कवालसंठाणसंठिते नो विसमचक्कवालसंठाणसंठिए, पुक्खवरवरे णं भंते ! दीवे केवतियं चक्कवालविक्रवभेणं केवइयं परिक्रवेणं पं० ?, गो० ! सोलस जोजणसतसहस्साइं चक्कवालविक्रवभेणं- 'एगा जोजणकोडी वाणउतिं खलु भवे सयसहस्सा । अट्ट सया चउणउया परीरओ पुक्खवरस्स ॥४०॥ से णं एगाए पउमवरवेदियाए एगेण य वणसंडेणं सपरि० दोण्हवि वण्णओ, पुक्खवरस्स णं भंते ! कति दारा पं० ?, गो० ! चत्तारि दारा पं० तं०- विजए वेजयंते जयंते अपराजिते, कहिं णं भंते ! पुक्खवरस्स दीवस्स विजए णामं पं० ?, गो० ! पुक्खवरदीवपुच्छिमपेरंते पुक्खवरोदसमुद्दपुरच्छिमद्वस्स पच्चत्थिमेणं एत्थ णं पुक्खवरदीवस्स विजए णामं दारे पं० तं चेव सव्वं, एवं चत्तारिवि दारा, सीयासीओदा णत्थि भाणियव्वाओ, पुक्खवरस्स णं भंते ! दीवस्स दारस्स दारस्स य २ एस णं केवतियं अबाधाए अंतरे पं० ?, गो० ! 'अडयाल सयसहस्सा बावीसं खलु भवे सहस्साइं । अगुणत्तरा य चउरो दारंतर पुक्खवरस्स ॥४१॥ पदेसा दोण्हवि पुट्ठा, जीवा दोसुवि भाणियव्वा, से केणट्ठेणं भंते ! एवं वुच्चति- पुक्खवरदीवे २ ? गो० ! पुक्खवरवरे णं दीवे त्थ २ देसे तहिं २ बहवे पउमरुक्खा पउमवणसंडा णिच्चं कुसुमिता जाव चिट्ठंति पउममहापउमरुक्खे एत्थ णं पउमपुंडरीया णामं दुवे देवा महिद्धीया जाव पलिओवमट्ठितीया परिवसंति, से तेणट्ठेणं गो० ! एवं वुच्चति- पुक्खवरदीवे २ जाव निच्चे, पुक्खवरवरे णं भंते ! दीवे

केवइया चंदा पभासिंसु वा० ?, एवं पुच्छा, 'चोयालं चंदसयं चउयालं चेव सूरियाण सयं । पुक्खवरदीवंमी चरंति एते पभासेंता ॥४२॥ चत्तारि सहस्साइं बत्तीसं चेव होंति णक्खत्ता । छच्च सया बावत्तर महग्गहा बारह सहस्सा ॥४३॥ छण्णउइ सयसहस्सा चत्तालीसं भवे सहस्साइं । चत्तारि सया पुक्खर तारागणकोडकोडीणं ॥४४॥ सोभेंसु वा०, पुक्खरवरदीवस्सस बहुमज्झदेसभाए एत्थ णं माणुसुत्तरे नामं पव्वते पं० वट्ठे वलयागारसंठाणसंठिते जे णं पुक्खरवरं दीवं दुहा विभयमाणे २ चिट्ठति, तं०- अब्भितरपुक्खरद्धं च बाहिपुक्खरद्धं च, अब्भितरपुक्खरद्धे णं भंते ! केवतियं चक्कवाल० परिक्खेवेणं पं०, गो ! अट्ठ जोयणसयसहस्साइं चक्कवालविकखंभेणं 'कोडी बायालीसा तीसं दोण्णि य सया अगुणवण्णा । पुक्खरअद्धपरिरओ एवं च मणुस्सखेत्तस्स ॥४५॥ से केणट्ठेणं भंते ! एवं वुच्चति- अब्भितरपुक्खरद्धे य २ ?, गो० ! अब्भितरपुक्खरद्धे णं माणुसुत्तरेणं पव्वतेणं सव्वतो समंता संपरिक्खित्ते, से एणट्ठेणं गो० ! अब्भितरपुक्खरद्धे य २, अदुरत्तरं च णं जाव णिच्चे, अब्भितरपुक्खरद्धे णं केवतिया चंदा पभासिंसु वा० सा चेव पुच्छा जाव तारागणकोडकोडीओ ?, गो० ! 'बावत्तरिं च चंदा बावत्तरिमेव दिणकरा दित्ता । पुक्खरवरदीवट्ठे चरंति एते पभासेंता ॥४६॥ तिन्नि सया छत्तीसा छच्च सहस्सा महग्गहाणं तु । णक्खत्ताणं तु भवे सोलाइं दुवे सहस्साइं ॥४७॥ अडयाल सयसहस्सा बावीसं खलु भवे सहस्साइं । दोन्नि सय पुक्खरद्धे तारागणकोडिकोडीणं ॥४८॥ सोभेंसु वा० ॥१७७॥ समयखेत्ते णं भंते ! केवतियं आयामविकखंभेणं केवतियं परिक्खेवेणं पं० ?, गो० ! पणयालीसं जोयणसयसहस्साइं आयामविकखंभेणं एगा जोयणकोडी जाव अब्भितरपुक्खरद्धपरिरओ से भाणियव्वो जाव अउणपण्णे, से केणट्ठेणं भंते ! एवं वुच्चति- माणुसखेत्ते २ ?, गो० ! माणुसखेत्ते णं तिविधा मणुस्सा परिवसंति, तं०-कम्मभूमगा अकम्मभूमगा अंतरदीवगा, से तेणट्ठेणं गो० ! एवं वुच्चति-माणुसखेत्ते २, माणुसखेत्ते णं भंते ! कति चंदा पभासेंसु वा० कईसूरा तवइंसु वा०?, गो० ! 'बत्तीसं चंदसयं बत्तीसं चेव सूरियाण सयं । सयलं मणुस्सलोयं चरंति एते पभासेंता ॥४९॥ एक्कारस य सहस्सा छप्पिय सोला महग्गहाणं तु । छच्च सया छण्णउया णक्खत्ता तिण्णि य सहस्सा ॥५०॥ अडसीइ सयसहस्सा चत्तालीस सहस्स मणुयलोगंमि । सत्त य सया अणूणा तारागणकोडकोडीणं ॥५१॥ सोभं सोभेंसु वा०, 'एसो तारापिंडो सव्वसमासेण मणुयलोगंमि । बहिया पुण ताराओ जिणेहिं भणिया असंखेज्जा ॥५२॥ एवइयं तारणं जं भणियं माणुसंमि लोणंमि । चारं कलंबुयापुप्फसंठियं जोइसं चरइ ॥५३॥ रविससिगहनक्खत्ता एवइया आहिया मणुयलोए । जेसिं नामागोयं न पागया पन्नवेहिंति ॥५४॥ छावट्ठी पिडगाइं चंदाइच्चाण मणुयलोगंमि । दो चंदा दो सूरा य होंति एक्केक्कए पिडए ॥५५॥ छावट्ठी पिडगाइं नक्खत्ताणं तु मणुयलोगंमि । छप्पन्नं होंति नक्खत्ता य० ॥५६॥ छावट्ठी पिडगाइं महग्गहाणं तु मणुयलोगंमि । छावत्तरं गहसयं च होइ० ॥५७॥ चत्तारि य पंतीओ चंदाइच्चाण मणुयलोगंमि । छावट्ठिय छावट्ठिय होइ य एक्केक्किया पंती ॥५८॥ छप्पन्नं पंतीओ नक्खत्ताणं तु मणुयलोगंमि । छावट्ठी २ हवइ य एक्केक्किया पंती ॥५९॥ छावत्तरं गहाणं पंतिसयं होइ मणुयलोगंमि । छावट्ठी २ य होति एक्केक्किया पंती ॥६०॥ ते मेरु परियडन्ता पयाहिणावत्तमंठला सव्वे । अणवट्ठियजोगेहिं चंदा सूरा गहगणा य ॥६१॥ नक्खत्ततारागणं अवट्ठिया मंडला मुणेयव्वा । तेऽविय पयाहिणावत्तमेव मेरुं अणुचरंति ॥६२॥ रयणियरदिणयराणं उट्ठे वअहे व संकमो नत्थि । मंड,संकमणं पुण अब्भितरबाहिरं तिरिए ॥६३॥ रयणियरदिणयराणं नक्खत्ताणं महग्गहाणं च । चारविसेसेण भवे सुहदुक्खविही मणुस्साणं ॥६४॥ तेसिं पविसंताणं तावक्खेत्तं तु वट्ठए नियमा । तेणेव कमेण पुणो परिहायइ निक्खमंताणं ॥६५॥ तेसिं कलंबुयापुप्फसंठिया होइ तावक्खेत्तपहा । अंतो य संकुया बाहि वित्थडा चंदसूरगणा ॥६६॥ केणं वट्ठति चंदो परिहाणी केण होइ चंदस्स । कालो वा जोणहो वा केणऽणुभावेण चंदस्स ? ॥६७॥ किण्हं राहुविमाणं निच्चं चंदेण होइ अविरहियं । चउरंगुमप्पत्तं हिट्ठा चंदस्स तं चरइ ॥६८॥ बावट्ठिं २ दिवसे २ उ सुक्कपक्खस्स । जं परिवट्ठइ चंदो खवेइ तं चेव कालेणं ॥६९॥ पन्नरसइभागेण य चंदं पन्नरसमेव तं वरइ । पन्नरसइभागेण य पुणोवि तं चेवऽतिक्रमइ ॥७०॥ एवं वट्ठइ चंदो परिहाणी एव होइ चंदस्स । कालो वा जोणहा वा

तेणऽणुभावेण चंदस्स ॥७१॥ अंतो मणुस्सखेत्ते हवंति चारोवगा य उववण्णा । पञ्चविहा जोइसिया चंदा सूरा गहगणा य ॥७२॥ तेण परं जे सेसा चंदाइच्चगहतारनक्खत्ता । नत्थि गइ नवि चारो अवट्टिया ते मणुयव्वा ॥७३॥ दो चंदा इह दीवे चत्तारि य सागरे लवणतोए । धायइसंडे दीवे बारस्स चंदा य सूरा य ॥७४॥ दो दो जंबुद्दीवे ससिसूरा दुगुणिया भवे लवणे (पा० एगो जंबुद्दीवे दुगुणा लवणे चउग्गुणा होंति) । लावणिगा य तिगुणिया ससिसूरा धायईसंडे ॥७५॥ धायइसंडप्पभिई उद्धिद्वतिगुणिया भवे चंदा । आइल्लचंदसहिया अणंतराणंतरे खेत्ते ॥७६॥ रिक्खग्गहतारग्गं दीवस्समुद्दे जहिच्छसे नाउं । तस्स ससीहिं गुणियं रिक्खग्गहतारगाणं तु ॥७७॥ चंदातोसूरस्स य सूरा चंदस्स अंतरं होइ । पन्नास सहस्साइं तु जोयणाणं अणूणाइं ॥७८॥ सूरस्स य सूरस्स य ससिणो २ य अंतरं होइ । बहियाओ माणुसनगस्स जोयणाणं सयसहस्सं ॥७९॥ सूरंतरिया चंदा चंदंतरिया य दिणयरा दित्ता । चित्तंतरलेसागा सुहलेसा मंदलेसा य ॥८०॥ अट्टासीइं च गाहा अट्टावीसं च होंति नक्खत्ता । एगससीपरिवारो एत्तो ताराण वोच्छामि ॥८१॥ छावट्टिसहस्साइं नव चेव सयाइं पंचसयराइं । एगससीपरिवारो तारागणकोडिकोडीणं ॥८२॥ बहियाओ माणुसनगस्स चंदसूराणऽवट्टिया जोगा । चंदा अभीइजुत्ता सूरा पुण होंति पुस्सेहिं ॥८३॥ १७८ । माणुसुत्तरे णं भंते ! पव्वते केवतियं उड्डुंउच्चत्तेणं केवतियं उव्वेहेणं केवतियं मूले विक्खम्भेणं केवतियं मज्झे विक्खंभेणं केवतियं सिहरे विक्खंभेणं केवतियं अंतो गिरिपरिरएणं केवतियं बाहिं गिरिपरि० केवतियं मज्झे गिरिपरिरएणं केवतियं उवरि गिरिपरिरएणं ?, गो० ! माणुसुत्तरे णं पव्वते सत्तरस्स एक्कवीसाइं जोयणसयाइं उड्डुंउच्चत्तेणं चत्तारि तीसे जोयणसए कोसं च उव्वेहेणं मूले दसबावीसे जोयणसते विक्खंभेणं मज्झे सत्ततेवीसे जोयणसते विक्खंभेणं उवरि चत्तारिचउवीसे जोयणसते विक्खंभेणं अंतो गिरिपरिरएणं- एगा जोयणकोडी बायालीसं च सयसहस्साइं तीसं च सहस्साइं दोण्णि य अउणापण्णे जोयणसते किंचिविसेसाहिए परिक्खेवेणं बाहिरगिरिपरिरएणं एगा जोयणकोडी बायालीसं च सतसहस्साइं छत्तीसं च सहस्साइं सत्त चोदसोत्तरे जोयणसते परिक्खेवेणं मज्झे गिरिपरिरएणं एगा जोयणकोडी बायालीसं च सतसहस्साइं चोतीसं च सहस्सा अट्टतेवीसे जोयणसते परिक्खेवेणं उवरि गिरिपरिरएणं एगा जोयणकोडी बायालीसं च सयसहस्साइं बत्तीसे नव य बत्तीसे जोयणसते परिक्खेवेणं, मूले विच्छिन्ने मज्झे संखित्ते उप्पिं तणुए अंतो सण्हे मज्झे उदग्गे बाहिं दरिसणिज्जे ईसिं सणिसण्णे सीहणिसाई अवद्धजवरासिसंठाणसंठिते सब्वजंबूणयामए अच्छे सण्हे जाव पडिरूवे, उभओपासिं दोहिं पउमवरवेदियाहिं दोहि य वणसंडेहिं सब्वतो समंता संपरिक्खित्ते वण्णओ दोणहवि, से केणट्ठेणं भंते ! एवं वुच्चति- माणुसुत्तरे पव्वते २ ?, गो० ! माणुसुत्तरस्स णं पव्वतस्स अंतो मणुया उप्पिं सुवण्णा बाहिं देवा अदुत्तरं च णं गो० ! मणुसुत्तरपव्वतं मणुया ण कयाई वीतिवइंसु वा वीतिवयंति वा वीतिवइस्संति वा णणत्थ चारणेहिं वा बिज्जाहरेहिं वा देवकम्मुणा वावि. से तेणट्ठेणं गो !, अदुत्तरं च णं जाव णिच्चेत्ति, जावं च णं माणुसुत्तरे पव्वते तावं च णं अस्सिंलोएत्ति पवुच्चति जावं च णं वासातिं वासधरातिं वा तावं च णं अस्सिंलोएत्ति पवुच्चति जावं च णं गेहाइवा गेहावणाति वा तावं च णं अस्सिंलोएत्ति पवुच्चति जावं च णं गामाति वा जाव रायहाणीति वा तावं च णं अस्सिंलोएत्ति पवुच्चति जावं च णं अरहंता चक्कवट्ठी बलदेवा वासुदेवा पडिवासुदेवा चारणा विज्जाहरा समणा समणीओ सावया सावियाओ मणुया पगतिभद्दगा विणीता तावं च णं अस्सिंलोएत्ति पवुच्चति जावं च णं समयाति वा आवलियाति वा आणापाणूति वा थोवाइ वा लवाइ वा मुहुत्ताइ वा दिवसाति वा अहोरत्ताति वा पक्खाति वा मासाति वा उदूति वा अयणाति वा संवच्छराति वा जुगाति वा वाससताति वा वाससहस्साति वा वाससयसहस्साइं वा पुव्वंगाति वा पुव्वाति वा तुडियंगाति वा एवं पुव्वे तुडिए अडडे अववे हूहुए उप्पले पउमे णलिणे अच्छिणिउरे अउते णउते पउते चूलिया सीसपहेलिया जावय सीसपहेलियंगेति वा सीसपहेलियाति वा पलिओवमेति वा सागरोवमेति वा उस्सप्पिणीति वा ओसप्पिणीति वा तावं च णं अस्सिंलोएत्ति पवुच्चति जावं च णं बादरे विज्जुकारे पायरे थणियसद्दे तावं च णं अस्सिं० जावं च णं बहवे ओराला

बलाहका संसेयंति संमुच्छंति वासं वासंति तावं च णं अस्सिलोए० जावं च णं बायरे तेउकाए तावं च णं अस्सिलोए० जावं च णं आगराति वा नदीउ(खणी)इ वा णिहीति वा तावं च अस्सिलोगित्ति पवुच्चति जावं च णं अगडाति वा णदीति वा तावं च णं अस्सिलोए० जावं च णं चंदोवरागाति वा सूरुवरागाति वा चंदपरिवेसाति वा सूरपरिवेसाति वा पडिचंदाति वा पडिसूराति वा इंदधणूइ वा उदगमच्छेइ वा कपिहसिताणि वा तावं च णं अस्सिलोगेति प०, जावं च णं चंदिमसूरियगहणक्खत्ततारारूवाणं अभिगमणनिग्गमणवुद्धिणिक्कड्डिअणवट्टियसंठाणसंठिती आघविज्जति तावं च णं अस्सिलोएत्ति पवुच्चति । १७९। अंतो णं भंते ! मणुस्सखेत्तस्स जे चंदिमसूरियगहणक्खत्ततारारूवा ते णं भदन्त ! देवा किं उड्डोववण्णगा कच्चीववण्णगा विमाणोववण्णगा चारोववण्णगा चारट्टितीया गतिरतिया गतिसमावण्णगा ?, गो० ! ते णं देवा णो उड्डोववण्णगा णो कप्पोव० विमाणोव० चारोव० नो चारट्टितीया गतिरतिया गतिसमावण्णगा उड्डंमुहकलंबुकपुप्फसंठाणसंठितेहिं जोयणसाहस्सितेहिं तावखेत्तेहिं साहस्सियाहिं बाहिरियाहिं वेउव्वियाहिं परिसाहिं महयाहयनट्टगीतवादिततंतीतलतालतुडियघणमुङ्गपडुप्पवादितरवेणं दिव्वाइं भोगभोगाइं भुंजमाणा महया उक्कट्टिसीहणायबोलकलकलसद्देणं विपुलाइं भोगभोगाइं भुंजमाणा अच्छयपव्वयरायं पदाहिणावत्तमंडलयां मेरुं अणुपरियडंति, तेसिं णं भंते ! देवाणं इंदे चवति से कहमिंदाणिं पकरंति ?, गो० ! ताहे चत्तारिपंच सामाणिया तं ठाणं उवसंपज्जित्ताणं विहरंति जाव तत्थ अन्ने इंदे उववण्णे भवति, इंदट्टाणे णं भंते ! केवतियं कालं विरहिते उववातेणं ?, गो० ! जह० एक्कं समयं उक्को० छम्मासा, बहिया णं भंते ! मणुस्सखेत्तस्स जे चंदिमसूरियगहणक्खत्ततारारूवा ते णं भंते ! देवा उड्डोव० कप्पोव० विमाणोव० चारोव० चारट्टितीया गतिरतिया गतिसमावण्णगा ?, गो० ! ते णं देवा णो उड्डोव० नो कप्पोव० विमाणोव० नो चारोव० चारट्टितीया नो गतिरतिया नो गतिसमावण्णगा पक्किगट्टसंठाणसंठितेहिं जोयणसतसाहस्सिएहिं तावखेत्तेहिं साहस्सियाहिं य बाहिराहिं वेउव्वियाहिं परिसाहिं महताहतणट्टगीयवाइयरवेणं दिव्वाइं भोगभोगाइं भुंजमाणा सुहलेस्सा सीयलेस्सा मंदलेस्सा मंदायवलेस्सा चित्तंतरलेसागा कूडाइव ठाणट्टिता अण्णोण्णसमोगाठाहिं लेसाहिं ते पदेसे सव्वतो समंता ओभासेंति उज्जोवेतिं तवंति पभासेंति, जया णं भंते ! तेसिं देवाणं इंदे चयति से कहमिंदाणिं पकरंति ?, गो० ! जाव चत्तारिपंच सामाणिया तं ठाणं उवसंपज्जित्ताणं विहरंति जाव तत्थ अण्णे उववण्णे भवति, इंदट्टाणे णं भंते ! केवतियं कालं विरहओ उवावातेणं ?, गो० ? जह० एक्कं समयं उक्को० छम्मासा । १८०। पुक्खरोदस्स दीवं पुक्खरोदे णामं समुद्दे वट्टे वलयागारसंठाणसंठिते जाव संपरिक्खित्ताणं चिट्ठति, पुक्खरोदे णं भंते ! समुद्दे केवतियं चक्कवालविकखंभेणं केवतियं परिकखेवेणं पं० ?, गो० ! संखेज्जाइं जोयणसयसहस्साइं चक्कवालविकखंभेणं संखेज्जाइं जोयणसयसहस्साइं परिकखेवेणं पं०, पुक्खरोदस्स णं समुदस्स कति दारा पं० ?, गो० ! चत्तारि दारा पं० तहेव सव्वं पुक्खरोदसमुद्दपुरत्थिमपेरंते वरुणवरदीवपुरत्थिमद्धस्स पच्चत्थिमेणं एत्थ णं पुक्खरोदस्स विजए नामं दारे पं०, एवं सेसाणवि, दारंतरंमि संखेज्जाइं जोयणसयसहस्साइं अबाहाए अंतरे पं०, पदेसा जीवा य तहेव, से केणट्टेणं भंते ! एवं वुच्चति- पुक्खरोदे समुद्दे २ ?, गो० ! पुक्खरोदस्स णं समुद्दस्स उदगे अच्छे पत्थे जच्चे तणुए फलिहवण्णाभे पगतीए उदगरसेणं सिरिधरसिरिप्पभा य दो देवा जाव महिड्डीया जाव पलिओवमटिठतीया परिवसंति, से एतेणट्टेणं जाव णिच्चे, पुक्खरोदे णं भंते ! समुद्दे केवतिया चंदा पभासिंसु वा ?, संखेज्जा चंदा पभासिंसु वा जाव तारागणकोडीकोडीउ सोभेसु वा०, पुक्खरोदे णं समुद्दे वरुणवरेणं दीवेणं संपरि० वट्टे वलयागारे जाव चिट्ठति, तहेव समचक्कवालसंठिते, केवतियं चक्कवालविकखंभेणं केवइयं परिकखेवेणं पं० ?, गो० ! संखिज्जाइं जोयणसहस्साइं चक्कवालविकखंभेणं संखेज्जाइं जोयणसतसहस्साइं परिकखेवेणं पं०, पउमवरवेदियावणसंडवण्णओ दारंतरं पदेसा जीवा तहेव सव्वं, से केणट्टेणं भंते ! एवं वुच्चइ- वरुणवरे दीवे २ ?, गो० ! वरुणवरे णं दीवे तत्थ २ देसे तहिं २ बहुइओ खुड्डाखुड्डियाओ जाव बिलपंतियाओ अच्छाओ पत्तेयं २ पउमवरवेइयापरि०

वण० वारुणिवरोदगपडिहत्थाओ पासातीताओ०, तासु णं खुड्डाखुड्डियासु जाव बिलपंतियासु बहवे उप्पायपव्वता जाव खडहडगा सव्वफलिहामया अच्छा तहेव वरुणवरुणप्पभा य एत्थ दो देवा महिड्ढीया० परिवसंति से तेणट्ठेणं जाव णिच्चे, जोतिसं सव्वं संखेज्जणेणं जाव तारागणकोडिकोडीओ, वरुणवरुणं दीवं वरुणोदे णामं समुद्दे वट्ठे वलया० जाव चिट्ठति, समचक्क० नो विसमचक्कवालवि० तहेव सव्वं भाणियव्वं, विक्खंभपरिक्खेवो संखिज्जाइं जोयणसयसहस्साइं दारंतरं च पउमवर० वणसंडे पएसा जीवा अट्ठो गो० ! वारुणोदस्स णं समुद्दस्स उदए से जहानामए चंदप्पभाइ वा वरसीधुवारुणीइ वा पत्तासवेइ वा पुप्फासवेइ वा चोयासवेइ वा फलासवेइ वा महुमेरएइ वा जातिपसन्नाइ वा खजूरसारेइ वा मुद्दियासारेइ वा कापिसायणीइ सुपक्खोयरसेइ वा पभूतसंभारसंचिता पोसमाससतभिसयजोगवत्तिता निरुवहतविसिद्धिद्विन्नकालोवयारा सुधोता उक्कोसग(मयपत्ता) अट्ठपिट्ठपुट्ठा (पिट्ठनिट्ठिजा) मुखइंतवरकिमिविदिण्णकद्दमा कापसन्ना अच्छा वरवारुणी अतिरसा जंबूफलपुट्ठवन्ना सुजाता ईसिउट्ठावलंबिणी अहियमधुरपेज्जा ईसासिरत्तणेत्ता कोमलकवोलकरणी जाव आसादिता विस्सादिता अणिहुयसंलावकरणहरिसपीतिजणणी संतोसततबिबोक्कहावविब्भमविलासवेल्लहलगमणकरणी वीराणमधियसत्तजणणी य होति संगामदेसकाले कयरणसमरपसरकरणी कडिढयाण विज्जुपयतिहिययाण मउयकरणी य होति उववेसिता समाना गतिं खलावेति य सयलंमिवि सुभासवुप्पीलिया समरभग्गवणो-सहयारा सुरभिरसदीविया सुगंधा आसायणिज्जा विस्सायणिज्जा पीणणिज्जा दप्पणिज्जा मयणिज्जा सव्विंदियगातपल्हायणिज्जा आसला मांसला पेसला (ईसी ओट्ठावलंबिणी ईसी तंबच्छिकरणी ईसीवोच्छेया कडुआ) वण्णेणं उववेया गंधेणं उववेया रसेणं उववेया फासेणं उववेया, भवे एयारूवे सिया ?, गो० ! नो इणट्ठे समट्ठे, वारूणस्स णं समुद्दस्स उदए एत्तो इट्ठतरे जाव उदए, से एणट्ठेणं एवं वुच्चति०, तत्थ णं वारूणिवारूणकंता देवा महिड्ढीया जाव परिवसंति से एणट्ठेणं जाव णिच्चे, सव्वं जोइसं संखिज्जकेण नायव्वं, वारूणवरे णं दीवे कइ चंदा पभासिंसु वा० ।१८१। वारूणवरुणं समुद्दं खीरवरे णामं दीवे वट्ठे जाव चिट्ठति सव्वं संखेज्जमं विक्खंभे य परिक्खेवो य जाव अट्ठो, बहूओ खुड्डा० वावीओ जाव सरसरपंतियाओ खीरोदगपडिहत्थाओ पासातीयाओ०, तासु णं खुड्डियासु जाव बिलपंतियासु बहवे उप्पायपव्वयगा० सव्वरयणामया जाव पडिरूवा, पुंडरीगपुक्खरवंता य एत्थ दो देवा महिड्ढीया जाव परिवसंति से तेणट्ठेणं जाव निच्चे, जोतिसं सव्वं संखेज्जं, खीरवरुणं दीवं खीरोए नामं समुद्दे वट्ठे वलयागारसंठाणसंठिते जाव परिक्खिवित्ताणं चिट्ठति, समचक्कवालसंठिते नो विसमचक्कवालसंठिते, संखेज्जाइं जोयणसय० विक्खंभपरिक्खेवो तहेव सव्वं जाव अट्ठो, गो० ! खीरोयस्स णं समुद्दस्स उदगं से जहाणामए-सुउसुहीमारूपणअज्जुणतरूणसरसपत्तकोमलअत्थिगत्तणग्गपोंडगवरूच्छु चारिणीणं लवं गपत्तपुप्फ पल्लवकक्को लगसफलरूक्खबहुगुच्छ- गुम्मकलितमलट्ठिमधुपयुरपिप्पलीफलितवल्लिवरविवरचारिणीणं अप्पोदगपीतसइरससमभूमिभागणिब्भयसुहोसियाणं सुप्पेसितसुहातरोगपरिवज्जिताणं णिरूवहतसरीरीणं कालप्पसविणीणं बितियततियसामप्पसूताणं अंजणवरगवलवलयजलधरजच्चंजणरिट्ठभमरपभूयसमप्पभाणं कुंडदोहणाणं वद्धत्थीपत्थुताणं रूढाणं मधुमासकाले संगहिनेहो अज्जचातुरक्केव होज्ज तासिं खीरे मधुररसे विगच्छबहुदव्वसंपउत्ते पत्तेयं मंदगिसुकडिढते खंडगुडमच्छंडितोववेते रण्णो चाउरंतचक्कवट्ठिस्स उवट्ठविते आसायणिज्जे० पल्हातणिज्जे जाव वण्णेणं उववेते जाव फासेणं, भवे एयारूवे सिया ?. णो इणट्ठे समट्ठे, खीरोदस्स णं से उदए एत्तो इट्ठयराए चेव जाव आसाएणं पं०, विमलविमलप्पभा य एत्थ दो देवा महिड्ढीया जाव परिवसंति से तेणट्ठेणं०, संखेज्जा चंदा जाव तारा० ।१८२। खीरोदण्णं समुद्दं घयवरे णामंदीवे वट्ठे वलयागारसंठाणसंठिते जाव परिचिट्ठति समचक्कवाल० नो विसम० संखेज्जविक्खंभपरि० पदेसा जाव अट्ठो, गो० ! घयवरे णं दीवे तत्थ २ बहवे खुड्डाखुड्डीओ वावीओजाव घयोदगपडिहत्थाओ उप्पायपव्वयगा जाव खडहड० सव्वकंचणमया अच्छा जाव पडिरूवा, कणयकणयप्पभा य एत्थ दो देवा महिड्ढीया०, चंदा संखेज्जा, घयवरुणं दीवं च घतोदे णाम समुद्दे वट्ठे वलयागारसंठाणसंठिते जाव चिट्ठति, समचक्क० तहेव दारा पदेसा जीवा य अट्ठो, गो० ! घयोदगस्स णं समुद्दस्स उदए से जहा०

पप्फुल्लसल्लइविमुक्कलकणिया रसरसवसुविबुद्धकोरेंटदामपिंडिततरस्स निद्धगुणतेयदीवियनिरूवहयविसिद्धसुंदरतरस्स
 सुजायदहिमहियदिवसगहियनवणीयपडुवणावियमुक्कडिढयउद्दावसज्जवीसंदियस्स अहियं पीवरसुरहिंगंधमणहरमहुरपरिणामदरिसणिज्जस्स
 पत्थनिम्मलसुहोवभोगस्स सरयकालंमि होज्ज गोधतवरस्स मंडए, भवे एतारूवे सिया ? . णो तिण्ढे समट्ठे, गो० ! घतोदस्स णं समुद्दस्स एत्तो इट्ठतरे जाव
 अस्साएणं पं० कंतसुकंता य एत्थ दो देवा महिड्ढीया जाव परिवसंति सेसं तं चेव जाव तारागणकोडाकोडीओ. घतोदयं णं समुद्दं खोदवरे णामं दीवे वट्ठे वलयागार
 जाव चिट्ठति तहेव जाव अट्ठो, खोतवरे णं दीवे तत्थ २ देसे तहिं २ खुड्डा० वावीओ जाव खोदोदगपडिहत्थाओ उप्पातपव्वयता सव्ववेरूलियामया जाव पडिरूवा.
 सुप्पभमहप्पभा य एत्थ दो देवा महिड्ढीया जाव परिवसंति, से एतेण० सव्वं जोतिसं तं चेव जाव तारा०, खोयवरणं दीवं खोदोदे नाम समुद्दे वलया० जाव
 संखेज्जाइं जोयणसतस० परिक्खेवेणं जाव अट्ठे, गो० ! खोदोदस्स णं समुद्दस्स उदए से० जहा आसलमांसलपसत्थवीसंतनिद्धसुकुमालभूमिभागे सुच्छिन्ने
 सुकट्ठलट्ठविसिद्धनिरूवहयाजीयवावीतसुकासजपयत्तनिउणपरिकम्मअणुपालियसुवुड्ढिवुड्ढाणं सुजाताणं लवणतणदोसवज्जियाणं णयायपरिवडिढयाणं
 निम्मातसुंदराणं रसेणं परिणयमउपीणपोरभंगुरसुजायमधुररसपुप्फविरइयाणं उवद्दवविवज्जियाणं सीयपरिफोसियाणं अभिणवतवग्गाणं अपालिताणं
 तिभायणिच्छोडियवाडिगाणं अवणीतमूलाणं गंठियपरिसोहिताणं कुसलणरकप्पियाणं उव्वणं जाव पोंडियाणं बलवगणरजत्तन्तपरिगालितमेत्ताणं खोयरसे होज्जा
 वत्थपरिभूए चाउज्जातगसुवासिते अहियपत्थलहुके वण्णोववेते तहेव, भवे एयारूवे सिया ? , णो तिण्ढे समट्ठे, खोयरसस्स णं समुद्दस्स उदए एत्तो इट्ठतरए चेव
 जाव आसाएणं पं० पुण्णभद्दमाणिभद्दा (पुण्णपुण्णभद्दा) य इत्थ दुवे देवा जाव परिवसंति, सेसं तहेव जोइसं संखेज्जं चंदा० । १८३। खोदोदणं समुद्दं णंदीसरवरे
 णामं दीवे वट्ठे वलयागारसंठिते तहेव जाव परिक्खेवो, पउमवर० वणसंडपरि० दारा दारंतरप्पदेसे जीवा तहेव, से केणट्ठेणं भंते !०, गो० ! देसे २ बहुओ खुड्डा०
 वावीओ जाव बिलपंतियाओ खोदोदगपडिहत्थाओ उप्पायपव्वयगा सव्ववइरामया अच्छा जाव पडिरूवा, अदुत्तरं च णं गो० !
 णंदीसरदीवचक्कवालविक्खंभबहुमज्झदेसभागे एत्थ णं चउदिसिं चत्तारि अंजणपव्वयता पं०, ते णं अंजणपव्वयगा चतुरसीतिजोयणसहस्साइं उड्ढंउच्चतेणं
 एगमेगं जोयणसहस्सं उव्वेहेणं मूले साइरेगाइं दस जोयणसहस्साइं धरणियले दस जोयणसहस्साइं आयामविक्खंभेणं ततोऽणंतरं च णं माताए २ पदेसपरिहाणीए
 परिहायमाणा २ उवरिं एगमेगं जोयणसहस्सं आयामविक्खंभेणं मूले एकतीसं जोयणसहस्साइं छच्च तेवीस जोयणसते किंचिविसेसाहिए परिक्खेवेणं धरणियले
 एकतीसं जोयणसहस्साइं छच्च तेवीसे जोयणसते देसूणे परिक्खेवेणं सिहरतले तिण्णि जोयणसहस्साइं एकं च बावट्ठं जोयणसतं किंचिविसेसाहियं परिक्खेवेणं
 पं० मूले विच्छिण्णा मज्झे संखित्ता उप्पिं तणुया गोपुच्छसंठाणसंठिता सव्वंजणामया अच्छा जाव पत्तेयं २ पउमवरवेदियापरि० पत्तेयं वणसंडपरिक्खित्ता
 वण्णओ, तेसिं णं अंजणपव्वयाणं उवरिं पत्तेयं २ बहुसमरमणिज्जो भूमिभागो पं०, से जहाणामए-आलिंगपुक्खरेति वा जाव आसयंति०, तेसिं णं बहुसमरमणिज्जाणं
 भूमिभागाणं बहुमज्झदेसभाए पत्तेयं २ सिद्धायतणा एकमेकं जोयणसतं आयामेणं पण्णासं जोयणाइं विक्खंभेणं बावत्तरिं जोयणाइं उड्ढंउच्चतेणं
 अणेगखंभसतसंनिविट्ठा वण्णओ, तेसिं णं सिद्धायतणाणं पत्तेयं २ चउदिसिं चत्तारि दारा पं० तं०-देवद्वारे असुरद्वारे णागद्वारे सुवण्णहारे, तत्थ णं चत्तारि देवा
 महिड्ढीया जाव पलिओवमट्ठितीया परिवसंति, तं०-देवे असुरे णागे सुवण्णे, ते णं दारा सोलस जोयणाइं उड्ढंउच्चतेणं अट्ठ जोयणाइं विक्खंभेणं तावतियं चेव
 पवेसेणं सेता वरकणग० वन्नओ जाव वणमाला, तेसिं णं दाराणं चउदिसिं चत्तारिं मुहुमंडवा पं०, ते णं मुहुमंडवा एगमेगं जोयणसतं आयामेणं पंचासं जोयणाइं
 विक्खंभेणं साइरेगाइं सोलस जोयणाइं उड्ढंउच्चतेणं वण्णओ, तेसिं णं मुहुमंडवाणं चउदि (तिदि) सिं चत्तारि (तिण्णि) दारा पं०, ते णं दारा सोलस जोयणाइं
 उड्ढंउच्चतेणं अट्ठ जोयणाइं विक्खंभेणं तावतियं चेव पवेसेणं सेसं तं चेव जाव वणमालाओ, एवं पेच्छाघरमंडवावि, तं चेव पमाणं जं मुहुमंडवाणं, दारावि तहेव,

णवरि बहुमज्झदेसे पेच्छाघरमंडवाणं अक्खाडगा मणिपेढियाओ अद्धजोयणप्पमाणाओ सीहासणा अपरिवारा जाव दामा थूमाइं चउद्दिसि तहेव णवरि सोलसजोयणप्पमाणा सातिरेगाइं सोलस जोयणाइं उच्चा सेसं तहेव जाव जिणपडिमा, चेइयरूक्खा तहेव चउद्दिसिं तं चेव पमाणं जहा विजयाए रायहाणीए णवरि मणिपेढियाओ सोलसजोयणप्पमाणाओ, तेसिं णं चेइयरूक्खाणं चउद्दिसिं चत्तारि मणिपेढियाओ अद्धजोयणविक्रखंभाओ चउजोयणबाहल्लाओ महिंदज्झया चउसट्टिजोयणुच्चा जोयणोव्वेधा जोयणविक्रखंभा सेसं तं चेव, एवं चउद्दिसिं चत्तारि णंदापुक्खरिणीओ णवरि खोयरसपडिपुण्णाओ जोयणसतं आयामेणं पन्नासं जोयणाइं विक्रखंभेणं पण्णासं जोयणाइं उव्वेधेणं सेसं तं चेव, मणोगुलियाणं गोमाणसीण य अडयालीसं २ सहस्साइं पुरच्छिमेण सोलस पच्चत्थिमेणवि सोलस दाहिणेण अट्ट उत्तरेणवि अट्ट साहस्सीओ तहेव सेसं उल्लोया भूमिभागा जाव बहुमज्झदेसभागे, मणिपेढिया सोलस जोयणा आयामविक्रखंभेणं अट्ट जोयणाइं बाहल्लेणं तारिसं मणिपीढियाणं उप्पिं देवच्छंदगा सोलस जोयणाइं आयामविक्रखंभेणं सातिरेगाइं सोलस जोयणाइं उड्ढंउच्चत्तेणं सव्वरयणं अट्टसयं जिणपडिमाणं सव्वो सो चेव गमो जहेव वेमाणियसिद्धायतणस्स, तत्थ णं जे से पुरच्छिमिल्ले अंजणपव्वते तस्स णं चउद्दिसिं चत्तारि णंदाओ पुक्खरिणीओ पं० तं०-णंदुत्तरा य णंदा आणंदा णंदिवद्धणा (नंदिसेणा अमोघा य, गोथूमा य सुदंसणा), ताओ णंदापुक्खरिणीओ एगमेणं जोयणसतसहस्सं आयामविक्रखंभेणं दस जोयणाइं उव्वेहेणं अच्छाओ सण्हाओ पत्तेयं २ पउमवरवेदिया० पत्तेयं २ वणसंडपरिक्खित्ता तत्थ २ जाव सोवाणपडिरूवगा तोरणा, तासिं णं पुक्खारिणीणं बहुमज्झदेसभाए (तासिं णं पुक्खरिणीणं चउद्दिसिं चत्तारि वणसंडा पं० तं०-पुरच्छिमेणं दाहिणेणं पच्चत्थिमेणं उत्तरेणं-‘पुव्वेण असोगवणं दाहिणतो होइ सत्तपणवणं । अवरेण चंपगवणं चूयवणं उत्तरे पासे ॥१॥ तासिं पा०) पत्तेयं २ दहिमुहपव्वया पं०, ते णं दहिमुहपव्वया चउसट्टी जोयणसहस्साइं उड्ढंउच्चत्तेणं एणं जोयणसहस्सं उव्वेहेणं सव्वत्थसमा पल्लगसंठाणसंठिता दस जोयणसहस्साइं विक्रखंभेणं एकतीसं जोयणसहस्साइं छच्च तेवीसे जोयणसए परिक्खेवेणं पं० सव्वरयणामया अच्छा जाव पडिरूवा तहा पत्तेयं २ पउमवरवेइया० वणसंडवण्णओ जाव आसयंति सयंति० सिद्धायतणं तं चेव पमाणं अंजणपव्वएसु सच्चेव वत्तव्वया णिरवसेसा भाणियव्वा जाव उप्पिं अट्टमंगलगा, तत्थ णं जे से दक्खिणिल्ले अंजणगपव्वते तस्स णं चउद्दिसिं चत्तारि णंदाओ पुक्खरिणीओ पं० तं०-भद्दा य विसाला य कुमुया पुंडरीकिणी, (नन्दुत्तरा य नंदा, आनन्दा नन्दिवड्ढणा) तं चेव पमाणं ते चेव दहिमुहा पव्वया तं चेव पमाणं जाव सिद्धायतणा, तत्थ णं जे से पच्चत्थिमिल्ले अंजणगपव्वए तस्स णं चउद्दिसिं चत्तारि णंदा पुक्खरिणीओ पं० तं०-णंदिसेणा अमोहा य, गोथूमा य सुदंसणा (भद्दा विसाला कुमुदा पुंडरीकिणी)तं चेव सव्वं भाणियव्वं जाव सिद्धायतणा, तत्थ णं जे से उत्तरिल्ले अंजणगपव्वते तस्स णं चउद्दिसिं चत्तारि णंदापुक्खरिणीओ पं० तं०-विजया वेजयंती जयंती अपराजिया, सेसं तहेव जाव सिद्धायतणा सव्वा सा चिय वण्णणा णातव्वा, तत्थ णं बहवे भवणवइवाणमंतरजोतिसियवेमाणिया देवा चाउम्मासियपाडिवएसु संवच्छरिएसु वा अण्णेसु बहूसु जिणजम्मणिक्रखमणणाणुप्पत्तिप-रिणिव्वाणमादिएसु य देवकज्जेसु य देवसमुदएसु य देवसमितीसु य देवसमवाएसु य देवपओयणेसु य एणंतओ सहिता समुवागता समाणा पमुदितपक्की लिया अट्टाहितारूवाओ महामहिमाओ करेमाणा पालेमाणा सुहंसुहेणं विहरंति, कइलासहरिवाहणा य तत्थ दुवे देवा महिड्ढीया जाव पलिओवमट्ठितीया परिवसंति, से एतेणट्ठेणं गो० ! जाव णिच्चा, जोतिसं संखेज्जं ।१८४। णंदिस्सरवरणं दीवं णंदीसरोदे णामं समुद्दे वट्ठे वलयागारसंठाणसंठिते जाव सव्वं तहेव अट्टो जो खोदोदगस्स जाव सुमणसोमणसभद्दा य एत्थ दो देवा महिड्ढीया जाव परिवसंति सेसं तहेव जाव तारणं ।१८५। णंदीसरोदं समुद्दं अरूणे णामं दीवे वट्ठे वलयागार जाव संपरिक्खित्ताणं चिट्ठति, अरूणे णं भंते ! दीवे किं समचक्कवालसंठिते विसमचक्कवालसंठि ? , गो० ! समचक्क० नो विसमचक्क०, केवतियं चक्कवालवि० ?, संखेज्जाइं जोयणसयसहस्साइं चक्कवालविक्रखंभेणं संखेज्जाइं जोयणसयसहस्साइं परिक्खेवेणं पं०, पउमवरवणसंडदारा दारंतरा य तहेव संखेज्जाइं जोयणसतसहस्साइं दारंतरं जाव अट्टो, वावीओ खोतोदगपडिहत्थाओ उप्पातपव्वयका सव्ववइरामया अच्छा०,

असोगवीतसोगा य एत्थ दुवे देवा महिङ्गीया जाव परिवसंति, से तेण० जाव संखेज्जं सव्वं, अरूणणं दीवं अरूणोदे णामं समुद्दे तस्सवि तहेव परिकखेवो अट्ठो खोतोदगे णवरिं सुभद्दसुमणभद्दा य एत्थ दो देवा महिङ्गीया सेसं तहेव, अरूणोदगं समुद्दं अरूणवरे णामं दीवे वट्ठे वलयागारसंठाण० तहेव संखेज्जं सव्वं जाव अट्ठो खोयोदगपडिहत्थाओ उप्पायपव्वतया सव्ववइरामया अच्छा, अरूणवरभद्दअरूणवरमहाभद्दा य एत्थ दो देवा महिङ्गीया०, एवं अरूणवरोदेवि समुद्दे जाव देवा, अरूणवरअरूणमहावरा य एत्थ दो देवा सेसं तहेव, अरूणवरोदणं समुद्दं अरूणवरावभासे णामं दीवे वट्ठे जाव देवा, अरूणवरावभासमभद्दारूणवरावभासमहाभद्दा य एत्थ दो देवा महिङ्गीया०, एवं अरूणवरावभासे समुद्दे णवरि देवा, अरूणवरावभासवरारूणवरावभासमहावरा य एत्थ दो देवा महिङ्गीया०, कुंडले दीवे कुंडलभद्दकुंडलमहाभद्दा य दो देवा महिङ्गीया०, कुंडलोदे समुद्दे चक्खुसुभचखुकंता य एत्थ दो देवा म०, कुंडलवरे दीवे कुंडलवरभद्दकुंडलवरमहाभद्दा य एत्थ दो देवा महिङ्गीया०, कुंडलवरोदे समुद्दे कांडलवर (वर) कुंडलवरमहावरा य एत्थ दो देवा म०, कुंडलवरावभासे दीवे कुंडलवरावभासमभद्दकुंडलवरावभासमहाभद्दा य एत्थ दो देवा०, कुंडलवरोभासोदे समुद्दे कुंडलवरोभासवरकुंडलवरोभासमहावरा य एत्थ दो देवा म० जाव पलिओवमट्ठितीया परिवसंति, कुंडलवरोभासं णं समुद्दं रूचगे णामं दीवे वट्ठे वलया० जाव चिट्ठति, किं समचक्क० विसमचक्कवाल० ?, गो० ! समचक्कवाल० नो विसमचक्कवालसंठिते, केवतियं चक्कवाल० पं० ?, सव्वट्ठमणोरमा य एत्थ दो देवा सेसं तहेव, रूयगोदे नामं समुद्दे जहा खोदोदे समुद्दे संखेज्जाइं जोयणसतसहस्साइं चक्कवालवि० संखेज्जाइं जोयणसतसहस्साइं परिकखेवेणं दारा दारंतरं पि संखेज्जाइं जोतिसं पि सव्वं संखेज्जं भाणियव्वं, अट्ठोवि जहेव खोदोदस्स नवरि सुमणसोमणसा य एत्थ दो देवा महिङ्गीया तहेव, रूयगाओ आढत्तं असंखेज्जं विक्खंभो परिकखेवो दारा दारंतरं च जोइसं च सव्वं असंखेज्जं भाणियव्वं, रूयगोदणं समुद्दं रूयगवरे णं दीवे वट्ठे रूयगवरभद्दरूयगवरमहाभद्दा य एत्थ दो देवा रूयगवरोदे रूयगवर (वर) रूयगवरमहावरा य एत्थ दो देवा महिङ्गीया० रूयगवरावभासे दीवे रूयगवरावभासमभद्दरूयगवरावभासमहाभद्दा य एत्थ दो देवा महिङ्गीया०, रूयगवरावभासे समुद्दे रूयगवरावभासवररूयगवरावभासमहावरा य एत्थ० हारदीवे हारभद्दहारमहाभद्दा एत्थ० हारसमुद्दे हारवरहारमहावरा य एत्थ दो देवा महिङ्गीया हारवरोदे० हारवरभद्दहारवरमहाभद्दा एत्थ दो देवा महिङ्गीया० हारवरोए समुद्दे हारवरवरहारवरमहावरा एत्थ० हाइवरावभासे दीवे हारवरावभासमभद्दहारवरावभासमहाभद्दा एत्थ० हारवरावभासोए समुद्दे हारवरावभासवरहारवरावभासमहावरा य एत्थ० एवं सव्वेवि तिपडोयारा णेतव्वा जाव सूरवरोभासोए समुद्दे, दीवेसु भद्दनामा वरनामा होंति उदहीसु जाव पच्छिमभावं च, खोतवरादीसु सयंभूरमणपज्जंतेसु वावीओ खोओदगपडिहत्थाओ पव्वयका य सव्ववइरामया देवदीवे दीवे दो देवा महिङ्गीया० देवभद्देवमहाभद्दा एत्थ० देवोदे समुद्दे देववरदेवमहावरा एत्थ० जाव सयंभूरमणे दीवे सयंभूरमणभद्दसयंभूरमणमहाभद्दा एत्थ दो देवा महिङ्गीया० सयंभूरमणणं दीवं सयंभूरमणोदे नामं समुद्दे वट्ठे वलया० जाव असंखेज्जाइं जोयणसतसहस्साइं परिकखेवेणं जाव अट्ठो, गो० ! सयंभूरमणोदए उदए अच्छे पत्थे जच्चे तणुए फलिहवण्णाभे पगतीए उदगरसेणं पं०, सयंभूरमणवरसयंभूरमणमहावरा य इत्थ दो देवा महिङ्गीया सेसं तहेव जाव असंखेज्जाओ तारागणकोडिकोडीओ सोभेंसु वा० । १८६। (१६४) केवइया णं भंते ! जंबुदीवा णामधेज्जेहिं पं० ?, गो० ! असंखेज्जा जंबुदीवा नामधेज्जेहिं पं०, केवतिया णं भंते ! लवणसमुद्दा पं० ?, गो० ! असंखेज्जा लवणसमुद्दा नामधेज्जेहिं पं०, एवं धायतिसंडावि, एवं जाव असंखेज्जा सूरदीवा नामधेज्जेहिं, एगे देवे दीवे पं० एगे देवोदे समुद्दे पं०, एवं णागे जक्खे भूते जाव एगे सयंभूरमणसमुद्दे णामधेज्जेणं पं० । १८७। लवणस्स णं भंते ! समुद्दस्स उदए केरिसए अस्साएणं पं० ?, गो० ! लवणस्स उदए आइले रइले लिंदे लवणे कडुए, अपेज्जे बहूणं दुपयंचउप्पयमिगपसुपक्खिसरिसवाणं णणत्थ तज्जोणियाणं सत्ताणं, कालोयस्स णं भंते ! समुद्दस्स उदए केरिसए अस्साएणं पं० ?, गो० ! आसले पेसले मांसले कालए मासरासिवण्णाभे पगतीए उदगरसेणं पं०, पुक्खरोदगस्स णं भंते ! समुद्दस्स उदए केरिसए पं० ?, गो० ! अच्छे जच्चे तणुए फालियवण्णाभे पगतीए

उदगरसेणं पं०, वरूणोदस्स णं भंते ! ०?, गो० ! जहाणामए-पत्तासवेति वा चोयासवेति वा खज्जूरसारेति वा मुद्धियासारेति सुपितखोतरसेति वा मेरएति वा कालिसायणेति वा चंदप्पभाति वा मणिसिलाति वा वरसीधूति वा पवरवारूणी वा अट्ठपिट्ठपरिणिट्ठिताति वा जंबूफलकालिया वरप्पसण्णा उक्कोसमदप्पत्ता ईसिउट्ठवलंबिणी ईसितंबच्छियकरणी ईसिवोच्छेयकरणी आसला मांसला पेसला वण्णेणं उववेता जाव णो तिणट्ठे समट्ठे, वारूणे उदए इत्तो इट्ठतरए चेव जाव अस्साएणं पं०, खीरोदस्स णं भंते ! उदए केरिसए अस्साएणं पं० ?, गो० ! से जहाणामए-रत्तो चाउरंतचक्कवट्ठिस्स चाउरक्के गोखीरे पज्जत्तिमंदग्गिसुकडिढते आउत्तरखंडमच्छंडितोववेते वण्णेणं उववेते जाव फासेण उववेए, भवे एयारूवे सिया ?, णो तिणट्ठे समट्ठे, गो० ! खीरोयगस्स० एत्तो इट्ठ जाव अस्साएणं पं०, घतोदस्स णं से जहाणामए सारतिकस्स गोघयवरस्स मंडे सल्लइकणियारपुप्फवण्णाभे सुकट्ठितउदारसज्झवीसंदिते वण्णेणं उववेते जाव फासेण य उववेए, भवे एयारूवे सिया ?, णो तिणट्ठे समट्ठे, इत्तो इट्ठयरे०, खोदोदस्स से जहाणामए उच्छूणं जच्चपुंडकाणं हरियालपिंडराणं भेरुंडछण्णाण वा कालपोराणं तिभागनिव्वाडियवाडगाणं बलवगणरजंतपरिगालियमित्ताणं जं च रसे होज्जा वत्थपरिपूएचाउज्जातगसुवासिते अहियपत्थे लहुए वण्णेणं उववेए जाव भवेयारूवे सिया ?, णो तिणट्ठे समट्ठे, एत्तो इट्ठयरा०, एवं सेसगाणवि समुद्दाणं भेदो जाव सयंभूरमणस्स, णवरि अच्छे जच्चे पत्थे जहा पुक्खरोदस्स । कति णं भंते ! समुद्दा पत्तेगरसा पं० ?, गो० ! चत्तारि समुद्दा पत्तेगरसा पं० तं०-लवणे वरूणोदे खीरोदे घयोदे, कति णं भंते ! समुद्दा पगतीए उदगरसेणं पं० ?, गो० ! तओ समुद्दा पगतीए उदगरसेणं पं० तं०-कालोए पुक्खरोए सयंभूरमणे, अवसेसा समुद्दा उस्सण्णं खोतरसा पं० समणाउसो ! ।१८८। कति णं भंते ! समुद्दा बहुमच्छकच्छभाइण्णा पं० ?, गो० ! तओ समुद्दा बहुमच्छकच्छभाइण्णा पं० तं०-लवणे कालोए सयंभूरमणे, अवसेसा समुद्दा अप्पमच्छकच्छभाइण्णा पं०, लवणे णं भंते ! समुद्दे कति मच्छजातिकुलकोडिजोणीपमुहसयसहस्सा पं० ?, गो० ! सत्त मच्छजातिकुलकोडीजोणीपमुहसतसहस्सा पं०, कालोए णं भंते ! समुद्दे कति मच्छजाति० पं० ?, गो० ! नव मच्छजातिकुलकोडीजोणी०, सयंभूरमणे णं भंते ! समुद्दे०, अब्धतेरस मच्छजातिकुलकोडीजोणीपमुहसतसहस्सा पं०, लवणे णं भंते ! समुद्दे मच्छाणं केमहालिया सरीरोगाहणा पं० ?, गो० ! जहण्णेणं अंगुलस्स असंखेज्जतिभागं उक्को० पंचजोयणसयाइं, एवं कालोए उक्को० सत्तं जोयणसताइं सयंभूरमणे दस जोयणसताइं ।१८९। केवतिया णं भंते ! दीवसमुद्दा नामधेज्जेहिं पं० ?, गो० ! जावतिया लोणे सुभा णामा सुभा वण्णा जाव सुभा फासा एवतिया दीवसमुद्दा नामधेज्जेहिं पं०, केवतिया णं भंते ! दीवसमुद्दा उद्धारसमएणं पं० ?, गो० ! जावतिया अट्ठाइज्जाणं सागरोवमाणं उद्धारसमया एवतिया दीवसमुद्दा उद्धारसमएणं पं० ।१९०। दीवसमुद्दा णं भंते ! किं पुढवीपरिणामा आउपरिणामा जीवपरिणामा पुग्गलपरिणामा ?, गो० ! पुढवीपरिणामावि आउ० जीव० पुग्गल०, दीवसमुद्देसु णं भंते ! सव्वपाणा सव्वभूया सव्वजीवा सव्वसत्ता पुढवीकाइयत्ताए जाव तसकाइयत्ताए उववण्णपुव्वा ?, हंता गो० ! असति अदुवा अणंतखुत्तो ।१९१।

☆☆☆इति दीवसमुद्दा समत्ता ॥ ☆☆☆ कतिविहे णं भंते ! ☆☆☆ इंदियविसए पोग्गलपरिणामे ☆☆☆ पं० ?, गो० ! पंचविहे इंदियविसए पोग्गलपरिणामे पं० तं०-सोतिंदियविसए जाव फासिंदियविसए, सोतेंदियविसए णं भंते ! पोग्गलपरिणामे कतिविहे पं० ?, गो० ! दुविहे पं० तं०-सुब्भिसद्वपरिणामे य दुब्भिसद्वपरिणामे य, एवं चक्खिंदियविसयादिएहिवि सुरूवपरिणामे य दुरूवपरिणामे य, एवं सुब्भिगंधपरिणामे य दुब्भिगंधपरिणामे य, एवं सुरसपरिणामे य दुरसपरिणामे य, एवं सुफासपरिणामे य दुफासपरिणामे य, से नूणं भंते ! उच्चावएसु सद्वपरिणामेसु उच्चावएसु रूवपरिणामेसु एवं गंधपरिणामेसु रसपरिणामेसु फासपरिणामेसु परिणममाणा पोग्गला परिणमंतीति वत्त सिया ?, हंता गो० ! उच्चावएसु सद्वपरिणामेसु परिणममाणा पोग्गला परिणमंतित्ति वत्तव्वं सिया, से णूणं भंते ! सुब्भिसद्दा पोग्गला दुब्भिसद्वत्ताए परिणमंति दुब्भिसद्दा पोग्गला सुब्भिसद्वत्ताए परिणमंति ?, हंता गो० ! सुब्भिसद्दा दुब्भिसद्वत्ताए परिणमंति दुब्भिसद्दा सुब्भिसद्वत्ताए परिणमंति, से णूणं भंते ! सुरूवा पुग्गला दुरूवत्ताए परिणमंति दुरूवा पुग्गला सुरूवत्ताए० ?, हंता गो० !, एवं सुब्भिगंधा पोग्गला दुब्भिगंधत्ताए

परिणमंति दुब्भिगंधा पोग्गला सुब्भिगंधत्ताए परिणमंति ?, हंता गो० !, एवं सुफासा दुफासत्ताए ?, सुरसा दूरसत्ताए० ?, हंता गो० ! १९२। ★★ देवाधिकारो (जोइस)★★ देवे णं भंते ! महिड्डीए जाव महाणुभागे पुव्वामेव पोग्गलं खिवित्ता पभू तमेव अणुपरियट्ठित्ताणं गिण्हित्ताए ?, हंता पभू, से केणट्ठेणं भंते ! एवं वुच्चति-देवे णं महिड्डीए जाव गिण्हित्ताए ? गो० ! पोग्गले खित्ते समणे पुव्वामेव सिग्घगती भवित्ता तओ पच्छा मंदगती भवति देवे णं महिड्डीए जाव महाणुभागे पुव्विं पच्छावि सीहे सीहगती (तुरिए तुरियगती) चेव से तेणट्ठेणं गो० ! एवं वुच्चति जाव एवं अणुपरियट्ठित्ताणं गेण्हित्ताए, देवे णं भंते ! महिड्डीए० बाहिए पोग्गले अपरियाइत्ता पुव्वामेव वालं अच्छित्ता अभेत्ता पभू गंठित्ताए ?, नो इणट्ठे समट्ठे, देवे णं भंते ! महिड्डीए० बाहिए पुग्गले अपरियाइत्ता पुव्वामेव वालं छित्ता भित्ता पभू गंठित्ताए ?, नो इणट्ठे समट्ठे, देवे णं भंते ! महिड्डीए० बाहिए पुग्गले परियाइत्ता पुव्वामेव वालं अच्छित्ता अभित्ता पभू गंठित्ताए ?, नो इणट्ठे समट्ठे, देवे णं भंते ! महिड्डीए जाव महाणुभागे बाहिए पोग्गले परियाइत्ता पुव्वामेव वालं छेत्ता भेत्ता पभू गंठित्ताए ? हंता पभू, तं चेव णं गंठिं छउमत्थे ण जाणति ण पासति एसुहुमं च णं गढिया, देवे णं भंते ! महिड्डीए० पुव्वामेव वालं अच्छेत्ता अभेत्ता पभू दीहीकरित्ताए वा हस्सीकरित्ताए वा ?, नो तिणट्ठे समट्ठे, एवं चत्तारिवि गमा, पढमबिइयभंगेसु अपरियाइत्ता एगंतरियगा अच्छेत्ता अभेत्ता, सेसं तहेव, तं चेव सिद्धिं छउमत्थे ण जाणति ण पासति एसुहुमं च णं दीहीकरेज्ज वा० १९३। अत्थि णं भंते ! चंदिमसूरियाणं हिट्ठिं पित्तारूवा अणुं पित्तारूवा अणुं पित्तारूवा उप्पिं पित्तारूवा अणुं पित्तारूवा ?, हंता अत्थि, से केणट्ठेणं भंते ! एवं वुच्चति-अत्थि णं चंदिमसूरियाणं जाव उप्पिं पित्तारूवा अणुं पित्तारूवा० ?, गो० ! जहा २ णं तेसिं देवाणं तवनियमबंभचेरवासाइं उस्सियाइं भवति तहा २ णं तेसिं देवाणं एयं पण्णायति अणुत्ते वा तुल्लत्ते वा, से एणट्ठेणं गो० ! अत्थि णं चंदिमसूरियाणं जाव उप्पिं पित्तारूवा अणुं पित्तारूवा १९४। एगमेगस्स णं भंते ! चंदिमसूरियस्स केवइओ णक्खत्तपरिवारो पं० केवइआ महागहा परिवारो केवइओ तारागणकोडाकोडिपरिवारो पं० ?, गो० ! एगमेगस्स णं चंदिमसूरियस्स- 'अट्ठासीतिं च गहा अट्ठावीसं च होइ नक्खत्ता । एगससीपरिवारो एत्तो ताराण वोच्छामि ॥८४॥ छावट्ठिसहस्साइं णव चेव सयाइं पंचसयराइं । एगससीपरिवारो तारागणकोडिकोणं ॥८५॥ १९५। जंबूदीवे णं भंते ! दीवे मंदरस्स पव्वयस्स पुरच्छिमिल्लाओ चरिमंताओ केवतियं अबाधाए जोतिसं चारं चरति ?, गो० ! एक्कारसहिं एक्कवीसेहिं जोयणसएहिं अबाधाए जोतिसं चारं चरति, एवं दक्खिणिल्लाओ पच्चत्थिमिल्लाओ उत्तरिल्लाओ, लोगंताओ भंते ! केवतियं अबाधाए जोतिसे पं० ?, गो० ! एक्कारसहिं एक्कारेहिं जोयणसतेहिं अबाधाए जोतिसे पं०, इमीसे णं भंते ! रयणप्पभाए पुढवीए बहुसमरमणिज्जाओ भूमिभागाओ केवतियं अबाधाए सव्वहेट्ठिल्ले ताराखे चारं चरति केवतियं अबाधाए सूरविमाणे चारं चरति केवतियं अबाधाए चंदविमाणे चारं चरति केवतियं अबाधाए सव्वउवरिल्ले ताराखे चारं चरति ?, गो० ! इमीसे णं रयणप्पभाए पुढवीए बहुसमरमणिज्जाओ सत्तहिं ण उएहिं जोयणसएहिं अबाधाए जोतिसं सव्वहेट्ठिल्ले ताराखे चारं चरति, अट्ठहिं जोयणसतेहिं अबाधाए सूरविमाणे चारं चरति, असीएहिं जोयणसतेहिं अबाधाए चंदविमाणे चारं चरति, नवहिं जोयणसएहिं अबाधाए सव्वउवरिल्ले ताराखे चारं चरति, सव्वहेट्ठिमिल्लाओ णं भंते ! ताराखेओ केवतियं अबाधाए सूरविमाणे चारं चरइ केवइयं अबाधाए चंदविमाणे चारं चरइ केवतियं अबाधाए सव्वउवरिल्ले ताराखे चारं चरइ ?, गो० ! सव्वहेट्ठिल्लाओ णं दसहिं जोयणेहिं सूरविमाणे चारं चरति णउतीए जोयणेहिं अबाधाए चंदविमाणे चारं चरति दसुत्तरे जोयणसते अबाधाए सव्वउवरिल्ले ताराखे चारं चरइ. सूरविमाणाओणं णं भंते ! केवतियं अबाधाए चंदविमाणे चारं चरति केवतियं सव्वउवरिल्ले ताराखे चारं चरति ?, गो० ! सूरविमाणाओ णं असीए जोयणेहिं चंदविमाणे चारं चरति, जोयणसयं अबाधाए सव्वउवरिल्ले ताराखे चारं चरति, चंदविमाणाओ णं भंते ! केवतियं अबाधाए सव्वउवरिल्ले ताराखे चारं चरति ?, गो० ! चंदविमाणाओ णं वीसाए जोयणेहिं अबाधाए सव्वउवरिल्ले ताराखे चारं चरइ, एवामेव सपुव्वावरेणं दसुत्तरसतजोयणबाहिल्ले तिरियमसंखेज्जे जोतिसविसए पं० १९६। जंबूदीवे णं भंते ! कयरे णक्खत्ते सव्वब्भित्तिल्लं चारं चरति कयरे नक्खत्ते

सव्वबाहिरिल्लं चारं चरति चरइ कयरे नक्खत्ते सव्वउवरिल्लं चारं कयरे नक्खत्ते सव्वहिट्टिल्लं चारं चरति ?, गो० ! जंबुदीवे णं दीवे अभीइनक्खत्ते सव्वब्भितरिल्लं चारं चरति मूले णक्खत्ते सव्वबाहिरिल्लं चारं चरइ साती णक्खत्ते सव्वोवरिल्लं चारं चरति भरणीणक्खत्ते सव्वहेट्टिल्लं चारं चरति । १९७। चंदविमाणे णं भंते ! किंसंठिते पं० ? गो० ! अब्धकविट्ठगसंठाणसंठिते सव्वफालितामए अब्भूसितपहसिते वण्णओ, एवं सूरविमाणेवि नक्खत्तविमाणेवि ताराविमाणेवि सव्वे अब्धकविट्ठसंठाणसंठिता. चंदविमाणे णं भंते ! केवतियं आयामविक्खंभेणं ? केवतियं परिक्खेवेणं ? केवतियं बाहल्लेणं पं० ?, गो० ! छप्पन्ने एगसट्ठिभागे जोयणस्स आयामविक्खंभेणं तं तिगुणं सविसेसं परिक्खेवेणं अट्ठावीसं एगसट्ठिभागे जोयणस्स बाहल्लेणं पं०, सूरविमाणस्सवि सच्चेव पुच्छा, गो० ! अडयालीसं एगसट्ठिभागे जोयणस्स आयामविक्खंभेणं तं तिगुणं सविसेसं परिक्खेवेणं चउवीसे एगसट्ठिभागे जोयणस्स बाहल्लेणं पं०, एवं गहविमाणेवि अब्धजोयणं आयामविक्खंभेणं तं तिगुणं सविसेसं परि० कोसं बाहल्लेणं, णक्खत्तविमाणे णं कोसं आयामविक्खंभेणं तं तिगुणं सविसेसं परि० अब्धकोसं बाहल्लेणं पं०, ताराविमाणे अब्धकोसं आयामविक्खंभेणं तं तिगुणं सविसेसं परि० पंचधणुसयाइं बाहल्लेणं पं० । १९८। चंदविमाणे णं भंते ! कति देवसाहस्सीओ परिवहंति ? गो० ! चंदविमाणस्स णं पुरच्छिमेणं सेयाणं सुभगाणं सुप्पभाणं संखतलविमलनिम्मलदधिघणगोखीरफेणरययणिगरप्पगासाणं (महुगुलियपिंगलक्खाणं) थिरलट्ठपउट्ठवट्ठपीवरसुसिलिट्ठसुविसिट्ठतिक्खदाढाविडं बितमुहाणं रत्तुप्पलपत्तमउयसुकुमालतालुजीहाणं पसत्थसत्थवेरूलियभिसंतकक्कडनहाणं विसालपीवरोरूपडिपुण्णविउलखंधाणं मिउविसयपसत्थसुहुमलक्खणविच्छिण्णकेसरसडोवसोभिताणं चंकमितललियपुलितगव्वितगतीणं उस्सियसुणिम्मियसुजायअप्फोडियणंगूलाणं वइरामयणक्खाणं वइरामयदन्ताणं वयरामयदाढाणं तवणिज्जजीहाणं तवणिज्जतालुयाणं तवणिज्जजोत्तगसुजोतितानं कामगमाणं पीतिगमाणं मणोगमाणं मणोरमाणं मणोहराणं अभियगतीणं अमियबलवीरियपुरिसकारपरक्कमाणं महता अप्फोडियसीहनातीयबोलकलयलरवेणं महुरेण मणहरेण य पूरिंता अंबरं दिसाओ य सोभयंता चत्तारि देवसाहस्सीओ सीहरूवधारीणं देवाणं पुरच्छिमिल्लं बाहं परिवहंति, चंदविमाणस्स णं दक्खिणेणं सेयाणं सुभगाणं सुप्पभाणं संखतलविमलनिम्मलदधिघणगोखीरफेणरययणिरप्पगासाणं वइरामयकुंभजुयलसुट्ठितपीवरवरवइसोडवट्ठियदित्त-सुरत्तपउमप्पकासाणं अब्भुण्णयमुहाणं तवणिज्जविसालचंचलचलंतचवलक्खणविमलुज्जल्लाणं मधुवण्णभिसंतणिद्धपिंगलपत्तलतिवण्णमणिरयणलोयणाणं अब्भुग्गतमउलमल्लियाणं धवलसरिससंठितणिव्वणदढकसिणफालियामयसुजायदंतमुसलोवसोभिताणं कंचणकोसीपविट्ठदंतगगविमलमणिरयणरूइर-पेरंतचित्तरूवगविरायितानं तवणिज्जविसालतिलगपमुहपरिमंडितानं णाणामणिरयणमुद्धगेवेज्जबद्धगलयवरभूसणाणं वेरूलियविचित्तदंडणिम्मलवइरा-मयतिक्खलट्ठअंकुसकुंभजुयलंतरोदियाणं तवणिज्जसुबद्धकच्छदप्पियबलुद्धराणं जंबूणयविमलघणमंडलवइरामयलालालियतालणाणामणिरय-णघण्टपासगरयतामयरज्जूबद्धलंबितघंटाजुयलमहुरसरमणहराणं अल्लीणपमाणजुत्तवट्ठियसुजातलक्खणपसत्थतवणिज्जवालगतपरिपुच्छणाणं उयवियपडिपुण्णकुम्मचलणलहुविक्रमाणं अंकामयक्खाणं तवणिज्जतालुयाणं तवणिज्जजीहाणं तवणिज्जजोत्तगसुजोतियाणं कामगमाणं पीतिगमाणं मणोगमाणं मणोरमाणं मणोहराणं अभियगतीणं अमियबलवीरियपुरिसकारपरक्कमाणं महया गंभीरगुलगुलाइयरवेणं महुरेणं मणहरेणं पूरेन्ता अंबरं दिसाओ य सोभयंता चत्तारि देवसाहस्सीओ गयरूवधारीणं देवाणं दक्खिणिल्लं बाहं परिवहंति, चंदविमाणस्स णं पच्चत्थिमेणं सेताणं सुभगाणं सुप्पभाणं चंकमियललियपुलितचलचलकउहसालीणं सण्णयपासाणं संगयपासाणं सुजायपासाणं मियमाइतपीणरइतपासाणं झसविहगसुजातकुच्छीणं पसत्थणिद्धमधुगुलितभिसंतपिंगलक्खाणं विसालपीवरोरूपडिपुण्णविपुलखंधाणं वट्ठपडिपुण्णविपुलकवोलकलिताणं घणणिचित्तसुबद्धलक्खणुण्ण-तईसिंआणंयवसभोद्धाणं चंकमितललितपुलियचक्कवालचलगव्वितगतीणं पीवरोरूवट्ठियसुसंठितकडीणं ओलंबपलंबलक्खणपमाणजुत्तपसत्थरमणिज्जवालगंडाणं समखुरवालधाणीणं समलिहिततिक्खग्गसिंगाणं तणुसुहुमसुजातणिद्धलोमच्छविधराणं उवचित्तमंसलविसालपडिपुण्णखुद्धपमुहपुंडराणं खंधपएससुंदराणं

वेरूलियभिसंतकडक्खसुणिरिक्खणाणं जुत्तप्पमाणप्पधाणलक्खणपसत्थरमणिज्जगगरगलसोभि ताणं घघरगसुबद्धकण्ठपरिमंडियाणं नाणामणिकणगरयणघण्टवेयच्छगसुकयरतियमालियाणं वरघंटागलगलियसोभंतस्सिरियाणं पउमुप्पलभसलसुरभिमालाविभूसिताणं वइरखुराणं विविधविकखुराणं फालियामयदंताणं तवणिज्जजीहाणं तवणिज्जतालुयाणं तवणिज्जजोत्तगसुजोतियाणं कामगमाणं पीतिगमाणं मणोगमाणं मणोरमाणं मणोहराणं अमितगतीणं अमियबलवीरियपुरिसयारपरक्कमाणं महया गंभीरगज्जियरवेणं मधुरेण मणहरेण य पूरेंता अंबरं दिसाओ य सोभयंता चत्तारि देवसाहस्सीओ वसभरूवधारीणं देवाणं पच्चत्थिमिल्लं बाहं परिवहंति, चंदविमाणस्स णं उत्तरेणं सेयाणं सुभगाणं सुप्पभाणं जच्चाणंतरमल्लिहायणाणं हरिमेलामदुलमल्लियच्छाणं घणणिचितसुबद्धलक्खणुण्णतचंकमि(चंचुच्चि)यललियपुलियचलचवलचंचलगतीणं लंघणवग्गणधावणधोरणतिवइजइणसिक्खितगईणं संणयपासाणं संगतपासाणं सुजायपासाणं मितमायितपीणरइयपासाणं झसविहगसुजातकुच्छीणं पीणपीवरवट्ठितसुसंठितकडीणं ओलंबपलंबलक्खणपमाणजुत्तपसत्थरमणिज्जवालंगंडाणं तणुसुहुमसुजायणिद्धलोमच्छविधराणं मिउविसयपसत्थसुहुमलक्खणविकिण्णकेसरवालिधराणं ललंतथासगललाडवरभूसाणाणं मुहमंडगोचूलचमरथासगपरिमंडियकडीणं तवणिज्जजीहाणं तवणिज्जतालुयाणं तवणिज्जजोत्तगसुजोतियाणं कामगमाणं पीतिगमाणं मणोगमाणं मणोरमाणं मणोहराणं अमितगतीणं अमियबलवीरियपुरिसयारपरक्कमाणं महया हेसियकिलकिलाइयरवेण मधुरेण मणहरेण य पूरेंता अंबरं दिसाओ य सोभयंता चत्तारि देवसाहस्सीओ हयरूवधारीणं उत्तरिल्लं बाहं परिवहंति, एवं सूरविमाणस्सवि पुच्छा, गो० ! सोलस देवसाहस्सीओ परिवहंति पुव्वकमेणं, एवं गहविमाणस्सवि पुच्छा, गो० ! अट्ट देवसाहस्सीओ परिवहंति पुव्वकमेणं दो देवाणं साहस्सीओ पुरत्थिमिल्लं बाहं परिवहंति दो देवाणं साहस्सीओ दक्खिणिल्लं० दो देवाणं साहस्सीओ पच्चत्थिमिल्लं० दो देवसाहस्सीओ हयरूवधारीणं उत्तरिल्लं बाहं परिवहंति, एवं णक्खत्तविमाणस्सवि पुच्छा, गो० ! चत्तारि देवसाहस्सीओ परिवहंति, तं०- सीहरूवधारीणं देवाणं एगा देवसाहस्सी पुरत्थिमिल्लं बाहं० एवं चउदिसिंपि, एवं तारागणाणवि णवरि दो देवसाहस्सीओ परिवहंति, तं०- सीहरूवधारीणं देवाणं पंचदेवसता पुरत्थिमिल्लं बाहं परिवहंति एवं चउदिसिंपि । १९९। एतेसिं णं भंते ! चंदिमसूरियगहगणणक्खत्तताराखूवाणं कयरे कयरेहिंतो सिग्घगती वा मंदगती वा ?, गो० ! चंदेहिंतो सूरा सिग्घगती सूरुहिंतो गहा सिग्घगती गहेहिंतो णक्खत्ता सिग्घघती णक्खत्तेहिंतो तारा सिग्घगती, सव्वप्पगती चंदा सव्वसिग्घगतीओ ताराओ । २००। एसिं णं भंते ! चंदिमजावताराखूवाणं कयरे कयरेहिंतो अप्पिड्डिया वा महिड्डिया वा ?, गो० ! ताराखूवेहिंतो णक्खत्ता महिड्डिया णक्खत्तेहिंतो गहा महिड्डिया गहेहिंतो सूरा महिड्डिया सूरुहिंतो चंदा महिड्डिया, सव्वप्पड्डिया तारा० सव्वमहिड्डिया चंदा । २०१। जंबूदीवे णं भंते ! दीवे ताराखूवस्स २ य एस णं केवतियं अबाधाए अंतरे पं० ?, गो० ! दुविहे अंतरे पं० तं०- वाघातिमे य निव्वाघाइमे य(पा० वाघाइए य निव्वाघाइए य) तत्थ णं जे से वाघातिमे से जह० दोण्णि य छावट्टे जोयणसए उक्को० बारस जोयणसहस्साइं दोण्णि य बायाले जोयणसए ताराखूवस्स २ य अबाहाए अंतरे पं०, तत्थ णं जे से णिव्वाघातिमे से जह० पंचधणुसयाइं उक्को० दो गाउयाइं ताराखूव जाव अंतरे पं० । २०२। चंदस्स णं भंते ! जोतिसिंदस्स जोतिसरन्नो कति अग्गमहिसीओ पं० ?, गो० ! चत्तारि अग्गमहिसीओ पं० तं०- चंदप्पभा दोसिणाभा अच्चिमाली पभंकरा, एत्थ णं एगमेगाए देवीए चत्तारि २ देवसाहस्सीओ परिवारे य, पभू णं ततो एगमेगा देवी अण्णाइं चत्तारि २ देवीसहस्साइं परिवारं विउव्वित्तए, एवामेव सपुव्वावरेणं सोलस देवसाहस्सीओ पं०, से तं तुडिए । २०३। पभू णं भंते ! चंदे जोतिसिंदे जोतिसराया चंदवडिंसए विमाणे सभाए सुधम्मए चंदंसि सीहासणंसि तुडिएण सद्धिं दिव्वाइं भोगभोगाइं भुंजमाणे विहरित्तए ?, णो तिणट्टे समट्टे, से केणट्टेणं भंते ! एवं वुच्चति-नो पभू चंदे० जोतिसराया चंदवडेंसए विमाणे सभाए सुधम्मए चंदंसि सीहासणंसि तुडिएणं सद्धिं दिव्वाइं भोगभोगाइं भुंजमाणे विहरित्तए ?, गो० ! चंदस्स जोतिसिंदस्स जोतिसरणो चंदवडेंसए विमाणे सभाए सुहम्मए जोतिसमाणवगंसि चेतियखंभंसि वइरामएसु गोलवट्टसमुग्गएसु बहुयाओ जिणसकहाओ सण्णिक्खत्ताओ चिट्ठंति जाओ णं चंदस्स जोतिसिंदस्स जोतिसरन्नो अन्नेसिं च बहूणं जोतिसियाणं देवाण य देवीण य अच्चणिज्जाओ

जाव पज्जुवासणिज्जाओ, तासिं पणिहाए नो पभू चंदे० जोतिसराया चंदवडिं० जाव चंदंसि सीहासणंसि जाव भुंजमाणे विहरित्तए, से एणणट्टेणं गो० ! नो पभू चंदे जोतिसराया चंदवडेंसए विमाणे सभाए सुधम्माए चंदंसि सीहासणंसि तुडिण सद्धिं दिव्वाइं भोगभोगाइं भुंजमाणे विहरित्तए, अदुत्तरं च णं गो० ! पभू चंदे जोतिसिदे जोतिसराया चंदवडिंसए विमाणे सभाए सुधम्माए चंदंसि सीहासणंसि चउहिं सामाणियसाहस्सीहिं जाव सोलसहिं आयरक्खदेवाणं साहस्सीहिं अत्तेहिं बहूहिं जोतिसिएहि देवेहिं देवीहि य सद्धिं संपरिवुडे महयाहयणट्टगीइवाइयतंतीतलतालतुडियघणमुइंगपडुप्पवाइयरवेणं दिव्वाइं भोगभोगाइं भुंजमाणे विहरित्तए, केवलं परियारतुडिण सद्धिं भोगभोगाइं बुद्धीए, नो चेव णं मेहुणवत्तियं । २०४। सूरस्स णं भंते ! जोतिसिंदस्स जोतिसरत्तो कइ अग्गमहिसीओ पं० ?, गो० ! चत्तारि अग्गमहिसीओ पं० तं०-सूरप्पभा आयवाभा अच्चिमाली पभंकरा, एवं अवसेसं जहा चंदस्स णवरिं सूरवडिंसए विमाणे सूरंसि सीहासणंसि तहेव सव्वेसिंपि गहाईणं चत्तारि अग्गमहिसीओ० तं०-विजया वेजयंती जयंती अपराजिया, तेसिंपि तहेव । २०५। चंदविमाणे णं भंते ! देवाणं केवतियं कालं ठिती पं० ?, एवं जहा ठितीपए तहा भाणियव्वा जाव ताराणं । २०६। एतेसिं णं भंते ! चंदिमसूरियगहणक्खत्तताराख्वाणं कयरे कयरेहिंतो० ?, गो ! चंदिमसूरिया एते णं दोण्णिवि तुल्ला सव्वत्थोवा संखेज्जगुणा णक्खत्ता संखेज्जगुणा गहा संखेज्जगुणाओ तारगाओ । २०७।

☆☆☆ जोइसुदेसओ समत्तो ॥ ☆☆☆ कहिं णं भंते ! वेमाणियाणं देवाणं विमाणा पं० कहिं णं भंते ! वेमाणिया देवा परिवसंति ?, जहा ठाणपदे तहा सव्वं भाणियव्वं णवरं परिसाओ भाणितव्वाओ जाव सक्के, अत्तेसिं च बहूणं सोधम्मकप्पवासीणं देवाण य देवीण य जाव विहरति । २०८। सक्कस्स णं भंते ! देविंदस्स देवरत्तो कति परिसाओ पं० ?, गो० ! तओ परिसाओ पं० तं०-समिता चंडा जाता, अब्भित्तारिया समिया मज्झिमिया चंडा बाहिरिया जाता, सक्कस्स णं भंते ! देविंदस्स देवरत्तो अब्भित्तारियाए परिसाए कति देवसाहस्सीओ पं० ?, मज्झिमियाए परि० तहेव बाहिरियाए, पुच्छा, गो० ! सक्कस्स देविंदस्स देवरत्तो अब्भित्तारियाए परिसाए बारस देवसाहस्सीओ पं० मज्झिमियाए परिसाए चउदस देवसाहस्सीओ पं० बाहिरियाए परिसाए सोलस देवसाहस्सीओ पं०, तहा अब्भित्तारियाए परिसाए सत्त देवीसयाणि मज्झिमियाए छच्च देवीसयाणि बाहिरियाए पंच देवीसयाणि पं०, सक्कस्स णं भंते ! देविंदस्स देवरत्तो अब्भित्तारियाए परिसाए देवाणं केवइयं कालं ठिई पं० ? एवं मज्झिमियाए बाहिरियाएवि, गो० सक्कस्स देविंदस्स देवरत्तो अब्भित्तारियाए परिसाए पंच पलिओवमाइं ठिती पं० मज्झिमियाए परिसाए चत्तारि पलिओवमाइं ठिती पं० बाहिरियाए परिसाए देवाणं तिन्नि पलिओवमाइं ठिती अब्भित्तारियाए परिसाए देवीणं तिन्नि पलिओवमाइं ठिती पं० मज्झिमियाए दुन्नि पलिओवमाइं ठिती पं० बाहिरियाए परिसाए एणं पलिओवमं ठिती पं०, अट्ठो सो चेव जहा भवणवासीणं, कहिं णं भंते ! ईसाणकाणं देवाणं विमाणा पं० ? तहेव सव्वं जाव ईसाणे एत्थ देविदे देव० जाव विहरति, ईसाणस्स णं भंते ! देविंदस्स देवरणो कति परिसाओ पं० ?, गो० ! तओ परिसाओ पं० तं०-समिता चंडा जाता, तहेव सव्वं णवरं अब्भित्तारियाए (१६५) परिसाए दस देवसाहस्सीओ पं० मज्झिमियाए परिसाए बारस देवसाहस्सीओ बाहिरियाए चउदस देवसाहस्सीओ, देवीणं पुच्छा, अब्भित्तारियाए णव देवीसता पं० मज्झिमियाए परिसाए अट्ठ देवीसता पं० बाहिरियाए परिसाए सत्त देवीसता पं०, देवाणं ठिती पं० ?, अब्भित्तारियाए परिसाए देवाणं सत्त पलिओवमाइं ठिती पं० मज्झिमियाए छ पलिओवमाइं बाहिरियाए पंच पलिओवमाइं ठिती पं०, देवीणं पुच्छा, अब्भित्तारियाए साइरेगाइं पंच पलिओवमाइं मज्झिमियाए परिसाए चत्तारि पलिओवमाइं ठिती पं० बाहिरियाए परिसाए तिण्णि पलिओवमाइं ठिती पं० अट्ठो तहेव भाणियव्वो, सणंकुमारणं पुच्छा तहेव ठाणपदगमेणं जाव सणंकुमारस्स तओ परिसाओ समिताई तहेव णवरिं अब्भित्तारियाए परिसाए अट्ठ देवसाहस्सीओ पं० मज्झिमियाए परिसाए दस देवसाहस्सीओ पं० बाहिरियाए परिसाए बारस देवसाहस्सीओ पं० अब्भित्तारियाए परिसाए देवाणं ठिती अब्धपंचमाइं सागरोवमाइं पंच पलिओवमाइं ठिती पं० मज्झिमियाए परिसाए अब्धपंचमाइं सागरोवमाइं चत्तारि पलिओवमाइं ठिती पं० बाहिरियाए परिसाए अब्धपंचमाइं सागरोवमाइं तिण्णि पलिओवमाइं ठिती पं०, अट्ठो सो चेव, एवं माहिंदस्सवि तहेव तओ परिसाओ णवरिं अब्भित्तारियाए परिसाए छ देवसाहस्सीओ पं० मज्झिमियाए अट्ठ देवसाहस्सीओ पं० बाहिरियाए दस देवसाहस्सीओ पं०, ठिती देवाणं अब्भित्तारियाए परिसाए अब्धपंचमाइं

सागरोवमाइं सत्त य पलिओ० ठिती पं०, मज्झिमियाए परिसाए पंच सागरोवमाइं छच्च पलिओवमाइं बाहिरियाए परिसाए अब्धपंचमाइं सागरोवमाइं पंच य पलिओवमाइं ठिती पं०, तहेव सव्वेसिं इंदाण ठाणपयगमेणं विमाणाणि वुच्चा ततो पच्छा परिसाओ पत्तेयं २ वुच्चति, बंभस्सवि तओ परिसाओ पं० अब्भितरियाए चत्तारि देवसाहस्सीओ मज्झिमियाए छ देवसाहस्सीओ बाहिरियाए अट्ठ देवसाहस्सीओ, देवाणं ठिती अब्भितरियाए परिसाए अब्धणवमाइं सागरोवमाइं पंच य पलिओवमाइं मज्झिमियाए परिसाए अब्धनवमाइं साग० चत्तारि पलिओवमाइं बाहिरियाए अब्धनवमाइं सागरोवमाइं तिण्णि य पलिओवमाइं अट्ठो सो चेव, लंतगस्सवि जाव तओ परिसाओ जाव अब्भितरियाए परिसाए दो चेव साहस्सीओ मज्झिमियाए चत्तारि देवसाहस्सीओ पं० बाहिरियाए छ देवसाहस्सीओ पं०, ठिती भाणियव्वा-अब्भितरियाए परिसाए देवाणं बारस सागरोवमाइं सत्त पलिओवमाइं ठिती पं० मज्झिमियाए परिसाए बारस सागरोवमाइं छच्च पलिओवमाइं ठिती पं० बाहिरियाए परिसाए बारस सागरोवमाइं पंच पलिओवमाइं ठिती पं०, महासुक्कस्सवि जाव तओ परिसाओ जाव अब्भितरियाए एगं देवसहस्सं मज्झिमियाए दो देवसाहस्सीओ पं० बाहिरियाए चत्तारि देवसाहस्सीओ, अब्भितरियाए परिसाए अब्धसोलस सागरोवमाइं पंच पलिओवमाइं मज्झिमियाए अब्धसोलस सागरोवमाइं चत्तारि पलिओवमाइं बाहिरियाए अब्धसोलस सागरोवमाइं तिण्णि पलिओवमाइं अट्ठो सो चेव, सहस्सारे पुच्छा जाव अब्भितरियाए परिसाए पंच देवसया मज्झिमियाए परि० एगा देवसाहस्सी बाहिरियाए दो देवसाहस्सीओ पं०, ठिती अब्भितरियाए अब्धद्वारस सागरोवमाइं सत्त पलिओवमाइं ठिती पं० एवं मज्झिमियाए अब्धद्वारस छप्पलिओवमाइं बाहिरियाए अब्धद्वारस सागरोवमाइं पंच पलिओवमाइं, अट्ठो सो चेव, आणयपाणयस्सवि पुच्छा जाव तओ परिसाओ णवरि अब्भितरियाए अड्ढाइज्जा देवसया मज्झिमियाए पंच देवसया बाहिरियाए एगा देवसाहस्सी ठिती अब्भितरियाए एगूणवीस सागरोवमाइं पंच य पलिओवमाइं एवं मज्झि० एगोणवीसं सागरोवमाइं चत्तारि य पलिओवमाइं बाहिरियाए परिसाए एगूणवीसं सागरोवमाइं तिण्णि य पलिओवमाइं ठिती अट्ठो सो चेव, कहिं णं भंते ! आरणअच्युयाणं देवाणं तहेव अच्युए सपरिवारे जाव विहरति, अच्युयस्स णं देविंदस्स तओ परिसाओ पं० अब्भितरपरि० देवाणं पणवीसं सयं मज्झिम० अड्ढाइज्जा सया बाहिरियाए पंचसया अब्भितरियाए एक्कवीसं सागरोवमा सत्त य पलिओवमाइं मज्झि० एक्कवीससाग० छप्पलि० बाहिरि० एकवीसं सागरो० पंच य पलिओवमाइं ठिती पं०, कहिं णं भंते ! हेट्ठिमगेवेज्जगाणं देवाणं विमाणा पं० कहिं णं भंते ! हेट्ठिमगेवेज्जगा देवा परिवसंति ?, जहेव ठाणपए तहेव, एवं मज्झिमगेवेज्जगा उवरिमगेविज्जगा अणुत्तरा य जाव अहमिंदा नामं ते देवा पं० समणाउसो ! ।२०९।

☆☆☆ पढमो वेमाणियउद्देसओ, प्र० ३ वे० उ० १ ॥☆☆☆ सोहम्मीसाणेसु णं कप्पेसु विमाणपुढवी किंपइट्ठिया पं० ?, गो० ! घणोदहिपइट्ठिया, सणंकुमारमाहिदेसु कप्पेसु विमाणपुढवी किंपइट्ठिया पं० ?, गो० ! घणवायपइट्ठिया पं०, बंभलोए णं भंते ! कप्पे विमाणपुढवीणं पुच्छा, घणवायपइट्ठिया पं०, लंतए णं भंते ! पुच्छा, गो० ! तदुभयपइट्ठिया, महासुक्कसहस्सारेसुवि तदुभयपइट्ठिया, आणयजावअच्युएसु णं भंते ! कप्पेसु पुच्छा, ओवासंतरपइट्ठिया, गेविज्जविमाणपुढवीणं पुच्छा, गो० ! ओवासंतरपइट्ठिया, अणुत्तरोववाइयपुच्छा ओवासंतरपइट्ठिया ।२१०। सोहम्मीसाणकप्पेसु विमाणपुढवी केवइयं बाहल्लेणं पं० ?, गो० ! सत्तावीसं जोयणसयाइं बाहल्लेणं पं०, एवं पुच्छा. सणंकुमारमाहिदेसु छव्वीसं जोयणसयाइं बंभलंतए पंचवीसं महासुक्कसहस्सारेसु चउवीसं आणयपाणयारणच्युएसु तेवीसं सयाइं गेविज्जविमाणपुढवी बावीसं अणुत्तरविमाणपुढवी एक्कवीसं जोयणसयाइं बाहल्लेणं ।२११। सोहम्मीसाणेसु णं भंते ! कप्पेसु विमाणा केवइयं उड्ढंउच्चत्तेणं पं० ?, गो० ! पंच जोयणसयाइं उड्ढंउच्चत्तेणं सणंकुमारमाहिदेसु छजोयणसयाइं. बंभलंत तएसु सत्त महासुक्कसहस्सारेसु अट्ठ आणयपाणएसु आरणच्युएसु नव, गेवेज्जविमाणाणं भंते ! केवइयं उड्ढंउ० ?, दस जोयणसयाइं, अणुत्तरविमाणाणं० एक्कारस जोयणसयाइं उड्ढंउच्चत्तेणं ।२१२। सोहम्मीसाणेसु णं भंते ! कप्पेसु विमाणा किंसंठिया पं० ?, गो० ! दुविहा पं० तं०-आवलियापविट्ठा य आवलियाबाहिरा य, तत्थ णं जे ते आवलियापविट्ठा ते तिविहा पं० तं०-वट्ठा तंसा चउरंसा, तत्थ णं जे ते आवलियबाहिरा ते णं णाणासंठिया पं०, एवं जाव गेविज्जविमाणा,

अणुत्तरोववाइयविमाणा दुविहा पं० तं०-वट्टे य तंसा य । २१३। सोहम्मीसाणेसु णं भंते ! कप्पेसु विमाणा केवतियं आयामविकखंभेणं केवतियं परिकखेवेणं पं० ?, गो० ! दुविहा पं० तं०-संखेज्जवित्थडा य असंखेज्जवित्थडा य, जहा णरगा तहा जाव अणुत्तरोववातिया संखेज्जवित्थडे य असंखेज्जवित्थडा य, तत्थ णं जे से संखेज्जवित्थडे से जंबुदीवप्पमाणे असंखेज्जवित्थडा असंखेज्जाइं जोयणसयाइं जाव परिकखेवेणं पं०, सोहम्मीसाणेसु णं भंते ! विमाणा कतिवण्णा पं० ?, गो० ! पंचवण्णा पं० तं०-किण्हा नीला लोहिया हालिद्दा सुक्किल्ला, सणंकुमारमाहिदेसु चउवण्णा नीला जाव सुक्किल्ला, बंभलोगलंतएसुवि तिवण्णा-लोहिया जाव सुक्किल्ला, महासुक्कसहस्सारेसु दुवण्णा-हालिद्दा य सुक्किल्ला य, आणयपाणतारणच्चुएसु सुक्किल्ला, गेविज्जविमाणा सुक्किल्ला अणुत्तरोववातियविमाणा परमसुक्किल्ला वण्णेणं पं०, सोहम्मीसाणेसु णं भंते ! कप्पेसु विमाणा केरिसया पभाए पं० ?, गो० ! णिच्चालोआ णिच्चुज्जोया सयं पभाए पं० जाव अणुत्तरोववातियविमाणा णिच्चालोआ णिच्चुज्जोतासयं पभाए पं०, सोहम्मीसाणेसु णं भंते ! कप्पेसु विमाणा केरिसया गंधेणं पं० ?, गो० ! से जहानामए-कोट्टपुडाण वा जाव गंधेणं पं०, एवं जाव एत्तो इट्ठयरागा चेव जाव अणुत्तरविमाणा, सोहम्मीसाणेसु विमाणा केरिसया फासेणं पं० ?, गो० ! से जहानामए-आइणेति वा रूतेति वा सव्वो फासो भाणियव्वो जाव अणुत्तरोववातियविमाणा, सोहम्मीसाणेसु णं भंते ! कप्पेसु विमाणा केमहालया पं० ?, गो० ! अयण्णं जंबुदीवे सव्वदीवसमुद्दाणं० सो चेव गमो जाव छम्मासे वीइवएज्जा जाव अत्थेगतिया विमाणावासा नो वीइवएज्जा जाव अणुत्तरोववातियविमाणा अत्थेगतियं विमाणं वीतिवएज्जा अत्थेगतिए नो वीइवएज्जा, सोहम्मीसाणेसु णं भंते ! विमाणा किंमया पं० ?, गो० ! सव्वरयणामया पं०, तत्थ णं बहवे जीवा य पोग्गला य वक्कमंति विउक्कमंति चयंति उवचयंति, सासया णं ते विमाणा दव्वट्ठयाए जाव फासपज्जवेहिं असासता जाव अणुत्तरोववातिया विमाणा, सोहम्मीसाणेसु णं भंते ! देवा कओहिंतो उववज्जंति ?, उववातो नेयव्वो जहा वक्कंतीए तिरियमणुएसु पंचेदिएसु संमुच्छिमवज्जिएसु उववाओ वक्कंतीगमेणं जाव अणुत्तरो०, सोहम्मीसाणेसु देवा एगसमएणं केवतिया उववज्जंति ?, गो० ! जह० ! एक्को वा दो वा तिण्णि वा उक्को० संखेज्जा वा असंखेज्जा वा उववज्जंति, एवं जाव सहस्सारे, आणतादी गेवेज्जा अणुत्तरा य एक्को वा दो वा तिण्णि वा उक्को० संखेज्जा वा उववज्जंति, सोहम्मीसाणेसु णं भंते ! देवा समए २ अवहीरमाणा २ केवतिएणं कालेणं अवहिया सिया ?, गो० ! तेणं असंखेज्जा समए २ अवहीरमाणा २ असंखेज्जाहिं उस्सप्पिणीहिं अवहीरंति नो चेव णं अवहिया सिया जाव सहस्सारो, आणतादिगेसु चउसुवि, गेवेजेसु अणुत्तरेसु य समए २ जाव केवतिकालेणं अवहिया सिया ?, गो० ! ते णं असंखेज्जा समए २ अवहीरमाणा २ पलिओवमस्स असंखेज्जतिभागमेत्तेणं अवहीरंति, नो चेव णं अवहिया सिया, सोहम्मीसाणेसु णं भंते ! कप्पेसु देवाणं केमहालया सरीरोगाहणा पं० ?, गो० ! दुविहा सरीरा पं० तं०-भवधारणिज्जा य उत्तरवेउव्विया य, तत्थ णं जे से भवधारणिज्जे से जह० अंगुलस्स असंखेज्जतिभागो उक्को० सत्त रयणीओ, तत्थ णं जे से उत्तरवेउव्विए से जह० अंगुलस्स संखेज्जतिभागो उक्को० जोयणसतसहस्सं, एवं एक्केक्का ओसारेत्ताणं जाव अणुत्तराणं एक्का रयणी, गेविज्जणुत्तराणं एगे भवधारणिज्जे सरीरे उत्तरवेउव्विया नत्थि । २१४। सोहम्मीसाणेसु णं देवाणं सरीरगा किंसंघयणी पं० ?, गो० ! छण्हं संघयणाणं असंघयणी पं०, नेवट्ठि नेव छिरा नवि ण्हारू णेव संघयणमत्थि, जे पोग्गला इट्ठा कंता जाव ते तेसिं संघातत्ताए परिणमंति जाव अणुत्तरोववातिया, सोहम्मीसाणेसु देवाणं सरीरगा किंसंठिता पं० ?, गो० ! दुविहा सरीरा पं० तं०-भवधारणिज्जा य उत्तरवेउव्विया य, तत्थ णं जे ते भवधारणिज्जा ते समचउरंसंठाणसंठिता पं०, तत्थ णं जे ते उत्तरवेउव्विया ते णाणासंठाणसंठिया पं० जाव अच्चुओ, अवेउव्विया गेविज्जणुत्तरा, भवधारणिज्जा समचउरंसंठाणसंठिता, उत्तरवेउव्विया नत्थि । २१५। सोहम्मीसाणेसु देवा केरिसया वण्णेणं पं० ?, गो० ! कणगत्तयरत्ताभा वण्णेणं पं०, सणंकुमारमाहिदेसु णं पउमपम्हगोरा वण्णेणं पं०, बंभलोगे णं भंते ! गो० ! अल्लमधुगवण्णाभा वण्णेणं पं०, एवं जाव गेवेज्जा, अणुत्तरोववातिया परमसुक्किल्ला वण्णेणं पं०, सोहम्मीसाणेसु णं भंते ! कप्पेसु देवाणं सरीरगा केरिसया गंधेणं पं० ?, गो० ! से जहानामए-कोट्टपुडाण वा तदेव सव्वं जाव मणामतरता चेव गंधेणं पं० जाव अणुत्तरोववाइया, सोहम्मीसाणेसु देवाणं सरीरगा केरिसया फासेणं पं० ?, गो० ! थिरमउयणिद्धसुकुमालच्छवी

फासेणं पं०, एवं जाव अणुत्तरोववातिया, सोहम्मीसाणदेवाणं केरिसगा पुग्गला उस्सासत्ताए परिणमंति ?, गो० ! जे पोग्गला इट्ठा कंता जाव ते तेसिं उस्सासत्ताए परिणमंति जाव अणुत्तरोववातिया, एवं आहारत्ताएवि जाव अणुत्तरोववातिया, सोहम्मीसाणदेवाणं कति लेस्साओ पं० ?, गो० ! एगा तेउलेस्सा पं०, सणंकुमारमाहिदेसु एगा पम्हलेस्सा, एवं बंभलोगेवि पम्हा, सेसेसु एक्का सुक्कलेस्सा, अणुत्तरोववातियाणं एक्का परमसुक्कलेस्सा, सोहम्मीसाणदेवा किं सम्मदिट्ठी मिच्छादिट्ठी सम्मामिच्छादिट्ठी ?, तिण्णिवि, जाव अंतिमगेवेज्जा देवा सम्मदिट्ठीवि मिच्छादिट्ठीवि सम्मामिच्छादिट्ठीवि. अणुत्तरोववातिया सम्मदिट्ठी णो मिच्छादिट्ठी णो सम्मामिच्छादिट्ठी, सोहम्मीसाणा किं णाणी अण्णाणी ?, गो० ! दोवि, तिण्णि णाणा तिण्णि अण्णाणा णियमा जाव गेवेज्जा, अणुत्तरोववातिया नाणी नो अण्णाणी तिण्णि णाणा णियमा, तिविधे जोगे दुविहे उवयोगे सव्वेसिं जाव अणुत्तरा । २१६। सोहम्मीसाणा देवा ओहिणा केवतियं खेत्तं जाणंति पासंति ?, गो० ! जह० अंगुलस्स असंखेज्जतिभागं उक्को० अवही जाव रयणप्पभा पुढवी उड्ढं जाव साइं विमाणाइं तिरियं जाव असंखेज्जा दीवसमुद्दा, एवं 'सक्कीसाणा पढमं दोच्चं च सणंकुमारमाहिंदा । तच्चं च बंभलंतग सुक्कसहस्सारग चउत्थी ॥८६॥ आणयपाणयकप्पे देवा पासंति पंचमिं पुढवी । तं चेव आरणच्चुय ओहीनाणेण पासंति ॥८७॥ छट्ठीं हेट्ठिममज्झिमगेवेज्जा सत्तमिं च उवरिल्ला । संभिण्णलोगनालिं पासंति अणुत्तरा देवा ॥८८॥ २१७ । सोहम्मीसाणेसु णं भंते ! देवाणं कति समुग्घाता पं० ?, गो० ! पंय समुग्घाता पं० तं०-वेदणासमुग्घाते कसाय० मारणंतिय० वेउव्विय० तेजससमुग्घाते. एव जाव अच्चुए, गेवेज्जाणं आदिल्ला तिण्णि समुग्घाता पं०, सोहम्मीसाणदेवा केरिसयं खुधपिवासं पच्चणुब्भवमाणा विहरंति ?, गो० ! णत्थि खुधपिवासं पच्चणुब्भवमाणा विहरंति जाव अणुत्तरोववातिया, सोहम्मीसाणेसु णं भंते ! कप्पेसु देवा एगत्तं पभू विउव्वित्तए पुहुत्तं पभू विउव्वित्तए ?, हंता पभू, एगत्तं विउव्वेमाणा एगिंदियरूवं वा जाव पंचिंदियरूवं वा पुहुत्तं विउव्वेमाणा एगिंदियरूवाणि वा जाव पंचिंदियरूवाणि वा, ताइं संखेज्जाइंपि असंखेज्जाइंपि सरिसाइंपि असरिसाइंपि संबद्धाइंपि असंबद्धाइंपि रूवाइं विउव्वंति ता अप्पणा जहिच्छियाइं कज्जाइं करंति जाव अच्चुओ, गेवेज्जणुत्तरोववातिया देवा किं एगत्तं पभू विउव्वित्तए पुहुत्तं पभू विउव्वित्तए ?, गो० ! एगत्तंपि पुहुत्तंपि, नो चेव णं संपत्तीए विउव्विंसु वा विउव्वंति वा विउव्विस्संति वा, सोहम्मीसाणदेवा केरिसयं सायासोक्खं पच्चणुब्भवमाणा विहरंति ?, गो० ! मणुण्णा सद्दा जाव मणुण्णा फासा जाव गेविज्जा, अणुत्तरोववाइया अणुत्तरा सद्दा जाव फासा, सोहम्मीसाणेसु देवाणं केरिसगा इड्ढी पं० ?, गो० ! महिड्ढीया महज्जुइया जाव महाणुभागा इड्ढीए पं० जाव अच्चुओ, गेवेज्जणुत्तरा य सव्वे महिड्ढीया जाव सव्वे महाणुभागा अणिंदा जाव अहमिंदा णामं ते देवगणा पं० समणाउसो ! । २१८। सोहम्मीसाणा देवा केरिसया विभूसाए पं० ?, गो० ! दुविहा पं० तं०-वेउव्वियसरीरा य अवेउव्वियसरीरा य. तत्थ णं जे ते वेउव्वियसरीरा ते हारविराइयवच्छा जाव दस दिसाओ उज्जोवेमाणा पभासेमाणा जाव पडिरूवा, तत्थ णं जे ते अवेउव्वियसरीरा ते णं आभरणवसणरहिता पगतित्था विभूसाए पं०, सोहम्मीसाणेसु णं भंते ! कप्पेसु देवीओ केरिसियाओ विभूसाए पं० ?, गो० ! दुविधाओ पं० तं०-वेउव्वियसरीराओ य अवेउव्वियसरीराओ य, तत्थ णं जाओ वेउव्वियसरीराओ ताओ सुवण्णसद्दालाओ सुवण्णसद्दालाइं वत्थाइं पवरपरहिताओ चंदाणणाओ चंदविलासिणीओ चंदद्धसमणिडालाओ सिंगारागारचारूवेसाओ संगय जाव पासातीयाओ जाव पडिरूवाओ, तत्थ णं जाओ अवेउव्वियसरीराओ ताओ णं आभरणवसणरहियाओ पगतित्थाओ विभूसाए पं०, सेसेसु देवा, देवीओ णत्थि, जाव अच्चुओ, गेवेज्जगदेवा, केरिसया विभूसाए० ?, गो० ! आभरणवसणरहिया०. एवं देवी णत्थि भाणियव्वं, पगतित्था विभूसाए पं०, एवं अणुत्तरावि । २१९। सोहम्मीसाणेसु देवा केरिसए कामभोगे पच्चणुब्भवमाणा विहरंति ?, गो० ! इट्ठ सद्दा इट्ठा रूवा जाव फासा, एवं जाव गेवेज्जा, अणुत्तरोववातियाणं अणुत्तरा सद्दा जाव अणुत्तरा फासा । २२०। ठिती सव्वेसिं भाणियव्वा, देवित्ताएवि अणंतं चयंति चइत्ता जे जहिं गच्छंति तं भाणियव्वं । २२१। सोहम्मीसाणेसु णं भंते ! कप्पेसु सव्वपाणा सव्वभूया जाव सत्ता पुढवीकाइयत्ताए जाव वणस्सतिकाइयत्ताए देवत्ताए देवित्ताए आसणसयणजावभंडोवगरणत्ताए उववण्णपुव्वा ?. हंता गो० ! असइं अदुवा अणंतरखुत्तो, सेसेसु कप्पेसु एवं चेव णवरि नो चेव णं देवित्ताए जाव गेवेज्जगा, अणुत्तरोववातिएसुवि एवं, णो चेव णं देवत्ताए देवित्ताए य, सेत्तं देवा । २२२। नेरइयाणं भंते ! केवतियं कालं

ठिती पं० ?, गो० ! जह० दस वाससहस्साइं उक्को० तेत्तीसं सागरोवमाइं एवं सव्वेसिं पुच्छा, तिरिक्खजोणियाणं जह० अंतोमु० उक्को० तिन्नि पलिओवमाइं, एवं मणुस्साणवि, देवाणं जहा गेरतियाणं, देवणेरइयाणं जा चेव ठिती सच्चेव संचिट्ठणा, तिरिक्खजोणियस्स जह० अंतोमुहुत्तं उक्को० वणस्सतिकालो. मणुस्से पं० भंते ! मणुस्सेति कालतो केवच्चिरं होति ?, गो० ! जह० अंतोमुहुत्तं उक्को० तिन्नि पलिओवमाइं पुव्वकोडिपुहुत्तमब्भहियाइं, गेरइयमणुस्सदेवाणं अंतरं जह० अंतोमु० उक्को० वणस्सतिकालो, तिरिक्खजोणियस्सअंतरं जह० अंतोमुहुत्तं उक्को० सागरोवमसयपुहुत्तं साइरेगं । २२३। एतेसिं पं० भंते ! गेरइयाणं जाव देवाण य कयरे० ?, गो० ! सव्वत्थोवा मणुस्सा गेरइया असं० देवा असं० तिरिया अणंतगुणा, से तं चउव्विहा संसारसमावण्णगा जीवा । २२४

★☆☆॥ चउविहपडिवत्ती ॥

★☆☆प्रति० ३ वेमा० उ० २॥ तत्थ पं० जे ते एवमाहंसु-पंचविहा संसारसमावण्णगा जीवा पं० ते एवमाहंसु, तं०-एगिंदिया बेइंदिया तेइंदिया चउरिंदिया पंचिंदिया, से किं तं एगिंदिया ?, २ दुविहा पं० तं०-पज्जत्तगा य अपज्जत्तगा य. एवं जाव पंचिंदिया दुविहा-पज्जत्तगा य अपज्जत्तगा य, एगिंदियस्स पं० भंते ! केवइयं कालं ठिती पं० ?, गो० ! जह० अंतोमुहुत्तं उक्को० बावीसं वाससहस्साइं बेइंदिय० जह० अंतोमु० उक्को० बारस संवच्छराणि एवं तेइंदियस्स एगूणपण्णं राइंदियाणं चउरिंदियस्स छम्मासा पंचेदियस्स जह० अंतोमु० उक्को० तेत्तीसं सागरोवमाइं, अपज्जत्तएगिंदियस्स पं० केवतियं कालं ठिती पं० ?, गो० ! जह० अंतोमु० उक्को० अंतो०, एवं सव्वेसिं, पज्जत्तेगिंदियाणं जाव पंचिन्दियाणं पुच्छा, जह० अंतो० उक्को० बावीसं वाससहस्साइं अंतमुहुत्तोणाइं, एवं उक्कोसिया ठिती अंतोमुहुत्तोणा सव्वेसिं पज्जत्ताणं कायव्वा, एगिंदिए पं० भंते ! एगिंदिएत्ति कालओ केवच्चिरं होइ ?, गो० ! जह० अंतोमु० उक्को० वणस्सतिकालो, बेइंदियस्स पं० भंते ! ० जह० अंतोमु० उक्को० संखेज्जं कालं जाव चउरिंदिए संखेज्जं कालं पंचेदिए पं० भंते ! पंचिंदिएत्ति० केवच्चिरं०, गो० ! जह० अंतोमु० उक्को० सागरोवमसयपुहुत्तं साइरेगं, एगिंदिए पं० अपज्जत्तए पं० भंते !, गो० ! जह० अंतोमु० उक्को० अंतोमुहुत्तं जाव पंचिंदियापज्जत्ता, पज्जत्तएगिंदिए पं० भंते ! ० ?, गो० ! जह० अंतोमुहुत्तं उक्को० संखिज्जाइं वाससहस्साइं, एवं बेइंदिएवि णवरिं संखेज्जाइं वासाइं, तेइंदिए पं० भंते ! ० संखेज्जा राइंदिया, चउरिंदिए पं० संखेज्जा मासा, पज्जत्तपंचिंदिए० सागरोवमसयपुहुत्तं सातिरेगं, एगिंदियस्स पं० भंते ! अंतरं०, गो० ! जह० अंतोमुहुत्तं उक्को० दो सागरोवमसहस्साइं संखेज्जवासमब्भहियाइं, बेइंदियस्स पं० अंतरं होति ?, गो० ! जह० अंतोमुहुत्तं उक्को० वणस्सइकालो, एवं तेइंदियस्स चउरिंदियस्स पंचेदियस्स, अपज्जत्तगाणं एवं चेव, पज्जत्तगाणवि एवं चेव । २२५। एएसिं पं० भंते ! एगिंदियबेइं० तेइं० चउ० पंचिंदियाणं कयरे० ?, गो० ! सव्वत्थोवा पंचेदिया चउरिंदिया विसे० तेइंदिया विसे० बेइंदिया विसे० एगिंदिया अणंतगुणा, एवं अपज्जत्तगाणं सव्वत्थोवा पंचेदिया अपज्जत्तगा चउरिंदिया अपज्जत्तगा विसे० तेइंदिया अपज्जत्तगा विसे० बेइंदिया अपज्जत्तगा विसे० एगिंदिया अपज्जत्तगा अणंतगुणा सइंदियाप० वि०, सव्वत्थोवा चउरिंदिया पज्जत्तगा पंचेदिया पज्जत्तगा विसे० बेइंदियपज्जत्तगा विसे० तेइंदियपज्जत्तगा विसे० एगिंदियपज्जत्तगा अणंतगुणा सइंदिया पज्जत्तगा विसे०, एतेसिं पं० भंते ! सइंदियाणं पज्जत्तगपज्जत्तगाणं कयरे० ?, गो० ! सव्वत्थोवा सइंदिया अपज्जत्तगा सइंदिया पज्जत्तगा संखेज्जगुणा, एवं एगिंदियावि, एतेसिं पं० भंते ! बेइंदियाणं पज्जत्तापज्जत्तगाणं अप्पाबहु ?, गो० ! सव्वत्थोवा बेइंदिया पज्जत्तगा अपज्जत्तगा असंखेज्जगुणा, एवं तेंदियचउरिंदियपंचेदियावि, एएसिं पं० भंते ! एगिंदियाणं बेइंदि० तेइंदि० चउरिंदि० पंचेदियाण य पज्जत्तगाण य अपज्जत्तगाण य कयरे० ?, गो० ! सव्वत्थोवा चउरिंदिया पज्जत्तगा पंचेदिया पज्जत्तगा विसे० बेइंदिया पज्जत्तगा विसे० तेइंदिया पज्जत्तगा विसे० पंचेदिया अपज्जत्तगा असंखेज्जगुणा चउरिंदिया अपज्जत्ता विसे० तेइंदियअपज्जत्ता विसे० बेइंदिया अपज्जत्ता विसे० एगिंदियअपज्जत्ता अणंतगुणा सइंदिया अपज्जत्ता विसे० एगिंदियपज्जत्ता संखेज्जगुणा सइंदियपज्जत्ता विसे० सइंदिया विसे० । सेत्तं पंचविधा संसारसमावण्णगा जीवा । २२६॥ प्र० ४ ॥ तत्थ पं० जे ते एवमाहंसु छव्विहा संसारसमावण्णगा जीवा पं० ते एवमाहंसु, तं०-पुढवीकाइया आउ० तेउ० वाउ० वणस्सति० तसकाइया, से किं तं पुढवी० ?, दुविहा पं० तं०-सुहुमपुढविकाइया य बादरपुढवीकाइया य, सुहुमपुढवीकाइया

दुविहा पं० तं०-पज्जत्तगा य अपज्जत्तगा य, एवं बायरपुढवीकाइयावि, एवं चउक्कएणं भेएणं आउतेउवाउवणस्सतिकाइया णेयव्वा, से किं तं तसकाइया ?, २ दुविहा पं० तं०-पज्जत्तगा य अपज्जत्तगा य । २२७। पुढवीकाइयस्स णं भंते ! केवतियं कालं ठिती पं० ?, गो० ! जह० अंतो० उक्को० बावीसं वाससहस्साइं, एवं सव्वेसिं ठिती णेयव्वा, तसकाइयस्स जह० अंतो० उक्को० तेत्तीसं सागरोवमाइं, अपज्जत्तगाणं सव्वेसिं जह० उक्को० अंतो०, पज्जत्तगाणं सव्वेसिं उक्कोसिया ठिती अंतोमुहुत्तऊणा कायव्वा । २२८। पुढवीकाइए णं भंते ! पुढवीकाइयत्तिकालतो केवचिरं होइ ?, गो० ! जह० अंतो० उक्को० असंखेज्जं कालं जाव असंखेज्जा लोया, एवं जाव आउ० तेउ० वाउक्काइयाणं, वणस्सइकाइयाणं अणंतं कालं जाव आवलियाए असंखेज्जतिभागो, तसकाइए णं भंते ! ० जह० अंतोमु० उक्को० दो सागरोवमसहस्साइं संखेज्जवासमब्भहियाइं, अपज्जत्तगाणं छण्हवि जहण्णेणवि उक्कोसेणवि अंतोमुहुत्तं, पज्जत्तगाणं-‘वाससहस्सा संखा पुढविदगाणिलतरूण पज्जत्ता । तेऊ राइंदि संखा तस सागरसतपुहुत्ताइं ॥ ८९ ॥ पज्जत्तगाणवि सव्वेसिं एवं, पुढवीकाइयस्स णं भंते ! केवतियं कालं अंतरं होति ?, गो० ! जह० अंतो० उक्को० वणप्फतिकालो, एवं आउतेउवाउकाइयाणं वणस्सइकालो, तसकाइयाणवि, वणस्सइकाइयस्स पुढवीकाइयकालो, एवं अपज्जत्तगाणवि वणस्सइकालो, वणस्सईणं पुढवीकालो, पज्जत्तगाणवि एवं चेव वणस्सइकालो, पज्जत्तवणस्सईणं पुढवीकालो । २२९। अप्पाबहुयं-सव्वत्थोवा तसकाइया तेउक्काइया असंखेज्जगुणा पुढवीकाइया विसेसाहिया आउकाइया विसे० वाउक्काइया विसे० वणस्सतिकाइया अणंतगुणा, एवं अपज्जत्तगावि पज्जत्तगावि, एतेसिं णं भंते ! पुढवीकाइयाणं पज्जत्तगाण य अपज्जत्तगाण य कयरे० ?, गो० ! सव्वत्थोवा पुढवीकाइया अपज्जत्तगा पुढवीकाइया पज्जत्तगा संखेज्जगुणा, एतेसिं णं०, सव्वत्थोवा आउक्काइया अपज्जत्तगा पज्जत्तगा संखेज्जगुणा जाव वणस्सतिकाइयावि, सव्वत्थोवा तसकाइया पज्जत्तगा तसकाइया अपज्जत्तगा असंखेज्जगुणा, एएसिं णं भंते ! पुढवीकाइयाणं जाव तसकाइयाणं पज्जत्तगाणं अपज्जत्तगाण य कयरे० ?, सव्वत्थोवा तसकाइया पज्जत्तगा तसकाइया अपज्जत्तगा असंखेज्जगुणा तेउक्काइया अपज्जत्ता असंखेज्जगुणा पुढविक्काइया आउक्काइया वाउक्काइया अपज्जत्तगा विसेसाहिया तेउ-(१६६) क्काइया पज्जत्तगा संखेज्जगुणा पुढविआउवाउपज्जत्तगा विसे० वणस्सतिकाइया अपज्जत्तगा अणंतगुणा तसकाइया अपज्जत्तगा विसे० वणस्सतिकाइया पज्जत्तगा संखेज्जगुणा सकाइया पज्जत्तगा विसे० । २३०। सुहुमस्स णं भंते ! केवतियं कालं ठिती पं० ?, गो० ! जहन्नेणं अंतोमुहुत्तं उक्कोसेणवि अंतोमुहुत्तं, एवं जाव सुहुमणिओयस्स, एवं अपज्जत्तगाणवि पज्जत्तगाणवि जहण्णेणवि उक्कोसेणवि अंतोमुहुत्तं । २३१। सुहुमे णं भंते ! सुहुमेत्ति० ?, गो० ! जहण्णेणं अंतोमुहुत्तं उक्कोसेणं असंखेज्जकालं जाव असंखेज्जा लोया, सव्वेसिं पुढविकालो जाव सुहुमणिओयस्स पुढवीकालो, अपज्जत्तगाणं सव्वेसिं जहण्णेणवि उक्कोसेणवि अंतोमुहुत्तं, एवं पज्जत्तगाणवि सव्वेसिं जहण्णेणवि उक्कोसेणवि अंतोमुहुत्तं । २३२। सुहुमस्स णं भंते ! केवतियं कालं अंतरं होति ?, गो० ! जहण्णेणं अंतोमु० उक्को० असंखेज्जं कालं कालओ असंखेज्जाओ उस्सप्पिणीओसप्पिणीओ खेत्तओ अंगुलस्स असंखेज्जतिभागो, सुहुमवणस्सतिकाइयस्स सुहुमणिओयस्सवि जाव असंखेज्जभागो, पुढवीकाइयाणं वणस्सतिकालो, एवं अपज्जत्तगाणं पज्जत्तगाणवि । २३३। एवं अप्पाबहुणं, सव्वत्थोवा सुहुमतेउकाइया सुहुमपुढवीकाइया विसेसाहिया सुहुमआउवाऊ विसेसाहिया सुहुमणिओया असंखेज्जगुणा सुहुमवणस्सतिकाइया अणंतगुणा सुहुमा विसेसाहिया, एवं अपज्जत्तगाणं, पज्जत्तगाणवि एवं चेव, एतेसिं णं भंते ! सुहुमाणं पज्जत्तापज्जत्ताणं कयरे० ?, सव्वत्थोवा सुहुमा अपज्जत्तगा संखेज्जगुणा पज्जत्तगा एवं जाव सुहुमणिगोया, एएसिं णं भंते ! सुहुमाणं सुहुमपुढवीकाइयाणं जाव सुहुमणिओयाण य पज्जत्तापज्जत्ताणं कयरे० ?, सव्वत्थोवा सुहुमतेउकाइया अपज्जत्तगा सुहुमपुढवीकाइया अपज्जत्तगा विसेसाहिया सुहुमआउअपज्जत्ता विसे० सुहुमवाउअपज्जत्ता विसे० सुहुमतेउकाइया पज्जत्तगा संखेज्जगुणा सुहुमपुढवीआउवाउपज्जत्तगा विसे० सुहुमणिओया अपज्जत्तगा असंखेज्जगुणा सुहुमणिओया पज्जत्तगा संखेज्जगुणा सुहुमवणस्सतिकाइया अपज्जत्तगा अणंतगुणा सुहुमअपज्जत्ता विसे० सुहुमवणस्सइपज्जत्तगा संखेज्जगुणा सुहुमा पज्जत्ता विसेसाहिया । २३४। बायरस्स णं भंते ! केवतियं कालं ठिती पं० ?, गो० ! जह० अंतोमु० उक्को० तेत्तीसं सागरोवमाइं, एवं बायरतसकाइयस्सवि, बायरपुढवीकाइयस्स बावीसवाससहस्साइं बायरआउस्स सत्तवाससहस्सं बायरतेउस्स तिणि

राइंदिया बायरवाउस्स तिण्णि वाससहस्साइं बायरवणं दसवाससहस्साइं, एवं पत्तेयसरीरबादरस्सवि, णिओयस्स जहं उक्कों अंतोमुं, एवं बायरणिओयस्सवि, अपज्जत्तगाणं सव्वेसिं अंतोमुहुत्तं, पज्जत्तगाणं उक्कोसिया ठिई अंतोमुहुत्तूणा कायव्वा सव्वेसिं । २३५। बायरे णं भंते ! बायरेत्ति कालओ केवचिरं होति ?, जहं अंतो उक्को असंखेज्ज कालं असंखेज्जाओ उस्सप्पिणीओसप्पिणीओ कालओ खेत्तओ अंगुलस्स असंखेज्जतिभागो, बायरपुढवीकाइयआउतेउवाउपत्तेयसरीरबादरवणस्सइकाइयस्स बायरनिओयस्सएतेसिं जहं अंतोमुं उक्को सत्तरिं सागरोवमकोडाकोडीओ संखातीयाओ समाओ अंगुलअसंखभागो तहा असंखेज्जा उ ओहे य बायरतरूअणुबंधो सेसओ वोच्छं (॥१॥) 'उस्सप्पिणि ओसप्पिणि अइढाइयपोग्गलाण परियंहा । बेउदधिसहस्सा खलु साधिया होंति तसकाए ॥९०॥ अंतोमुहुत्तकालो होइ अपज्जत्तगाण सव्वेसिं । पज्जत्तबायरस्स य बायरतसकाइयस्सावि ॥९१॥ एतेसिं ठिई सागरोवमसतपुहुत्तं साइरेणं 'तेउस्स संख राई दुविहणिओए मुहुत्तमद्धं तु । सेसाणं संखेज्जा वाससहस्सा य सव्वेसिं ॥९२॥ २३६। अंतरं बायरस्स बायरवणस्स तिस्स णिओयस्स बायरणिओयस्स एतेसिं चउण्हवि पुढवीकालो जाव असंखेज्जा लोया, सेसाणं वणस्सतिकालो, एवं पज्जत्तगाणं अपज्जत्तगाणवि अंतरं, ओहे य बायरतरू ओघनिओए बायरणिओए य कालमसंखेज्जं अंतरं, सेसाणं वणस्सतिकालो । २३७। अप्पां सव्वत्थोवा बायरतसकाइया बायरतेउकाइया असंखेज्जगुणा पत्तेयसरीरबादरवणस्सतिं असंखेज्जगुणा बायरणियोया असंखे बायरपुढवीं असंखे आउवाउं असंखेज्जगुणा बायरवणस्सतिकाइया अणंतगुणा बायरा विसेसाहिया, एवं अपज्जत्तगाणवि, पज्जत्तगाणं सव्वत्थोवा बायरतेउकाइया बायरतसकाइया असंखेज्जगुणा पत्तेयसरीरबायरा असंखेज्जगुणा सेसा तहेव जाव बादरा विसेसाहिया, एतेसिं णं भंते ! बायराणं पज्जत्तापज्जत्ताणं कयरे ? . सव्वत्थोवा बायरा पज्जत्ता बायरा अपज्जत्तगा असंखेज्जगुणा, एवं सव्वे जहा बायरतसकाइया । एएसिं णं भंते ! बायराणं बायरपुढवीकाइयाण जाव बायरतसकाइयाणं य पज्जत्तापज्जत्ताणं कयरे ? , सव्वत्थोवा बायरतेउकाइया पज्जत्तगा बायरतसकाइया अपज्जत्तगा असंखेज्जगुणा पत्तेयसरीरबायरवणस्सतिकाइया पज्जत्तगा असंखेज्जगुणा बायरणिओयापज्जत्तगा असंखेज्जं पुढवीआउवाउपज्जत्तगा असंखेज्जगुणा बायरतेउअपज्जत्तगा असंखे पत्तेयसरीरबायरवणस्सतिअपं असंखे बायरा णिओया अपज्जत्तगा असंखे बायरपुढवीआउवाउअपज्जत्तगा असंखेज्जगुणा बायरवणस्सइपज्जत्तगा अणंतगुणा बायरपज्जत्तगा विसेसाहिया बायरवणस्सतिअपज्जत्ता असंखगुणा बायरा विसेसाहिया, एएसिं णं भंते ! सुहुमाणं सुहुमपुढवीकाइयाणं जाव सुहुमनिगोदाणं बायराणं बायरपुढवीकाइयाणं जाव बायरतसकाइयाणं य कयरे ? , गो ! सव्वत्थोवा बायरतसकाइया बायरतेउकाइया असंखेज्जगुणा पत्तेयसरीरबायरवणा असंखे तहेव जाव बायरवाउकाइया असंखेज्जगुणा सुहुमतेउकाइया असंखे सुहुमपुढवीं विसेसाहिया सुहुमआउं विं सुहुमवाउं विसेसां सुहुमनिओया असंखेज्जगुणा बायरवणस्सतिकाइया अणंतगुणा बायरा विसेसाहिया सुहुमवणस्सइकाइया असंखे सुहुमा विसेसां, एवं अपज्जत्तगावि पज्जत्तगावि, णवरि सव्वत्थोवा बायरतेउकाइया पज्जत्ता बायरतसकाइया पज्जत्ता असंखेज्जगुणा पत्तेयसरीरं सेसं तहेव जाव सुहुमपज्जत्ता विसेसाहिया, एएसिं णं भंते ! सुहुमाणं बादराणं य पज्जत्ताणं य अपज्जत्ताणं य कयरे ? , सव्वत्थोवा बायरा पज्जत्ता अपज्जत्ता असंखेज्जगुणा सव्वत्थोवा सुहुमा अपज्जत्ता सुहुमपज्जत्ता संखेज्जगुणा, एवं सुहुमपुढवी बायरपुढवी जाव सुहुमनिओया बायरनिओया नवरं पत्तेयसरीरबायरवणं सव्वत्थोवा पज्जत्ता अपज्जत्ता असंखेज्जगुणा, एवं बादरतसकाइयावि, सव्वेसिं पज्जत्तगाणं कयरे ? , सव्वत्थोवा बायरतेउकाइया पज्जत्ता बायरतसकाइया पज्जत्तगा असंखेज्जगुणा ते चेव अपज्जत्तगा असंखेज्जगुणा पत्तेयसरीरबायरवणस्सइअपज्जत्तगा असंखे बायरणिओया पज्जत्ता असंखेज्जं बायरपुढवीं असं आउं वाउं पज्जत्ता असंखे बायरतेउकाइयअपज्जत्ता असंखे पत्तेयं असंखे बायरनिओयपज्जत्ता असं बायरपुढवीआउवालकाइं अपज्जत्तगा असंखेज्जगुणा सुहुमतेउकाइया अपज्जत्तगा असं सुहुमपुढवीआउवाउअपज्जत्ता विसेसां सुहुमतेउकाइयपज्जत्तगा असंखे सुहुमपुढवीआउवाउपज्जत्तगा विसेसाहिया सुहुमणिगोया अपज्जत्तगा असंखे सुहुमणिगोया पज्जत्तगा असंखे बायरवणस्सतिकाइया पज्जत्तगा अणंतगुणा बायरा पज्जत्तगा विसेसाहिया बायरवणस्सइअपज्जत्ता असंखे बायरा अपज्जत्ता

विसे० बायरा विसेसाहिया सुहुमवणस्सतिकाइया अपज्जत्तगा असंखे० सुहुमा अपज्जत्ता विसेसाहिया सुहुमवणस्सइकाइया पज्जत्ता संखेज्जगुणा सुहुमा पज्जत्तगा विसेसाहिया सुहुमा विसेसाहिया ।२३८। कतिविहा णं भंते ! णिओया पं० ?, गो० ! दुविहा णिओया पं० तं०- णिओया य णिओदजीवा य, णिओया णं भंते ! कतिविहा पं० ?, गो० ! दुविहा पं० तं०- सुहुमणिओया य बायरणिओया य, सुहुमणिओआ णं भंते ! कतिविहा पं० ?, गो० ! दुविहा पं० तं०- पज्जत्तगा य अपज्जत्तगा य, बायरणिओयावि दुविहा पं० तं०- पज्जत्तगा य अपज्जत्तगा य, णिओयजीवा णं भंते ! कतिविहा पं० ?, दुविहा पं० तं०- सुहुमणिओदजीवा य बायरणिओयजीवा य, सुहुमणिगोदजीवा दुविहा पं० तं०- पज्जत्तगा य अपज्जत्तगा य, बादरणिगोदजीवा दुविहा पं० तं०- पज्जत्तगा य अपज्जत्तगा य ।२३९। निगोदा णं भंते ! दव्वट्टयाए किं संखेज्जा असंखेज्जा अणंता ?, गो० ! नो संखेज्जा असंखेज्जा नो अणंता, एवं पज्जत्तावि अपज्जत्तावि, सुहुमनिगोदा णं भंते ! दव्वट्टयाए किं संखेज्जा असंखेज्जा अणंता ?, गो० ! णो संखेज्जा असंखेज्जा णो अणंता, एवं पज्जत्तगावि अपज्जत्तगावि, एवं बायरावि पज्जत्तगावि अपज्जत्तगावि णो संखेज्जा असंखेज्जा णो अणंता, णिओदजीवा णं भंते ! दव्वट्टयाए किं संखेज्जा असंखेज्जा अणंता ?, गो० ! नो संखेज्जा नो असंखेज्जा अणंता, एवं पज्जत्तावि अपज्जत्तावि, एवं सुहुमणिओयजीवावि पज्जत्तगावि अपज्जत्तगावि, बादरणिओदजीवावि पज्जत्तगावि अपज्जत्तगावि, णिओदा णं भंते ! पदेसट्टयाए किं संखेज्जा० ? पुच्छा, गो० ! नो संखेज्जा नो असंखेज्जा अणंता, एवं पज्जत्तगावि अपज्जत्तगावि, एवं सुहुमणिओयावि पज्जत्तगावि अपज्जत्तगावि, पएसट्टयाए सव्वे अणंता, एवं बायरनिगोयावि पज्जत्तयावि अपज्जत्तयावि, पएसट्टयाए सव्वे अणंता, एवं णिओदजीवा नव(प्र० सत्त)विहावि पएसट्टयाए सव्वे अणंता, एसिं णं भंते ! णिओयाणं सुहुमाणं बायराणं पज्जत्तयाणं अपज्जत्तगाणं दव्वट्टयाए पएसट्टयाए दव्वट्टपएसट्टयाए कयरे० ?, गो० ! सव्वत्थोवा बादरणिओयपज्जत्तगा दव्वट्टयाए बादरनिगोदा अपज्जत्तगा दव्वट्टयाए असंखेज्जगुणा सुहुमणिओदा अपज्जत्तगा दव्वट्टयाए असंखे० सुहुमणिओदा पज्जत्तगा दव्वट्टयाए संखि०, एवं पदेसट्टयाएवि, दव्वट्टपदेसट्टयाए सव्वत्थोवा बादरणिओया पज्जत्ता य दव्वट्टयाए जाव सुहुमणिओदा पज्जत्ता य दव्वट्टयाए संखे० सुहुमणिओएहिंतो पज्जत्तएहिंतो दव्वट्टयाए बायरणिगोदा पज्जत्ता पएसट्टयाए अणंतगुणा बायरणिओदा अपज्जत्ता पएसट्टयाए असंखे० जाव सुहुमणिओया पज्जत्ता पएसट्टयाए संखे०, एवं णिओयजीवावि, णवरि संकमपए जाव सुहुमणिओयजीवेहिंतो पज्जत्तएहिंतो दव्वट्टयाए बायरणिओयजीवा पज्ज० पदेसट्टयाए असंखे० सेसं तहेव जाव सुहुमणिओयजीवा पज्जत्ता पएसट्टयाए संखे०, एतेसिं णं भंते ! णिगोदाणं सुहुमाणं बायराणं पज्जत्ताणं अपज्जत्ताणं णिओयजीवाणं सुहुमाणं बायराणं पज्जत्तगाणं अपज्जत्तगाणं दव्वट्टयाए पएसट्टयाए दव्वट्टपएसट्टयाए य कयरे० ?, सव्वत्थोवा बायरणिओदा पज्जत्ता दव्वट्टयाए बायरणिओदा अपज्जत्ता दव्वट्टयाए असं० सुहुमणिगोदा अप० दव्वट्टयाए असंखेज्जगुणा सुहुमणिओदा पज्ज० दव्वट्टयाए संखेज्जगुणा सुहुमणिओएहिंतो दव्वट्टयाए बायरणिओदजीवा पज्जत्ता दव्वट्टयाए अणंतगुणा बायरणिओदजीवा अपज्जत्तादव्वट्टयाए असंखेज्जगुणा सुहुमणिओदजीवा अपज्जत्ता दव्वट्टयाए असंखेज्जगुणा सुहुमणिओयजीवा पज्जत्ता दव्वट्टयाए संखेज्जगुणा, पएसट्टयाए सव्वत्थोवा बायरणिओदजीवा पज्जत्ता पएसट्टयाए बायरणिओदा अपज्जत्ता पएसट्टयाए असंखे० सुहुमणिओयजीवा अपज्जत्तया पएसट्टयाए असंखे० सुहुमणिगोदजीवा पज्जत्ता पएसट्टयाए संखेज्जगुणा सुहुमणिओदजीवेहिंतो पएसट्टयाए बायरणिगोदा पज्जत्ता पदेसट्टयाए अणंतगुणा बायरणिगोदा पज्जत्ता पएस० असंखे० जाव सुहुमणिओया पज्जत्ता पएसट्टयाए संखेज्जगुणा, दव्वट्टपएसट्टयाए सव्वत्थोवा बायरणिओया पज्जत्ता दव्वट्टयाए बायरणिओदा अपज्जत्ता दव्वट्टयाए असंखेज्जगुणा जाव सुहुमणिगोदा पज्जत्ता दव्वट्टयाए संखेज० सुहुमणिओदेहिंतो दव्वट्टयाए बायरणिओदजीवा पज्जत्ता दव्वट्टयाए अणंतगुणा सेसा तहेव जाव सुहुमणिओदजीवा पज्जत्तगा दव्वट्टयाए संखेज्जगुणा सुहुमणिओयजीवेहिंतो पज्जत्तएहिंतो दव्वट्टयाए बायरणिओयजीवा पज्जत्ता पदेसट्टयाए असंखेज्जगुणा सेसा तहेव जाव सुहुमणिओया पज्जत्ता पदेसट्टयाए संखेज्जगुणा । सेत्तं छव्विहा संसारसमावणण्या जीवा

☆☆☆२४०। छव्विहपडिवत्ती ॥ प्रतिपत्तिः ५ ॥☆☆☆* तत्थ णं जे ते एवमाहंसु सत्तविहा

संसारसमावण्णगा जीवा पं० ते एवमाहंसु, तं०- नेरइया तिरिक्खा तिरिक्खजोणिणीओ मणुस्सा मणुस्सीओ देवा देवीओ, णेरतियस्सठिती जह० दसवाससहस्साइं उक्को० तेत्तीसं सागरोवमाइं, तिरिक्खजोणियस्स जह० अंतोमुहुत्तं उक्को० तिन्नि पलिओवमाइं, एवं तिरिक्खजोणिणीएवि, मणुस्साणवि मणुस्सीणवि, देवाणं ठिती जहा णेरइयाणं, देवीणं जह० दसवाससहस्साइं उक्को० पणपणपलिओवमाणि, नेरइयदेवदेवीणं जच्चेव ठिती सच्चेव संचिट्टणा, तिरिक्खजोणिणीणं जह० अंतोमु० उक्को० तिन्नि पलिओवमाइं पुव्वकोडीपुहुत्तमब्भहियाइं, एवं मणुस्सस्स मणुस्सीएवि, णेरइयस्स अंतरं जह० अंतोमु० उक्को० वणस्सतिकालो, एवं सव्वाणं(व्वेसिं)तिरिक्खजोणियवज्जाणं, तिरिक्खजोणियाणं जह० अंतोमु० उक्को० सागरोवमसतपुहुत्तं सातिरेगं, अप्पाबहुयं- सव्वत्थोवाओ मणुस्सीओ मणुस्सा असंखे० नेरइया असंखे० तिरिक्खजोणिणीओ असंखेज्जगुणाओ देवा असंखेज्जगुणा देवीओ संखेज्जगुणाओ तिरिक्खजोणिया अणंतगुणा । सेत्तं सत्तविहा संसारसमावण्णगा जीवा । २४१ ☆☆☆॥ प्रतिपत्तिः ६ ॥☆☆☆ तत्थ णं जे ते एवमाहंसु अट्ठविहा० जीवा पं० ते एवमाहंसु- पढमसमयनेरतिया अपढमसमयनेरइया पढमसमयतिरिक्खजोणिया अपढमसमयतिरिक्खजोणिया पढमसमयमणुस्सा अपढमसमयमणुस्सा पढमसमयदेवा अपढमसमयदेवा, पढमसमयनेरइयस्स णं भंते ! केवतियं कालं ठिती पं० ?, गो० ! पढमसमयनेरइयस्स जह० एक्कं समयं उक्को० एक्कं समयं, अपढमसमयनेरइयस्स जह० दसवाससहस्साइं समऊणाइं उक्को० तेत्तीसं सागरोवमाइं समऊणाइं, पढमसमयतिरिक्खजोणियस्स जह० एक्कं समयं उक्को० एक्कं समयं, अपढमसमयतिरिक्खजोणियस्स जह० खुट्ठागं भवग्गहणं समऊणं उक्को० तिन्नि पलिओवमाइं समऊणाइं, एवं मणुस्साणवि जहा तिरिक्खजोणियाणं, देवाणं जहा णेरतियाणं ठिती, णेरइयदेवाणं जच्चेव ठिती सच्चेव संचिट्टणा दुहाणवि, पढमसमयतिरिक्खजोणिणं णं भंते ! पढ० कालओ केवचिरं होति ?, गो० ! जह० एक्कं समयं उक्को० एक्कं समयं, अपढमतिरिक्खजोणियस्स जह० खुट्ठागं भवग्गहणं समऊणं उक्कोसेणं वणस्सतिकालो, पढमसमयमणुस्साणं जह० उ० एक्कं समयं, अपढममणुस्स० जह० खुट्ठागं भवग्गहणं समऊणं उक्को० तिन्नि पलिओवमाइं पुव्वकोडिपुहुत्तमब्भहियाइं, अंतरं पढमसमयणेरतियस्स जह० दसवाससहस्साइं अंतोमुहुत्तमब्भहियाइं उक्को० वणस्सतिकालो, अपढमसमय० जह० अंतोमु० उक्को० वणस्सतिकालो, पढमसमयतिरिक्खजोणिणं जह० दो खुट्ठागभवग्गहणाइं समऊणाइं उक्को० वणस्सतिकालो, अपढमसमयतिरिक्खजोणियस्स जह० खुट्ठागं भवग्गहणं समयाहियं उक्को० सागरोवमसतपुहुत्तं सातिरेगं, पढमसमयमणुस्सस्स जह० दो खुट्ठाइं भवग्गहणाइं समऊणाइं उक्को० वणस्सतिकालो, अपढमसमयमणुस्सस्स जह० खुट्ठागं भवग्गहणं समयाहियं उक्को० वणस्सतिकालो, देवाणं जहा नेरइयाणं जह० दसवाससहस्साइं अंतोमुहुत्तमब्भहियाइं उक्को० वणस्सइकालो, अपढमसमय० जह० अंतो० उक्को० वणस्सइकालो, अप्पबहुत्तं एतेसि णं भंते ! पढमसमयनेरइयाणं जाव पढमसमयदेवाण य कतरे० ?, गो० ! सव्वत्थोवा पढमसमयमणुस्सा पढमसमयणेरइया असंखे० पढमसमयदेवा असंखे० पढमसमयतिरिक्खजोणिया असंखे०, अपढमसमयनेरइयाणं जाव अपढम० देवाणं एवं चेव अप्पबहुत्तं णवरि अपढमसमयतिरिक्खजोणिया अणंतगुणा, एतेसि णं पढमसमयनेरइयाणं अपढम० णेरतियाणं कयरे० ?, सव्वत्थोवा पढमसमयणेरतिया अपढमसमयनेरइया असंखे० एवं सव्वे, पढमसमयणेरइयाणं जाव अपढमसमयदेवाण य कयरे० ?, सव्वत्थोवा पढमसमयमणुस्सा अपढमसमयमणुस्सा असंखे० पढमसमयणेरइया असंखे० पढमसमयदेवा असंखे० पढमसमयतिरिक्खजोणिया असंखे० अपढमसमयनेरइया असंखे० अपढमसमयदेवा असंखे० अपढमसमयतिरिक्खजोणिया अणंतगुणा । सेत्तं अट्ठविहा संसारसमावण्णगा जीवा ☆☆☆॥ २४२॥ प्रतिपत्तिः ७ ॥☆☆☆ तत्थ णं जे ते एवमाहंसु णवविधा संसारसमावण्णगा जीवा पं० ते एवमाहंसु- पुढवीकाइया आउक्काइया तेउक्काइया वाउक्काइया वणस्सइकाइया बेइंदिया तेइंदिया चउरिंदिया पंचेंदिया, ठिती सव्वेसिं भाणियव्वा, पुढवीकाइयाणं संचिट्टणा पुढवीकालो जाव वाउक्काइयाणं, वणस्सईणं वणस्सतिकालो, बेइंदिया तेइंदिया चउरिंदिया संखेज्जं कालं, पंचेंदियाणं सागरोवमसहस्सं सातिरेगं, अंतरं सव्वेसिं अणंतं कालं

वणस्सतिकाइयाणं असंखेज्जं कालं, अप्पाबहुगं- सव्वत्थोवा पंचिंदिया चउरिंदिया वि० तेइंदिया वि० बेइंदिया वि० तेउक्काइया असंखे० पुढवी० आउ० वाउ० विसेसाहिया वणस्सतिकाइया अणंतगुणा । सेत्तं णवावधा संसारसमावण्णगा जीवा ★★१२४३॥ प्रतिपत्तिः ८ ॥★★ तत्थ णं जे ते एवमाहंसु दसविधा संसारसमावण्णगा जीवा पं० ते एवमाहंसु, तं० पढमसमयएगिंदिया अपढमसमयएगिंदिया पढमसमयबेइंदिया अपढमसमयबेइंदिया जाव पढमसमयपंचिंदिया अपढमसमयपंचिंदिया, पढमसमयएगिंदियस्स णं भंते ! केवतियं कालं ठिती पं० ?, गो० ! जह० एक्कं समयं उक्को० एक्कं०, अपढमसमयएगिंदियस्स० ?, जह० खुड्डागं भवग्गहणं समऊणं उक्को० बावीसं वाससहस्साइं समऊणाइं, एवं सव्वेसिं पढमसमयिकाणं जह० एक्को समओ उक्को० एक्को समओ, अपढम० जह० खुड्डागं भवग्गहणं समऊणं उक्को० जा जस्स ठिती सा समऊणा जाव पंचिंदियाणं तेत्तीसं सागरोवमाइं समऊणाइं, संचिद्धणा पढमसमयस्स जह० एक्कं समयं उक्को० एक्कं समयं, अपढमसमयिकाणं जह० खुड्डागं भवग्गहणं समऊणं उक्कोसेणं एगिंदियाणं वणस्सतिकालो बेइंदियतेइंदियचउरिंदियाणं संखेज्जं कालं पंचेदियाणं सागरोवमसहस्सं सातिरेगं, पढमसमयएगिंदियाणं केवतियं अंतरं होति ?, गो० ! जह० दो खुड्डागभवग्गहणाइं समऊणाइं उक्को० वणस्सतिकालो, अपढमएगिंदिय० अंतरं जह० खुड्डागं भवग्गहणं समयाहियं उक्को० दो सागरोवमसहस्साइं संखेज्जवासमब्भहियाइं, सेसाणं सव्वेसिं पढमसमयिकाणं अंतरं जह० दो खुड्डाइं भवग्गहणाइं उक्को० वणस्सतिकालो, अपढमसमयिकाणं सेसाणं जह० खुड्डागं भवग्गहणं समयाहियं उक्को० वणस्सतिकालो, पढमसमयिकाणं सव्वेसिं सव्वत्थोवा पढमसमयपंचेदिया पढम० चउरिंदिया विसे० पढम० तेइंदिया विसे० पढ० बेइंदिया विसे० पढ० एगिंदिया विसे०, एवं अपढमसमयिकावि, णवरिं अपढमसमयएगिंदिया अणंतगुणा, दोण्हं अप्पबहु- सव्वत्थोवा पढमसमयएगिंदिया अपढमसमयएगिंदिया अणंतगुणा सेसाणं सव्वत्थोवा पढमसमयिका अपढम० असंखे०, एतेसिं णं भंते ! पढमसमयएगिंदियाणं अपढमसमयएगिंदियाणं जाव अपढमसमयपंचिंदियाणं य कयरे० ?, सव्वत्थोवा पढमसमयपंचेदिया पढमसमयचउरिंदिया विसेसाहिया एवं हेट्टामुहा जाव पढमसमयएगिंदिया विसेसा० अपढमसमयपंचेदिया असंखे० अपढमसमयचउरिंदिया विसे० जाव अपढमसमयएगिंदिया अणंत० । सेत्तं दसविहा संसारसमावण्णगा जीवा । सेत्तं संसारसमावण्णगा जीवा । सेत्तं जीवाभिगमे ★★१२४४॥ प्रतिपत्तिः ९

॥★★ सव्वजीव पडिवत्ति ★★ से किं तं सव्वजीवाभिगमे ?, सव्वजीवेसु णं इमाओ णव पडिवत्तीओ एवमाहिज्जंति, एगे एवमाहंसु- दुविहा सव्वजीवा पं० जाव दसविहा सव्वजीवा पं०, तत्थ णं जे ते एवमाहंसु दुविहा सव्वजीवा पं० ते एवमाहंसु, तं०- सिद्धा चेव असिद्धा चेव, सिद्धे णं भंते ! सिद्धेति कालतो केवचिरं होति ?, गो० ! सातीअपज्जवसिए, असिद्धे णं भंते ! असिद्धेति० ?, गो० ! असिद्धा दुविहा पं० तं०- अणाइए वा अपज्जवसिए अणातीए वा सपज्जवसिए, सिद्धस्स णं भंते ! केवतियं कालं अंतरं होति ?, गो० ! सातियस्स अपज्जवसियस्स णत्थि अंतरं, असिद्धस्स णं भंते ! केवइयं अंतरं होइ ?, गो० ! अणातियस्स अपज्जवसियस्स णत्थि अंतरं, अणातियस्स सपज्जवसियस्सवि णत्थि अंतरं, एएसिं णं भंते ! सिद्धाणं असिद्धाणं य कयरे० ?, गो० ! सव्वत्थोवा सिद्धा असिद्धा अणंतगुणा ॥२४५॥ अहवा दुविहा सव्वजीवा पं० तं०- सइंदिया चेव अणिंदिया चेव, सइंदिए णं भंते ! कालतो केवचिरं होइ ?, गो० ! सइंदिए दुविहे पं० तं०- अणातीए वा अपज्जवसिए अणाइए वा सपज्जवसिए, अणिंदिए सातीए वा अपज्जवसिए, दोह्वि, अंतरं नत्थि, सव्वत्थोवा अणिंदिया सइंदिया अणंतगुणा, अहवा दुविहा सव्वजीवा पं० तं०- सकाइया चेव, अकाइया चेव, एवं चेव एवं सजोगी चेव अजोगी चेव, तहेव संचिद्धणं अंतरं अप्पाबहुयं जहा सइन्दियाणं, अहवा दुविहा सव्वजीवा पं० तं०- सवेदगा चेव अवेदगा चेव, सवेदए णं भंते ! सवे० ?, गो० ! सवेयए तिबिहे पं० तं०- अणादीए वा अपज्जवसिए अणादीए वा सपज्जवसिए साइए वा सपज्जवसिए, तत्थ णं जे से साइए सपज्जवसिए से जह० अंतोमु० उक्को० अणंतं कालं जाव खेत्तओ अवड्डं पोग्गलपरियट्टं देसूणं, अवेदए णं भंते ! अवेयएति कालओ केवचिरं होइ ?, गो० ! अवेदए दुविहे पं० तं०- सातीए अपज्जवसिते साइए वा सपज्जवसिए, तत्थ णं जे सादीए सपज्जवसिते से जह० एक्कं समयं

उक्को० अंतोमुहुत्तं, सवेयगस्स णं भंते ! केवतियं कालं अंतरं होइ ?, अणादियस्स अपज्जवसियस्स णत्थि अंतरं अणादियस्स सपज्जवसियस्स नत्थि अंतरं, सादियस्स सपज्जवसियस्स जह० एक्कं समयं उक्को० अंतोमु० अवेदगस्स णं भंते ! केवतियं कालं अंतरं होइ ?, सातीयस्स सपज्जवसियस्स जह० अंतोमु० उक्को अणंतं कालं जाव अवहुं पोग्गलपरियट्ठं देसूणं, अप्पाबहुगं- सव्वत्थोवा अवेयगा सवेयगा अणंतगुणा, एवं सकसाई चेव अकसाई चेव, जहा सवेयके तहेव भाणियव्वे अहवा दुविहा सव्वजीवा पं० तं०- अलेसा य, जहा असिद्धा, सिद्धा सव्वत्थोवा अलेसा सलेसा अणंतगुणा ।२४६। अहवा दुविहा सव्वजीवा पं० तं०- णाणी चेव अण्णाणी चेव, णाणी णं भंते ! कालओ० ?, णाणी दुविहे पं० तं०- सातीए वा अपज्जवसिए सासीए वा सपज्जवसिए, तत्थ णं जे से सादीए सपज्जवसिते से जहण्णेणं अंतोमुहुत्तं उक्कोसेणं छावटितठसागरोवमाइं सातिरेगाइं, अण्णाणी जहा सवेदया, णाणिस्स अंतरं जहण्णेणं अंतोमुहुत्तं उक्कोसेणं अणंतं कालं अवहुं पोग्गलपरियट्ठं देसूणं, अण्णाणियस्स दोण्हवि आदिल्लाणं णत्थि अंतरं, सादीयस्स सपज्जवसियस्स जहण्णेणं अंतोमु० उक्कोसेणं छावट्ठिं सागरोवमाइं साइरेगाइं, अप्पाबहुगं- सव्वत्थोवा णाणी अण्णाणी अणंतगुणा, अहवा दुविहा सव्वजीवा पं० तं०- सागरोवउत्ता य अणागारोवउत्ता य, संचिट्ठणा अन्तरं च जहण्णेणं उक्कोसेणवि अन्तोमुहुत्तं, अप्पाबहुगं- सागारो० संखे० ।२४७। अहवा दुविहा सव्वजीवा पं० तं०- अहारगा चेव अणाहारगा चेव, आहारए णं भंते ! जाव केवचिरं होति ?, गो० ! आहारए दुविहे पं० तं०- छउमत्थआहारए य केवलिआहारए य, (१६७) छउमत्थआहारए णं जाव केवचिरं होति ?, गो० ! जहण्णेणं खुड्ढागं भवग्गहणं दुसमऊणं उक्को० असंखेज्जं कालं जाव कालओ खेत्तओ अंगुलस्स असंखेज्जतिभागं, केवलिआहारए णं जाव केवचिरं होइ ?, गो० ! जह० अंतोमु० उक्को० देसूणा पुव्वकोडी, अणाहारए णं भंते ! केवचिरं० ?, गो० ! अणाहारए दुविहे पं० तं०- छउमत्थअणाहारए य केवलिअणाहारए य, छउमत्थअणाहारए णं जाव केवचिरं होति ?, गो० ! जहण्णेणं एक्कं समयं उक्कोसेणं दो समया, केवलिअणाहारए दुविहे पं० तं०- सिद्धकेवलिअणाहारए य भवत्थकेवलिअणाहारए य, सिद्धकेवलिअणाहारए णं भंते ! कालओ केवचिरं होति ?, सातिए अपज्जवसिए, भवत्थकेवलिअणाहारए णं भंते ! कइविहे पं० ?, भव० दुविहे पं० तं०- सजोगिभवत्थकेवलिअणाहारए य अजोगिभवत्थकेवलिअणाहारए य, सजोगिभवत्थकेवलिअणाहारए णं भंते ! कालओ केवचिरं० ?, अजहण्णमणुक्कोसेणं तिण्णि समया, अजोगिभवत्थकेवलि० जह० अंतो० उक्को० अंतोमुहुत्तं, छउमत्थआहारगस्स केवतियं कालं अंतरं० ?, गो० ! जहण्णेणं एक्कं समयं उक्को० दो समया, केवलिआहारगस्स अंतरं अजहण्णमणुक्कोसेणं तिण्णि समया, छउमत्थअणाहारगस्स अंतरं० ?, जह० खुड्ढागभवग्गहणं दुसमऊणं उक्को० असंखेज्जं कालं जाव अंगुलस्स असंखेज्जतिभागं, सिद्धकेवलिअणाहारगस्स सातीयस्स अपज्जवसियस्स णत्थि अंतरं, सजोगिभवत्थकेवलिअणाहारगस्स जह० अंतो० उक्कोसेणवि, अजोगिभवत्थकेवलिअणाहारगस्स णत्थि अंतरं, एसि णं भंते ! आहारगाणं अणाहारगाण य कयरे० ?, गो० ! सव्वत्थोवा अणाहारगा आहारगा असंखेज्जगुणा ।२४८। अहवा दुविहा सव्वजीवा पं० तं०- भासगा य अभासगा य, भासए णं भंते ! भासएत्ति कालओ केवचिरं होति ?, गो० ! जहण्णेणं एक्कं समयं उक्को० अंतोमुहुत्तं, अभासए णं भंते० !, गो० ! अभासए दुविहे पं० तं०- साइए वा अपज्जवसिए सातीए वा सपज्जवसिए, तत्थ णं जे से साइए सपज्जवसिए से जह० अंतो० उक्को० अणंतं कालं अणंता उस्सप्पिणीओसप्पिणीओ वणस्सतिकालो, भासगस्स णं भंते ! केवतियं कालं अंतरं होति ?, जह० अंतो० उक्को० अणंतं कालं वणस्सतिकालो, अभासग० सातीयस्स अपज्जवसियस्स णत्थि अंतरं, सातीयसपज्जवसियस्स जह० एक्कं समयं उक्को० अंतो०, अप्पाबहुगं- सव्वत्थोवा भासगा अभासगा अणंतगुणा, अहवा दुविहा सव्वजीवा पं० तं०- ससरीरी य असरीरी य, असरीरी जहा सिद्धा, थोवा असरीरी ससरीरी ससरीरी अणंतगुणा ।२४९। अहवा दुविहा सव्वजीवा पं० तं०- चरिमा चेव अचरिमा चेव, चरिमे णं भंते ! चरिमेत्ति कालतो केवचिरं होति ?, गो० ! चरिमे अणादीए सपज्जवसिए, अचरिमे दुविहे पं० तं०- अणातीए वा अपज्जवसिए सातीए वा अपज्जवसिते, दोण्हंपि णत्थि अंतरं, अप्पाबहुगं- सव्वत्थोवा अचरिमा चरिमा अणंतगुणा, (प्र० अहवा दुविहा सव्वजीवा पं० तं०- सागारोवउत्ता य अणागारोवउत्ता य, दोण्हंपि संचिट्ठणावि अंतरंपि जह० उ० अंतो०, अप्पाबहुगं- सव्वत्थोवा अणागारोवउत्ता

सागरोवउत्ता असंखेज्जगुणा) सेत्तं दुविहा (प्र० 'सिद्धसइंदियकाए जोए वेए कसाय लेसा य । नाणुवओगाहारा भास सरीरी य चरमो य ॥१॥) ☆☆☆॥२५०॥

सर्वजीवप्र० १ ॥☆☆☆ तत्थ णं जे ते एवमाहंसु तिविहा सव्वजीवा पं० ते एवमाहंसु तंह- सम्मद्दिट्ठी मिच्छादिट्ठी सम्मामिच्छादिट्ठी णं भंते ! कालओ केवचिरं होति ?, गो० ! सम्मद्दिट्ठी दुविहे पं० तं०- सातीए वा अपज्जवसिए साइए वा सपज्जवसिए, तत्थ णं जे ते सातीए सपज्जवसिते से जह० अंतो० उक्को० छावट्ठिं सागरोवमाइं सातिरेगाइं, मिच्छादिट्ठी तिविहे पं० तं०- साइए वा सपज्जवसिए अणातीए वा अपज्जवसिते अणातिए वा अपज्जवसिए, तत्थ णं जे ते सातीए सपज्जवसिए से जह० अंतो० उक्को० अणंतकालं जाव अवट्ठं पोग्गलपरियट्ठं देसूणं, सम्मामिच्छादिट्ठी जह० अंतो० उक्को० अंतोमु० सम्मद्दिट्ठिस्स अंतरं साइयस्स अपज्जवसियस्स नत्थि अंतरं, सातीयस्स सपज्जवसियस्स जह० अंतो० उक्को० अणंतं कालं जाव अवट्ठं पोग्गलपरियट्ठं, मिच्छादिट्ठिस्स अणादीयस्स अपज्जवसियस्स णत्थि अंतरं, अणातीयस्स सपज्जवसियस्स नत्थि अंतरं, साइयस्स सपज्जवसियस्स जह० अंतो० उक्को० छावट्ठिं सागरोवमाइं सातिरेगाइं, सम्मामिच्छादिट्ठिस्स जह० अंतो० उक्को० अणंतं कालं जाव अवट्ठं पोग्गलपरियट्ठं देसूणं, अप्पाबहुगं- सव्वत्थोवा सम्मामिच्छादिट्ठी अणंतगुणा मिच्छादिट्ठिअणंतगुणा ॥२५१॥ अहवा तिविहा सव्वजीवा पं० तं०- परिता अपरिता नोपरित्तानोअपरित्ता, परित्ते णं भंते !० परि० कालतो केवचिरं होति ?, परित्ते दुविहे पं० तं० कायपरित्ते य संसारपरित्ते य, कायपरित्ते णं भंते !, जह० अंतोमु० उक्को० असंखेज्जं कालं जाव असंखेज्जा लोगा, संसारपरित्ते णं भंते ! संसारपरित्तेत्ति कालओ केवचिरं होति ?, जह० अंतो० उक्को० अणंतं कालं जाव अवट्ठं पोग्गलपरियट्ठं देसूणं, अपरित्ते णं भंते !० ?, अपरित्ते दुविहे पं० तं०- कायअपरित्ते य संसारअपरित्ते य, कायअपरित्ते णं जह० अंतो० उक्को० अणंतं कालं वणस्सतिकालो, संसारापरित्ते दुविहे पं० तं०- अणादीए वा अपज्जवसिते अणादीए वा सपज्जवसिते, णोपरित्तेणोअपरित्त सातीए अपज्जवसिते, कायपरित्तए जह० अंतो० उक्को० वणस्सतिकालो, संसारपरित्तस्स णत्थि अंतरं, कायापरित्तस्स जह० अंतो० उक्को० असंखिज्जं कालं पुढवीकालो, संसारापरित्तस्स अणाइयस्स सपज्जवसियस्स नत्थि अंतरं, णोपरित्तनोअपरित्तस्सवि णत्थि अंतरं, अप्पाबहुगं- सव्वत्थोवा परिता णोपरित्तानोअपरित्ता अनंतगुणा अपरित्ता अनंतगुणा ॥२५२॥ अहवा तिविहा सव्वजीवा पं० तं०- पज्जत्तगा अपज्जत्तगा नोपज्जत्तगानोअपज्जत्तगा, पज्जत्तके णं भंते ! जह० अंतो० उक्को० सागरोवमसतपुहुत्तं साइरेगं, अपज्जत्तगे णं भंते !, जह० अंतो० उक्को० अंतो०, नोपज्जत्तणोअपज्जत्तए सातीए अपज्जवसिते, पज्जत्तगस्स अंतरं जह० अंतो० उक्को० अंतो०, अपज्जत्तगस्स जह० अंतो० उक्को० सागरोवमसयपुहुत्तं साइरेगं, तइयस्स णत्थि अंतरं, अप्पाबहुगं- सव्वत्थोवा नोपज्जत्तगानोअपज्जत्तगा अपज्जत्तगा अणंतगुणा पज्जत्तगा संखिज्जगुणा ॥२५३॥ अहवा तिविहा सव्वजीवा पं० तं०- सुहुमा बायरा नोसुहुमानोबायरा, सुहुमे णं भंते ! सुहुमेत्ति कालओ केवचिरं० ?, जह० अंतोमुहुत्तं उक्को० असंखिज्जं कालं पुढवीकालो, बायरा जह० अंतो० उक्को० असंखिज्जं कालं असंखिज्जाओ उस्सप्पिणीओसप्पिणीओ कालओ खेत्तओ अंगुलस्स असंखिज्जइभागो, नोसुहुमनोबायरए साइए अपज्जवसिए, सुहुमस्स अंतरं बायरकालो, बायरस्स अंतरं सुहुमकालो, तइयस्स नत्थि, अप्पाबहुगं- सव्वत्थोवा नोसुहुमानोबायरा बायरा अणंतगुणा सुहुमा असंखेज्जगुणा ॥२५४॥ अहवा तिविहा सव्वजीवा पं० तं०- सण्णी असण्णी नोसण्णीनोअसण्णी, सन्नी णं भंते ! सण्णीति कालओ०, जह० अंतो० उक्को० सागरोवमसतपुहुत्तं सातिरेगं, असण्णी जह० अंतो० उक्को० वणस्सतिकालो, नोसण्णीनोअसण्णी साइए अपज्जवसिते, सण्णिस्स अंतरं जह० अंतो० उक्को० वणस्सतिकालो, असण्णिस्स अंतरं० ?, जह० अंतो० उक्को० सागरोवमसयपुहुत्तं सातिरेगं, ततियस्स णत्थि अंतरं, अप्पाबहुगं- सव्वत्थोवा सण्णी नोसन्नीअसण्णी अणंतगुणा असण्णी अणंतगुणा ॥२५५॥ अहवा तिविहा सव्वजीवा पं० तं०- भवसिद्धिया अभवसिद्धिया नोभवसिद्धियानोअभवसिद्धिया, अणाइया सपज्जवसिया भवसिद्धिया, अणाइया अपज्जवसिया अभवसिद्धिया, साई अपज्जवसिया नोभवसिद्धियानोअभवसिद्धिया, तिण्हं पि नत्थि अंतरं, अप्पाबहुगं- सव्वत्थोवा अभवसिद्धिया नोभवसिद्धिया नोअभवसिद्धिया अनंतगुणा

॥२५६॥ अहवा तिविहा सव्व० तं०- तसा थावरा नोतसानोथावरा, तसस्स णं भंते ! कालओ० ?, जह० अंतो० उक्को० दो सागरोवमसहस्साइं साइरेगाइं, थावरस्स संचिट्ठणा वणस्सतिकालो, णोतसानोथावरा साती अपज्जवसिया, तसस्स अंतरं वणस्सतिकालो, थावरस्स तसकालो, णोतसणोथावरस्स णत्थि अंतरं, अप्पाबहुगं- सव्वत्थोवा तसा नोतसानोथावरा अणंतगुणा थावरा अणंतगुणा । से तं तिविधा सव्वजीवा **☆☆☆॥२५७॥ सव्वजीवप्र० २ ॥☆☆☆** तत्थ णं जे ते एवमाहंसु चउव्विहा सव्वजीवा पं० ते एवमाहंसु, तं० मणजोगी वइजोगी कायजोगी अजोगी, मणजोगी णं भंते !० जह० एक्कं समयं उक्को० अंतोमुह, एवं वइजोगीवि, कायजोगी जह० अंतो० उक्को० वणस्सतिकालो, अजोगी सातीए अपज्जवसिए मणजोगिस्स अंतरं जह० अंतो० उक्को० वणस्सइकालो, एवं वइजोगिस्सवि, कायजोगिस्स जह० एक्कं समयं उक्को० अंतो०, अयोगिस्स णत्थि अंतरं, अप्पाबहुगं- सव्वत्थोवा मणजोगी वइजोगी संखिज्जगुणा अजोगी अणंतगुणा कायजोगी अणंतगुणा ॥२५८॥ अहवा चउव्विहा सव्वजीवा पं० तं०- इत्थिवेयगा पुरिसवेयगा नपुंसगवेयगा अवेयगा, इत्थिवेयणा णं भंते ! इत्थिवेदएत्ति कालतो केवचिरं होति ?, गो० ! (एगेण आएसेण)पलियसयं, दसुत्तरं अट्टारस चोद्धस पलियपुहुत्तं समओ जहण्णो, पुरिसवेदस्स जह० अंतो उक्को० सागरोवमसयपुहुत्तं सातिरेगं, नपुंसगवेदस्स जह० एक्कं समयं उक्को० अणंतं कालं वणस्सतिकालो, अवेयए दुविहे पं० तं०- सातीए वा अपज्जवसिए सातिए सपज्जवसिए, साइअपज्जवसियस्स णत्थि अंतरं, तत्थ णं जे ते साइसपज्जसिए से जह० एक्कं सा० उक्को० अंतो०, इत्थी वेदस्स अन्तरं जह० अन्तो० उक्को० वणस्सतिकालो, पुरिसवेदस्स जह० एगं समयं उक्को० वणस्सइकालो, नपुंसगवेदस्स जह० अंतो० उक्को० सागरोवमसयपुहुत्तं सातिरेगं, अवेदगो जहाहेट्ठा, अप्पाबहुगं- सव्वत्थोवा पुरिसवेदगा इत्थिवेदगा संखे० अवेदगा अणंतगुणा नपुंसगवेयगा अणंतगुणा ॥२५९॥ अहवा चउव्विहा सव्वजीवा पं० तं० चक्खुदंसणी अचक्खुदंसणी अवधिदंसणी केवलदंसणी, चक्खुदंसणी णं भंते !० ?, जह० अंतो० उक्को० सागरोवमसहस्सं सातिरेगं, अचक्खुदंसणी दुविहे पं० तं०- अणातीए वा अपज्जवसिए अणाइए वा सपज्जवसिए, ओहिदंसणिस्स जह० इक्कं समयं उक्को० दो छावट्ठी सागरोवमाणं साइरेगाओ, केवलदंसणी साइए अपज्जवसिए, चक्खुदंसणिस्स अंतरं जह० अंतोमु० उक्को० वणस्सतिकालो, अचक्खुदंसणिस्स दुविहस्स नत्थि अंतरं, ओहिदंसणिस्स जह० अंतोमुह उक्को० वणस्सइकालो, केवलदंसणिस्स णत्थि अंतरं, अप्पाबहुगं- सव्वत्थोवा ओहिदंसणी चक्खुदंसणी असंखे० केवलदंसणी अणंतगुणा अचक्खुदंसणी अणंतगुणा ॥२६०॥ अहवा चउव्विहा सव्वजीवा पं० तं०- संजया असंजया संजयासंजया नोसंजयानोअसंजयानोसंजयासंजया, संजए णं भंते !० ? जह० एक्कं समयं उक्को० देसूणा पुव्वकोडी, असंजया जहा अण्णाणी, संजयासंजते जह० अंतोमु० उक्को० देसूणा पुव्वकोडी, नोसंजतनोअसंजयनोसंजयासंजए सातीए अपज्जवसिए संजयस्स संजयासंजयस्स दोण्हवि अंतरं जह० अंतोमु० उक्को० अवट्ठं पोग्गलपरियट्ठं देसूणं, असंजयस्स आदिदुवे णत्थि अंतरं, सातीयस्स सपज्जवसियस्स जह० एक्कं स० उक्को० देसूणा पुव्वकोडी, चउत्थगस्स णत्थि अंतरं, अप्पाबहुगं- सव्वत्थोवा संजयासंजया संजया संखे० णोसंजयणोअसंजयणोसंजयासंजया अणंतगुणा असंजया अणंतगुणा । सेत्तं चउव्विहा सव्वजीवा **☆☆☆॥२६१॥ सर्वजीवप्रतिपत्तिः ३ ॥☆☆☆** तत्थ णं जे ते एवमाहंसु पंचविधा सव्वजीवा पं० ते एवमाहंसु, तं० कोहकसायी माणकसायी मायाकसायी लोहकसायी अकसायी, कोहकसाइ माणकसाइ मायाकसाईणं जह० अंतो० उक्को० अंतोमु० लोभकसाइस्स जह० एक्कं स० उक्को० अंतो०, अकसाई दुविहे जहा हेट्ठा, कोहकसाइमाणकसाइमायाकसाईणं अंतरं जह० एक्कं स० उक्को० अंतो०, लोहकसाइस्स अंतरं जह० अंतो० उक्को० अंतो० अकसाइ तहा जहा हेट्ठा, अप्पाबहुगं- ‘अकसाई सव्वत्थोवा माणकसाई तहा अणंतगुणा । कोहे मायालोभे विसेसमहिया मुणेतव्वा ॥९३॥ २६२॥ अहवा पंचविहा सव्वजीवा पं० तं०- णेरइया तिरिक्खजोणिया मणुस्सा देवा सिद्धा, संचिट्ठणांतराणि जह हेट्ठा भणियाणि, अप्पाबहुगं- थोवा मणुस्सा णेरइया असंखे० देवा असंखे० सिद्धा अणंतगुणा तिरिया अणंतगुणा । सेत्तं पंचविहा सव्वजीवा **☆☆☆॥२६३॥ सर्वजीवप्रतिपत्तिः ४ ॥☆☆☆** तत्थ णं जे ते एवमाहंसुछव्विहा सव्वजीवा पं० ते एवमाहंसु,

तं०- आभिणिबोहियणाणी सुयणाणी ओहिनाणी मणपज्जवणाणी केवलनाणी अण्णाणी, आभिणिबोहियणाणी णं भंते ! आभिणिबोहियणाणित्ति कालओ केवचिरं होइ ?, गो० ! जह० अन्तोमुहुत्तं उक्को० छावट्ठिं सागरोवमाइं साइरेगाइं, एवं सुयणाणीवि ओहिणाणीवि, मणपज्जवणाणी णं भंते !० ?, जह० एकं समयं उक्को० देसूणा पुव्वकोडी, केवलनाणी णं भंते !० ?, सादीए अपज्जवसिए, अन्नाणिणो तिविहा पं० तं०- अणाइए वा अपज्जवसिए अणाइए वा सपज्जवसिए साइए वा सपज्जवसिए, तत्थ साइए सपज्जवसिए जह० अंतो० उक्को० अणंतं कालं अवट्ठं पुग्गलपरियट्ठं देसूणं, अंतरं- आभिणिबोहियणाणित्त्स जह० अंतो० उक्को० अणंतं कालं अवट्ठं पुग्गलपरियट्ठं देसूणं, एवं सुय० अंतरं ओहि० मणपज्जव०, केवलनाणिणो णत्थि अंतरं, अन्नाणि० साइसपज्जवसियस्स जह० अंतो० उक्को० छावट्ठिं सागरोवमाइं साइरेगाइं, अप्पाबहुगं- सव्वत्थोवा मण० ओहि० असंखे० आभि० सुय० विसेसा० सट्ठाणे दोवि तुल्ला केवलिणो अणंतगुणा अण्णाणी अणंतगुणा, अहवा छव्विहा सव्वजीवा पं० तं०- एगिंदिया बेंदिया तेंदियाचउरिंदिया पंचेंदिया अणिंदिया, संचिट्ठणांतरा जहा हेट्ठा, अप्पाबहुगं- सव्वत्थोवा पंचेंदिया चउरिंदिया विसेसा० तेइं विसे० बेइं विसे० अणिंदिया अणंतगुणा एगिंदिया अणंतगुणा । २६४। अहवा छव्विहा सव्वजीवा पं० तं०- ओरालियसरीरी वेउव्विय० आहार० तेयग० कम्म० असरीरी, ओरालियसरीरी णं भंते !० कालओ केवचिरं होइ ?, जह० खुट्ठागं भवग्गहणं दुसमऊणं उक्को० असंखिज्जं कालं जाव आंगुलस्स असंखेज्जतिभागं, वेउव्वियसरीरी जह० एकं समयं उक्को० तेत्तीसं सागरोवमाइं अंतोमुहुत्तमब्भहियाइं, आहारगसरीरी जह० उक्को० अंतो०, तेयगसरीरी दुविहे अणादीए वा अपज्जवसिए अणादीए वा सपज्जवसिते, एवं कम्मगसरीरीवि, असरीरी सातीए अपज्जवसिते, अंतरं ओरालियसरीरस्स जह० एकं समयं उक्को० तेत्तीसं सागरोवमाइं अंतोमुहुत्तमब्भहियाइं, वेउव्वियसरीरस्स जह० अंतो० उक्को० अणंतं कालं वणस्सतिकालो, आहारगसरीरस्स जह० अंतो० उक्को० अणंतं कालं जाव अवट्ठं पोग्गलपरियट्ठं देसूणं, तेय० कम्मसरीरस्स य दुण्हवि णत्थि अंतरं, अप्पाबहुगं- सव्वत्थोवा आहारगसरीरी वेउव्वियसरीरी असंखे० ओरालियसरीरी असंखे० असरीरी अणंतगुणा तेयाकम्मसरीरी दोवि तुल्ला अणंतगुणा । सेत्तं छव्विहा सव्वजीवा ★★☆। २६५॥ सर्वजीवप्रतिपत्तिः ५ ॥ ★★☆ तत्थ णं जे ते एवमाहंसु सत्तविधा सव्वजीवा पं० ते एवमाहंसु तं०- पुढवी० आउ० तेउ० वाउ० वणस्सति० तस० अकाइया, संचिट्ठणांतरा जहा हेट्ठा, अप्पाबहुगं- सव्वत्थोवा तसकाइया तेउ० असंखेज्जगुणा पुढवीकाइया विसे० आउ० विसे० वाउ० विसेसा० सिद्धाअणंतगुणा वणस्सइकाइया अणंतगुणा । २६६। अहवा सत्तविहा सव्वजीवा पं० तं०- कण्हलेस्सा नील० काउ० तेउ० पम्ह० सुक्क० अलेस्सा, कण्हलेसे णं भंते ! कण्हलेसेत्ति कालओ केवचिरं होइ ?, गो० ! ज० अंतो० उक्को० तेत्तीसं सागरोवमाइं अंतोमुहुत्तमब्भहियाइं, नीललेस्से णं ? , जह० अंतो० उक्को० दस सागरोवमाइं पलिओवमस्स असंखेज्जतिभागमब्भहियाइं, काउलेस्से णं भंते ! , जह० अंतो० उक्को० तिन्नि सागरोवमाइं पलिओवमस्स असंखेज्जतिभागमब्भहियाइं, तेउलेस्से णं भंते !०, जह० अंतो० उक्को० दोण्णि सागरोवमाइं पलिओवमस्स असंखेज्जिभागमब्भहियाइं, पम्हलेसे णं भंते !०, जह० अंतो० उक्को० दस सागरोवमाइं अंतोमुहुत्तमब्भहियाइं, सुक्कलेसे णं भंते !० ?, जह० अंतो० उक्को० तिन्नीसं सागरोवमाइं अंतोमुहुत्तमब्भहियाइं, अलेस्से णं भंते !०, सादीए अपज्जवसिते, कण्हलेसस्स णं भंते ! अंतरं कालओ केवचिरं होति ?, जह० अंतो० उक्को० तेत्तीसं सागरोवमाइं अंतोमुहुत्तम०, एवं नीललेसस्सवि काउलेसस्सवि, तेउलेसस्स णं भंते ! अंतरं का० ?, जह० अंतो० उक्को० वणस्सतिकालो, एवं पम्हलेसस्सवि सुक्कलेसस्सवि दोण्हवि एवमंतरं, अलेसस्स णं भंते ! अंतरं कालओ० ?, गो० ! सादीयस्स अपज्जवसियस्स णत्थि अंतरं, एतेसिं णं भंते ! जीवाणं कण्हलेसाणं नील० काउले० तेउ० पम्ह० सुक्क० अलेसाण य कयरे ?०, गो० ? सव्वत्थोवा सुक्कलेस्सा पम्ह० संखेज्जगुणा तेउ० असंखेज्जगुणा अलेस्सा अणंत० काउ० अणंतगुणा नील० विसे० कण्ह० विसे । सेत्तं सत्तविहा सव्वजीवा ★★☆। २६७॥ सर्वजीवप्रतिपत्तिः ६ ॥ ★★☆ तत्थ णं जे ते एवमाहंसु अट्ठविहा सव्वजीवा पं० ते णं एवमाहंसु, तं०- आभिणिबोहियणाणी सुय० ओहि० मण० केवल० मतिअन्नाणी सुयअण्णाणी विभंगअण्णाणी, आभिणिबोहियणाणी णं भंते !

आभिणिबोहियणाणीति कालओ केवचिरं होति ?, गो० ! जह० अंतो० उक्को० छावट्टिसागरोवमाइं सातिरेगाइं, एवं सुयणाणीवि, ओहिणाणी णं भंते !० ?, जह० एक्कं समयं उक्को० छावट्टिसागरोवमाइं, सातिरेगाइं मणपज्जवणाणी णं भंते !० ?, जह० एक्कं स० उक्को० देसूणा पुव्वकोडी, केवलणाणी णं भंते !० ?, सादीए अपज्जवसिते, मतिअण्णाणी णं भंते !० ?, मइअण्णाणी तिविहे पं० तं०-अणाइए वा अपज्जवसिए अणादीए वा सपज्जवसिए सातीए वा सपज्जवसिते, तत्थ णं जे सादीए सपज्जवसिते से जह० अंतो० उक्को० अणंतं कालं जाव अवड्ढं पोग्गलपरियट्ठं देसूणं, सुयअण्णाणी एवं चेव, विभंगअण्णाणी णं भंते ! विभंग० ?, जह० एक्कं समयं उ० तेत्तीसं सागरोवमाइं देसूणाए पुव्वकोडीए अब्भहियाइं, आभिणिबोहियणाणस्स णं भंते ! अंतरं कालओ० ?, जह० अंतो० उक्को० अणंतं कालं जाव अवड्ढं पोग्गलपरियट्ठं देसूणं, एवं सुयणाणस्सवि ओहिणाणस्सवि मणपज्जवणाणस्सवि, केवलणाणस्स णं भंते ! अंतरं० ?, सादीयस्स अपज्जवसियस्स णत्थि अंतरं, मइअण्णाणस्स णं भंते ! अंतरं० ?, अणादीयस्स अपज्जवसियस्स णत्थि अंतरं अणादीयस्स सपज्जवसियस्स णत्थि अंतरं, सादीयस्स सपज्जवसियस्स जह० अंतो० उक्को० छावट्टिं सागरोवमाइं सातिरेगाइं, एवं सुयअण्णाणस्सवि, विभंगणाणस्स णं भंते ! अंतरं० ?, जह० अंतो० उक्को० वणस्सतिकालो, एएसिं णं भंते ! आभिणिबोहियणाणीणं सुयणाणीणं ओहि० मण० केवल० मइअण्णाणीणं सुयअण्णाणीणं विभंगणाणीणं य कतरे० ?, गो० ! सव्वत्थोवा जीवा मणपज्जवणाणी ओहि० असंखे० आभिणिबोहियणाणी सुयणाणी एए दोवि तुल्ला विसेसाहिया, विभंगणाणी असंखिज्जगुणा, केवलणाणी अणंतगुणा, मइअण्णाणी सुयअण्णाणी य दोवि तुल्ला अणंतगुणा । २६८। अहवा अट्ठविहा सव्वजीवा पं० तं०-गेरइया तिरिक्खजोणिया तिरिक्खजोणिणीओ मणुस्सा मणुस्सीओ देवा देवीओ सिद्धा, गेरइए णं भंते ! नेरइयत्ति कालओ केवचिरं होति ?, गो० ! जह० दस वाससहस्साइं उ० तेत्तीसं सागरोवमाइं, तिरिक्खजोणिए णं भंते !० ?, जह० अंतोमु० उक्को० वणस्सतिकालो, तिरिक्खजोणिणी णं भंते !० ?, जह० अंतो० उक्को० तिन्नि पलिओवमाइं पुव्वकोडिपुहुत्तमब्भहियाइं, एवं मणूसे मणूसी, देवे जहा नेरइए, देवी णं भंते !० ?, जह० दस वाससहस्साइं उ० पणपन्नं पलिओवमाइं, सिद्धे णं भंते ! सिद्धेत्ति० ?, गो० ! सादीए अपज्जवसिए, गेरइयस्स णं भंते ! अंतरं कालओ केवचिरं होति ?, जह० अंतो० उक्को० वणस्सतिकालो, तिरिक्खजोणियस्स णं अंतरं कालओ० ?, जह० अंतो० उक्को० सागरोवमसतपुहुत्तं सातिरेगं, तिरिक्खजोणिणीणं भंते ! अंतरं कालओ केवचिरं होति ?, गो० ! जह० अंतोमुहुत्तं उक्को० वणस्सतिकालो, एवं मणुस्सस्सवि मणुस्सीएवि देवस्सवि देवीएवि, सिद्धस्स णं भंते ! अंतरं० ?, सादीयस्स अपज्जवसियस्स णत्थि अंतरं, एतेसिं णं भंते ! गेरइयाणं तिरिक्खजोणियाणं तिरिक्खजोणिणीणं मणूसाणं मणूसीणं देवाणं देवीणं सिद्धाणं य कयरे० ?, गो० ! सव्वत्थोवा मणुस्सीओ मणुस्सा असंखे० नेरइया असंखे० तिरिक्खजोणिणीओ असंखे० देवा असंखि० देवीओ संखे० सिद्धा अणंतगुणा तिरिक्खजोणिया अनंतगुणा । सेत्तं अट्ठविहा सव्वजीवा ★★२६९॥ सर्वजीवप्रतिपत्तिः ७ ॥★★ तत्थ णं जे ते एवमाहंसु णवविधा सव्वजीवा पं० ते एवमाहंसु तं०-एगिंदिया बेंदिया तेंदिया चउरिंदिया गेरइया पंचेंदियतिरिक्खजोणिया मणूसा देवा सिद्धा, एगिंदिए णं भंते ! एगिंदियत्ति कालओ केवचिरं होइ ?, गो० ! जह० अंतोमु० उक्को० वणस्स०, बेंदिए णं भंते !०, जह० अंतो० उक्को० असंखेज्जं कालं, एवं तेइंदिएवि, चउ०, गेरइया णं भंते !०, जह० दस वाससहस्साइं उक्को० तेत्तीसं सागरोवमाइं, पंचेंदियतिरिक्खजोणिए णं भंते !०, जह० अंतो० उक्को० तिण्णि पलिओवमाइं पुव्वकोडिपुहुत्तमब्भहियाइं, एवं मणूसेवि, देवा जहा गेरइया, सिद्धे णं भंते !० ?, सादीए अपज्जवसिए, एगिंदियस्स णं भंते ! अंतरं कालओ केवचिरं होति ?, गो० ! जह० अंतो० उक्को० दो सागरोवमसहस्साइं संखेज्जवासमब्भहियाइं, बेंदियस्स णं भंते ! अंतरं कालओ केवचिरं होति ?, गो० ! जह० अंतो० उक्को० वणस्सतिकालो, एवं तेंदियस्सवि चउरिंदियस्सवि गेरइयस्सवि पंचेंदियतिरिक्खजोणियस्सवि मणूस्सवि देवस्सवि सव्वेसिमेवं अंतरं भाणियव्वं, सिद्धस्स णं भंते ! अंतरं कालओ० ?, सादीयस्स अपज्जवसियस्स णत्थि अंतरं, एतेसिं णं भंते ! एगिंदियाणं बेइंदि० तेइंदि० चउरिंदियाणं गेरइयाणं पंचेंदियतिरिक्खजोणियाणं मणूसाणं देवाणं सिद्धाणं य कयरे० ?, गो० ! सव्वत्थोवा मणुस्सा गेरइया असंखेज्जगुणा देवा असंखेज्जगुणा पंचेंदियतिरिक्खजोणिया असंखेज्जगुणा चउरिंदिया विसेसाहिया तेइंदिया विसे० बेंदिया

विसे० सिद्धा अणंतगुणा एणिंदिया अणंतगुणा । २७०। अहवा णवविधा सव्वजीवा पं० तं०-पढमसमयनेरइया अपढम० पढमसमयतिरिक्खजोणिया अपढम० पढमसमयमणूसा अपढम० पढमसमयदेवा अपढम० सिद्धा य, पढमसमयणेरइया णं भंते !० ?, गो० ! एक्कं समयं, अपढमसमयणेरइए णं भंते !० ?, जह० दस वाससहस्साइं समऊणाइं उक्को० तेत्तीसं सागरोवमाइं समऊणाइं, पढमसमयतिरिक्खजोणिए णं भंते !० ?, एक्कं समयं, अपढमसमयतिरिक्खजोणिए णं भंते !० ?, जह० खुड्डागं भवग्गहणं समऊणं उक्को० वणस्सतिकालो, पढमसमयमणुस्से णं भंते !० ?, एक्कं समयं, अपढमसमयमणुस्से णं भंते !० ?, जह० खुड्डागं भवग्गहणं समऊणं उक्को० तिन्नि पलिओवमाइं पुव्वकोडिपुहुत्तमब्भहियाइं, देवे जहा णेरइए. सिद्धे णं भंते ! सिद्धेत्ति कालओ केवचिरं होति ?, गो० ! सादीए अपज्जवसिते, पढमसमयणेरइयस्स णं भंते ! अंतरं कालओ० ?, गो० ! जह० दस वाससहस्साइं अंतोमुहुत्तमब्भहियाइं उक्को० वणस्सतिकालो, अपढमसमयणेरइयस्स णं भंते ! अंतरं०, जह० अंतो० उक्को० वणस्सतिकालो, पढमसमयतिरिक्खजोणियस्स णं (१६८) भंते ! अंतरं कालतो० ?, जह० दो खुड्डागाइं भवग्गहणाइं समऊणाइं उक्को० वण०, अपढमसमयतिरिक्खजोणियस्स णं भंते ! अंतरं कालतो० ?, जह० खुड्डागं भवग्गहणं समयाहियं उक्को० सागरोवमसयपुहुत्तं सातिरेगं, पढमसमयमणूसस्स जहा पढमसमयतिरिक्खजोणियस्स, अपढमसमयमणूसस्स णं भंते ! अंतरं कालओ० ?, जह० खुड्डागं भवग्गहणं समयाहियं उक्को० वण०, पढमसमयदेवस्स जहा पढमसमयणेरतियस्स, अपढमसमयदेवस्स जहा अपढमसमयणेरइयस्स, सिद्धस्स णं भंते !० ?, सादीयस्स अपज्जवसियस्स णत्थि अंतरं, एएसिं णं भंते ! पढमसमयनेरइयाणं पढमस० तिरिक्खजोणियाणं पढमसमयमणूसाणं पढमस० देवाण य कयरे० ?, गो० सव्वत्थोवा पढमसमयमणूसा पढमसमयणेरइया असंखिज्जगुणा पढमसमयदेवा असं० पढमस० तिरिक्खजो० असं०, एएसिं णं भंते ! अपढम० नेरइयाणं अपढमसमयतिरिक्खजोणि० अपढमसमयमणूसाणं अपढमसमयदेवाण य कयरे० ?, गो० ! सव्वत्थोवा अपढमसमयमणूसा अपढमसमयनेरइ० असं० अपढमसमयदेवा असं० अपढमसमयतिरि० अणंतगुणा, एतेसिं णं भंते ! पढमसमयनेरइयाणं अपढमसमयणेरइयाण य कयरे० ?, गो० ! सव्वत्थोवा पढमसमयणेरइया अपढमसमयणेरइया असंखे०, एतेसिं णं भंते ! पढमसमयतिरिक्खजोणियाणं अपढमसमयतिरिक्खजोणि० कतरे० ?, गो० ! सव्व० पढमसमयतिरि० अपढमसमयतिरिक्खजोणिया अणंत०, मणुय० देव०, अप्पाबहुयं नेरइयाइयाणं, एतेसिं णं भंते ! पढमस० णेरइ० पढमस० तिरिक्खाणं पढमस० मणूसाणं पढमसमयदेवाणं अपढमसमयनेरइ० अपढमसमयतिरिक्ख० अपढमसमयमणू० अपढमसमयदेवाणं सिद्धाण य कयरे० ?, गो० ! सव्वत्थोवा पढमस० मणूसा अपढमसमयमणु० असं० पढमसमयनेरइ० असं० पढमसमयदेवा असं० पढमसमयतिरिक्खजो० असं० अपढमसमयनेर० असं० अपढमस० देवा असंखे० सिद्धा अणं० अपढमस० तिरि० अणंतगुणा । सेत्तं नवविहा सव्वजीवा ☆☆☆॥२७१॥ सर्वजीवप्रतिपत्तिः ८ ॥☆☆☆ तत्थ णं जे ते एवमाहंसु दसविधा सव्वजीवा पं० ते णं एवमाहंसु, तं०-पुढवीकाइया आउ० तेउ० वाउ० वणस्सतिकाइया बिंदिया तिंदिया चउरिं० पंचे० अणिंदिया, पुढवीकाइए णं भंते ! पुढवीकाइएत्ति कालओ केवचिरं होति ?, गो० ! जह० अंतो० उक्को० असंखेज्जं कालं असंखेज्जाओ उस्सप्पिणीओसप्पिणीओ कालओ खेत्तओ असंखेज्जा लोया, एवं आउतेउवाउकाइया, वणस्सतिकाइए णं भंते ! गो० ! जह० अंतो० उक्को० वणस्सतिकालो, बेदिए णं भंते !० ?, जह० अंतो० उक्को० संखेज्जं कालं, एवं तेइंदिएवि चउरिंदिएवि, पंचिंदिए णं भंते ! गो० ! जह० अंतो० उक्को० सागरोवमसहस्सं सातिरेगं, अणिंदिए णं भंते !० ?, सादीए अपज्जवसिए, पुढवीकाइयस्स णं भंते ! अंतरं कालओ केवचिरं होति ?, गो० ! जह० अंतो० उक्को० वणस्सतिकालो, एवं आउकाइयस्स तेउ० वाउ०, वणस्सइकाइयस्स णं भंते ! अंतरं कालओ० ?, जा चेव पुढवीकाइयस्स संचिट्टणा, बियतियचउरिंदियपंचेदियाणं एतेसिं चउण्हं पि अंतरं जह० अंतो० उक्को० वणस्सइकालो, अणिंदियस्स णं भंते ! अंतरं कालओ केवचिरं होति ?, गो० ! सादीयस्स अपज्जवसियस्स णत्थि अंतरं, एतेसिं णं भंते ! पुढवीकाइयाणं आउ० तेउ० वाउ० वण० बेदियाणं तेइंदियाणं चउरिं० पंचेदियाणं अणिंदियाणं य कतरे० ?, गो० ! सव्वत्थोवा पंचेदिया चतुरिंदिया विसेसाहिया तेइंदि० विसे० बेदि० विसे० तेउकाइया असंखिज्जगुणा पुढवीकाइया

वि० आउ० वि० वाउ० वि० अणिंदिया अणंतगुणा वणस्सतिकाइया अणंतगुणा । २७२। अहवा दसविहा सव्वजीवा पं० तं०-पढमसमयणेइया अपढम० पढमसमयतिरिक्खजोणिया अपढम० पढमसमयमणूसा अपढम० पढमसमयदेवा अपढम० पढमसमयसिद्धा अपढम०, पढमसमयनेइया णं भंते ! पढमसमयणेइएत्ति कालओ केवचिरं होति ?, गो० ! एक्कं समयं, अपढमसमयनेइए णं भंते ! ० ?, जह० दस वाससहस्साइं समऊणाइं उक्को० तेत्तीसं सागरोवमाइं समऊणाइं, पढमसमयतिरिक्खजोणिया णं भंते ! ० ?, गो० ! एक्कं समयं, अपढमसमयतिरिक्ख० ?, जह० खुड्ढागं भवग्गहणं समऊणं उक्को० वणस्सइकालो, पढमसमयमणूसे णं भंते ! ० ?, एक्कं समयं, अपढमसमयमणूसे णं भंते ! ० ?, जह० खुड्ढागं भवग्गहणं समऊणं उक्को० तिण्णि पलिओवमाइं पुव्वकोडीपुहुत्तमब्भहियाइं. देवे जहा णेरइए, पढमसमयसिद्धे णं भंते ! ० ?, एक्कं समयं, अपढमसमयसिद्धे णं भंते ! ० ?, सादीए अपज्जवसिए, पढमसमयणेइयस्स णं भंते ! अंतरं कालओ० ?, ज० दस वाससहस्साइं अंतोमुहुत्तमब्भहियाइं उक्को० वणस्सतिकालो, अपढमसमयणे० अंतरं कालओ केव० ?, जह० अंतो० उ० वण०, पढमसमयतिरिक्खजोणियस्स अंतरं केवचिरं होइ ?, गो० ! जह० दो खुड्ढागभवग्गहणाइं समऊणाइं उक्को० वण०, अपढमसमयतिरिक्खजोणियस्स णं भंते ! ० ?, जह० खुड्ढागभवग्गहणं समयाहियं उक्को० सागरोवमसयपुहुत्तं सातिरेगं. पढमसमयमणूसस्स णं भंते ! अंतरं कालओ० ?, जह० दो खुड्ढागभवग्गहणाइं समऊणाइं उक्को० वण० अपढमसमयमणूसस्स णं भंते ! अंतरं० ?, जह० खुड्ढागं भव० समयाहियं उक्को० वणस्सइ०, देवस्स णं० अंतरं जहा णेरइयस्स, पढमसमयसिद्धस्स णं भंते ! अंतरं० ?, णत्थि, अपढमसमयसिद्धस्स णं भंते ! अंतरं० ?, गो० ! सादीयस्स अपज्जवसियस्स णत्थि अंतरं एतेसिं णं भंते ! पढमस० णेरइयाणं पढमस० तिरिक्खजोणियाणं पढमसमयमणूसाणं पढमसमयदेवाणं पढमसमयसिद्धाण य कतरे० ?, गो० ! सव्वत्थोवा पढमसमयसिद्धा पढमसमयमणूसा असंखे० पढमस० णेरइया असंखेज्जगुणा पढमस० देवा असं० पढमसमयतिरि० असं०, एतेसिं णं भंते ! अपढमसमयनेइयाणं जाव अपढमसमयसिद्धाण य कयरे० ?, गो० ! सव्वत्थोवा अपढमस० मणूसा अपढमस० नेइया असंखि० अपढमस० देवा असंखि अपढमस० सिद्धा अणंतगुणा अपढमस० तिरि० अणंतगुणा. एतेसिं णं भंते ! पढमस० णेरइयाणं अपढमस० णेरइयाण य कतरे० ?, गो० ! सव्वत्थोवा पढमस० णेरइया अपढमस० नेइया असंखे०, एतेसिं णं भंते ! पढम० तिरिक्खजोणियाणं अपढमस० तिरिक्खजोणियाण य कतरे० ?, गो० ! सव्वत्थोवा पढमसमयतिरिक्खजो० अपढमस० तिरिक्खजोणिया अणंतगुणा, एतेसिं णं भंते ! पढमस० मणूसाणं अपढमसमयमणूसाण य कतरे० ?, गो० ! सव्वत्थोवा पढमसमयमणूसा अपढमस० असंखे०, जहा मणूसा तहा देवावि, एतेसिं णं भंते ! पढमसमयसिद्धाण अपढमसम० य कयरे० ?, गो० ! सव्वत्थोवा पढमसमयसिद्धा अपढमसमयसिद्धा अणंतगुणा, एतेसिं णं भंते ! पढमसमयणेइयाणं अपढमसमयणेइयाणं पढमस० तिरिक्खजोणियाणं अपढमस० तिरि० जो० प० समयमणू० अपढमस० मणू० पढ० स० देवाणं अप० समयदेवाणं पढमस० सिद्धाणं अपढमसमयसिद्धाण य कतरे० ?, गो० ! सव्वत्थोवा पढमस० सिद्धा पढमस० मणूसा असं० अप० समयमणूसा असंखि० पढमसमयणेइया अस० पढमस० देवा असं० पढमस० तिरि० असं० अपढमस० णेर० असंखे० अपढमस० देवा असं० अपढमस० सिद्धा अणंत० अपढमस० तिरि० अणंतगुणा । सेत्तं दसविहा सव्वजीवा । सेत्तं सव्वजीवाभिगमे । २७३॥ सर्वजीवप्रतिपत्तिः ५५५९॥ श्रीजीवाजीवाभिगमोपागं ३॥ ५५५